


清代傳記叢刊・綜錄類②
周駿富輯

清史列傳

(一)

卷一至
卷八

清國史館原編



明文書局印行

清史列傳目錄

宗室王公傳一 卷一

代善 阿濟格

宗室王公傳二 卷二

多爾袞 多鐸 豪格 碩塞 濟爾哈朗 尼堪

薩哈璘 博洛 雅爾哈齊 阿巴泰

宗室王公傳三 卷三

岳託 瓦克達 勒克德渾 阿敏 穆爾哈齊

巴雅喇 褚英 芬古 杜度 察尼 喀爾楚渾

巴思哈 務達海 博和託 固爾瑪渾 洛託 傅喇塔

穆爾帖 薩弼 蘇布圖 溫齊 阿拜 巴布泰 漢岱 恭阿

屯齊 塔拜 賴慕布 瑪瞻 巴穆布爾善 巴爾堪

扎喀納 莽古爾泰 德格類 拜音圖 碩託 延信

大臣畫一傳檔正編一卷四

費英東 額亦都 扈爾漢 佟養正子佟圖賴 西喇布子瑪喇希

覺羅拜山子顧納岱 孫莫洛渾 武理堪子武拜 偉齊子穆里瑪

額爾德尼 達海 希福 康果禮 佟養性孫國瑤

阿什達爾漢 達爾漢 伊勒慎 圖賚 阿山 葉臣

恩格圖 哈寧阿 準塔 和託 焦安民 佟養甲 羅繡錦弟繪錦

譚泰 祁充格 剛林 何洛會 冷僧機 敦拜 沈文奎

張大猷 李思忠子塞白理 柯永盛弟永昇 陳泰 阿爾津

李國翰 濟什哈 朱瑪喇 愛星阿子富善 卓羅

大臣畫一傳檔正編一卷五

范文程 額色赫 寧完我 覺羅巴哈納 車克 明安達禮

藍拜 寧古哩 噶達渾 伊拜弟庫爾圖 金礪 劉之源

伊爾德 根特 耶廷佐 蔣國柱 喀喀穆 梁化鳳 達素

趙廷臣 李率泰 馬國柱 林起龍 耿繼茂 尙之孝 金光祖

石廷柱 蔣赫德 傅以漸 呂宮 魏裔介 孫廷銓 黃機

蘇拜子和託 鄂羅塞臣 哈什屯 褚庫

大臣畫一傳檔正編三 卷六

郎球 斐雅思哈 巴山子舒恕 星訥 蘇克薩哈

蘇納海 朱昌祚 王登聯 鼈拜 巴哈 瑪爾賽 索尼

遏必隆 楊雍建 米思翰子李榮保 巴泰 佟國印 杜篤祐

對喀納 傅達禮 朱國治 甘文焜子國城 和善等 范承謨

馬雄鎮 高天爵吳萬福等 希爾根子喀西泰 根特 瓦爾喀

圖喇 莽依圖 畢力克圖 額楚 莫洛 陳福

傅宏烈 圖海 李之芳

大臣畫一傳檔正編四 卷七

董衛國 瑚圖 蔡毓榮 鄂善 周有德 覺羅舒恕

穆成額 桑格 塔勒岱 賴塔 趙良棟 王進寶子用予

佛尼勒 希福 穆占 勒貝 哲爾肯 郝浴 覺羅伊圖

李壽 宋德宜子駿業 杜立德 馮溥 姚文然 上官鉉

錫卜臣 張長庚 卜三元子永舉 熊賜履

大臣畫一傳檔正編五 卷八

王熙 魏象樞 湯斌 陸隴其 索額圖 明珠 佛倫

余國柱 于成龍 王鷲 朱之錫 靳輔 徐旭齡 于成龍

姚啟聖子儀

大臣畫一傳檔正編六 卷九

吳興祚 馬如龍 傅拉塔 楊素蘊 黃梧子芳度 姪芳世 芳泰

施琅 萬正色 拉哈達 楊捷 徐治都 瓦岱 葉映榴

伊桑阿 阿蘭泰 張英 吳璵 吳正治 陳廷敬 李天馥

徐元文 王揆 葉方藹 勵杜訥 韓茨 王士禎 宋犖

湯右曾

大臣畫一傳檔正編七 卷十

麻勒吉 郎廷相 趙祥星 陶岱 錢鈺 徐乾學弟秉義

高士奇 王鴻緒 王頊齡 弟九齡 高爾位 張玉書 李光地

薩布素 郎坦 佟國綱 薩穆哈 郭琇 彭鵬

大臣畫一傳檔正編八 卷十一

費揚古 孫思克 珠滿 碩岱 馬際伯 弟見伯 覲伯 赫壽

佟國維 溫達 張鵬翮 蔣廷錫 顧八代 徐潮 郭世隆

貝和諾 子馬喇 博齋 范承勳 陳瓊 施世綸 藍理

王新命

大臣畫一傳檔正編九 卷十二

舒蘭 祖良璧 李麟 趙申喬 陳詵 張伯行 趙宏燦 弟宏燮

子之桓 范時崇 年遐齡 子希堯 黃秉中 鄂海 許汝霖

慕天顏 阿山 噶禮 阿靈阿 子阿爾松阿 揆敘 鄂倫岱

覺羅滿保 施世驃 藍廷珍 富寧安 田從典 遜柱

高其位 子起 蕭永藻 沈近思

大臣畫一傳檔正編十 卷十三

勵廷儀 子宗萬 張廷樞 隆科多 年羹堯 蔡珽 李維鈞

陳鵬年 齊蘇勒 楊宗仁 王國棟 法海 田文鏡 李衛

楊文乾 嵩祝 拉錫 福敏

大臣畫一傳檔正編十一 卷十四

朱軾 蔡世遠 馬齊 徐元夢 陳元龍 白潢 鄂爾泰 弟鄂爾奇

張廷玉 弟廷璐 廷瑑 子若霽 楊名時 黃叔琳 子登賢 高其倬

趙國麟

大臣畫一傳檔正編十二 卷十五

李紱 孫友棠 孫嘉淦 魏廷珍 甘國璧 圖理琛 莽鵠立

范時繹 憲德 碩色 傅鼎 石雲倬 冶大雄 來保

史貽直

大臣畫一傳檔正編十三 卷十六

陳世倌 阿克敦 劉於義 徐木 弟杞 子以烜 邁柱 黃廷桂

張允隨 查郎阿 嵇曾筠 高斌 子恆 孫樸 顧琮 牛鈕 海望

大臣畫一傳檔正編十四 卷十七

杭奕祿 盛安 梅穀成 傅爾丹 岳鍾琪子濬 元展成

張廣泗 譚行義 汪滌 楊超曾 喀爾吉善子定長 方觀承

吳達善 陳惠華 王安國

大臣畫一傳檔正編十五 卷十八

尹會一子嘉銓 楊錫紱 王士俊 仲永檀 哈元生子尙德

馬爾泰 魏定國 尹繼善 陳大受子輝祖 陳宏謀 劉統勳

大臣畫一傳檔正編十六 卷十九

傅清子明仁 拉布敦 班第 熊學鵬 鄂容安 納穆扎勒

三泰 方苞 錢陳羣子汝誠 任蘭枝 張照 沈德潛

汪由敦 彭啟豐

大臣畫一傳檔正編十七 卷二十

鄒一桂 董邦達 金德瑛 秦蕙田 曹秀先 喬光烈 傅恆子福靈安

兆惠 阿里衮 舒赫德 梁詩正子敦書 蔣溥 官保 劉綸

大臣畫一傳檔正編十八 卷二十一

于敏中 程景伊 梁國治 嵇璜 伍彌泰 楊廷璋 永貴 三寶

莊有恭 達勒黨阿 哈達哈子哈寧阿 愛隆阿弟巴靈阿

大臣畫一傳檔正編十九 卷二十二

額勒登額 巴圖濟爾噶勒 和起子和隆武 高天喜子仁人傑

馮鈐 張若震 訥親 楊應琚 明瑞 珠魯訥 德福

覺羅雅爾哈善 覺羅納世通 唐綏祖 阿思哈

大臣畫一傳檔正編二十 卷二十三

明德 胡寶琮 高晉 李侍堯 周學健 鄂昌 吳士功

劉藻 彰寶 裘日修 錢維城

大臣畫一傳檔正編二十一 卷二十四

任舉子承恩 温福 董天弼 哈國興 莊存與 張泰開

德保 周煌 寶光鼎 常青 袁守侗 陸燿 鄂寧

宗室莽古賚 海祿

大臣畫一傳檔正編二十一卷二十五

黃仕簡子秉淳 藍元枚 福隆安 桂林 謝墉 錢載

阿肅 陸錫熊 海蘭察 普爾普 富勒渾花尙阿 勒爾謹

柴火紀 尹德禧 剛塔

大臣傳次編一卷二十六

阿桂 福康安 蔡新 劉墉姪鏡之 王杰 彭元瑞

孫士毅 索琳 劉星煒 王昶 陸費墀

大臣傳次編二卷二十七

尹壯圖 舒常 宗室興肇 劉秉恬 烏什哈達 鄂輝

舒亮 穆克登阿 孫全謀 彭承堯 玉德 梁肯堂 徐績

閔鶚元 陳淮 姚棻 慶桂 書麟 福崧

大臣傳次編三卷二十八

董誥 朱珪 紀昀 劉權之 費淳 戴衢亨 成德

傅森 瑚圖禮 沈初 熊枚 吳省欽弟省蘭 趙佑

汪承沛 周廷棟 錢樾 萬承風 劉鳳誥 錢棨

大臣傳次編四 卷二十九

勒保 明亮 和琳 姜晟 花連布 仙鶴林 額勒登保

德楞泰 子蘇沖阿

大臣傳次編五 卷三十

惠齡 宜縣 子瑚素通阿 畢沅 秦承恩 景安 吳熊光

宗室恆瑞 呢瑪善 賽沖阿

大臣傳次編六 卷三十一

馬瑜 薛大烈 桂涵 李長庚 許松年 邱良功 張見陞

胡振聲 岳起 清安泰 恩長 顏檢 裘行簡 張誠基

陸有仁 荆道乾 謝啟昆 蔣兆奎 興奎 三音布 扎勒杭阿等

大臣傳次編七 卷三十二

松筠 托津 鄒炳泰 曹振鏞 百齡 章煦 鐵保

金光悌 秦瀛 鮑桂星 費錫章

大臣傳次編八 卷三十三

那彥成 温承惠 高祀 劉清 方維甸 方受疇 趙慎畛

胡克家 朱勳 曾燠 康紹鏞 陳鳳翔

大臣傳次編九 卷三十四

伯麟 富俊 孫玉庭 蔣攸銛 汪廷珍 初彭齡 姚文田

王引之 陳用光 玉麟

大臣傳次編十 卷三十五

和珅 恆敬 穆克登布 葉世倬 吳璈 曹師曾

楊懋恬 徐烝 程含章 戴三錫 阿霖 莫晉 慶祥

福綿 吳光悅 武隆阿 舒爾哈善 塔斯哈 盧坤

張井 魏元煜 陳中孚 楊懌曾 邱樹棠 孫爾準

大臣傳續編一 卷三十六

長齡 子桂輪 文孚 盧蔭溥 阮元 王鼎 戴均元

伊里布 李鴻賓 陳官俊

大臣傳續編二 卷三十七

黃鉞 王宗誠 何凌漢 朱士彥 鄂山 覺羅海齡 英瑞

王璋慶 楊遇春 陶澍 程祖洛 祁墳 裕謙

大臣傳續編三 卷三十八

賀長齡 林則徐 鄧廷楨 栗毓美 鍾祥 陳鑾 吳其濬

梁章鉅 張日昃 吳榮光 韓克均 烏爾恭額 巴哈布

特依順 邢彥寶 凱音布 舒通阿 海齡 袁登舜 張喜

大臣傳續編四 卷三十九

成順 常德 烏珍泰 霍隆武 賡音岱 圖明額 楊芳

胡超 段永福 齊慎 羅思舉 張必祿 李國棟 劉允孝

王得祿 關天培 陳化成 祝廷彪 余步雲 唐際盛 葛雲飛

鄭國鴻 王錫朋 張士秀

大臣傳續編五 卷四十

潘世恩 卓秉恬 子樓 文慶 裕誠 琦善 訥爾經額

穆彰阿 宗室耆英 柏葭 葉名琛

大臣傳續編六 卷四十一

杜受田 湯金釗 宗室敬徵 宗室奕經 宗室禧恩弟裕恩

何汝霖 花沙納 徐澤醇 宗室恩華 黃爵滋 袁希祖

呂賢基 戴熙

大臣傳續編七 卷四十二

姚元之 文蔚 吳文鎔 王懿德 李星沅 羅繞典 陸建瀛

恆春 季芝昌 舒興阿 程裔采 弟琳采 周天爵 胡林翼

羅澤南

大臣傳續編八 卷四十三

江忠源 李續賓 鄒鳴鶴 吉爾杭阿 蔣文慶 李孟羣

王有齡 羅遵殿 徐有壬 常大淳 陶恩培 柏貴 陸應穀

陸費瑒 鄭祖琛 崇綸 青麐 楊文定 宗室祥厚 和春

善祿 扎拉芬

大臣傳續編九 卷四十四

瑞昌 宗室綿洵 托雲保 佟鑑 達洪阿 霍隆武

烏蘭泰 克興額 穆騰額 烏爾棍泰 向榮 張國樑

鄧紹良 塔齊布 雙福 尤渤 陳金綬 樂善 鞠殿華

博勒恭武 常祿 都隆阿 恆安 文俊 褚克昌

鄧爾恆

大臣畫一傳檔後編一 卷四十五

僧格林沁 曾國藩 駱秉章 桂良 官文 翁心存

彭蘊章

大臣畫一傳檔後編二 卷四十六

祁篤藻 周祖培 倭仁 瑞常 朱鳳標 賈楨 瑞麟 麟魁

張祥河 王慶雲

大臣畫一傳檔後編三 卷四十七

沈兆霖 李棠階 趙光 許乃普 曹毓瑛 譚廷襄 羅惇衍

宗室肅順 陳孚恩 穆蔭 恆祺 基溥 明善

勝保

大臣畫一傳檔後編四 卷四十八

黃宗漢 杜翰 顏伯燾 徐廣縉 牛鑑 恆福 潘鐸

易棠 慧成 熙麟 劉韻珂 劉源灝 毛鴻賓 勞崇光

吳振械 怡良

大臣畫一傳檔後編五 卷四十九

馬新貽 曾望顏 張亮基 何桂清 李續宜 張芾 趙景賢

周之琦 徐之銘 徐宗幹 翁同書 馮德馨 劉蓉

大臣畫一傳檔後編六 卷五十

蔣益澧 袁甲三 姪保慶 多隆阿 托明阿 覺羅耆齡 明緒

宗室常清 明誼 裕瑞 平瑞 舒保 宗室奕紀

全順 關保 錫霖 德興阿 瑞昌 周天受 周天培

鮑起豹 王浚

大臣畫一傳檔後編七 卷五十一

饒廷選 劉松山 江忠義 林文察 高連升 黃開榜 鄭魁士

陳大富 熊天喜 楊昌泗 程學啟 張樹珊 李臣典 唐殿魁

石清吉 余際昌 譚國泰 左宗棠 文祥

大臣畫一傳檔後編八 卷五十二

賽尙阿 英桂 單懋謙 沈桂芬 全慶 宗室載齡

宗室靈桂 文煜 寶璽 崇綸 魁齡 崇實

毛昶熙

大臣畫一傳檔後編九 卷五十三

景廉 錫珍 宗室奎潤 袁保恆 雷以誠 薛煥

黃鈺 張家驥 胡家玉 吳棠 沈葆楨

大臣畫一傳檔後編十 卷五十四

布彥泰 覺羅樂斌 李宗羲 張樹聲 丁寶楨 劉長佑

何璟 楊岳斌 嚴樹聲 翁同爵

大臣畫一傳檔後編十一 卷五十五

福濟 晏端書 劉典 黎培敬 丁日昌 郭柏蔭 林肇元

潘鼎新 張曜 都興阿 魁玉 金順

大臣畫一傳檔後編十二 卷五十六

穆圖善 英翰 托雲 阜保 宗室奕山 子載鷺 長麟

吳長慶 周盛波 周盛傳 鮑超 江長貴 傅振邦 劉厚基

陳國瑞 鄭國魁 楊玉科

新辦大臣傳一 卷五十七

李鴻章 閻敬銘 張之萬 恩承 宗室福錕 宗室麟書

額勒和布 榮祿 裕德 宗室崑岡 李鴻藻

畢道遠

新辦大臣傳二 卷五十八

潘祖蔭 彭玉麟 許庚身 景廉 崇綺 懷塔布 續昌

宗室綿宜 曾紀澤 孫詒經 周德潤 洪鈞 李文田

薛福成

新辦大臣傳三 卷五十九

崧蕃 劉嶽昭 岑毓英 卞寶第 曾國荃 李瀚章 劉坤一

楊重雅 徐延旭 倪文蔚 劉錦棠 張煦 馬丕瑤 許振禕

劉銘傳 色楞額 依克唐阿

新辦大臣傳四 卷六十

延茂 英廉 沙克都林扎布 升泰 文海 郭松林

蕭孚泗 吳全美 譚上連 陶茂林 方耀 孫開華 黃翼升

李朝斌 周達武 羅孝連 雷正綰 唐友耕 譚拔萃 張得勝

趙鴻舉 左寶貴 劉明鏡 劉步蟾 郭寶昌 鄧安邦 徐占彪

徐邦道

新辦大臣傳五 卷六十一

王德榜 劉連捷 劉倬雲 宗室敬信 崇禮 錢應溥

徐會灃 廖壽恆 立山 聯元 薛允升 張百熙 壽山

陸寶忠 楊昌濬 劉秉璋 陶模 饒應祺 譚鍾麟 聶士成
黃萬鵬 閃殿魁

已纂未進大臣傳一 卷六十二

蔣凝學 裕祿 毓賢 恩銘 啟秀 剛毅 馬如龍

歐陽利見 康國器 席寶田 宋慶 徐川儀 邊寶泉

余聯沅 孫毓汶 馮子材 吳育仁 羅榮光 許景澄 李興銳

余虎恩 楊岐珍 鄭崇義

已纂未進大臣傳二 卷六十三

游智開 郝長慶 楊儒 夏辛酉 馬玉崑 邵友濂 王孝祺

徐桐 任道鎔 譚碧理 徐壽朋 徐承煜 劉永慶 趙舒翹

葉祖珪 李鶴年 牛允誠 蕭慶衍 袁昶 蘇元春 劉恩溥

鄧承修 翁同龢

已纂未進大臣傳三 卷六十四

張仁黼 王文韶 曹鴻勳 馬維騏 景星 廷杰 豐陞阿

孫家鼎 陳啟泰 張之洞 葛寶華 戴鴻慈 陸元鼎 陳璋

忠義傳 卷六十五

勞漢 尹布等 護穆薩 覺羅蘭泰等 董廷元 弟廷儒 廷柏 瑚密色 色赫等

李芝桂 張泰瑞等 王德教 王維新等 鄺引昌 袁夢吉等 佟國仕 張國纓等

武韜 王廷衡等 周永緒 尹明廷等 馬騰龍 張順等 金漢蕙 郭養志等

鄔象鼎 慎倣允等 熊應龍 子天琳 劉國泰等 祝昌 許文耀等

武君烈 唐銓等 高應第 劉延祉等 金世爵 杜嶠等 金光 王焜等

楊三知 孫世譽等 蕭震 張松齡等 成國樞 王攀桂等 嵇永仁

張存 劉超鳳等 臧世龍 陳豹等 噶林 六十等 姬登第 王大勳等

冷格 邦烏禮等 劉岷 馬秉倫等 蘇世爵 劉維等 張玉 徐學聖等

李文仲 王承文等 倪國正 吳嗣昌等 策塔爾 常明等 傅澤布 福太等

布英克 五格爾等 胡邦佑 許景淹等 何道深 李應芳等 楊先春 金國保等

國興 韓世貴等 扎拉芬 拉托爾凱等 趙文哲 王日杏等 薛琮 張清士等

陳聖矩 次子理 錢國佐等 滕家瓚 族弟家泰 施錦等

王一魁 饒德豐等 朱錦慶 王鳳翔等 尙維岳 高傑 倪占鼇

石陣圖 廖廷超等 章憲 趙朝珍等 黃應文 子揆等 馮培元 江水輝等

和倫 永謙等 陳名魁 連旭 强克捷 蘇超 李珍等

烏雲布 倭克金泰等 方振聲 沈志勇等 楊延亮 子宏萬等 楊成鼎等

朱貴 子昭南 韋逢甲 顏履敬等 麥廷章 繆志林 趙發元等

唐樹義 曾國華 邵懿辰 蕭啟江 褚汝航 福咸 豐陞 額 德安

李鶴章 王鑫 温紹原 王懿榮 成肇慶

儒林傳上一 卷六十六

孫奇逢 子博雅 魏一鰲 趙御衆 刁包 杜越 沈國模 史孝咸 王朝式 韓

孔當 邵曾可 張履祥 凌克貞 何汝霖 張嘉玲 祝涇 陳梓 沈昀 陳確 屠

安世 鄭宏 葉敦良 惲日初 劉洵 洵子茂林 陸世儀 陳瑚 盛敬 江士韶

芮長恤 蔡所性 吳光 張怡 雷士俊 李容 白奐彩 党湛 李士瓊 馬棫

士 王夫之 謝文洊 甘京 封濬 黃熙 宋之盛 之盛 孫士宗

彭士望 彭任 張自動 張時爲 朱用純 王喆生 陸求可 費密

耿介 陳榕 崔蔚林 張潛 馬光裕 曹續祖 范鎬

鼎 李生光 党成 胡承諾 彭大壽 蕭企昭 曹本榮 陳大章 萬年茂 劉

夢鵬 張貞生 張烈 張能麟 應撫謙 姚宏任 秦雲爽

汪佑 吳曰慎 施璜 汪璉 湯之錡 金敞 顧培 高愈 嚴毅 張夏 華學泉

王宏撰 王建常 康呂賜 李困篤 李柏 王心敬 康乃心

彭隴 子定求 錢民 陸元輔 周象明 寶克勤 子容 遂 田蘭芳 徐鄰唐 湯

準 冉觀祖 李經世 李來章 劉宗泗 劉源淥 范明徵 孫若羣 劉

以貴 詹明章 鄭文炳 陳九齡 張鵬翼 林赤章 李夢箕 夢箕子圖南

童能靈 顏元 王源 李堪 輝鶴生 程廷祚

儒林傳上二 卷六十七

勞史 桑調元 茅星來 邵廷采 沈佳 向塔 徐世沐 黃尚衡 華希閔

張雲章 王步青 焦袁熹 楊履基 張自超 劉齊 劉捷 姜兆錫

陳遷鶴 子萬策 李光坡 從弟光輿 光型 從子鍾倫 鍾倫子清馥 方邁

陳法 李文炤 王元復 胡方 陳遇夫 馮成修 勞瀆 馮經

殷元福 夏錫疇 胡具慶 郭善鄰 王聿修 王植 黃叔瓚 王之銳

王懋竑 朱澤澐 喬灌 任瑗 陸奎勳 汪紱 余元遴 元遴 孫翹光 洪騰蛟 董

桂敷 馬翮飛 胡國鈺 黃永年 陳道 鄧元昌 宋昌圖

曾受一 鄧純 孫景烈 王巡泰 劉紹攸 官獻瑤 孟超然

戴祖啟 閻循觀 韓夢周 姜國霖 張鏐 法坤宏 梁鴻翥 謝金鑾 陳庚煥

陰承方 卿彬 子祖培 蘇懿諧 姚學煥 潘諮 唐鑑 資塿 胡達源 丁善慶

朱文炆 劉傳瑩 李元春 賀瑞麟 薛于瑛 路德 柏景偉

方垌 顧廣譽 邵懿辰 陳壽熊 方東樹 方宗誠 夏忻 弟炯 許鼎 蘇惇元

朱道文 方潛 汪桂月 呂緝熙 楊德亨 劉繹 龍文彬

吳嘉賓 蘇源生 劉廷詔 劉熙載 宗稷辰 范泰衡 成孺

余煥文

儒林傳下一 卷六十八

顧炎武 張昭 吳任臣 黃宗羲 弟宗炎 宗會 子百家 陳赤衷

錢澄之 方中通 朱鶴齡 陳啟源 臧琳 張爾岐 馬驥 黃生

薛鳳祚 俞汝言 徐善 徐庭垣 姚際恆 孫之騷 梅文鼎 弟文鼎

文鼎 王錫闡 毛奇齡 胡渭 子彥昇 葉佩孫 閻若璩 李鎧 吳玉搢 宋鑒

萬斯大 兄斯選 弟斯同 從子言 子經 惠周惕 子士奇 孫棟 余蕭客

陳厚耀 馮景 魏荔彤 王又樸 顧陳圻 吳廷華 盛世佐

顧棟高 陳祖范 吳鼎 梁錫璵 華玉淳 顧鎮 蔡德音 諸錦 鄭江 沈炳震

徐文靖 趙繼埉 王文清 潘士權 余廷燦 任啟運 全祖望

沈彤 王士讓 龔元玠 劉斯組 陳象樞 李榮陞 江永 胡匡衷

盧文弨 孫志祖 邵瑛 翁方綱 朱筠 李威 王鳴盛 金日追 吳淩雲 汪

照 錢大昕 族子塘 姑 錢大昭 子東垣 繹 侗 范家相 姜炳璋

盛百二 翟均廉 褚寅亮 程際盛 翟灝 黃模 周廣業 任大椿 族弟兆麟

基振 梁上國 張崇蘭 戴震 段玉裁 鈕樹玉 陳樹華

凌廷堪 江聲 兄筠 孫沅 顧廣圻 崔述 程瑤田 邵晉涵 周永年

孔廣森 孔繼涵 劉台拱 劉玉麐 臧庸 弟禮堂 金榜 洪榜 汪龍

王念孫 李淳 宋繇初 王謨 汪中 子喜孫 江德量 徐復 許珩 汪光

熾 梁玉繩 弟履繩 汪遠孫

莊述祖 莊毅甲 莊有可

武億 戚學標 陳熙晉 李誠

丁杰 周春 吳東發 沈夢蘭 宋世華

儒林傳下二 卷六十九

孫星衍 畢亨 李貽德

陳鱣 王聘珍 洪亮吉 子飴孫 符孫 麟孫

桂馥 許瀚

朱彬 姪士端

汪德鉞 呂飛鵬 張惠言 子成孫

江承之 胡祥麟

許宗彥 郝懿行 牟庭

莫與儔 子友芝

陳壽祺 子喬樅 謝震 何治運 孫經世 柯蘅

馬宗槩 子瑞辰

林春溥 嚴可均 嚴元照

焦循 子廷琥 顧鳳毛 鍾懷 李鍾泗

李銳 汪萊 張敦仁 談泰 陳懋齡

朱珔 胡世琦 左暄 包世榮

李富孫 兄超孫 弟遇孫 馮登府 洪頤煊 兄坤煊 弟震煊

徐養原 臧壽恭

張應昌 周中孚 凌塾

胡承珙 胡秉虔

沈欽韓 陳逢衡

劉逢祿 宋翔鳳 戴望 雷學淇 王萱齡

沈濤 江藩 黃承吉 黃爽 凌曙

朱駿聲 薛傳均 薛壽

方成珪 趙坦 嚴杰 劉文淇 子毓崧 孫壽曾

方申 胡培翬 楊大培

迮鶴壽 丁晏 王筠 俞正燮 王曜南

姚配中 羅士琳 顧觀光 曾釗 林伯桐 李黼平 吳懋清 魏源 鄒漢勛

陳澧 侯康 侯度 鄒伯奇 華長卿 柳興恩 許桂林 鍾文烝

朱右曾 鄭珍 王崧 劉寶楠 子恭冕 潘維城 龍啟瑞 苗夔 龐

大壘 陳立 桂文燦 陳奐 金鶚 管禮耕 陸元綸 黃式三 子以周

李善蘭 李聯琇 吳樹聲 劉庠 朱一新

文苑傳一 卷七十

魏禧 兄際瑞 弟禮 禮子世倣 世儼 李騰蛟 邱維屏 曾燦 林時益 梁份

顧柔謙 子祖禹 周茂蘭 楊无咎 金俊明 葛芝 紀映鍾 冷士嶠 王大經 顧

有孝 冒襄 子丹書 歸莊 陸圻 弟楷 從子繁昭 柴紹炳 毛先舒 丁澎 沈謙

孫治 吳百朋 陳廷會 虞黃昊 張丹 王暉 沈用濟 歐陽斌元 陳宏

緒 徐世溥 賀貽孫 章慥 陳允衡 毛乾乾 李子金 李世熊 薛鎔

林古度 余懷 杜濬 弟芥 陳恭尹 陳子升 屈紹隆 李鄴嗣 陳汝登

周容 陳洪綬 彭孫貽 馮班 兄舒 吳文 宗元鼎 任元祥 董以寧

鄒祗謨 谷應泰 竇遴 奇井在 米漢雯 楊思聖 申涵光 殷岳 張蓋

宋琬 曹爾堪 施閏章 高詠 王庭 從兄翅 李明啓 熊伯龍 劉子壯

胡亶 唐夢賚 孫蕙 杜濬 王鉞 張貞 李來泰 侯方域 王猷定

王士祿 弟士祐 徐夜 傅辰 顧大申 邱象升 象升弟象隨 馬世俊 崔華 朱克

生 秦松齡 倪燦 嚴繩孫 丁煒 林侗 侗弟佶 許友 友子遇

黎士宏 汪琬 葉燮 王命岳 梅清 梅庚 劉體仁 劉榛 周

在浚 吳兆騫 弟兆宜 顧貞觀 楊寶 計東 宋 穎 唐甄 余杰

毛際可 方象瑛 黃與堅 顧湄 王揆 王昊 葉封 董俞 田茂遇

吳農祥 王嗣槐 徐林鴻 陸次雲 顧景星 張仁熙 劉醇驥 王戩

劉獻廷 黃儀 鈕琇 邵遠平 姚之駟 沈珩 沈光邦

陸棻 徐嘉炎 任辰旦 徐咸清 顏光敏 李澄中 曹貞吉 謝重輝 王萃

張篤慶 喬萊 林麟焜 張遠 徐倬 蔣伊 陸肯堂 吳暉

高層雲 子不騫 龐塏 袁佑 邊連寶

文苑傳二 卷七十一

陳維崧 吳綺 章藻功 朱彝尊 子昆田 孫稻孫 李良年 譚吉璉 鍾淵映

龔翔麟 周箕 沈進 汪森 尤侗子珍 汪楫 汪懋麟 王巖 劉心學 心學孫中

柱 張璣 孫枝蔚 李念慈 潘耒 徐鉉 曹禾 吳雯 傅山 程康莊

黃虞稷 毛晉 鄭元慶 吳嘉紀 鄧漢儀 陶季 邵長蘅 陳玉璣

葉奕苞 蔡方炳 趙執信 馮廷樞 洪昇 金德嘉 吳苑

梁佩蘭 程可則 方殿元 王隼 吳文煒 史申義 顧圖河 周起渭

鄭梁 裘連 儲欣 從孫大文 姜宸英 嚴虞惇 性德 劉巖 唐孫華

徐葆光 查慎行 弟嗣琛 族子昇 查揆 汪份 弟士鏞 王式丹 吳廷楨

徐昂發 張大受 李重華 何焯 陳景雲 景雲子黃中 沈元滄 子廷方

沈名孫 名孫子嘉轍 陳奕禧 汪維憲 倪璠 王琦 趙殿成 馮應榴

方燦如 方式濟 顧嗣立 吳之振 杜詔 樓儼 王澍

萬承蒼 盛際斯 際斯子樂 尙廷楓 陳儀 陳潢 楊椿 子述曾

厲鶚 符曾 吳穎芳 嚴遂成 車騰芳 許遂 韓海 馬維翰 盧見曾

蔣恭棐 朱桓 鄭方坤 兄方城 黃任 王峻 王延年

張鵬翀 孫致彌 金兆燕 陳兆崙 商盤 童鈺 何夢瑤 勞孝輿

羅天尺 蘇珥

林蒲封 楊仲興

彭端淑 弟肇洙 遵泗

黃之雋 周宣猷 陳長鎮 易宗浚

汪師韓 顧我錡 柯煜

江昱 馬榮祖

蔣衡 劉大樾 吳定 王灼

明安圖 劉湘燿 邵昂霄

胡天游 周長發 陳士播

夏之蓉 周大樞 齊召南 杭世駿 周京

陳撰 汪沆 金志章

馬曰琯 弟曰璐 金農 丁敬 陳章 姚世鈺 趙昱子一清 弟

信 沈炳巽

張庚 沈冰壺 祝維誥 李鐸 曹寅 鮑鈺 朱孝純 舒瞻

屈復 吳鎮 楊鸞 胡鈇

翁照 潘高 許廷鏢 李果 鮑皋子之鍾 余

京 張曾 周準

文苑傳三 卷七十一

趙青藜 汪越

鄭燮 王鳴韶

袁枚 程晉芳 王友亮 葉酉

邵齊燾 王太岳

鄭虎文 王右曾 沈叔埏

許伯政 汪憲 朱文藻 吳

騫 李中簡 戈濤

郭起元 蕭正模 朱仕琇 兄仕玠 魯九皋

顧奎光 子敏恆

梁同書 王文治 王元啟 萬光泰 沈大成

沈業富 施朝幹

曹學閔 折遇蘭 余慶長 段嘉梅 程大中

蔣士銓 楊屋 汪軻 趙由儀 陳奉茲 孫世慶 李文藻 李維寅

朱休度 張雲璈 張遠覽 趙翼 曹仁虎 趙文哲 吳泰來 褚廷璋

檀萃 鮑倚雲 方正樹 李調元 從弟鼎元 驥元 姚鼎 姚範 劉開

張九鉞 弟九鍵 九鎰 九鐔 余集 沈亦然 王宗炎 彭紹升 汪縉 羅有高

嚴長明 子觀 吳卓信 莊忻 鮑廷博 黃丕烈 秦恩復 曹庭棟 吳文溥

李懷民 弟憲喬 錢澧 曹錫寶 謝振定 管世銘 楊于果 吳錫麒 吳鼎 樂

鈞 劉嗣綰 吳慈鶴 黃景仁 吳嵩梁 祁韻士 許鴻磐 章學誠 章宗源

吳蘭庭 葉維庚 馮敏昌 趙希璜 李符清 莫元伯 法式善 汪學金 楊倫

師範 袁文典 周於禮 宋大樽 朱彭 楊芳燦 弟揆 徐鏞慶 何道生

高澍然 張紳 伊秉綬 薩玉衡 黎簡 張錦芳 張錦麟 黃丹書 胡亦常

呂堅 李士楨 張問陶 葉繼雯 喻文鏊 陳詩 石韞玉

惲敬 陸繼輅 繼輅兄子耀通 毛燧傳 趙懷玉 董士錫 吳德旋 呂瓚

王芑孫 舒位 王曇 孫原湘 張士元 張海珊 張履 歐陽輅 周有聲

黃文暘 喬載繇 陳鶴 周濟 宋湘 吳蘭修 溫承恭

文苑傳四 卷七十三

張澍 邢澍 任其昌 瞿中溶 黃易 趙魏 張廷濟 陸增祥 顧莼 朱綬 陸文

謝蘭生 凌揚藻 徐松 沈垚 李兆洛 胡敬 程同文

陳文述 屠倬 錢林 方元鵬 姚瑩 戴鈞衡 張作枏 沈欽裴

駱騰鳳 錢儀吉 從弟泰吉 郭尙先 何紹基 黃安濤 王衍梅 徐熊飛

鄧顯鶴 周樹槐 張鑑 楊鳳苞 施國祁 汪家禧 余煌 施彥士

王贈芳 李祖陶 李惺 包世臣 齊彥槐 徐璈 陳沆 謝階樹

劉淳 潘煥龍 謝葵 董祐誠 兄基誠 周儀障 方履篋 彭兆孫 郭慶

王豫 吳翌鳳 趙紹祖 姚椿 梅曾亮 管同 毛嶽生 張維屏 譚敬昭

黃培芳 彭泰來 倪濟遠 邵詠 黃爵滋 郭儀霄 湯鵬 項名達 戴煦

陳杰 夏鸞翔 汪日楨 陳偕燦 艾暢 湯儲璠 黃本驥 兄本騏

潘德輿 葉名澧 龔自珍 端木國瑚 戴綱孫 朱琦 王拯 鄭獻甫

姚燮 黃燮清 梁廷枏 楊廷桂 馮桂芬 符葆森 樊雨 尙銘

王柏心 何秋濤 張穆 李光廷 孫鼎臣 吳敏樹 馮志沂 徐鼎

周壽昌 郭崑燾 魯一同 張際亮 林昌彝 史夢蘭 邊浴禮

譚瑩 子宗浚 熊景星 徐榮 儀克中 黃子高 張文虎 韓應陞

丁取忠 吳嘉善 蔣日豫 潘詠 蔣湘南 吳觀禮

循吏傳一 卷七十四

李允禎 金鎮 王天鑑 畢振姬 方國棟 趙廷標 駱鍾麟

朱克簡 子約 多宏安 白登明 于朋舉 吳汝為 湯家相

宋必達 趙吉士 田起龍 李疇 劉偉 黎士宏 黃貞麟

陸求可 崔宗泰 于宗堯 任辰旦 張沐 王又旦 崔華

姚文燮 韓蓋光 江皋 孫蕙 張瑾 衛立鼎 龔其裕 子燦

孫一發 曾孫景瀚 陸在新 陳洪諫 邵嗣堯 井睦 蔣伊

張堦 張克嶷 靳讓 朱振 成康保 高蔭爵 祖進朝

劉榮 楊朝正 王縉 趙俞 陶元淳 鄭善述 子方城 孫天錦

廖冀亨 曾孫文錦 文錦子惟勳 陳汝咸 蔣兆龍 佟國瓏 周中鉉

劉繼聖 遲維坤 黃世發 李發枝 沈慶曾 夏熙澤 陸師

沈光榮 張士琦 寶容遂 余旬

循吏傳二 卷七十五

閻堯熙 魏嶮 趙之鶴 陳惠榮 謝濟世 葉新 施昭庭

劉士銘 莊亨陽 葉左寬 沈起元 翁運標 朱宏仁 蔣祝

陳慶門 紀達宜 謝仲坑 王時翔 藍鼎元 童華 魯淑

金溶 朱懋德 牛運震 邵大業 李大本 陳玉璽 陸廣霖

王希伊 張甄陶 謝應龍 周克開 林明倫 白雲上 康基淵

鄧夢琴 李炯 顧光旭 王德屏 茹敦和 莫暮 鄭基

汪輝祖 陳昌齊 劉大紳 張吉安 紀大奎 狄尙綱 蔣勵常

伊秉綬 劉體重 子煦 嚴如煜 子正基 李賡芸 方積

史紹登 蓋方泌

循吏傳三 卷七十六

劉台斗 吳梯 李文耕 李毓昌 孔傳坤 徐邦慶 張琦

劉衡 俞德淵 朱士達 子念祖 朱大源 費庚吉 吳均

吳應連 子寶林 石家紹 徐棟 史秉直 何日愈 顧夔

雲茂琦 劉慶凱 桂超萬 王肇謙 托克清阿 沈衍慶

黃輔辰 子彭年 徐台英 吳祖昌 李元度 趙秉貽 蒯賀孫

李朝儀 陳崇砥 朱次琦 李仁元 錢德承 穆其琛 許瑤光

尹耕雲 劉秉琳

循吏傳四 卷七十七

楊榮緒 陳建侯 鐵珊 金國琛 鍾謙鈞 俞澍 婁詩漢

段起 姚國慶 沈錫華 朱靖甸 陳佐平 秦煥 李孟荃

李炳濤 朱根仁 林達泉 儲裕立 丁壽昌 方大湜 陳豪

何金壽 方瑞蘭 曾紀鳳 蕭世本 鄒振岳 潘治 周秉禮

任蘭生 李金鏞 蒯德模 金福曾 毛隆輔 袁堯齡 劉含芳

王寅清 曹秉哲 冷鼎亨 陳文獻 桂中行 沈鎔經 章洪鈞

馮德材 孫叔謙 涂官俊 夏敬頤 王仁堪 何慶釗 張華奎

馬嘉植 趙以煥 許祺身 李景祥

貳臣傳甲 卷七十八

劉良臣子澤洪 孫定遼 孔有德 王鼐永 王正志 徐一范

徐勇 郝效忠 馬得功 李永芳 孟喬芳 張存仁 劉武元

祖可法 尙可喜 洪承疇 劉芳名 李國英 張勇 祝世昌

鮑承先 王世選 祖大壽 祖澤潤弟澤溥 祖澤洪 鄧長春

耿仲明 全節 吳汝玠 宋權 王宏祚 李化熙 任濬

曹溶 衛周允 李鑑 胡茂禎 高第 孔希貴 張煊

徐起元 賈漢復 張天祿弟天福 馬寧 常進功 盧光祖

高進庫 霍達 吳六奇 陳世凱 田雄

貳臣傳乙 卷七十九

孫得功 馬光遠 沈志祥 謝陞 金之俊 胡世安 田維嘉

沈維炳 房可壯 劉漢儒 黃圖安 高斗光 王永吉 王鐸子無黨

左夢庚 許定國 趙之龍 梁雲構 劉良佐 劉應賓 苗胙土

張鳳翔 吳偉業 夏成德 馮銓 李若琳 謝啟光 孫之獬

李魯生 吳惟華 土國寶 魯國男 陳之遴 劉正宗 周亮工

錢謙益 魏琯 潘士良 李猶龍 王之綱 任珍 梁清標

黨崇雅 衛周祚 戴明說 劉餘祐 龔鼎孳 劉昌 孫承澤

熊文舉 薛所蘊 李元鼎 傅景星 葉初春 張若麒 唐通

董學禮 駱養性 陳之龍 柳寅東 方大猷 陳名夏 高爾儼

張忻子端 白廣恩 南一魁 張縉彥 孫可望 白文選

逆臣傳 卷八十

吳三桂 馬寶 王屏藩 李本深 張國柱 楊遇明 楊富 蔡祿 楊來嘉

王永清 曹申吉 羅森 吳之茂 陳洪明 崔之瑛 王輔臣 譚洪子天祕

鄭蛟麟 祖澤清 耿精忠 曾養性 劉秉政 劉進忠 尙之信

嚴自明 孫延齡 馬雄子承蔭 郭義 線國安 姜瓖

李建泰 金聲桓 章于天 李成棟 袁彭年 鄭芝龍 劉澤清

馬逢知 曹綸

清史列傳 卷一

宗室王公傳一

和碩禮親王代善

代善太祖高皇帝第二子初封貝勒歲丁未正月與兄褚英隨太祖弟貝勒舒爾哈齊往徙東海瓦爾喀部斐悠城新附人戶軍夜行大霧上有光舒爾哈齊疑非吉兆欲旋師代善褚英持不可遂進收屯寨大敗烏拉兵萬衆於路代善追及其統兵貝勒博克多縱馬左手攬其胷而斬之太祖嘉代善奮勇克敵賜號古英巴圖魯癸丑正月太祖親征烏拉既攻克遜扎塔郭爾多鄂謨三城布占泰率兵三萬越富勒哈城結營諸將皆欲戰太祖曰征伐大國豈能遽使無子遺乎代善率諸將奏言我士飽馬騰利速戰所慮者布占泰不出耳今彼既出平原廣野可一鼓擒也舍不戰厲兵秣馬何爲太祖曰我仰荷天眷雖遇勁敵無不單騎突陣斬將搴旗今何難身先搏戰但恐爾等或致一二被傷故欲計出萬全爾衆志旣孚即可決戰因命進烏拉兵亦出陣距百步許代善隨太祖臨陣奮戰大破之遂克

其城代善邀擊潰衆殪過半布占泰竄葉赫所屬城邑皆降編戶萬家丙辰太祖建元天命封代善及舒爾哈齊長子阿敏太祖第五子莽古爾泰與太宗文皇帝並爲和碩貝勒國中稱代善爲大貝勒阿敏爲二貝勒莽古爾泰爲三貝勒太宗文皇帝爲四貝勒天命三年四月上以七大恨告天興師征明行二日雨欲旋師代善曰我與明和久矣因其不道故興師今旣臨境若遽旋將與明復修好乎抑相讐怨乎興兵之名安能隱之天雖雨吾軍士皆有製衣弓矢亦有備雨具何慮霑溼且天降此雨以懈明邊將心使吾進兵出其不意耳是雨利我不利彼也上曰善夜將半遂進霽月出分隊馳味爽圍撫順城明遊擊李永芳以城降東州瑪哈丹二城及臺堡寨五百餘皆下攜降衆以還旣出明邊二十里聞明總兵張承廕等率兵萬來追代善同四貝勒返戰上遣巴克什額爾德尼諭止之代善駐兵於邊令復奏曰彼若待我我則與戰若不待是必走矣當乘勢追襲無使我兵寂然歸致謂怯也上然之亦移師入邊破其三營斬承廕及副將頗廷相參將蒲世芳游擊梁汝貴等四年正月命率大臣十六兵五千守扎喀關以防明來侵尋撤還三月朔偵明兵四萬出寬甸侵我南路六萬出撫順侵我西路上以南路有兵

五百駐防親出禦西路命代善前行偵者又告明兵六萬出清河路代善曰清河界道仄崎嶇未能驟至當先禦撫順兵遂與侍衛扈爾漢等過扎喀關四貝勒以祀事後至言界藩山上有築城夫役宜急衛之代善方進兵太蘭岡欲設伏待敵從四貝勒言直趨界藩見明兵攻吉林崖者約二萬又一軍列薩爾濟山與阿敏莽古爾泰及諸將議曰吉林崖衛夫役兵僅四百急增千人助之俾登山馳下衝擊以右翼兵夾攻之敵衆在薩爾濟山者以左翼兵當之遂遣千人往吉林崖上至詢知諭分右翼二旗兵與左翼四旗兵合先破薩爾濟山敵營其夾攻吉林崖之右翼二旗兵仍如議於是合六旗兵趨薩爾濟山明兵出陣發槍礮我兵仰射之奮力衝擊不移時破其營而前往助吉林崖兵千人自山下擊右翼二旗兵渡水直前夾攻陣斬明總兵杜松王宣趙夢麟等是夜明兵別由開原出三分口者其總兵馬林率三萬人營尙閒崖監軍道潘宗顏率萬人營斐芬山翌日上率四貝勒擊明游擊龔念遂李希泌兵一萬於幹埤鄂謨代善以三百餘騎馳至尙閒崖見林結方營掘濠三市濠外火器兵居前繼列騎宗顏軍其西三里卽馳騎告時上已破念遂等不待四貝勒收兵親臨尙閒崖傳令士皆下馬步戰左翼二旗

兵下者方四五十人明兵已自西突至代善告敵至卽躍馬直入陣衆軍奮進斬獲過半翌日上駐蹕界藩代善請以二十騎先歸都城探南路敵遠近上亦於是夜還都城代善奉命偕諸貝勒統先至軍士禦明總兵劉綎甫出瓦爾喀什窩集見綎兵至阿布達哩岡四貝勒以右翼兵登山代善以左翼兵出其西夾攻之明兵大潰綎沒於陣旋收降助明之朝鮮將士以還七月從上攻克明鐵嶺城敗助明之蒙古兵八月上親征葉赫圍其貝勒錦台什所居東城代善同衆貝勒圍其貝勒布揚古所居西城東城下布揚古及其弟布爾杭古大懼乞盟代善諭降之葉赫遂平六年三月上親征明瀋陽四貝勒先敗明總兵李秉誠朱萬良姜弼等代善偕其長子台吉岳託追四十里斬馘甚衆七月鎮江城降將陳良策叛投明總兵毛文龍上命同莽古爾泰遷金州民於復州十一年八月太祖龍馭上賓岳託偕弟台吉薩哈璘議以告父代善曰四貝勒才德冠世深契先帝聖心衆皆悅服當嗣大位代善曰此吾素志也天人允協其誰不從代善告阿敏莽古爾泰及衆貝勒皆曰善遂合詞請太宗文皇帝嗣位太宗文皇帝讓再三代善言益懇切衆議亦堅乃從之十月征蒙古喀爾喀扎嚕特部擒貝勒巴克與其二子及岱青

多爾濟拉什希布桑阿爾齊等斬貝勒鄂爾齊圖俘其屬戶而還天聰元年五月
從上圍明錦州聞明兵自山海關來援迎擊之遂薄寧遠城殫敵無算因溽暑班
師三年十月從上征明入洪山口克遵化趨京城北土城關之東駐營明大同總
兵滿桂宣府總兵侯世祿率援兵至德勝門敗之十二月攻克良鄉還破敵永定
門南遂從上閱薊州形勢明兵五千自山海關至距城二里許與我遇遂立營環
列車楯槍礮代善麾左翼四旗護軍攻其東破之四年正月明兵部侍郎劉之綸
以兵至遵化登山營代善率衆環圍之招之綸降不從遂攻破其七營之綸遁巖
中爲我軍射殫擒遊擊守備各一五年三月命諸貝勒直言時政代善奏曰刑罰
不中民有怨言由讞獄之不得人宜選易之八月從上圍明大凌河城正紅旗圍
西北代善軍爲策應城外守臺明兵害我遊牧十人掠駝馬去代善同貝勒濟爾
哈朗等以礮攻克其臺留兵守九月明監軍道張春總兵吳襄等率兵四萬自錦
州來援距城十五里代善從上統兵二萬往擊至則敵已陣槍礮齊發聲震天地
我騎縱橫馳突飛矢如雨敵敗卻襄及其副將桑阿爾齊遁春等復收潰衆立營
黑雲起大風自西來敵乘風縱火勢甚熾將偪我軍天忽雨反風敵營燬死者甚

衆我軍合攻之陣斬副將張吉甫滿庫王之敬生擒春及副將張洪謨等春見上不跪上欲誅之代善奏曰前所俘無不收養此人欲以死成名奈何殺之以遂其志上赦春先是天命六年二月太祖命代善阿敏莽古爾泰同太宗分月直佐理事及天聰三年正月太宗以諸兄宜節勞諭以弟姪代直每御殿命代善阿敏莽古爾泰列坐左右不令下坐至是禮部參政李伯龍請定期朝會班次儀制下諸貝勒會議謂莽古爾泰不可並坐代善言我等奉上居大位仍並列坐甚非心所安請上南面中坐我與莽古爾泰侍坐於側外國蒙古諸貝勒坐我等下衆皆曰善遂定議六年五月從上征察哈爾行二旬過興安嶺聞林丹汗遁移師趨歸化城入明大同宣府境以書示沙河堡得勝堡張家口諸守將議和而還八年五月從上征明出榆林口至宣府境分兵自喀喇鄂博攻克得勝堡遂由朔州趨馬邑八月會大軍於大同以俘獲獻御營而還崇德元年四月晉封和碩兄禮親王十二月從上征朝鮮降國王李倬二年二月班師七月因征朝鮮時違旨以所獲糧餉馬及選護衛溢額等事集諸王貝勒貝子大臣等諭曰朕於兄禮親王極愛敬何竟不體朕意又諭曰王等於朕雖盡恭敬朕亦不喜必須正身行義相輔佐朕始

嘉賴焉三年二月上親征喀爾喀王與鄭親王濟爾哈朗等留守十二月以失朝
自檢舉部議罰鍰上免之四年十一月從上獵於葉赫至英格布占王射擊馬仆
傷足上見之馳下馬親爲裹創酌金卮勸飲因泣下諭曰朕以兄年高不可馳馬
曾屢勸兄奈何不自愛遂罷獵命乘輿齊行日十五里或二十里八年八月世祖
章皇帝嗣位王集諸王貝勒大臣議以鄭親王濟爾哈朗睿親王多爾袞同輔政
又發貝子碩託郡王阿達禮欲立睿親王私議令法司鞠誅之碩託乃王第二子
阿達禮則王第三子穎親王薩哈璘子也順治元年朝元旦命上殿母拜二年春
王復來五年十月薨年六十有六賜祭葬銀萬兩立碑紀功康熙十年六月追諡
曰烈復立碑表墓今上乾隆十九年九月入祀盛京賢王祠四十三年正月詔以
王與鄭親王濟爾哈朗睿親王多爾袞肅親王豪格克勤郡王岳託並太祖太宗
世祖時戮力行閒櫛風沐雨之親藩宜配饗太廟又以王等茂著壯猷克昭駿烈
初封嘉號當長延奕禩詔見襲禮親王爵之康親王復封號曰禮 初次襲滿達
海禮烈親王代善第七子崇德五年九月隨大軍圍明錦州敗其杏山松山援兵
六年五月封輔國公八年隨肅親王豪格圍松山以本旗兵敗敵明總督洪承疇

援踵至卻其三隊旋復來犯力拒之所乘馬創肅親王易以馬甫乘而敵大至鼓勇復擊之殿後而還明總兵吳三桂倚山結營自固偕諸軍擊破之三桂宵遁七年四月隨鄭親王濟爾哈朗攻塔山毀其城而還八年八月授都察院承政順治元年四月隨睿親王多爾袞入山海關擊敗流賊李自成十月晉封固山貝子隨英親王阿濟格追剿自成由邊外趨綏德二年二月克沿邊三城及延安府自成遁湖廣躡之屢敗賊八月凱旋三年正月隨肅親王剿流賊張獻忠七月由漢中進秦州圍賊渠高如礪等於三台山如礪降十一月師至西充擒斬獻忠肅親王令滿達海與貝勒尼堪等分剿遵義夔州茂州餘賊四年八月班師五年二月以徇隱同征西充之護軍參領希爾根冒功事議罰鍰睿親王令免之六年四月襲封和碩親王時睿親王與英親王敬謹親王尼堪端重親王博洛先後討大同叛鎮姜瓖以王與兄郡王瓦克達剿賊朔州寧武尋授征西大將軍八月克復朔州馬邑縣寧武關城寧化所八角堡及靜樂縣遂會端重親王軍攻復汾州城斬偽巡撫姜建勳僞布政使劉秉業等僞總兵楊振威斬瓖首獻英親王軍大同平王遣護軍統領索渾圍平遙署護軍統領希爾根圍太谷貝勒拜音圖圍沁州鎮國

公漢岱圍遼州先後攻復其城屯留襄垣榆社武鄉等縣俱降十月睿親王令留兵付瓦克達剿撫餘賊王同輔國公薩弼攜應撤兵還京七年二月與端重親王敬謹親王同理六部事八月睿親王遣尙書阿哈尼堪迎朝鮮王李湜弟阿哈尼堪白理部事諸王以理事官恩國泰代坐徇隱罰鍰八年二月加封號曰巽尋同諸王奏削故睿親王封爵三月命諸王分管六部王掌吏部九年二月薨年三十有一諡曰簡十六年十月追論王與睿親王素無嫌分取其所遺財物掌吏部時尙書譚泰驕縱不能糾削爵諡 二次襲常阿岱原封巽簡親王滿達海第一子順治九年七月襲封和碩巽親王十六年十月追論滿達海罪降常阿岱爲貝勒康熙四年四月薨年三十有三諡曰懷愍第六子星尼降襲固山貝子次子錫倫圖封奉恩將軍後俱停襲乾隆四十三年三月詔以巽親王滿達海著有勞績賜一等輔國將軍爵世襲罔替以滿達海七世孫福色硃額襲 三次襲傑書禮烈親王代善孫初禮烈親王第八子祐塞封鎮國公卒第二子精濟襲晉封多羅郡王卒順治六年十月以祐塞第三子傑書襲多羅郡王八年二月加號曰康十六年十二月常阿岱旣降爵以傑書襲和碩親王仍號康熙十三年六月授奉命

大將軍討逆藩耿精忠九月師至浙江駐金華賊已陷温州處州都統賴塔總督李之芳駐衢州破賊於焦園紫郎山賊將徐尙朝引衆五萬犯金華王令都統巴雅爾副都統瑪哈達迎擊斬賊將吳榮先等兵無算十二月尙朝復引賊五萬逼金華城南十二里莊巴雅爾與總兵陳世凱等會剿破賊壘於積道山殺二萬餘復永康縉雲二縣賊將馬公輔由義烏遁武義署前鋒統領希福躡之苦竹嶺斬殪甚衆賊將沙有祥據桃花嶺梗處州路瑪哈達同總兵李榮等擊潰之副都統穆赫林又敗之白水洋十四年正月復處州府及仙居縣公輔尙朝等猶據宣平松陽屢窺處州都統拉哈達偕諸將禦剿破之石塘石佛嶺大王嶺東隴隘口上套寨下五塘諸處時寧海將軍貝子傅喇塔由黃巖規復温州叛鎮祖宏勳曾養性糾賊數萬倚山憑江水陸抗阻上命傑書由衢州進回奏處州方有賊警金華兵力弱難驟進十五年三月諭趣之曰王坐守金華將及二載徒以文移往來爲事不親統官兵進剿逆賊何日可滅宜剋期進取毋再遲延觀望貽誤軍機八月自金華移駐衢州敗賊於大溪灘復江山常山二縣進攻仙霞關僞參將金應虎迎降遂抵浦城縣攻拔之檄精忠言浦城爲閩財賦要地今大兵攻拔已扼咽喉

與其繫頸就戮曷若立功贖罪全百萬生靈九月復建陽撫降建寧延平二府精忠震懾無措遣其子顯祚來迎王遣齎示免死敕諭精忠出城六十里迎降十月王入駐福州奏精忠請隨大軍剿海賊鄭錦以贖罪上報可時錦僞總統許耀衆三萬結寨烏龍江之南小門山及眞鳳山王遣拉哈達等擊走之十一月疏言精忠出剿海賊其弟昭忠聚忠宜以一人來福州統轄藩屬又疏言福建經制兵已照原額全設精忠隨大軍所率佐領下兵數已不少其左右兩鎮官兵可並裁宏勳養性應令赴京候補上命耿精忠爲鎮平將軍駐福州餘俱如所請是月王遣穆赫林擊敗僞將軍吳淑於浦塘復邵武府進師泰寧僞總兵王安邦等降汀州府及所屬諸縣悉復十六年正月拉哈達賴塔破賊將趙得勝何祐等二十六營於白茅山太平山諸處復興化府二月復泉州漳州二府奏入得旨王統率官兵自衢州入仙霞關直抵福州剿撫並用所向克捷擊逐海賊收復全閩安輯百姓克奏膚功深爲可嘉三月疏言福建旣平臣欲卽統兵入粵但省會重地未可輕離且距漳州遠恐遲至炎暑難進師先就見駐漳州汀州騎兵令將軍拉哈達等率同耿精忠赴潮州尋遣總兵馬三奇同前鋒參領都克納敗海賊於龍溪班山

副都統楊鳳翔守泉州敗來犯賊五千餘十七年閏三月海賊犯漳州提督段應舉卻之四月賊陷平和環偪海澄穆赫林段應舉守禦越七旬援不至城遂陷長泰亦陷賊王以援遲請罪詔俟師旋日再議七月賊陷同安惠安王遣副都統禪布提督楊捷復之九月賴塔等破賊於蜈蚣山復長泰尋破賊於柯鏗山萬松關副都統吉勒塔布同捷破賊將劉國軒於江東橋又敗之潮溝副都統瑚圖破吳淑於石衛寨十八年正月吉勒塔布捷復敗國軒於郭塘歐溪頭二月賊犯江東橋吉勒塔布卻之追剿至太平寨斬賊千餘十月吉勒塔布敗賊於鼇頭山副都統沃申攻克東石城十九年二月沃申剿平大定小定玉洲石馬諸賊巢復海澄水師提督萬正色克海壇三月拉哈達捷等克廈門金門賴塔克銅山餘賊悉竄臺灣先是精忠爲藩下參領徐鴻弼等首其歸順後尙蓄逆謀王疏請逮治上密諭王令自請來京至是精忠自請入覲王亦奉詔班師五月疏言福建投誠兵甚多需餉浩繁廈門金門已恢復宜留八旗兵六百守泉州二千四百分守福州漳州餘皆隨還十月至京上率王大臣至盧溝橋迎勞十一月命預議政二十一年十二月追論前在金華數年頓兵不進及至福建又遲援海澄銷去軍功罰俸一

年二十四年十二月順天府丞王維珍以旗人與房山縣民爭煤窯自倚康親王府差委鼓衆鬧堂肆詬狀疏聞下部逮究旗人四舒華善辱詈職官俱擬枷責上嘉維珍無所瞻顧下部議敘諭閣臣曰旗下惡棍干預詞訟久經嚴禁四舒等挾制官司橫肆詬詈情殊可惡再加嚴審治罪其主一併察議大學士勒德洪奏其主卽康親王傑書上曰朕止論事之是非不論其爲何人也於是法司覆勘四舒論斬華善論絞王府護衛及管煤官降罰有差王坐失察罰俸如例二十九年七月率兵屯歸化城備剿噶爾丹尋以大將軍裕親王福全將抵烏蘭布通詔移師會之至則賊已竄十月撤還三十六年閏三月薨年五十有三諡曰良 四次襲椿泰康良親王傑書第六子康熙三十六年七月襲封和碩康親王四十八年五月薨年二十有七諡曰悼 五次襲崇安康悼親王椿泰第一子康熙四十八年十月襲封和碩康親王雍正五年十二月掌宗人府事十一年九月薨年二十有九諡曰修 六次襲巴爾圖康良親王傑書第五子康熙三十二年四月封三等輔國將軍雍正十二年四月襲封和碩康親王乾隆十八年三月薨年八十諡曰簡 七次襲永恩康修親王崇安第二子雍正十二年四月封多羅貝勒乾隆十

八年五月襲封和碩康親王十九年十一月總理正黃旗覺羅學四十三年正月命復禮烈親王始封之號仍爲禮親王嘉慶十年二月薨年七十有九諡曰恭八次襲昭槿禮恭親王永恩第一子嘉慶七年十一月歲滿封不入八分輔國公是月委署散秩大臣十年六月襲封和碩禮親王

和碩英親王阿濟格

阿濟格太祖高皇帝第十二子初授台吉天命十年十一月科爾沁台吉奧巴苦察哈爾林丹汗之虐來乞援阿濟格隨三貝勒莽古爾泰等征之至農安塔林丹汗遁乃還十一年四月同台吉碩託征喀爾喀巴林布部十月隨大貝勒代善征扎魯特部有功是年封貝勒天聰元年正月同二貝勒阿敏等征朝鮮克五城五月從上征明同莽古爾泰等率偏師衛塔山糧運敗明兵二萬會大軍於錦州進薄寧遠城北明援兵千餘掘濠爲車營列火器以拒阿濟格殲之明總兵滿桂出城東二里陣上欲進擊阿濟格請從諸貝勒以距城近不可攻勸阻甚力上怒親率阿濟格等馳擊明前隊騎兵追至城下盡殲之諸貝勒皆愧奮不及胄馳進分擊步卒斬馘無算二年三月以擅主弟貝勒多鐸婚削爵尋復之三年八月同貝

勒濟爾哈朗等略明錦州寧遠焚其積聚俘獲三千計十月從上征明率左翼四旗及蒙古兵克龍井關明漢兒莊副將易愛洪山口參將王遵臣來援斬之殲其衆進圍漢兒莊明守將李豐降十一月大軍克洪山口至遵化明山海關總兵趙率教以精兵來援阿濟格奮擊率教敗走會上以數騎視遵化城垣因遮擊敗兵阿濟格追斬率教於陣並戮其副將以下官遂進薄京城明寧遠巡撫袁崇煥錦州總兵祖大壽以援兵二萬屯廣渠門外我師追殺至城濠阿濟格馬創死始還十二月同貝勒阿巴泰等略通州焚其船克張家灣尋從上閱薊州形勢遇明山海關援兵五千於城外同代善等突入敵營殲之五年三月命諸貝勒直言時政阿濟格奏曰臣愚魯無能致煩聖慮自今願痛改前非勉勵職業八月上征明由白土場趨廣寧阿濟格同貝勒德格類岳託率兵二萬由義州進大凌河與大軍會夜圍錦州敵兵襲阿濟格營時大霧人覲面不相識阿濟格嚴陣待忽青氣自天下衝敵陣霧中開如門頃之霽急擊大敗之擒遊擊一獲甲械及馬二百餘上親勞以金卮酌賜九月諭授圍城方略覘察援兵勿以敵寡輕戰墮計中尋聞明增兵來援命額駙揚古利率八旗護軍之半往益阿濟格軍時錦州兵七千逐我

偵者於小凌河岸突近御前衛兵不滿二百上擐甲渡河直入敵陣敗之阿濟格繼至敵復出步軍列濠外騎兵翼其後阿濟格奮前破其步卒斬副將一於是上以所統兵付阿濟格明監軍道張春等復以兵四萬援錦州我師迎擊於大凌河截殺過半逐北逾一舍六年五月從上征察哈爾林丹汗遁阿濟格統左翼及蒙古兵略大同宣府明兵懼盡獻張家口所貯犒邊財物七月師旋七年三月命築通遠堡城以兵駐守五月明降將孔有德等自登州海道來歸爲明總兵黃龍所遮朝鮮復掘之阿濟格同濟爾哈朗貝勒杜度等往迎立營江岸明與朝鮮兵望見皆引退有德等輜重得畢至六月詔問證明及朝鮮察哈爾三者何先奏言臣意當攻明以耕耘畢興師皇上親駐關外諸貝勒將帥率大軍進關攻略城堡招撫民人然後相敵形勢酌量緩急而行計之得也八月同阿巴泰等略山海關俘獲甚衆師還以不能乘勝入關詔切責阿濟格奏臣欲息馬運糧諸貝勒不從上曰汝果能堅執不從諸貝勒誰棄汝而來朕非欲加罪於爾等自後當謹識朕言耳八年五月從上證明同貝勒多爾袞多鐸自巴顏珠爾克入龍門口遇明兵敗之追攻龍門未下趨保安州克其城斬守備一謁上於應州籍俘獲數以聞八月

拔靈邱斬知縣守備師還崇德元年四月敍功晉封多羅武英郡王五月同阿巴泰證明克鵬鶚堡薄延慶州先後克定興安肅容城安州雄縣東安文安寶坻順義昌平遇敵五十六戰皆捷俘人畜十數萬擒總兵巢丕昌等又遣都統譚泰等設伏斬遵化三屯營守將我師方出關明兵躡我後還擊殲之獲馬百四十餘捷聞旨嘉獎賜鞍馬一九月師旋駕出地載門十里迎勞設宴上見王遠征勞瘁爲之惻然命坐於右側親以金卮酌賜十二月上征朝鮮令駐守牛莊二年三月以貝子碩託等攻皮島久未下命引兵千往助四月至軍令都統薩穆什哈率護軍前進都統阿山等率銳卒乘小舟疾攻西北隅兵部承政車爾格督八旗及漢軍朝鮮等兵乘巨艦偪其城都統石廷柱戶部承政馬福塔從北隅督戰敵不能支遂克皮島斬總兵沈世奎敗諸路來援之兵俘戶三千有奇船七十貲畜無算上遣使褒諭十二月遣軍自牛莊入白土場遇明兵於清河岸敗之四年二月從上證明王率師至大凌河東揚言欲以紅衣礮攻臺守卒懼四里屯張剛屯寶林寺旺民屯千家屯成化峪道爾彰等俱下尋率四旗護軍還守塔山連山俘人馬千計三月上遣四旗騎兵往助四月自連山會御營於義州南山岡班師九月略錦

州寧遠界六年三月同鄭親王濟爾哈朗圍錦州其守鄂蒙古台吉吳巴什等密議降爲明總兵祖大壽所覺接戰王乘夜登城助擊明兵敗乃徙蒙古及明兵降者於義州事詳鄭獻親王傳四月敗明援兵於松山北嶺六月復敗明關內援兵追擊薄松山城獲馬五十餘七月上以阿濟格克敵奏捷勞績可嘉賜銀四千兩八月明總督洪承疇率總兵吳三桂王樸等來援錦州兵號十三萬上親征大軍營松山明兵懼將奔塔山王追擊之獲其筆架山積粟復往塔山邀擊明兵敗奔者又同睿親王多爾袞克敵臺四擒副將王希賢參將崔定國都司楊重鎮等三桂樸僅以身免方三桂等之敗也明錦州松山杏山高橋諸路兵猶固守不下九月駕還盛京同杜度阿巴泰多鐸等分兵圍之十一月承疇夜出松山兵來襲我軍沿濠射敵返走城閉不得入降其衆二千餘七年二月圍杏山遣前鋒統領鄂莫克圖等略寧遠遣護衛及親軍策應誘殺三桂等追兵三月三桂復率兵四千駐塔山分兵至高橋不戰而退遂縱兵追至連山斬三十人獲馬三十師踰寧遠城西十里審視糧運海道寧遠兵出犯又擊敗之四月凱旋十月議王駐高橋時有軍行勞苦語又縱敵人私行獵及上御殿宴賚不俟賞先歸等罪削爵詔從寬

罰鍰又議值敏惠恭和元妃喪時王歌舞應幽禁詔免罪八年九月復同鄭親王征寧遠軍城北填壕布雲梯以礮急攻城頽敵潰斬遊擊吳良弼都司王國安等二十餘員直抵前屯衛立營柵復移礮城西攻之斬總兵李輔明袁尙仁等三十餘員兵四千餘明中前所總兵黃色棄城遁進拔之順治元年四月同睿親王入山海關破流賊李自成十月晉封和碩英親王賜鞍馬二尋命爲靖遠大將軍由沿邊趨陝西斷賊歸路先是宣府巡撫李鑑以赤城道朱壽整貪酷不法將劾之壽整遣子入京囑素識之旗人綽書泰求王給印札與鑑令貰壽整罪至是王出師過宣府召諭鑑曰壽整忠良宜釋免鑑曰此重犯若擅釋之王亦不便綽書泰時在側叱之曰爾何不懼王而反懼冲齡皇帝耶鑑艱然去王復遣綽書泰與總兵劉芳名強之不可事聞壽整綽書泰俱伏誅賚鑑金幣二年二月以王擅出邊至土默特鄂爾多斯逗遛需索諭趣之尋奏大軍入邊剿賊八戰皆捷陝西屬城克者四降者三十八時自成已爲豫親王多鐸所敗棄西安據商州上命多鐸還趨江南而以阿濟格追剿流賊方自成南走時攜賊十三萬并湖廣襄陽承天荊州德安守禦賊七萬聲言欲取南京水陸齊下王分兵躡其後追及於鄧州承天

德安武昌富池口桑家口九江屢敗賊撫其降者窮追至賊老營大破之自成僅以步卒二十人遁斬其兩叔父及僞汝侯劉宗敏於軍僞軍師宋獻策總兵左光先等皆就俘是役凡十三戰皆大捷故明寧南侯左良玉子夢庚方泊軍九江聞大軍至執總督袁繼咸等率總兵官十二馬步兵十萬舟數萬詣軍門降計所下河南屬城十二湖廣屬城三十九江西屬城六江南屬城六皆設官撫定閏六月捷聞命侍臣赴軍慰勞復諭曰王克奏膚勳不勝喜悅念王及行閒將士馳驅跋涉懸崖峻嶺深江大河萬有餘里可謂勞苦而功高矣寇氛既靖宜卽班師其招撫餘兵應留充軍伍或散歸田里王與諸大臣商權行之八月師旋方自成遁時王誑報已死又不候旨班師攝政王多爾袞傳語以王等有罪不遣迎但於午門會齊歸第復議前脅李鑑令釋朱壽鏊又擅索土默特鄂爾多斯馬降郡王罰銀五千兩又王在軍中嘗稱上爲孺子諭隨征都統公譚泰等集衆暴其罪譚泰等匿之至是論罪譚泰等降革有差三年正月以張蓋坐午門罪之未幾復原爵五年八月剿平天津曹縣土寇十一月喀爾喀行獵近邊命赴大同駐守十二月大同總兵姜瓖聞大兵將至疑襲已據城叛附近十一城皆應王至夜圍之事聞卽

命王爲平西大將軍以都統巴顏等率兵會討六年正月賊黨劉遷犯代州據外
郭章京愛松古遊擊高得勝被圍遣端重郡王博洛等往援破斬賊渠耶方遷遁
去三月攝政王至大同會王兩妃卒攝政王諭令先歸王啟云予不希富貴但丈
夫重名譽欲佐命效力俾後世垂名史冊耳顧以妻死棄大事而歸乎卒不行四
月復左衛命還京六月遣人啟攝政王言輔政德豫親王征流寇至望都潛身僻
地破潼關西安不殲其衆追騰機思不取其國功績未著不當優異其子鄭親王
乃叔父子不當稱叔父子乃太祖之子皇帝之叔當以予爲叔王攝政王拒之曰
德豫親王薨未久何忍出此言曩者令爾征流寇德豫親王征江南爾逗遛邊外
德豫親王乃破流寇克西安平定江南河南浙江追騰機思敗喀爾喀二汗兵功
較爾甚多且原係親王爾原爲郡王其一子吾養爲子一子襲王爵何爲優異鄭
親王雖叔父子原係親王爾安得妄思越分自請爲叔王已而王復請營府第於
是攝政王廷數其罪曰爾前往大同擅加大同宣府文武官各一級私除各處職
官違命攻渾源州又與郡王瓦克達私贈財物姑免治罪嗣後勿復預部務接漢
官八月復同貝子鞏阿岱統兵征大同九月僞總兵楊振威斬壤及其兄琳弟有

光詣軍門降大兵入城誅從逆吏民墮大同城埤堦五尺班師八年正月攝政王薨於喀喇河屯王赴喪次卽歸帳其夜諸王赴臨王獨不至而私遣人至京召其第五子郡王勞親以兵迎脅攝政王所屬人附己詐言攝政王悔以多爾博爲子曾取勞親入正白旗又怨攝政王不令豫親王子多尼詣己詰責豫親王舊屬阿爾津僧格且諷端重親王博洛等速推己攝政至石門上迎喪王不去佩刀勞親兵至王張纛與合隊左右坐舉動甚悖攝政王近侍額克親吳拜蘇拜等首其欲爲亂鄭親王等卽於路監守之至京翰實議削爵幽禁降勞親貝子閏二月以初議罪尙輕下諸王大臣再議移繫別室籍其家子勞親等皆黜宗室三月阿濟格於獄中私藏兵器事覺諸王大臣復議阿濟格前犯重罪皇上從寬免死復加恩養給三百婦女役使及僮僕牲畜金銀什物乃仍起亂心藏刀四口欲暗掘地道與其子及心腹人約期出獄罪何可貸應裁減一切止給婦女十口及隨身服用餘均追出取入官十月監者復告阿濟格謀於獄中舉火於是論死賜自盡爵除第一子和度初封輔國公順治元年封固山貝子三年十月卒第二子傅勒赫順治二年封鎮國公八年削爵十七年三月卒十八年四月以傅勒赫因父罪被黜

復封其次子構孳爲輔國公康熙五年三月卒構孳弟綽克都康熙四年正月封
輔國公二十七年十月任盛京將軍三十七年四月以不稱職革任十一月復議
綽克都久任將軍不能訓練削爵 初次襲普照綽克都第八子康熙三十七年
十一月宗人府議革綽克都公爵不准承襲得旨照議不准承襲則英王一支絕
矣此公爵著其子普照承襲十二月襲封輔國公五十二年十一月議普照恭送
淑惠妃發引違例乘馬削爵以弟經照襲雍正元年三月復以軍前效力封輔國
公尋署領侍衛內大臣四月署鑲藍旗護軍統領兼理右翼前鋒統領五月署西
安將軍七月授宗人府右宗人二年七月任鑲藍旗滿洲都統九月卒年三十有
四十一月子恆冉襲三年九月諭宗人府曰普照之子恆冉見在承襲公爵其家
原不應有二公向因普照在軍前效力尙屬勤謹且年羹堯之妻係普照兄女朕
因年羹堯青海之功又念普照原係承襲公爵之人是以特授爲輔國公今年羹
堯如此背負朕恩其普照之公爵著不必承襲十年六月追議普照受年羹堯銀
兩削爵 二次襲經照綽克都第九子康熙五十二年十二月襲封輔國公雍正
十年六月以冒領所屬護軍校錢糧削爵 三次襲璐達綽克都孫閒散宗室隆

德子雍正十年十二月襲封奉恩輔國公乾隆六年三月卒年三十有七諡曰恭簡 四次襲麟魁恭簡輔國公璐達第一子乾隆六年七月襲封奉恩輔國公十年十二月以殘虐削爵 五次襲九成綽克都孫閒散宗室興綬子乾隆十一年四月襲封奉恩輔國公二十五年五月以值班時隱匿金水河淹斃人事削爵 六次襲謙德九成第四子乾隆二十五年六月降襲三等鎮國將軍三十二年三月卒年十九 七次襲順德九成第七子乾隆三十二年六月降襲奉恩將軍四十年正月諭曰朕覽實錄載英親王阿濟格秉心不純往追流賊誑報已死又擅至沿邊索馬且向巡撫囑託公事過跡昭著雖前此亦有微勞究不足以抵其罪黜爵實由自取至其子孫前俱降爲庶人削其宗籍皇祖御極之初曾加恩將伊次子傅勒赫復還宗支追封公爵遞襲其餘諸子仍行除籍嗣於康熙五十二年復蒙恩將伊第三子伯爾遜第八子佟塞第十子鄂拜第十一子班進泰各支賜給紅帶子附入玉牒今思傅勒赫一支旣已作爲宗室襲爵其有後之伯爾遜等各支及無後之和度等同係英親王之子孫似毋庸復爲區別因推廣皇祖恩意著交宗人府一體查明復還黃帶子列入宗譜嘉慶元年十月以病休致四年

二月授頭等侍衛五年六月順德卒年四十有七 八次襲華寧奉恩將軍順德
第一子嘉慶五年十二月襲封奉恩將軍

清史列傳卷一終

清史列傳 卷二

宗室王公傳二

和碩睿親王多爾袞

多爾袞太祖高皇帝第十四子初封貝勒天聰二年二月上征察哈爾多羅特部大敗之敖穆掄俘獲萬餘以多爾袞從征有功賜號墨爾根岱青三年十月從上自龍井關入明邊與三貝勒莽古爾泰等攻漢兒莊降之十一月先驅赴通州相視渡河捕哨卒從上攻明北京敗寧遠巡撫袁崇煥錦州總兵祖大壽援兵於廣渠門外十二月遇明山海關援兵於薊州殲之四年二月上自灤河旋蹕多爾袞與莽古爾泰先行破敵營斬級六十獲馬八五年三月命諸貝勒直言時政多爾袞奏曰讞獄重務凡任事諸臣當悉心詳議不可苟且塞責七月初設六部命掌吏部事八月從上圍大凌河城明兵出誘戰多爾袞偕諸將衝入陣敵墮壕死者百餘城上礮矢齊發我將士有陣沒者上切責其從官曰定例遇敵時貝勒坐鎮軍中令諸將率兵擊之今貝勒輕自進戰爾等何不阻止儻有疏失爾等死不足

蔽幸矣十月大壽以錦州降多爾袞與貝勒阿巴泰等以兵四千隨大壽作潰奔狀城內兵分路迎並爲我軍擊敗事詳饒餘郡王傳六年五月從上征察哈爾與貝勒濟爾哈朗俘其部衆千餘於歸化城西南黃河岸七年六月詔問證明及朝鮮察哈爾三者何先奏言宜整兵馬乘穀熟時入明邊圍北京截其援兵毀其屯堡爲久駐計可坐待其敝也八年五月從上證明入龍門口敗明兵克保安州事詳英親王傳略朔州至五臺山而還先是我軍征察哈爾林丹汗西渡河欲奔唐古特行至大草灘病卒其子額哲率千餘戶留托里圖九年二月上命多爾袞同貝勒岳託薩哈璘豪格統兵一萬招之四月至錫喇珠爾格降其台吉索諾木及所屬千五百戶進偪托里圖恐其衆驚潰按兵不動額哲母葉赫貝勒錦台什女孫也其弟南楚暨族叔祖阿什達爾漢皆爲我大臣遣宣諭慰撫額哲遂奉其母率宰桑台吉等衆迎降時鄂爾多斯部濟農誘額哲往附旣盟且行矣追留之諭盡返所攜察哈爾人衆不然卽移兵討濟農懼盡送於軍六月師還渡河岳託率兵千衛降衆駐歸化城多爾袞與兩貝勒攜額哲及宰桑台吉等證明自平魯衛至朔州毀寧武關略代州忻州崞縣黑峯口及應州斬級六千餘俘獲無算仍由

歸化城攜降衆還察哈爾有元玉璽交龍紐鐫漢篆曰制誥之寶順帝失之沙漠越二百餘年有牧山麓者見羊不食草以蹶撼地發之乃璽歸於元裔博碩克圖汗後爲林丹汗所得至是多爾袞令額哲獻於上衆貝勒大臣以蒙古悉臣服且得前代璽表上尊號事具穎毅親王傳崇德元年四月晉封和碩睿親王八月上以武英郡王阿濟格饒餘貝勒阿巴泰統師征明已越北京諭王同豫親王多鐸等征山海關以牽制明兵至錦州收降城中士人胡有陞張紹禎門世文門世科秦永福等聞武英郡王奏捷乃班師十二月從上征朝鮮二年正月同肅親王豪格別從寬甸路入長山口克昌州敗其兵於寧邊城下又以五千人追敗其黃州援兵萬五千進攻江華島以紅衣礮擊潰船四十乘勝入島殲伏兵千餘克其城獲朝鮮王妃及其二子國王李傑窮蹙乞降上班師命王約束後軍攜朝鮮質子李滢李溟及大臣子以還三年二月上親征喀爾喀以王與禮親王代善等留守並監築遼陽都爾弼城逾月工竣改名屏城復同阿巴泰董治盛京至遼河大路廣十丈高三尺夾以壕八月授奉命大將軍統左翼兵征明白董家口東登山毀邊牆入掩其無備取青山營遣人約右翼兵會通州河西越北京至涿州分兵入

道右傍西山麓左沿連河長驅並進自北京西千里內明將卒皆潰遁略地至山西界而還復東趨臨清渡運河攻濟南破之還略天津遷安由太平寨出青山關凡二十餘戰皆捷克城四十餘降者六俘戶口二十五萬有奇四年四月凱旋賜馬五銀二萬兩五年六月同肅親王等赴明義州屯田諭以駐營近錦州斷敵往來路至則攻克錦州城西九臺盡刈其禾稼又攻克小凌河西二臺七月明兵五百出錦州城夜襲我鑲藍旗營擊卻之斬八人明總督洪承疇至寧遠分兵據杏山營城下擊敗其騎兵獲馬七十上遣人傳諭曰王等但固守營壘俟敵來犯乃擊之是月敵兵千餘出戰卻復入擊斬甚衆獲馬百餘旋復斬其出樵者八十六人又追斬明兵夜入義州戕我屯卒者九月敗敵杏山城北擊松山援兵獲馬匹甲仗六年二月攻廣寧山城擊松山援兵斬二百四十及出獵小凌河之錦州兵百七十餘是時圍錦州之王貝勒等移營去城三十里又令每旗一將校率每佐領下甲士五人先歸上遣鄭親王濟爾哈朗往伏傳諭王曰前令爾等圍錦州由遠漸近以困之今離城遠駐致敵人田獵輓運任意往來軍律何在若久駐馬疲當徧察以定去留仍嚴懲不善牧者乃均派遣還尤屬錯謬其由何人倡議各指

名擬罪王回奏臣因敵兵在錦州松山杏山三城人其馬皆牧他處若彼來犯可更番抵禦是以遣每旗官一員率佐領下五人還牧馬修治甲冑器械又因舊駐近城處草盡移遠就牧皆臣倡議應治臣罪上又遣內大臣等至遼河傳諭曰朕愛爾過於諸子弟賚予獨厚以爾勤勞國政恪遵朕命故也今於圍敵緊要之時離城遠駐遣兵歸家何違命若此其自行議罪王奏臣識庸慮短背違諭旨罪應死上命降爲郡王罰銀萬兩奪兩佐領戶口六月同肅親王往代鄭親王等圍錦州承疇率王樸李輔明唐通白廣恩曹變蛟馬科王廷臣吳三桂八大將合兵十三萬次松山屢迎戰王擊卻之以敵兵多請濟師上親統大軍疾馳六日至戚家堡遣大學士剛林諭王以立營高橋王令剛林代奏聖駕親臨臣等勇氣倍增惟務進攻但明兵甚衆臣等屢攻戰微有損傷若再速戰恐力不及遽立營高橋慮敵人潛約錦州松山兩處兵夾攻請上駐營松山杏山間上從之自烏欣河南山至海縣互列營明兵屢犯我鑲藍旗鑲紅旗諸汛旣敗卻伺我軍歸營輒來犯上張黃蓋指揮布陣明將士望見皆潰遁王偕貝子洛託等趨塔山大路橫擊之敵死者相枕藉遂攜紅衣礮攻克塔山外四臺擒明副將王希賢等三桂樸由杏山

奔寧遠九月王還盛京十一月往代貝勒杜度等圍錦州七年二月下松山城承
疇就擒三月克錦州大壽以城降四月移師克塔山城殲官屬及兵七千復以礮
攻杏山城管糧官朱廷榭副將呂品奇降盡毀松山塔山杏山三城乃班師七月
敘功復爵和碩睿親王八年八月世祖章皇帝卽位禮親王集諸王貝勒大臣議
以鄭親王與王輔政王自誓曰如不秉公輔理妄自尊大天地譴之越日郡王阿
達禮潛語王曰王正大位我當從王貝子碩託亦言內大臣及侍衛皆從我謀王
可自立王遂與禮親王發其謀阿達禮碩託並伏誅十二月同鄭親王集衆定議
罷諸王貝勒貝子管理六部順治元年正月卻朝鮮國王李倧餽物告鄭親王及
諸大臣曰朝鮮國王因予取江華島時全其妻子常以禮來餽較諸王獨厚向曾
奏聞先帝受之今我等輔政誼無私交不當受遂定議禁外國餽送諸王貝勒是
月鄭親王集內三院六部諸大臣諭以凡政事先白王書銜名亦先之三月都統
和洛會等訐肅親王怨王不立己語言悖妄因集衆定讞削肅親王爵以議政大
臣揚善等詔附謀亂誅之四月上御篤恭殿授王奉命大將軍印給御用蠶蓋敕
便宜行事率武英郡王豫郡王恭順王孔有德懷順王耿仲明智順王尙可喜等

證明師次翁後明平西伯吳三桂自山海關書來請兵王得書卽移錦州紅衣礮向山海關復三桂書曰我國向欲與明修好屢致書明君臣不計國家喪亂生民塗炭曾無一言答是以整師三入蓋示意於明欲其熟籌通好今則不復出此惟底定中原與民休息而已今聞流賊攻陷京都崇禎帝慘亡不勝髮指用率仁義之師沈舟破釜誓不返旌必滅賊出民水火伯遣使致書思報主恩與流賊不共戴天誠忠臣之義勿因向守遼東與我爲敵尙復懷疑昔管仲射桓公鉤桓公用爲仲父以成霸業伯若率衆來歸必封以故土晉爲藩王國讐可報身家可保世子孫長享富貴師次連山三桂復遣使請速進夜馳踰寧遠次沙河距關十里三桂報賊已出邊立寨王令諸王迎擊敗賊將唐通於一片石師至關三桂出迎王令三桂歸營兵各以白布繫肩爲識恐與賊混致誤殺使先驅入關時李自成率賊二十餘萬自北山橫亙至海列陣待我兵少對賊布陣不及海岸王令曰流賊橫行久獷且衆不可輕擊吾觀其陣大相去遠首尾不能顧可鱗次集我兵對賊陣尾伺其氣衰突之必勝努力破此則大業成矣勿違節制越伍躁進陣旣列令三桂兵居右翼末悉衆搏戰是日大風揚沙蔽天咫尺莫辨賊力鬪良久我軍

呼譟者再風遂止從三桂陣右突出衝賊中堅萬馬騰躍飛矢雨墮自成方登高岡觀戰知爲我兵膽落急策馬下岡走我兵無不一當百追奔四十里賊大潰遁回京都王卽軍前承制進三桂爵平西王下令關內軍人皆薙髮以馬步兵萬隸三桂先驅追賊乃誓諸將曰此行除暴救民滅賊安天下勿殺無辜勿掠財物勿焚廬舍不如約者罪之仍諭官民以取殘不殺共享太平之意自關以西各城堡百姓逃竄山谷者皆還鄉里薙髮迎降遂以捷音馳奏五月朔師次通州自成已先一日焚宮闕載輜重西遁王令諸王同三桂各率所部追賊翌日王入京師明文武百官率軍民老幼焚香跪迎朝陽門外設故明鹵簿請乘輦王曰予法周公輔成王不當乘輦諸臣以周公負扆攝政固請王曰予來定天下不可不從衆意乃乘輦入武英殿下令安輯百姓飭將士皆乘城毋入民舍有卒屠民家犬射傷犬主斬以徇民皆安堵如故爲崇禎帝發喪三日具帝禮葬歸順諸臣俱以明原官任事武英郡王等追賊至望都自成奔西安畿輔諸城俱納款分遣都統覺羅巴哈納石廷柱葉臣及侍郎王鼐永等招撫山東山西河南以京城內外經賊蹂躪鰥寡孤獨無生計者飭所司瞻養告官吏軍民曰養民之道莫大於省刑罰薄

稅斂自明季禍亂刁風日競以越訴誣告爲常設機構訟敗俗傷財心竊痛之自今嘉興維新凡五月初二日味爽以前罪無大小悉行宥免違諭輿訟卽以所告罪罪之鬪毆婚田細事就有司告理重大經撫按結案非機密重情毋得入京越訴訟師誣陷良民加等反坐前朝敝政莫如加派遼餉外又有剿餉練餉數倍正供遠者二十年近者十餘載天下嗷嗷朝不及夕更有召買糧科諸名目巧取殃民今與民約額賦外一切加派盡予刪除如官吏仍混徵暗派察實治罪時明福王朱由崧自立於江寧其大學士史可法督師揚州又設江北四鎮沿淮徐置戍卒王欲招之降令南來副將韓拱薇等致書可法曰予向在瀋陽卽知燕京物望咸推司馬後入關破賊得與都人士相接識介弟於清班曾託其勒手書致衷緒未審以何時得達比聞道路紛紛多謂金陵有自立者夫君父之讐不共戴天春秋之義有賊不討則故君不得書葬新君不得書卽位所以防亂臣賊子法至嚴也闖賊李自成稱兵犯闕手毒君親中國臣民不聞加遺一矢平西王吳三桂介在東陲獨效包胥之哭朝廷感其忠義念累世之宿好棄近日之小嫌爰整貔貅驅除狗鼠入京之日首崇懷宗帝后諡號卜葬山陵悉如典禮親郡王將軍以下

一切故封不加改削勳戚文武諸臣咸在朝列恩禮有加耕市不驚秋毫無犯方擬秋高氣爽遣將西征傳檄江南聯兵河朔陳師鞠旅戮力同心報乃君國之讐彰我朝廷之德豈意南州諸君子苟安旦夕弗審事機聊慕虛名頓忘實害予甚惑之國家之撫定燕都乃得之於闖賊非取之於明朝也賊毀明朝之廟辱及先人我國家不憚征繕之勞悉索敝賦代爲雪恥孝子仁人當如何感恩圖報茲乃乘逆寇稽誅王師暫息遂欲雄據江南坐享漁人之利揆諸情理豈可謂平將以爲天塹不能飛渡投鞭不足斷流耶夫闖賊但爲明朝崇耳未嘗得罪於我國家也徒以薄海同讐特伸大義今若擯號稱尊便是天有二日儼爲勅敵予將簡西行之銳轉旆東征且擬釋彼重誅命爲前導夫以中華全力受制潢池而欲以江左一隅兼支大國勝負之數無待著龜矣予聞君子之愛人也以德細人則以姑息諸君子果識時知命篤念故主厚愛賢王宜勸令削號歸藩永綏福祿朝廷當待以虞賓統承禮物帶礪山河位在諸王侯上庶不負朝廷伸義討賊興滅繼絕之初心至南州羣彥翩然來儀則爾公爾侯列爵分土有平西之典例在惟執事實圖利之輓近士大夫好高樹名義而不顧國家之急每有大事輒同築舍昔宋

人議論未定兵已渡河可爲殷鑒先生領袖名流主持至計必能深維終始寧忍隨俗浮沈取舍從違應早審定兵行在即可西可東南國安危在此一舉願諸君子同以討賊爲心毋貪一身瞬息之榮而重故國無窮之禍爲亂臣賊子所竊笑予實有厚望焉記有之惟善人能受盡言敬布腹心竚聞明教江天在望延跂爲勞書不宣意可法旋遣人答書曰南中向接好音法隨遣使問訊吳大將軍未敢遽通左右非委隆誼於草莽也誠以大夫無私交春秋之義今倥偬之際忽捧琬琰之章真不啻從天而降也循讀再三殷殷致意若以逆賊尙稽天討煩貴國憂法且感且愧懼左右不察謂南中臣民媿安江左竟忘君父之怨敬爲貴國一詳陳之我大行皇帝敬天法祖勤政愛民真堯舜之主也以庸臣誤國致有三月十九日之事法待罪南樞救援無及師次淮上凶問遂來地坼天崩山枯海泣嗟乎人孰無君雖肆法於市朝以爲泄泄者之戒亦奚足謝先皇帝於地下哉爾時南中臣民哀慟如喪考妣無不拊膺切齒欲悉東南之甲立翦凶讐而二三老臣謂國破君亡宗社爲重相與迎立今上以繫中外之心今上非他神宗之孫光宗之子而大行皇帝之兄也名正言順天與人歸五月朔日駕臨南都萬姓夾道歡呼

聲聞數里羣臣勸進今上悲不自勝讓再讓三僅允監國迨臣民伏闕屢請始以十五日正位南都從前鳳集河清瑞應非一卽告廟之日紫雲如蓋祝文升霄萬目共瞻欣傳盛事大江涌出枺梓十萬章助修宮殿豈非天意也哉越數日遂命法視師江北刻日西征忽傳我大將軍吳三桂借兵貴國破走逆成爲我皇帝后發喪成禮埽清宮闕撫輯羣黎且罷薙髮之令示不忘本朝此等舉動振古鑠今凡爲大明臣子無不長跼北向頂禮加額豈但如明諭所云感恩圖報已乎謹於八月薄治筐篚遣使犒師兼欲請命鴻裁連兵西討是以王師旣發復次江淮乃辱明誨引春秋大義來相詰責善哉言乎然此文爲列國君薨世子應立有賊未討不忍死其君者立說耳若夫天下共主身殉社稷青宮皇子慘變非常而猶拘牽不卽位之文坐昧大一統之義中原鼎沸倉猝出師將何以維繫人心號召忠義紫陽綱目踵事春秋其閒特書如莽移漢鼎光武中興丕廢山陽昭烈踐阼懷愍亡國晉元嗣基徽欽蒙塵宋高纘統是皆於國讐未翦之日亟正位號綱自未嘗斥爲自立率以正統與之甚至如元宗幸蜀太子卽位靈武議者疵之亦未嘗不許以行權幸其光復舊物也本朝傳世十六正統相承自治冠帶之族繼絕存

亡仁恩遐被貴國昔在先朝夙膺封號載在盟府寧不聞乎今痛心本朝之難驅除亂逆可謂大義復著於春秋矣昔契丹和宋止歲輸以金繒回紇助唐原不利其土地況貴國篤念世好兵以義動萬代瞻仰在此一舉若乃乘我蒙難棄好崇讐規此幅員爲德不卒是以義始而以利終爲賊人所竊笑也貴國豈其然往先帝軫念潢池不忍盡戮剿撫互用貽誤至今今上天縱英明刻刻以復讐爲念廟堂之上和衷體國介冑之士飲泣枕戈忠義民兵願爲國死竊以爲天亡逆闖當不越於斯時矣語曰樹德務滋除惡務盡今逆成未服天誅謀知捲土西秦方圖報復此不獨本朝不共戴天之恨抑亦貴國除惡未盡之憂伏乞堅同仇之誼全始終之德合師進討問罪秦中共梟逆賊之頭以洩敷天之憤則貴國義聞照耀千秋本國圖報惟力是視從此兩國世通盟好傳之無窮不亦休乎至於牛耳之盟則本朝使臣久已在道不日抵燕奉盤盂從事矣法北望陵廟無涕可揮身陷大戮罪當萬死所以不卽從先帝者實惟社稷之故傳曰竭股肱之力繼之以忠貞法處今日鞠躬致命克盡臣節所以報也惟殿下實昭鑒之書至宣付內院先是畿輔初定王遣輔國公屯齊哈和度等迎上駕奏言京師形勢宜建都皇上宅

中圖治宇內朝宗可慰天下仰望心至是率諸王迎駕於通州十月上御皇極門賜冊寶封叔父攝政王建碑紀績復豪格肅親王爵晉阿濟格爲英親王同三桂可喜由邊外趨綏德復多鐸豫親王爵同有德仲明由河南趨西安剿賊定後豫親王還征江南二年五月鄭親王等議定攝政王儀制視諸王有加禮王曰上前未敢違禮他處如議行翌日入朝見諸臣皆跪遂回輿責大學士剛林等曰諸臣何故跪此皇上之朝門也他處行此禮尙可乃行之朝門豈有竟受之理其諭衆官知之御史趙開心疏言攝政王見諸臣跪迎卽回因諸臣徒知尊王而不知王之尊皇上也以叔父之親兼攝政之尊原與諸王有異然羣臣謁王當與朝見皇上禮不同宜明定儀制又正號必先正名上諭稱攝政叔父王叔父惟皇上得稱之若臣庶皆稱則尊卑無異臣以爲當於叔父上加一皇字庶上下辨而名義定疏下禮部議行六月豫親王克揚州可法死之遂下江寧擒由崧於蕪湖江南平閏六月英親王剿賊至武昌東下九江故明寧南侯左良玉之子夢庚率衆降遂班師七月王致書豫親王曰王遣貝勒博洛等招撫常州蘇州杭州紹興諸府降故明潞王朱常淂淮王朱常清已悉知之大兵日久勞苦王可率諸將士還京南

京改稱江南省應天府改爲江寧府王量留兵交貝勒勒克德渾都統葉臣駐守朱氏在任改補他職所貯留充饒洪武陵設太監四名守陵兵四十名給地供祭祀投誠官或來京或彼處安置王其酌行之又致書英親王曰爾等先稱流賊盡滅李自成已死後又言戰敗賊兵凡十三次則先稱殲賊竟屬虛語今又聞自成遁江西爾等既稱在江西候旨何竟啟行八月英親王還京王令停遣官出迎尋議英親王出征時罪降郡王事具本傳十月誠浙江總督張存仁曰各官之任曾屢飭盡忠勤職毋諂媚餽遺本王爾爲封疆大吏宜表率僚屬爾乃送本王緞茶豈前諭未之聞耶後勿復如此是月同鄭親王肅親王入謝上賜良馬恩出諭曰凡遇朝賀大典朕受王禮若此等小節無與諸王同王奏上年幼冲臣不敢違禮俟上春秋鼎盛凡有寵恩自不敢辭十二月集諸王貝勒貝子公大臣等遣人傳語以尊崇皇上戒諂媚己且曰太祖太宗所貽之業予必力圖保護俟皇上春秋鼎盛卽行歸政又曰前所以不立肅親王者非予一人意因諸王大臣皆曰若立肅親王我等皆無生理是以不立傳語畢惟豫親王不答使者還報復遣傳語曰昔太宗賓天時予在朝門幄中坐爾與英王跪請卽尊位謂兩旗大臣屬望我者

多諸親戚皆來言了時以死自誓乃已此言豈烏有耶豫親王語塞諸王請議其罪王以事在赦前且誠令自省非欲加罪免之三年正月遣肅親王征四川流賊張獻忠二月集尙書公英俄爾岱等語曰予爲上攝政惟恐事多闕誤生民失所日夜焦思又素嬰風疾勞瘁弗勝予有過毋或瞻徇其一一指陳至國家事各有專屬戶部惟英俄爾岱內院惟范文程剛林寧完我額色特是賴皆當勉力勿憚勞又言諸王均宜優養安榮其拜跪儀文殊爲可省日者肅親王出師予爲祖道以金鞍良馬解贈王屈體而受予心惻至今因欲禁此禮爾等爲我善諭之五月率諸王大臣出安定門送豫親王征蘇尼特部諭將帥皆宜躬先臨陣奮勇破敵勿退後冒虛名八月豫親王擊敗喀爾喀部土謝圖汗碩雷汗凱旋王迎之烏蘭諾爾宴賚出征王貝勒及外藩台吉等四年七月集各部尙書啟心郎等諭曰內大臣禮部僉以豫親王功懋應晉輔政叔王予初亦念及以王爲予季弟猶豫未果今復思黜陟爲國家鉅典烏容瞻徇爾等與諸王議行又誠豫親王曰汝繼予輔政其益加勤勉尋罷鄭親王輔政復阿濟格親王十二月以風疾不勝跪拜從諸王大臣議元旦節上前行禮後起立以待其進酒入班行跪禮俱停止五年二

月肅親王平四川凱旋王以肅親王徇隱隨征護軍統領希爾根冒功事又欲擢用罪人揚善之弟吉賽戒飭再三不引咎令諸王大臣論罪幽繫之七月王視三桂子應熊服黃紗衣詰之乃豫親王所與罰豫親王銀二千兩十二月大同總兵姜瓖叛遣副都統阿喇善等助英親王圍剿六年二月王自將征大同次固爾班口有碩雷汗下七人來歸言碩雷汗兵馬距十日程王因出張家口趨喀爾喀行三日以馬瘠且道乏水罷仍移師討瓖三月朔次桑乾河先遣官招撫渾源州應州越數日應州從賊參將張祖壽山陰從賊知縣顏永錫各詣軍前降師薄大同遣人諭瓖曰渾源負固不服已克平應州山陰皆效順予今來此速開門迎降當宥爾今不降勢迫後降亦不從與其自取死亡不如速歸順瓖抗拒如故端重郡王博洛承澤郡王碩塞復代州敬謹郡王尼堪剿賊太原率都統阿賴等屢戰皆捷斬僞巡撫姜輝王卽軍中晉封三郡王爲親王告之曰爾等向不在貴寵列予以同係太祖孫加錫王爵位次俸祿不得與大藩等王先歸四月以貝子務達海鎮國公屯齊喀等征大同令英親王還京六月英親王遣人啟王以輔政德豫親王子不當優異鄭親王不當稱叔王而自請爲叔王王拒之曰豫王功多且舊封

親王其子多爾博予養爲子多尼應襲王爵何謂優異鄭王雖叔父子封親王亦久爾原爲郡王何得妄思越分英親王復請營府第王乃數其擅加大同衆官銜及諸罪令後勿預部事接漢官并誠衆曰諸王及內大臣有干預部院政事及內外漢官升降者不論言之是非卽治罪予於各官應遷者遷應降者降豈如明偏聽人言輕爲進退耶至諸王於非所屬官員私傳至府者罪在諸王聽傳往者罪在衆官如遇應傳之事諸王必先啟奏方許又諭禮部曰予師行在外所出政令必諭六部都察院鑾儀衛之事原設印信不便攜行今倣古制別鑄印各一加行在二字以後差遣侍衛用鑾儀衛印七月復統師征大同行十餘日遣護軍統領索渾希爾根助親王滿達海剿賊寧武關獵於阿嚕什巴爾台等處而還入寧武關僞總兵劉偉僞道趙夢龍等降大同僞總兵楊振威等斬瓌及其兄弟首獻軍前賊黨以次削平九月一等輕車都尉希福自以奉使外藩勞勩王優用王以其自請諭內大臣等議罪應棄市令免死革職不許隨朝及往來諸王大臣家十月以喀爾喀二楚呼爾嘗犯邊統師討之徵敖漢扎嚕特察哈爾烏喇特土默特四子部落各以兵會至喀屯布拉克不見賊乃班師十二月王妃博爾濟吉特氏薨

以玉冊寶追封爲敬孝忠恭正宮元妃七年正月納肅親王妃博爾濟吉特氏並遣官選女子於朝鮮二月令部不須題奏者付親王滿達海及端重親王敬謹親王料理五月率諸王貝勒獵山海關令親王多尼順承郡王勒克德渾貝子務達海錫翰鎮國公漢岱並議政是月朝鮮送女至王親迎之於連山卽日成婚六月獵中後所責隨獵王貝勒等不整行列罪罰貝勒屯齊尙善貝勒扎喀納綏有差宥親王滿達海罰申戒之七月王欲於邊外築城清暑令戶部計額徵地畝人丁數加派直隸山西浙江山東江南河南湖廣江西陝西九省銀二百四十九萬兩有奇輸工用王尋以悼妃故有疾錫翰與內大臣席納布庫等詣第王怨曰頃予罹此莫大之憂體復不快上雖人主念此大故亦宜循家人禮一爲臨幸若謂上方幼沖爾等皆親近大臣也又曰爾等毋以予言請駕臨錫翰等出王遣人追止之不及於是上幸王第王責錫翰等罪降罰有差八月遣禮部尙書阿哈尼堪迎朝鮮王李湊之弟阿哈尼堪啟理部事諸王以理事官恩國泰自代事覺議罪革阿哈尼堪職罰親王滿達海銀三千兩降端重親王敬謹親王爲郡王各罰銀二千兩十一月王以疾率諸王貝勒獵邊外十二月薨於喀喇河屯年三十有九上

聞震悼親率王貝勒大臣縞服迎奠東直門外允議政王大臣請部院事仍令滿達海博洛尼堪三王理之八年正月議以王嗣子多爾博襲封親王俸祿視諸王三倍用物同御用者撤去裁護衛百員爲六十議入得旨朕之初心本欲於攝政王歸政之後優禮酬報不意王中道捐棄未遂朕懷今多爾博應特加恩禮所議裁去護衛四十朕殊不忍其仍留八十員尋以王近侍蘇克薩哈詹岱爲議政大臣復博洛尼堪親王詔各省輸助築城銀盡抵今年額徵錢糧二月蘇克薩哈詹岱等首告王薨時其侍女吳爾庫尼將殉呼從官羅什博爾惠蘇拜穆濟倫告以王曾製八補黃袍令與大東珠朝珠黑貂褂潛置棺內又王欲於永平圈房以兩旗官兵移駐與都統和洛會等共定逆謀因出獵稽遲未行都統譚泰亦首言王納肅親王妃并令肅親王子至第較射和洛會以惡言詈之於是鄭親王濟爾哈朗巽親王滿達海端重親王博洛敬謹親王尼堪及內大臣等疏言昔太宗文皇帝龍馭上賓諸王大臣共矢忠誠翊戴皇上因方在冲年令臣濟爾哈朗與睿親王多爾袞同輔政逮後多爾袞獨專威權不令濟爾哈朗預政遂以母弟多鐸爲輔政叔王背誓肆行妄自尊大以皇上之繼位盡爲己功又將太宗文皇帝昔年

恩養諸王大臣官兵人等爲我皇上攻城破敵剿滅賊寇之功全歸於己其所用儀仗音樂衛從俱僭擬至尊造府與宮闕無異擅用織造緞匹糜庫貯金銀將皇上侍臣伊爾登陳泰一族及所屬人丁剛林巴爾達齊二族盡收入己旗又擅自誑稱太宗文皇帝之卽位原係奪立以挾制中外又構陷威逼使肅親王不得其死遂納其妃且將戶口財產不歸公俱以肥己又誘皇上侍臣額爾克岱青席納布庫等欲令附己凡一切政事及批票本章不奉上命槩稱詔旨擅作威福任喜怒爲黜陟僭妄背理不可枚舉又不令諸王貝勒貝子公等入朝辦事令日候府前竟以朝廷自居顯有悖逆心臣等從前畏其聲威今蘇克薩哈等首告逆謀詳鞠皆實應追治其罪削爵黜宗室籍財產入官其嗣子多爾博給信親王多尼疏入得旨如議行閏二月追論王私閱太祖高皇帝實錄令大學士剛林等削書其母殉葬時事剛林等治罪如律十二年詔內外大小官直言時政吏科副理事官彭長庚一等子許爾安各上疏頌睿親王元功請復爵號修其墓下王大臣議鄭親王濟爾哈朗貝勒尙善等奏長庚言太宗文皇帝創業盛京諸王俱樹勳勞而睿親王之功爲冠又與諸王堅持盟誓扶立皇上鞠躬任事考自太宗文皇帝創

業遜諸王分理六曹從未以多爾袞功大推爲冠首皇上嗣膺大寶王大臣等同心翊贊亦非多爾袞獨效忠誠又言遇奸人煽惑離間骨肉於郡王阿達禮貝子碩託私謀擁戴乃執大義立置典刑查阿達禮碩託之伏法由謀於禮親王代善禮親王遺諭多爾袞言詞迫切多爾袞懼罪及己始行舉首又言奉命統兵收拾明疆大權在握關內關外咸知有攝政王一人是時皇上沖齡遠在盛京彼若肆然自帝誰能禁之而乃先驅綏定恭迎聖駕查多爾袞克取明疆並非秉權獨往先是臣濟爾哈朗率兵攻克明中後所前屯衛中前所三城凱旋乃遣多爾袞往收燕京彼時燕京不過一空城耳卽他王攻取亦勢在必克有何偉績又言當其初薨尙無異議爲時無幾朝論紛起論罪削爵毀滅過甚查多爾袞亡後禮數甚渥因近侍首告逆蹟審實始追奪爵號何謂朝論紛起毀滅過甚又言詢之故老聽之傳聞前後予奪之間似不相符查長庚分屬新進所詢故老何人所得傳聞又是何語又言肅親王妃瀆亂一事愆尤莫掩然功多罪少應存議親議政之條查多爾袞將肅親王無因戕害收其一妃又以一妃私與其兄英親王此罪尙云輕小何罪爲大多爾袞議親是矣肅親王又皇上何人獨非親乎又言私匿帝服

御用等物必由彼傳諭織造早晚齋送暫貯王府查多爾袞專製帝服隨身備用伊侍女密囑潛置棺內經首告始搜出並非暫貯之物又言方今皇上宵旰求寧而水旱相繼似同風雷之警伏思多爾袞在日豈無水旱之虞卽今日亦並無風雷之警何得以金縢比擬又言賜之昭雪復其爵號一以彰太祖之有子太宗之有弟皇上開創之有臣且以見太宗知人之明並以勵諸王作忠之氣幽明交感災眚可弭率皆狂惑之心悖妄之語至於援引成王周公事蹟以比睿王尤屬乖謬夫武王繼商而立封周公之子伯禽於魯特命周公攝守國政多爾袞攝政曾奉有太宗之特命乎周公誅管叔放蔡叔於郭鄰以其同武庚叛也肅親王亦曾有叛情乎且多爾袞圖肅親王元妃又以一妃與英親王周公曾有此行乎與其黨同謀離間皇上侍衛勒幸其第周公又有此行乎以避痘爲名奉皇上遠幸邊外西喇塔喇地方侍衛不及百人又乏扈從之兵時經長夏勢甚孤危周公又有此行乎與弟豫親王及英親王子勞親造府糜帑數百萬致兵餉空虛以他物抵充周公又有此行乎於海子內建避痘處所私動內帑擅差部員苦累官工夫皇上一切營建止用內府工匠而彼竟私役官工周公又有此行乎尤可異者多爾

袞欲離皇上私與其黨定計駐永平又擅娶朝鮮國王族女一女不足其願又娶一女未至而身亡又太宗時英親王被論因罰出公遏必隆等三佐領及至燕京多爾袞擅給還英親王又將黃旗下剛林和洛會巴爾達齊三族取入伊旗又皇上六近臣曾各盟誓效忠而多爾袞偪勒敗盟又違例於八旗選美女入伊府並於新服喀爾喀部索取有夫之婦又濫費公帑將織造江南蘇杭緞匹私爲己有充賞比倖種種不法情狀衆目共見其餘瑣細敗檢之事不可枚舉長庚爾安乃妄稱功倖周公結黨煽亂應論死家產籍沒妻子爲奴詔從寬並流徙寧古塔許爾安所襲父定國世爵准定國他子襲乾隆三十八年二月諭曰睿親王多爾袞當世祖章皇帝冲齡踐阼時攝政有年威福自專不能恪盡臣節身歿之後因其屬人首告經諸王大臣定罪除封成案具在第念我朝定鼎之初睿親王實先統衆入關肅清京輦檄定中原前勞未可盡泯今其後嗣廢絕而塋域之在東直門外者歲久益就榛蕪亦堪憫惻著交內務府派員往視繕葺仍爲量植松楸並准其近支王公等以時祭埽用昭朕篤念成勳之意四十三年正月諭曰睿親王多爾袞當開國時首先統衆入關埽蕩賊氛肅清宮禁分遣諸王追殲流寇撫定疆

陞一切創制規模皆所經畫尋卽奉迎世祖車駕入都定國開基以成一統之業厥功最著願以攝政有年威福不無專擅諸王大臣未免畏而忌之遂致歿後爲蘇克薩哈等所構授款於其屬人首告誣以謀逆經諸王定罪除封其時我世祖章皇帝實尙在沖齡未嘗親政也夫睿親王果萌異志則方兵權在握何事不可爲且吳三桂之所迎勝國舊臣之所奉止知有攝政王耳其勢更無難號召卽我滿洲大臣心存忠篤者自必不肯順從然彼誠圖爲不軌無難陰除異己以逞逆謀乃不於彼時因利乘便直至身後以斂服僭用明黃龍袞指爲覬覦之證有是理乎況英親王阿濟格其同母兄也於追捕流賊回京時誑報李自成身死且不候旨班師睿親王卽遣員斥責其非並免王公等往迎之禮又因阿濟格出征時脅令巡撫李鑑釋免逮問道員及擅至鄂爾多斯土默特取馬會議其罪降爲郡王平日辦理政務秉公持正若此是果有叛志無叛志乎又實錄載睿親王集諸王貝勒貝子公大臣等遣人傳語曰今觀諸王貝勒大臣等但知諂媚於予未見有尊崇皇上者予豈能容此昔太宗升遐嗣君未立英王豫王跪請予卽尊位予曰若必如此言予卽當自刎誓死不從遂奉皇上纘成大統似此危疑之日以予

爲君予尙不可今乃不敬皇上而媚予予何能容自今以後有盡忠皇上者予用之愛之其不盡忠不敬事皇上者雖媚予予不爾宥也且云太宗恩育予躬所以特異於諸子弟者蓋深信諸子弟之成立惟予能成立之每覽實錄至此未嘗不爲之墮淚則王之立心行事實能篤忠盡感厚恩深明君臣大義尤爲史冊所罕覩使王彼時如宋太宗之處心積慮則豈肯復以死固辭而不爲邪說搖惑耶乃令王之身後久抱不白之冤於泉壤心甚憫焉假令王之逆跡稍有左驗削除之罪果出於我世祖聖裁朕亦寧敢復翻成案乃實由宵小奸謀搆成冤獄而王之政績載在實錄者皆有大功而無叛逆之跡豈可不爲之昭雪乎前於乾隆三十八年因其瑩域久荒特敕量爲繕葺並准其近支祭掃然以王之生平盡心王室尙不足以慰彼成勞朕以爲應加恩復還睿親王封號追諡曰忠補入玉牒並令補繼襲封照親王園寢制度修其塋墓仍令太常寺春秋致祭其原傳有未曾詳敘者並交國史館恭照實錄所載敬謹輯錄增補宗室王公功績傳用副彰闡宗勳至意於是多爾袞追復舊封配享太廟其睿親王爵世襲罔替八月入祀盛京賢王祠 初次襲淳穎睿忠親王多爾袞七世孫初王嗣子多爾博歸本宗恩封

多羅貝勒生蘇爾發襲固山貝子生塞勒塞勒生功宜布皆襲輔國公功宜布生如松襲多羅信郡王淳穎如松第三子也乾隆三十六年四月襲信郡王修齡所遺奉恩輔國公四十三年正月上既追復多爾袞舊封命襲封和碩睿親王四十九年五月管理正紅旗覺羅學五十一年四月掌宗人府事十一月充玉牒館副總裁五十七年閏四月任正黃旗漢軍都統五十八年四月任閱兵大臣五十九年四月署正黃旗領侍衛內大臣是月調左宗正五月調右宗正嘉慶元年五月任正黃旗領侍衛內大臣是月調正白旗領侍衛內大臣十一月充玉牒館副總裁二年九月復調正黃旗領侍衛內大臣十二月調鑲紅旗滿洲都統四年正月高宗純皇帝龍馭上賓上命王總理喪儀是月管理藩院事授御前大臣六月上詣觀德殿回宮時王將宗人府引見官摺撤出諭曰朝廷之章疏豈有出入自由之理設遇有封口奏章或參劾大臣亦可任其徇私撤下乎卽淳穎之意爲朕節勞起見不知朕日理萬幾從不以爲勞何得將已遞之摺徑行撤回殊屬膽大著交宗人府嚴加議處尋議罰親王俸三月八月調正黃旗滿洲都統十一月命爲御前王內廷行走五年閏四月署健銳營事十一月薨年四十上念其人品端方

奉職勤慎輟朝三日親臨賜奠諡曰恭 二次襲寶恩睿恭親王淳穎第一子嘉慶四年三月授散秩大臣乾清門行走十二月歲滿封不入八分輔國公六年二月襲封和碩睿親王四月任正黃旗領侍衛內大臣七年五月薨年二十有五諡曰愼 三次襲端恩睿恭親王淳穎第四子嘉慶七年六月襲封和碩睿親王十年正月乾清門行走

和碩豫親王多鐸

多鐸太祖高皇帝第十五子初封貝勒天聰二年二月從上征多羅特部有功賜號額爾克楚呼爾三年十月從上證明由龍井關入同貝勒莽古爾泰多爾袞以偏師圍漢兒莊城降之遂會大軍克遵化進薄京城明寧遠巡撫袁崇煥錦州總兵祖大壽以兵二萬來援屯廣渠門外諸貝勒敗之追至壕多鐸以幼後潰卒來犯卻之十二月旋師薊州遇明援兵自山海關來距城二里許列陣多鐸同諸貝勒擊殲之五年三月命諸貝勒直言時政多鐸奏曰臣未預理刑其中公私不得知但觀法司諸臣實心任事秉公執法者少當令明習法律遵守成規八月從上圍明大凌河城正白旗兵圍東北多鐸軍爲策應旋同大貝勒代善等克近城臺

堡九月明援兵七千出錦州拒我前鋒軍於小凌河岸上以兵二百馳擊敵潰遁多鐸追迫錦州墜馬馬逸入敵陣乃乘軍校扎福塔之馬而還越十日明援兵四萬距大凌河十五里列營多鐸從上擊敗之十一月同貝勒濟爾哈朗往塔山東沿海截隘俘百餘人六年五月從上征察哈爾林丹汗遁同濟爾哈朗多爾袞等俘其衆千餘於歸化城西南黃河岸七年六月詔問征明及朝鮮察哈爾三者何先奏言我兵非怯鬪止攻山海關外城豈可必得攻關外城與攻北京城名雖不同勞苦則一宜直入關庶可厭士心成久遠計且相機審時古語有之若緩旦夕敵漸知備固城池修根本何隙之可乘我何愛於明祇念士卒勞苦姑與和若時可取原不待再計至察哈爾且勿加兵朝鮮已和勿遽絕惟先圖其大者如蒙天佑得之餘隨所求皆至矣八年五月從上征明入龍門口敗明兵克保安州事詳英親王傳復略朔州至五臺山還從上擊敗明兵於大同城南九年五月上先遣諸貝勒征明山西度明必調寧遠錦州兵往援命多鐸以軍入寧錦界牽制之遂由廣寧進以都統阿山石廷柱率兵四百前驅大壽令副將劉應選吳三桂劉成功趙國志合錦州松山兵三千五百營大凌河西多鐸甫過十三山站阿山等遣

人以敵數報多鐸盡率所部馳擊塵蔽天明兵驚潰我軍兩路追擊一至錦州一
至松山斬應選及軍官八人兵五百擒遊擊曹得功等獲馬二百餘甲胄無算翌
日攻克一臺回駐廣寧邊境旬餘乃還駕出懷遠門五里迎勞諭嘉其初專闖外
能出奇取勝賜良馬五甲五崇德元年四月晉封和碩豫親王六月命掌禮部事
八月同睿親王多爾袞征明錦州降胡有陞等由義州還十二月從上征朝鮮由
沙河堡領兵千繼前鋒軍至朝鮮國都其國王李倬遁南漢山城進圍之其臣在
外者以兵二萬餘援城中兵亦出屢擊之皆捷迎上駐城西獻所獲馬械命分賚
有差二年正月朝鮮全羅忠清兩道援兵列營南漢山命多鐸往視朝鮮兵拒山
下敗之追奔上山值雪陰晦乃還旦復進朝鮮兵已拔營遁收其馬千餘三年九
月上至演武場送睿親王征明王以日疾甫愈不至命俟睿親王班師議罪仍從
上征明錦州由蒙古扎袞博倫界分道同貝子博洛率護軍及土默特兵入明境
俘斬哨卒十餘攻克桑阿爾齊舊所居之大興堡斬守備及壯丁二百俘其戶口
道擒大壽謀二人詔往助鄭親王濟爾哈朗軍將過中後所大壽以兵來襲傷我
兵九人掠馬三十王且戰且退斬三十人夜達鄭親王營翌日薄中後所城上統

師至敵不敢出四年五月議前不送出師及中後所失士馬罪降多羅貝勒八月命掌兵部事十月同肅親王豪格征明寧遠敗敵城北山岡斬總兵金國鳳及其二子五年三月命同鄭親王分統左右翼兵往義州葺城屯田逾月畢工墾田東西四十里復同迎蒙古多羅特部蘇班岱等降衆敗明兵賜御廩良馬一事詳鄭獻親王傳十一月圍錦州夜伏兵桑阿爾齊堡旦敵至敗之追至塔山斬級八十餘獲馬二十六年三月復同鄭親王圍錦州收其守郭蒙古將諾本齊等屢敗明兵杏山松山間事俱詳鄭獻親王傳八月明總督洪承疇以八總兵十三萬衆來援錦州上親統大軍臨之自盛京馳六日環松山而營明兵震怖宵遁上命多鐸設伏明總兵吳三桂王樸從杏山奔寧遠我前鋒兵自杏山西逐之至高橋伏起殺敵無算九月上旋蹕留多鐸與諸王更番圍松山城中午夜出犯鑲黃旗營敗之斬級千餘十二月又犯正黃旗正紅旗營沿壕射卻之殪四百餘人七年二月明松山副將夏承德遣通款以其子舒出質約內應夜半梯而登生擒承疇及巡撫邱民仰總兵王廷臣曹變蛟祖大樂等七月敍功晉封多羅豫郡王十月貝勒阿巴泰由黃崖口征明薊州命多鐸屯寧遠邊境牽制明兵至則遣人入略俘百

餘人敵出戰敗之多獲牲械八年四月因聖躬違和有事祈禱疏言兵不得已而用今日之勢宜暫息兵至國中興作俟規模既定然後舉行但當以農務爲急農務克勤則庶民衣食豐足衣食豐足則舉國慶豫聖躬長享安和矣此後舉行未晚也順治元年四月隨睿親王入山海關破流賊李自成十月晉封和碩豫親王時明福王朱由崧自立於南京設江北四鎮扼淮徐爲割據計上命多鐸爲定國大將軍統師南征值河南奏流賊肆掠懷慶詔先剿賊河南十二月至孟津遣護軍統領圖賴先渡河走賊守將黃士欣等沿河十五寨堡望風歸附睢州明總兵許定國土寨首領李際遇降至陝州賊將張有曾壁靈寶縣城外拔之進距潼關二十里賊據山列營前鋒統領努山鄂碩等攻破之圖賴復率騎掩殺甚衆僞汝侯劉宗敏遁二年正月賊將劉方亮犯我營卻之自成親率步騎迎戰大軍進擊殲其步卒賊騎奔夜屢來犯皆敗還賊鑿重壕立堅壁大軍發巨礮進攻更疊戰方酣賊騎三百橫衝我師貝勒尼堪貝子尙善等躍馬來擊賊敗衄都統恩格圖等躡之斬獲甚衆諸軍連破賊營屍滿壕塹委軍械甲冑彌野自成精銳略盡遁還西安僞吳山伯馬士堯率所部七千餘衆降大軍入關獲士堯所遣致書自成

者三人並士堯斬以徇越二日師至西安自成已先五日燬室廬挈子女輜重出藍田口竄商州南走湖廣二月奏捷諭嘉壯猷偉略調度有方命以陝西事付英親王阿濟格卽由河南趨淮陽討南京之稱號自立者是月旋師河南流賊僞平南伯劉忠迎降三月分徇南陽開封親統師趨歸德州縣望風納款所至撫兵民設官屬疏請速鑄給印信以防詐僞從之詔獎方收關陝旋定中原剿寇安民勲庸茂著賜寶飾佩刀鍍金鞵帶四月趨泗州明守將焚橋遁遂夜渡淮直趨揚州距城二十里立營令鎮國將軍漢岱等前驅獲船三百餘翌日薄城招諭明大學士史可法翰林學士衛允文等降不從攻七日克其城擒斬之五月師至揚子江北岸明鎮海伯鄭鴻逵等以水師分守瓜洲儀徵我軍左右對敵列營相持三日造船二百餘留左翼兵駐江北岸遣鎮國將軍拜音圖等直渡江副都統李率泰引大軍次渡福王聞揚州失守遁太平大軍至南京明忻城伯趙之龍魏國公徐州爵大學士王鐸禮部尙書錢謙益等迎降收文武官數百員馬步兵二十三萬有奇王入駐城中安撫居民令投誠軍悉歸伍遣貝勒尼堪貝子屯齊等追福王於太平復走蕪湖欲渡江圖賴等邀之江口明靖國公黃得功迎戰敗中流矢死

總兵田雄馬得功縛福王及其妃歸我軍諭嘉王與諸臣同心協力克奏膚功遣侍衛赴軍勞之初福王走太平其大學士馬士英挾福王母南走杭州議奉潞王朱常澆拒守六月貝勒博洛等趨杭州士英迎戰敗渡錢塘江逃常澆率衆降淮王朱常清亦自紹興來降浙東西悉歸順王承制改南京爲江南省疏授江寧巡撫安慶巡撫以下官三百七十三人有僞稱杜陽王煽亂廬江無爲知州以聞遣總兵吳勝兆等剿平之尋奉詔俟貝勒勒克德渾至江寧俘福王等還京十月凱旋上行郊勞禮於南苑晉封和碩德豫親王賜黑狐帽紫貂朝服金五千兩銀五萬兩馬十鞍二三年五月蘇尼特部騰機思騰機特等叛奔喀爾喀詔集外藩諸蒙古兵於克魯倫河以多鐸爲揚威大將軍同承澤郡王碩塞統師追剿七月師至盈阿爾察克山聞騰機思在袞噶嚕台星夜疾進三日敗賊於諤特克山斬台吉茂海渡圖拉河追至布爾哈圖山斬騰機特子二騰機思孫三及喀爾喀台吉十三人盡獲其家口輜重師次扎濟布喇克喀爾喀土謝圖汗兩子以兵二萬碩雷汗子以兵三萬兩路迎戰我師奮擊大捷追奔三十餘里先後斬級數千俘千餘人獲駝千九百馬二萬一千一百牛萬六千九百羊十三萬五千三百有奇十

月凱旋上出安定門迎勞宴之所獲牲畜悉頒賚將士加賜王鞍馬一四年七月
晉封輔政淑德豫親王賜金千兩銀萬兩鞍馬二增冊文稱定鼎中原以來所建
功勳卓越等倫云六年三月薨年三十有六立碑紀功九年三月鄭親王濟爾哈
朗等議多爾袞既削封爵多鐸係其母弟應追降郡王從之康熙十年六月追諡
曰通乾隆四十三年正月諭廷臣曰豫親王多鐸從睿親王入關肅清京輦卽率
師西平流寇南定江浙實爲開國諸王戰功之最乃以睿親王之誣獄株連降其
親王之爵其後又改封信郡王雖至今承襲罔替但以王之勳績超邁等倫自應
世胄原封以彰殊眷豈可以風影微眚輒加貶易命追復親王及封號並配饗太
廟八月入祀盛京賢王祠 初次襲多尼豫通親王多鐸第二子崇德七年七月
封多羅郡王順治六年十月襲封和碩親王七年五月預議政八年二月加號曰
信九年三月追降多鐸爲郡王多尼亦降多羅信郡王罷議政十月復議政十五
年正月上命多尼爲安遠靖寇大將軍偕平郡王羅科鐸貝勒尙善杜蘭等證明
桂王朱由榔與四川廣西兩路軍會期進取九月由湖南至貴州會平越十一月
由貴陽趨安莊衛由榔之晉王李定國焚磨盤江鐵索橋遁十二月大軍以浮橋

濟遂自交水至松嶺衛擊走其鞏王白文選十六年正月薄雲南省城定國文選挾由榔奔永昌王入城駐守令貝勒尙善等由鎮南州克永昌府及騰越州六月以王跋涉險阻經歷寒暑傳諭慰勞賜御衣一蟒袍一及鞍馬弓矢等物十七年五月凱旋上遣內大臣迎勞六月追諭在雲南時誤坐前鋒統領瑚哩布等磨盤山敗績罪罰鍰十八年正月薨年二十有六諡曰宣和 二次襲鄂扎信宣和郡王多尼第二子順治十八年六月襲封多羅信郡王康熙十四年三月察哈爾布爾尼叛上命鄂扎爲撫遠大將軍往討以大學士圖海副之瀕行諭曰大兵出山海關當宣布從前待布爾尼厚恩及今不忍加誅之意彼若悔罪來歸則已否則以敕書付縱還蒙古特往諭之卽布爾尼等臨陣來降亦當保全恩養四月軍次岐爾哈泰偵賊屯達祿王留輜重與圖海及副都統烏丹等輕騎前布爾尼設伏列陣待王分布滿洲蒙古兵山澗間賊伏發撓我士默特兵破之布爾尼列火器以拒大軍奮擊賊大敗復收潰卒戰幾殲之獲馬械無算布爾尼偕弟羅布藏以三十騎遁至扎魯特境貴勒蘇特爲科爾沁赴調之部長沙津射殫察哈爾平王招撫餘黨千三百餘戶閏五月師旋上迎勞於南苑諭褒以遠行征討建立大功

賜金百兩銀五千兩二十四年十二月掌宗人府事二十九年七月噶爾丹深入烏珠穆沁上命恭親王常寧爲安北大將軍鄂扎副之三十五年二月上親征噶爾丹以王統領正白旗營三十八年十二月以情解宗人府任四十一年十月薨年四十有八 三次襲洞鄂豫通親王多鐸第七子順治十八年正月封多羅貝勒康熙十三年四川叛應逆藩吳三桂上命洞鄂爲定西大將軍同貝子溫齊輔國公綽克託討之師由陝西進將抵略陽陝西提督王輔臣叛於寧羌州洞鄂以道阻退次漢中留將軍錫卜臣等駐守自引兵出棧道由鳳縣至鳳翔復留副都統赫業等駐守身率餘兵回西安十四年正月上諭廷臣曰蘭州近邊要地應速遣兵駐守今保寧大兵已回西安達禮善巴圖魯兵亦將至西安其撥西安見在兵每佐領下四五十名赴蘭州剿禦逸賊洞鄂疏言蘭州固宜遣防但保寧還卒鎧甲未備達禮善巴圖魯兵兼程來恐難驟遣若以西安兵往恐輔臣由陳倉諸路斷我棧道自秦州平涼來徧深爲可虞又疏言興安兵變殺總兵王懷忠臣等出示安撫仍止前往興安之副都統穆舒渾兵上敕撫慰興安又諭洞鄂曰陝西重地棧道關係尤急沔州秦州乃通漢中要路其若何據守保固與總督等會議務

期萬全時鳳縣賊毀偏橋守隘阻運輔臣所部王好文等復斷棧道二月諭責洞鄂等退縮遲延致狡寇阻截仍嚴飭往定平涼秦州諸路於是將軍阿密達署副都統鄂克濟哈等率所調與京兵西安兵往平涼洞鄂與溫齊綽克託等率回自保寧及達禮善巴圖魯兵往秦州是月賊陷蘭州敕兩路兵速進洞鄂至隴州經仙逸關僞總兵高鼎蔡元拒關山河岸洞鄂與署前鋒統領穆占西安將軍佛尼勒等分布前後隊先遣都統赫業爲奇兵應援合力衝擊賊敗遁獲馬械無算進復關山關追擊五十里三月大軍次渭河奪其橋圍秦州四月四川平涼諸賊萬餘來援屯南山城內突出賊八千餘分擊敗之克東西兩關屢敗賊陣斬僞總兵何隆李國棟招撫僞文武官二百二十餘兵八千四百餘安輯民人九萬有奇復秦州佛尼勒等追剿至閿關賊迎戰敗之復禮縣追賊至西和殺千餘人陣斬僞官三十清水羌俱平捷聞詔嘉獎六月復遣安西將軍穆占復鞏昌僞總兵趙士昇以蘭州降七月上諭洞鄂曰國家仰荷天眷秦州鞏昌蘭州等處漸次恢復朕甚嘉悅此係保寧還旆之兵間關跋涉戮力效命所致須不時存念恤其勞苦非緊要必節其勞無大過則寬其罰爾等將兵在外事情經練頗多必能同寅協恭

折衷而行但相隔遼遠慮所及不得不爲告誡秦地實爲形勝要區今將軍提督總兵及投誠兵衆雲屯一處將軍張勇勞績甚多恐貝勒等藐忽視之生彼憤懣時廑朕懷貝勒等旣效勤勞底定秦省務期克奏全功以慰朕望八月招撫歸川十二堡僞參將普國祥及兵千餘與將軍畢力克圖阿密達會平涼賊出戰擊斬僞總兵郝天祥斃賊無算九月遣副都統鄂泰阿爾琥敗賊於寶雞縣羊添池山焚其營十二月疏言大兵攻平涼克取第一關廂距城三里許對南山屯營欲進薄城因溝深地險難下壘故未能卽下諭宜斷賊餉道以困之十五年二月諭兵部曰大將軍貝勒洞鄂等屯兵平涼日久賊寇尙未剿滅城池尙未恢復夫秦省不能卽定川賊尙在窺伺者皆由王輔臣未剿滅平涼未克取故也其以都統大學士圖海爲撫遠大將軍亟赴陝西剿滅逆孽其貝勒洞鄂以下悉聽大將軍節制是月疏言聞逆賊將斷關山擬遣兵往守但見在兵少難分至鞏昌雖有副都統翁愛率兵前赴而賊偪可虞命將軍錫卜臣等調兵守關山張勇等堵剿出犯秦鞏之賊十六年二月上以洞鄂統兵出征殊負委託削貝勒爵三十一年九月任正藍旗滿洲都統四十二年三月襲封多羅信郡王四十五年七月薨年六

十禮部請卹諭廷臣曰洞鄂補授都統襲封王爵以來並無感恩效力之處且原係軍政問罪之人不准賜卹其王爵亦當論嫡長所生應以前信郡王鄂扎之子德昭襲 四次襲德昭信郡王鄂扎第五子康熙四十五年七月襲封多羅信郡王雍正二年十一月授宗人府左宗正四年八月命管正白旗事務五年十一月轉右宗正乾隆二十七年二月薨年六十有三諡曰愨 五次襲如松豫通親王多鐸六世孫初王第三子多爾博出爲睿忠親王後睿忠親王被罪未及襲還本宗封多羅貝勒多爾博生蘇爾發襲固山貝子生塞勤塞勤生功宜布皆襲輔國公如松功宜布第三子也乾隆十一年六月襲父爵輔國公十七年七月任乾清門散秩大臣二十一年四月管健銳營事六月署鑲黃旗滿洲副都統二十二年正月署領侍衛內大臣尋授宗人府右宗人二月授兵部侍郎四月授鑲紅旗滿洲副都統二十三年二月調正黃旗滿洲副都統九月遷正黃旗漢軍都統二十四年六月轉左宗人九月署兵部尙書十二月授領侍衛內大臣二十五年十月授綏遠城將軍二十六年十一月調西安將軍二十七年閏五月襲封多羅信郡王八月授正藍旗蒙古都統九月署領侍衛內大臣二十八年七月授右宗正十

月管理宗人府銀庫事三十年十一月以縱輿夫開博場應革爵得旨寬免在閒散王上行走如松請歲繳王俸五千兩贖罪宗人府議不足蔽辜應革爵命照如松請仍免革爵三十五年十一月薨年三十有四諡曰恪 六次襲修齡信愨郡王德昭第十五子乾隆二十七年六月襲如松所遺之輔國公三十年十二月授散秩大臣三十四年十月授宗人府右宗人十二月任正白旗滿洲副都統三十五年正月調鑲紅旗滿洲副都統五月轉左宗人閏五月調正紅旗漢軍副都統三十六年四月襲封多羅信郡王四月授左宗正三十七年三月總理鑲白旗覺羅學四十二年正月命復豫通親王始封爵號晉襲和碩豫親王四月任正白旗蒙古都統四十八年十月授盟長十一月掌宗人府事四十九年閏三月調鑲藍旗滿洲都統五十一年三月薨年三十有八諡曰良 七次襲裕豐豫良親王修齡第一子乾隆五十一年十月襲封和碩豫親王六十年二月管理鑲紅旗覺羅學

和碩肅親王豪格

豪格太宗文皇帝第一子初從征蒙古棟夔察哈爾鄂爾多斯諸部有功封貝勒

天命十一年十月同大貝勒代善等征克扎嚕特部天聰元年五月上征明豪格同貝勒德格類等敗明兵於錦州復率偏師衛塔山糧運遇明兵二萬我前軍八十人擊卻之二年五月同貝勒濟爾哈朗征蒙古固特塔布囊誅之收其衆三年十月上征明命同三貝勒莽古爾泰等赴通州視渡口捕哨卒大軍由通州薄京城豪格迎擊明寧錦援兵於廣渠門外敵重兵右伏莽古爾泰令諸貝勒擊其右避敵者罪豪格獨如命衝殺至壕敵大潰十二月同貝勒岳託薩哈璘圍永平府別攻香河縣克之四年正月同岳託守瀋陽五年三月命諸貝勒直言時政豪格奏曰臣願竭忠爲國遇征伐不辭勞瘁以圖報稱七月上統師攻明大凌河城豪格與貝勒杜度等居守六年五月上征察哈爾林丹汗遁移師略歸化城諸路六月晉封和碩貝勒七年六月詔問征明與朝鮮察哈爾三者何先奏言我征明如徒得錦州餘壁不下恐曠日老我師今宜悉我衆及邊外新舊蒙古從舊道入頒示屯寨告以我願和而明不肯彼民身被創痍將自怨其主我勇氣自倍矣再用更番法俟馬肥益以漢兵巨礮一從寧遠一從舊路入夾攻山海關得則已不得屯兵彼地遣人招諭流賊來歸不然駐師通州偵流賊情形彼方分兵禦我俟其

懈襲之至朝鮮且暫行撫慰察哈爾如近我境則相機而行遠則且緩圖也八月與貝勒阿巴泰等略明山海關俘獲戶口牲畜四千有奇八年七月上親統大軍證明由宣府趨朔州豪格偕額駙揚古利毀邊牆大兵遂由尙方堡分道進八月同貝勒多爾袞略朔州及五臺山還從上視大同城擊敗明援兵九年二月命同多爾袞岳託薩哈璘統兵收察哈爾林丹汗子額哲受其降師還抵歸化城岳託以疾留豪格同諸貝勒略明山西州縣敗明兵遂會岳託於歸化城班師事詳睿忠親王傳崇德元年四月晉封和碩肅親王六月命掌戶部事尋坐黨岳託且漏上言有怨心降貝勒解部任罰鍰八月同睿親王多爾袞攻明錦州降胡有陞等十一月命仍攝戶部十二月從上征朝鮮同睿親王統滿洲蒙古及外藩蒙古各左翼兵列從寬甸入二年正月入長山口昌州民不能禦奔山立寨攻克之敗安州黃州兵五百於寧邊城下擒其總兵寧邊帥復率兵來援遣蒙古都統蘇納等敗擒之師次宣屯村村民言黃州帥聞其王被圍率兵萬五千往援行三日矣我軍疾馳一晝夜追及於陶山敗之九月以都統鄂莫克圖欲脅取蒙古台吉博洛女以媚豪格豪格不治鄂莫克圖罪議罷部任罰鍰三年九月證明自董家口毀

邊牆入敗明兵於豐潤縣遂下山東降高唐州略地至曹州明兵毀橋拒我師列陣誘敵潛渡繞其後敗之還下東光縣又遣騎二千敗郭太監兵於滹沱河破獻縣四年四月凱旋賜馬二銀萬兩八月命仍攝戶部九月復原封十月同貝勒多鐸證明寧遠敗之北山岡五年六月同睿親王等屯田義州刈其禾稼屢敗明兵克其臺卻其總督洪承疇之衆十二月命同睿親王圍錦州嗣以我軍離城遠駐又遣弁兵私回議罪與睿親王並降郡王六年六月同睿親王多爾袞代鄭親王濟爾哈朗等圍錦州屢捷擊敗承疇之卒十三萬九月還盛京事俱詳睿忠親王傳十一月命同輔國公滿達海圍松山七年二月明松山副將夏承德內應擒承疇及巡撫總兵等斬兵備道副將遊擊等官百餘兵三千六百有奇事具豫通親王傳三月駐杏山斬明兵出薪者三十餘人又遣前鋒努山擊敗明兵欲入寧遠者五百餘人四月同鄭親王攻塔山克之七月敘功復原封賜鞍馬一蟒緞百順治元年四月以語侵睿親王爲都統和洛會等所訐削爵十月上大封諸王念豪格從定中原有功仍復原封是冬命征山東土寇至則定濟寧破滿家洞等賊巢堙二百五十一洞土寇平三年正月命爲靖遠大將軍同衍禧郡王羅洛渾貝勒

尼堪等西征三月抵西安遣尙書星訥等剿賊於邠州宋大傑賀洪器齊勳張國棟降復遣都統都類剿賊於慶陽斬石二五月賊渠劉文炳康千總郭天星等迎拒擊之斬康千總時賊渠賀珍一隻虎孫守法據漢中興安武大定高如礪蔣登雷石國璽王可成周克德據徽縣階州大軍自西安進分兵奮擊降登雷國璽可成克德餘潰遁復所陷州縣陝西平十一月入蜀至南部偵賊張獻忠據西充縣令護軍統領鼇拜先發大軍夜繼進詰旦抵西充獻忠悉衆來拒大破之斬獻忠於陣分兵克賊營百三十餘斬數萬級捷聞得旨嘉獎四年八月奏分定諸郡縣蜀寇悉平五年二月凱旋上御太和殿宴勞三月睿親王以豪格徇隱隨征護軍參領希爾根冒功事又欲擢用罪人揚善之弟吉賽議罪削爵繁之卒於獄八年正月上親政念其枉復封和碩肅親王立碑表之十三年九月追諡武再立碑以紀其功乾隆四十三年正月上追念肅親王忠勳命配享太廟其見襲之顯親王復封號曰肅八月入祀盛京賢王祠 初次襲富綬肅武親王豪格第四子順治八年二月襲封和碩親王改號曰顯尋預議政康熙八年十二月薨年二十有七諡曰懿 二次襲丹臻顯懿親王富綬第四子康熙九年六月襲封和碩顯親王

三十五年二月從上征噶爾丹同副都統禪穆布等統領正藍旗營四十一年五月薨年三十有八諡曰密 三次襲衍潢顯密親王丹臻第六子康熙四十一年八月襲封和碩顯親王乾隆元年二月總理鑲白旗覺羅學三十六年十二月薨年八十有二諡曰諡 四次襲蘊著顯懿親王富綬孫輔國將軍拜察禮第三子康熙四十七年十二月封三等奉國將軍乾隆七年六月授內閣侍讀學士十年二月遷通政使十一月遷盛京戶部侍郎十二年五月調兵部侍郎尋任鑲黃旗滿洲副都統九月授漕運總督十四年四月以受商人程志仁等餽遺又稱奉旨嚴查鹽政吉慶私產狡詐乖張擬絞監候嗣恩釋二十年十一月授鑲白旗漢軍副都統二十一年八月調右翼副都統二十三年八月授涼州將軍二十七年正月調綏遠城將軍二十八年三月攝歸化城都統事三十年十二月授工部尙書三十一年正月預議政尋充經筵講官二月管會同四譯館三十二年三月因工部派辦溝渠工程不公降二級調用三十七年四月襲封和碩顯親王五月授鑲藍旗滿洲都統三十八年閏三月總理鑲藍旗覺羅學四十三年正月命復肅武親王始封之號仍爲肅親王四月薨年八十諡曰勤 五次襲永錫顯密親王丹

臻孫奉國將軍成信第五子乾隆三十三年十一月授三等侍衛四十三年閏六月襲封和碩肅親王四十九年六月總理正黃旗覺羅學嘉慶二年八月任鑲藍旗漢軍都統四年正月管理圓明園八旗內務府三旗官兵二月署正黃旗蒙古都統三月署鑲藍旗蒙古都統五年二月以皇三子入學時王進陳設玩器革都統任并圓明園官兵事務

和碩承澤親王碩塞

碩塞太宗文皇帝第五子順治元年十月封多羅承澤郡王時流賊李自成奔潼關河南仍爲賊守十二月隨豫親王多鐸出征有功事具豫通親王傳二年二月還師河南尋隨豫親王征明福王朱由崧於南京四月賜團龍紗衣一襲五月克南京福王就俘凱旋賜金二千兩銀二萬兩三年五月蘇尼特部叛奔喀爾喀隨豫親王往剿亦有功七月敗喀爾喀土謝圖汗碩雷汗兵五年八月同英親王阿濟格等剿天津土寇十一月喀爾喀行獵近邊同英親王戍大同會總兵姜瓖叛王堅守汛地賊至麾兵掩殺之六年正月援代州走賊黨劉遷賊又於助馬得勝路立兩營以拒王親督戰敗之三月睿親王多爾袞赴大同招撫瓖承制晉碩塞

爲親王七年八月以和碩親王之下多羅郡王之上無止稱親王例仍改爲多羅郡王八年閏二月晉封和碩承澤親王三月掌兵部事十月預議政十一年十一月掌宗人府事十二月薨年二十有七康熙十年六月追諡曰裕 初次襲博果鐸承澤裕親王碩塞第一子順治十二年六月襲封和碩親王改號曰莊雍正元年正月薨年七十有四諡曰靖無嗣 二次襲允祿聖祖仁皇帝第十六子康熙六十一年十一月任內務府總管雍正元年二月命爲博果鐸後襲封和碩莊親王二年十一月掌宗人府事七年二月任正紅旗漢軍都統七月調鑲白旗滿洲都統十年八月調正黃旗滿洲都統今上御極命總理事務兼掌工部食親王雙俸王承聖祖仁皇帝指授精於天文算法預修數理精蘊至是充增修七政時憲書總裁又修律呂正義後編御製序稱其貫徹樂義乾隆二年十二月以總理事務得優敘賜一奉恩鎮國公並允王請以承澤裕親王曾孫鈕赫襲三年二月任理藩院尙書尋充玉牒館總裁四年十月議王與弘普往來黨私應削爵得旨寬免裁親王雙俸罷理藩院尙書任十二月復以王私抵官物應削爵詔仍免之罰親王俸五年六年十二月奉旨免罰俸七年六月總理樂部事二十九年六月王

七十誕辰賜詩有近尊行裏無雙老闔藩衛中有數賢之句三十二年二月薨年七十有二諡曰恪 三次襲永瑞莊恪親王允祿孫奉恩輔國公弘普第一子乾隆八年七月襲父爵奉恩輔國公二十一年四月管健銳營事二十二年正月署鑾儀衛事七月任鑲黃旗滿洲副都統二十六年二月調鑲黃旗漢軍副都統三十三年六月襲封和碩莊親王尋任鑲紅旗蒙古都統十月總理樂部事三十四年十月總理正藍旗覺羅學三十八年九月署領侍衛內大臣十月授盟長十一月掌宗人府事三十九年九月總理左右翼宗學四十一年十一月充玉牒館總裁四十二年六月調正紅旗滿洲都統五十三年二月薨年五十有二諡曰愼四次襲繇課莊愼親王永瑞弟奉國將軍永珂第一子出爲永瑞後乾隆四十七年十一月授三等待衛五十三年五月襲封和碩莊親王十一月內廷行走十二月管左翼近支頭族族長并管理鑲白旗覺羅學嘉慶四年九月任正紅旗蒙古都統十二月署正白旗領侍衛內大臣五年正月任正黃旗領侍衛內大臣三月署正白旗漢軍都統六年正月授閱兵大臣二月調鑲藍旗滿洲都統四月以王隨駕行在失約束家奴馳馬衝突御道革領侍衛內大臣都統及閱兵大臣任退

出內廷行走罰王俸二年八年八月授鑲藍旗漢軍都統九年九月以監修裕陵隆恩殿工程妥協命內廷行走十一月管右翼近支第三族族長十二月署鑲黃旗領侍衛內大臣十年四月署正白旗領侍衛內大臣閏六月署鑲紅旗蒙古都統

和碩鄭親王濟爾哈朗

濟爾哈朗追封和碩莊親王舒爾哈齊第六子舒爾哈齊顯祖宣皇帝第三子太祖高皇帝母弟初封貝勒歲丁未東海瓦爾喀部斐悠城長策穆特赫苦烏拉部長之虐乞歸附太祖命舒爾哈齊同貝勒褚英代善往收其環城屯寨五百戶以還賜號達爾漢巴圖魯事詳廣略貝勒褚英傳辛亥年八月薨順治十年五月追封和碩親王諡曰莊濟爾哈朗幼育於太祖宮中封和碩貝勒天命十年十一月同台吉阿巴泰等援科爾沁有功事詳饒餘敏郡王傳十一年四月征喀爾喀巴林部十月征扎魯特部並有功天聰元年正月同貝勒阿敏岳託阿濟格等征朝鮮師屢勝次平壤城朝鮮王李倬使請和仍欲進攻岳託不可濟爾哈朗以不宜深入可駐平山城以待和議之成遂引軍往與李倬議歲貢定盟而還事詳

克勤郡王傳五月從上征明出廣寧舊邊進圍錦州同貝勒莽古爾泰等率偏師衛塔山糧運遇明兵敗之尋移師寧遠與明總兵滿桂兵遇裏創力戰大敗其衆二年五月以蒙古固特塔布囊自察哈爾移據阿拉克綽特部舊地遇來歸我者輒行阻殺命同貝勒豪格討誅之收其衆三年八月同貝勒德格類岳託阿濟格等征明錦州寧遠焚其積聚多俘獲十月上親統大軍由洪山口征明命同岳託攻大安口毀其水門乘夜進擊走明馬蘭營援兵旦見明兵立二營於山上濟爾哈朗先擊敗其衆追至馬蘭營殲之是日自辰迄巳五戰皆捷降馬蘭營馬蘭口大安口三營兵趨石門寨明援兵至者悉斬之寨中官民出降遂會大軍於遵化進薄北京十二月同貝勒阿巴泰等徇通州焚其船克張家灣四年正月從上圍永平先是劉興祚叛歸明與明巡撫袁崇煥同赴永平聞我軍將至遂趨太平寨道殺喀喇沁蒙古之以俘來獻者上命濟爾哈朗與阿巴泰往捕追及於山海關斬興祚擒其弟興賢以獻大軍旣克永平命與貝勒薩哈璘統兵萬鎮守察倉庫閱士卒置官吏降明道員白養粹廢員孟喬芳楊文魁等以書招永平屬州縣於是灤州州同張文秀遷安縣知縣朱雲台副將王維城參將馬光遠守備李繼全

千戶錢奇志相繼降三月上旋蹕令阿敏碩託更守永平因趨迤西路招降榛子鎮乃還五年三月命諸貝勒直言時政濟爾哈朗奏曰比者讞獄滋怨皆由諸臣自今當選賢良慎司刑憲七月初設六部命掌刑部事八月從上圍明大凌河城鑲藍旗兵圍西南濟爾哈朗軍爲策應旋同大貝勒代善等克近城臺堡十一月明總兵祖大壽以城降將旋師同貝勒多鐸往塔山東沿海截隘俘百餘人六年五月從上征察哈爾林丹汗遁大軍次穆魯哈喇克沁濟爾哈朗與岳託等率右翼兵趨歸化城收察哈爾部衆千餘七年三月奉命築岫巖城五月明將孔有德耿仲明自登州航海來降濟爾哈朗等迎護其衆事具英親王傳六月詔問征明及朝鮮察哈爾三者何先奏言朝鮮不違約當反其貢物姑與互市不必往征明乃吾敵國宜取其近京數城久駐伺隙別屯兵山海以東錦州以西擾其耕穫使不得休息復分兵半於山海關前立營半繞入關後內外夾攻敵必絀八年五月上復親征察哈爾濟爾哈朗留守盛京崇德元年四月晉封和碩鄭親王十二月上征朝鮮復留守三年十月率兵征明寧遠薄中後所城明兵懼不敢出乃移師克模龍關及五里堡屯臺四年五月征明錦州及松山與敵遇九戰九敗之俘二

千有奇五年三月葺義州城上親臨閱有舊附明之蒙古多羅特部蘇班岱阿巴爾岱居杏山西五里臺遣託克託內籲請率三十戶來歸上命王與多鐸郡王阿達禮率師千五百往迎瀕行諭曰敵見我兵寡必來拒戰可分兵爲前後中三隊前隊拒戰後隊應援遂辭御營遵諭乘夜過錦州城南至杏山令來使潛告蘇班岱等攜戶口輜重行旦明杏山總兵劉周智沿城結營與錦州松山守將分翼列陣偪我軍王令駐軍待敵呼譟而來王督戰衝入敵陣與諸王貝勒並進大敗之追奔至城下斬其副將楊倫周參將李得位復遣兵破敵兩營於城南獻所獲馬械於御營分賚有差加賜御廐良馬一九月同武英郡王阿濟格等圍錦州城中兵屢出犯王設伏城南俟敵敵知有伏卽遁追斬六十餘人又遣輔國將軍務達海俘明運糧兵於杏山塔山間六年三月復圍錦州繞城立營八掘壕築塹爲久困計時大壽在城中以蒙古兵守外郭蒙古台吉諾木齊吳巴什等欲降縋二人齎書下約獻東關至期爲大壽覺而鬪聲聞郭外大軍薄城蒙古兵縋以上我師與蒙古合擊明兵明兵敗入內城遂據其郭遷郭內蒙古六千餘口於義州並收降明都司守備以下八十六員使馳奏上命入門擊鼓集衆官宣捷於篤恭殿四

月明援兵自杏山至松山王令右翼兵伏錦州南山西岡左翼兵伏於山北嶺遣前鋒軍挑戰敵至伏起來擊大敗之五月明援兵六萬屯松山北岡擊斬二千人六月睿親王多爾袞等至錦州更代兩軍合營聞明兵自松山趨海口我左翼兵由東右翼兵由西擊卻敵衆追至松山城獲馬五十餘振旅還八月明總督洪承疇率兵十三萬至松山上親統大軍臨之命留守九月上將旋蹕仍赴錦州更代圍城十二月敗承疇承疇夜犯正紅正黃兩旗營敵兵從杏山宵遁者復爲我伏兵所殲七年二月肅親王豪格等克松山城擒承疇王仍圍錦州三月大壽遣人乞降請盟誓王留其使二人遣一傳諭曰我圍因此城旦夕可取何與爾盟誓欲降則降非相強也大壽乃率衆赴營降四月移師塔山克之進圍杏山以礮毀城城中懼開門降乃籍俘數以奏奉命毀塔山松山杏山三城而還七月敍功賜鞍馬一蟒緞百八年八月世祖章皇帝嗣位王與睿親王多爾袞同輔政九月征明寧遠拔中後所城斬遊擊吳良弼都司王國安等進攻前屯衛斬總兵李輔明袁尙仁中前所總兵黃色棄城遁取之遂班師順治元年正月王集內三院六部諸大臣諭以政事先白睿親王書銜名亦先之五月睿親王入山海關擊走流賊李

自成九月王扈駕至京師十月上御皇極門封信義輔政叔王賜金千兩銀萬兩
緞千匹四年二月以造第踰制擅用銅獅銅龜銅鶴罰鍰罷輔政五年三月貝子
屯齊等訐王在盛京時不舉發兩黃旗大臣謀立肅親王私議及扈駕入關擅令
兩藍旗越次立營前行等事降多羅郡王閏四月復爵和碩鄭親王九月命爲定
遠大將軍征湖廣十月道出山東剿曹縣土賊擒獲賊首李化鯨李名讓張學允
等得降鎮劉澤清逆書煽亂狀以聞叛黨並伏誅六年正月由安陸府渡江抵長
沙時明桂王朱由榔之總督何騰蛟及附由榔之總兵馬進忠王進才杜允熙陶
養用胡一青糾流賊餘黨一隻虎等據湖南府縣王令順承郡王勒克德渾都統
阿濟格尼堪爲前哨大軍繼進抵湘潭生擒騰蛟拔其城四月分兵趨永興擊走
允熙遂至辰州一隻虎聞風遁令尙書阿哈尼堪等擊進才於寶慶克其城又遣
破南山坡大水洪江諸路兵凡二十八營寶慶平七月分兵定靖州進衡州斬養
用破一青七營於城南山追剿至廣西全州分兵定道州黎平府及烏撒土司先
後收六十餘城七年正月凱旋敘功賜金二百兩銀二萬兩八年二月同巽親王
滿達海端重親王博洛敬謹親王尼堪奏削故睿親王封爵事詳睿忠親王傳三

月上以王年老一切朝賀謝恩悉免行禮九年二月晉封叔和碩鄭親王十二年二月疏言太祖高皇帝開拓初日與四大貝勒五大臣及衆台吉等討論政務得失咨訪兵民疾苦使上下交孚鮮壅蔽故能上合天心下洽民志埽靖羣雄肇興大業太宗文皇帝纘承大統紹述前猷亦時與諸王貝勒大臣講論不輟且崇獎忠直鼓勵英傑錄微功棄小過凡下詔令必先講求可以順民心垂久遠者然後施行又慮武備廢弛不忘騎射時駕出射獵諸王貝勒置酒讌會以優爲樂太宗皇帝還自獵所克勤郡王岳託發其事太宗皇帝勃然怒曰我國肇興治弓矢繕甲兵視將士若赤子故人爭效死每戰必克以成大業朕常恐後世子孫棄我國淳厚之風沿習漢俗卽於恇淫今汝等爲此荒樂欲國家興隆其可得乎遣大臣索尼再三宣諭今皇上詔大小臣工盡言無隱誠欲立綱陳紀綏國祚於無疆也臣以爲平治天下莫要於信詔令順民心前降諭軫恤滿洲官兵疾苦聞者無不懼怖嗣又令修乾清宮詔令不信何以使軍民服從伏祈效法太祖太宗不時與內外大臣詳究政務得失凡事必豫商榷然後頒之詔令見諸施行庶幾法行令信可以紹二聖之休烈矣抑臣更有請者垂休典謨廣昭令德莫要於立史官古

聖帝明王進君子遠小人順天心合民志措天下於太平垂鴻名於萬世良於史
臣有賴今宜倣古制特設起居注官置之左右凡聖主嘉言懿行一一記載於以
垂萬世傳無窮亦治道之一助也上嘉納之三月同貝勒尙善等議吏科副理事
官彭長庚正白旗一等子許爾安請復睿親王舊封妄頌功勛結黨煽亂應立斬
上命從寬流徙又議廣東布政使胡章誣奏平南王尙可喜靖南王耿繼茂縱兵
占官廩等事與誣告凡人不同應立絞上命褫職免罪五月王疾劇駕臨問王奏
臣受三朝厚恩未能仰答不勝感痛惟願以取雲貴滅桂王爲念且滿洲兵甚少
而能破流賊取京都應加撫恤上垂涕曰天何不令朕叔長年耶言已大慟駕旋
命工圖其像翌日薨年五十有七詔輟朝七日賜祭葬銀萬兩置守園十戶立碑
紀功康熙十年六月追諡曰獻乾隆十九年九月入祀盛京賢王祠四十三年正
月上追念鄭親王忠勛命配享太廟其見襲之簡親王復始封號曰鄭 初次襲
濟度鄭獻親王濟爾哈朗第二子順治八年閏二月封其兄富爾敦爲鄭親王世
子濟度爲多羅簡郡王四月富爾敦卒九月濟度封世子九年十月命議政十一
年十二月以海賊鄭成功擾福建授定遠大將軍同貝子務達海都統噶達渾剿

之十二年九月師入閩境聞泉州賊遁駐福州久之乃進駐泉州十三年六月投誠僞總兵黃梧副將蘇明鄭純等自海澄縣遣迎大兵僞官八十餘人兵一千七百有奇俱降王自泉州移駐漳州俄聞成功犯福州遣副都統覺羅阿克善參領褚庫巴圖魯參領伊巴格圖赴援遇賊高齊陸路敗之斬二百餘級將抵福州賊船二百餘泊烏龍江阿克善等水陸並進卻賊衆追至大漳河口陣斬僞總兵林祖蘭等獲船十有四時惠安閩安漳浦頻告警分遣護軍統領覺羅雅布蘭副都統阿玉錫等往剿斬賊二千餘獲船數百先後降僞總兵一副將五參將遊擊以下五十人兵三千有奇十四年三月還京上遣議政大臣哈什屯等迎之盧溝橋令先赴鄭親王喪所上親臨其第慰之五月襲封和碩親王仍其郡王之號曰簡十七年七月薨年二十有八康熙十年六月追諡曰純 二次襲德塞簡純親王濟度第三子順治十八年二月襲封和碩簡親王康熙九年三月薨年十有九諡曰惠 三次襲喇布簡純親王濟度第二子康熙七年正月封三等輔國將軍九年九月襲封和碩簡親王十三年九月以逆藩吳三桂耿精忠黨分擾江西命爲揚威大將軍鎮江寧十四年九月詔移江西十二月遣兵斬賊朱三於東鄉縣十

五年二月遣兵敗賊王用等於鄱陽縣之沙蘭粟嶺五月奏招撫南康吉安饒州
僞官四百五十餘兵萬五千有奇七月奏僞都督楊益茂據金谿縣破其木寨斬
三千餘級復金谿十月遣兵赴萬年縣剿賊楊彪萬勝破賊於五都馮家山十二
月奏故平南王尙可喜子之信在廣州乞降以所齎密疏上陳先是三桂賊將高
大傑韓大任等陷吉安王奏調綠旗兵會剿又請敕總督運紅衣礮十具攻吉安
並從之諭戒以勿坐守觀望因奏省會緊要不可輕離至是將軍額楚等擊賊螺
子山失利上命侍郎班迪等赴吉安察狀還奏諭令戴罪圖功王乃親圍吉安十
六年三月賊夜出南門逸王入城駐六月奏招撫江西各屬僞官千九百餘兵三
萬七千四百有奇又疏言韓大任等屯寧都樂安諸處調兵三路進剿韓大任願
降請爲入告詔報可旣而大任自寧都出擾萬安泰和等縣王請調兵禦剿上曰
簡親王喇布自到江西並未建尺寸之功宴坐會城虛糜糧餉迨赴吉安以重兵
圍城逆賊韓大任奔逸不能擊滅進攻竊據寧都雖遣副都統布舒庫等率兵前
往究未大創賊衆今韓大任自寧都竄突延及萬安泰和諸處不能撲剿又以兵
少具奏計喇布所轄滿漢官兵爲數不少一韓大任未能翦除任其出入宜卽嚴

加處分念見在與賊相持姑俟事平日議罪十七年正月護軍統領哈克三等敗大任於老虎洞燬其營斬六十餘級大任奔福建赴康親王傑書軍前降二月詔移師湖南駐茶陵八月奏三桂死於衡州詔師還十八年正月抵衡州賊帥吳國貴夏國相等宵遁復其城二月分兵復祁陽耒陽等縣及寶慶府降僞總兵卓英董世興僞副總兵周嘉貞等又僞將軍全鉞僞總兵馬隆興熊天章魯大捷姜繼尙僞侍郎范思徵等相繼降六月疏言隨征之烏拉寧古塔兵千二百餘人應遵旨撤還但新寧諸處賊未平請暫留剿從之八月疏言將軍穆占復新寧安親王岳樂克武岡賊竄遁臣駐東安遣烏拉寧古塔兵還京令穆占駐新寧上嚴責其不追剿賊於沅州靖州九月奏僞副將張朝貴以下七十餘人降詔進定廣西駐桂林十九年正月奏昭義將軍馬承蔭標下糧匪兵課撥餉給乃定又言馬承蔭奉旨設五營會剿雲貴今請自募兵足七千數增立援剿二營上以將軍標無七營例不允三月疏言臣遵旨率兵往柳州至永福縣聞馬承蔭叛卽欲進剿因兵單暫還桂林五月疏言大兵分路進剿總督金光祖破賊武宣復縣城將軍莽依圖破賊陶登定象州臣由雒容進柳州馬承蔭率衆降八月詔移駐南寧十月奏

僞將軍饒一龍以慶遠府城降是月詔選所部兵付大將軍賴塔進定雲南二十
年八月奉詔率柳州南寧間駐兵還京十月薨年二十有八二十二年三月追論
吉安諸處失機罪削爵 四次襲雅布簡純親王濟度第五子初封三等輔國將
軍康熙二十二年三月襲封和碩簡親王二十七年七月以噶爾丹擾喀爾喀命
同安親王岳樂各率兵五百赴蘇尼特汛界駐防十月撤還二十九年七月噶爾
丹深入烏珠穆沁地命裕親王福全爲撫遠大將軍出古北口恭親王常寧爲安
北大將軍王與信郡王鄂扎副之出喜峰口旣而停喜峰口出師命赴裕親王軍
參贊軍務八月敗噶爾丹於烏蘭布通噶爾丹乞宥罪旋由大磧山遁師旋議不
追剿罪削爵得旨從寬罰俸三年三十五年二月從上親征由中路抵克魯倫河
聞噶爾丹敗竄乃還三十八年十二月掌宗人府事四十年九月薨年四十有四
諡曰修 五次襲雅爾江阿簡修親王雅布第一子康熙三十六年十二月封世
子三十九年四月命直郡王允禩溶永定河雅爾江阿與僖郡王岳希貝勒延壽
分董其事四十一年正月襲封和碩簡親王四十九年正月掌宗人府事雍正元
年正月充玉牒館總裁三年十月告成賜銀幣尋因編載遺漏及辦事屢誤停俸

撤六佐領歸公四年二月奏請再行酌撤佐領恩免停俸諭責其人甚卑鄙終日沈醉諸事漫不經心下所司議處削爵 六次襲神保住簡修親王雅布第十四子康熙五十五年四月封三等奉國將軍雍正四年三月襲封和碩簡親王乾隆十三年九月諭曰神保住自襲爵以來不知自愛恣意妄爲致兩日成嘗因辭食王俸朕加恩賞給半俸贍其度日之資伊竟不知感恩守分且罔顧近派族人稍加周恤今據宗人府劾奏神保住陵虐伊兄忠保之女其行事更出情理之外著革去王爵另行請旨承襲 七次襲德沛鄭獻親王濟爾哈朗從曾孫初王弟追封多羅貝勒芬古生傅喇塔封固山貝子生福存襲固山貝子德沛福存第八子也雍正十三年五月封三等鎮國將軍八月授兵部左侍郎乾隆元年七月任古北口提督二年二月授甘肅巡撫六月疏言備荒期於先籌賑恤貴乎實惠向遇歉歲州縣必俟詳允後動支倉庫錢糧上司又必委驗覈減文移輾轉至開倉散賑時而饑民已待哺不得攜老幼轉徙矣且倉廩大率在城近者尙可匍匐支領遠者每以跋涉甘餒是徒費國家倉貯而饑民霑恩未徧甘省地處萬山風多雨少歲常歉薄民鮮蓋藏且地方遼闊倍他省州縣所轄由百里至四五百里不等

閒時已覺迢遙領賑尤多狼狽雖筋力壯盛者亦不能數百里往返領一日口糧
况孤寡殘弱哉今歲雨暘時若可望有秋但有備無患不得不預爲綢繆臣思散
賑貴多設廠而專其責於州縣請預勘各州縣地方就鄉村連絡處分擇公廨廟
宇十餘處造具地名冊籍遇散賑時該州縣具詳日卽將倉糧散給務使老少均
霑強弱普被旣無拮据之難且免守候之累則向苦流離之人皆得就食但運糧
腳價費多甘省每歲於青黃不接時令各州縣平糶倉糧秋收買補或遇豐年除
還正項價餘亦卽買糧存貯此向例也嗣後賑恤運價應將此項糧價餘銀貯州
縣庫停其買糧以爲運費如不敷先於州縣庫不拘何項動支再於司庫舊存公
用銀十八萬兩內還項賑畢造冊覈銷如有捏冒卽參賠如此則官易爲理而
民霑實惠矣奉旨先事預防原當如此至糧價餘銀作爲運腳一項應用時咨部
請示九月擢湖廣總督三年四月疏陳苗疆七事一苗民懶不習田請於新關苗
疆代買牛種器具令地方官親勸開墾一苗民未覩禮讓請立義館以附近生員
教誨一苗居山叢林密令官弁誘買樹木數年後山中無險可恃一苗寨係茅屋
畏火攻請製火器一苗疆兵駐處偶有急需無項可支請於苗疆州縣庫存銀千

兩同知通判駐所亦請交貯帑銀千兩并建常平倉買貯穀二三千石庶儲蓄有備一邊地緊要官兵勢難分布查山東沿海及滇黔蜀粵俱有團練鄉勇之事應令地方官力行此法一團有警各團救護立練總什長相統率一苗民貪賄忘親凡犯罪逃匿之案請懸立賞格有能擒獻重犯者賞銀二十兩情罪稍輕者賞銀八兩先刊石曉諭時廷議水田未便勸墾苗人不可欺誘至要犯懸購臨時酌賞餘俱如所請行十二月攝襄陽鎮總兵四年七月調閩浙總督八月疏言泉州府晉江縣之衙口鄉大姓肆橫械鬪等事不一而足祇緣僻處海濱不解法度查永寧舊寨地勢高敞去衙口陸行十餘里由海徑渡七八里即可直達且衙口原係陸路提標右營汛地應請卽以該遊擊帶兵二百三十名移駐永寧其衙口後身空公庵設把總一員兵五十名海邊石亭設一汛撥兵十名稽查又西倉處各大姓適中地查興化同知止司逃盜海防請以該管事務歸併興化通判卽以該同知改隸泉州移駐西倉議如所請行五年十二月諭廷臣曰德沛屢任封疆操守廉潔旣一介不取而因公犒賞之處又復繁多所得養廉不能敷用以致京中逋負不能清還且棄舊有之產朕心深爲軫念此等清官應格外加恩以風有位著

將福建藩庫銀就近賞給一萬兩示朕嘉獎之意六年二月命稽查濟墅北新兩關七月兼署浙江巡撫七年四月調兩江總督八月疏言揚州猝被水廬舍蕩然見自揚州至寶應隄埂高阜災民斷續搭蓬居住將來興化泰州之無處容身者勢必移來人煙雜沓俱係待賑窮民奸良莫辨臣於揚州城廂及高郵寶應令遊擊等巡查以期奸匪遁跡奉旨好應如是辦理然只宜行之以暫而不可久初上諭嗣後該州縣當秋成時穀價高昂不能買補而該處存倉穀石尙可接濟者照例詳請展限於次年買補儻穀價既屬不敷而貯倉穀石又係不足者准其詳明上司以別州縣穀價之贏餘添補採買爲酌盈劑虛挹彼注茲之計至是德沛奏言江南地廣人稠穀不敷食歷係取資江廣及上江樅陽運漕等處邇聞各處米價俱昂轉販者少如以別州縣贏餘添補則江蘇所屬買補止有不足並無贏餘若因籌補無項致通省倉貯全虛目前無以濟用日後何賴臣請俟秋成後各屬有糶價存庫者不拘本境鄰封擇時價稍平者卽爲代買其不敷之價應照前撫臣徐士林所請於捐監項下補足至淮揚徐海等州縣見在被災印官賑務殷繁不能兼顧已飭藩司動支司庫銀十萬兩遴員採買俟飭提各屬糶價歸還原款

奉旨好著照所議行八年二月召來京六月授吏部右侍郎十二月兼管國子監祭酒事務十年七月教習庶吉士十一年二月奉上諭侍郎德沛因伊度日艱難指伊弟簡親王見食俸祿奏請借支十年以完舊逋以資生計著照所請行閏三月轉吏部左侍郎十二年三月兼署戶部左侍郎五月署山西巡撫九月命上書房行走十二月擢吏部尙書十三年七月以疾解任九月諭曰神保住已獲罪革爵德沛於此王爵既有承襲之分且在等輩中較爲厚重可卽令承襲王爵德沛襲王之後宜追念從前諸王將族中應行資助之人加意周恤共相和睦以期仰沐朕恩於無旣是月襲封和碩簡親王十七年六月薨年六十有五諡曰儀 八次襲奇通阿鄭獻親王濟爾哈朗曾孫初王第四子追封輔國公巴爾堪生巴賽襲輔國公奇通阿巴賽第十子也雍正四年八月封三等輔國將軍九月授頭等侍衛九年十二月襲父爵輔國公十年三月授散秩大臣乾隆元年四月任正紅旗滿洲都統三年十二月授領侍衛內大臣十七年十月襲封和碩簡親王二十一年六月掌宗人府事二十二年正月充玉牒館總裁二十八年六月薨年六十有三諡曰勤 九次襲豐訥亨簡勤親王奇通阿第一子乾隆八年二月封三等

輔國將軍二十三年七月以三等待衛奉命率健銳營兵一千剿準噶爾餘孽及回部十一月至阿克蘇城十二月隨參贊大臣舒赫德進師巴爾楚克二十四年正月至呼爾璦逆回霍集占引賊五千餘來犯豐訥亨同侍衛豐安等合諸軍擊卻之追潰衆十餘里翌日再進賊據塹拒復奪塹所乘馬創易馬進賊退避夜率兵取水於沁達勒河連敗賊衆於渡口遂進援大軍之與賊相持於葉爾羌者敗賊於葉爾羌河岸大軍聞槍礮聲突圍出合擊賊衆卻之乃還阿克蘇詔嘉其臨陣奮勇遷二等待衛尋擢鑲白旗滿洲副都統十月以經理臺站至額格爾呼爾璦遇結寨出掠之布魯特賊衆斬二十餘級得旨獎敘二十五年三月頒賚緞十二銀五百兩四月調阿克蘇兵赴伊犁爲領隊大臣九月率兵百人捕竊馬臺站之馬哈沁賊衆過察爾圖嶺窮追十餘日擒七十餘人獲馬五十餘復得旨獎敘二十七年二月同領隊大臣伊勒圖驅越境遊牧之哈薩克部衆擒其魁五人收其馬二千餘至伊犁詔以哈薩克歸附日淺未知內地法度宥其罪諭獎豐訥亨熟悉情形令傳旨曉諭哈薩克釋還其人及馬閏五月彙敘出征以來得三等功牌一頭等功牌四予雲騎尉世職十二月還京賜雙眼孔雀翎遷護軍統領管健

銳營事二十八年十月襲封和碩簡親王尋授領侍衛內大臣初簡勤親王原襲之輔國公及豐訥亨之雲騎尉世職因已襲親王銷除三十年六月諭嘉豐訥亨頻年出征頗著勞績其先世功勛所遺公爵官仍予襲遂以豐訥亨之弟經訥亨襲互詳武襄輔國公傳三十四年正月任正黃旗漢軍都統三十八年十月掌宗人府事四十年十二月薨年五十有三諡曰恪 十次襲積哈納簡恪親王豐訥亨第二子乾隆四十年四月授頭等待衛四十一年五月襲封和碩簡親王尋授散秩大臣四十三年正月命復鄭獻親王始封之號仍爲鄭親王四十九年五月薨年二十有七諡曰恭 十一次襲烏爾恭阿鄭恭親王積哈納第一子乾隆五十七年三月襲封和碩鄭親王王初名佛爾果崇額六十年七月奉旨更今名嘉慶六年四月管理鑲白旗覺羅學

和碩敬謹親王尼堪

尼堪太祖高皇帝孫原封廣略貝勒褚英第三子初征多羅特棟夔諸部有功天聰九年五月大兵征明山西隨貝勒多鐸率偏師入寧錦界牽制明西援兵崇德元年封固山貝子十二月上征朝鮮李倬遁尼堪隨豫親王多鐸追至南漢山城

圍之朝鮮將來援爲我軍所殲又擊敗其副將二年正月倭降師還四月預議政
四年二月上征明隨武英郡王阿濟格等率四旗兵環守塔山連山七年九月代
公博和託等駐守錦州順治元年四月隨睿親王多爾袞入山海關敗流賊李自
成五月隨武英郡王追擊流賊於望都十月晉封多羅貝勒十二月隨豫親王率
師自孟津至陝州大破賊衆二年正月至潼關賊將劉方亮犯我營尼堪同護軍
統領圖賴夾擊之獲馬三百餘賊又以騎兵橫衝我師同貝子尙善敗之三月趨
歸德定河南諭嘉王貝勒等勤勞日久賜尼堪弓一五月隨豫親王克明南京追
縛福王朱由崧於蕪湖攻克江陰十月凱旋賜金二百兩銀萬五千兩鞍一馬五
三年三月隨肅親王豪格西征尼堪抵西安由棧道進發賊渠賀珍自雞頭關迎
拒敗之抵漢中疾躡其營賊潰走西鄉追擊於楚湖至漢陰賊一隻虎奔四川孫
守法奔岳科寨十一月入蜀張獻忠伏誅與貝子滿達海分兵剿遵義夔州茂州
榮昌隆昌富順內江資陽擒斬僞王及官弁等二千三百有奇俘獲無算川寇平
互見肅武親王傳五年正月師旋八月同英親王阿濟格剿平天津土寇九月晉
封多羅郡王加號敬謹六年正月命爲定西大將軍討大同叛鎮姜瓖三月奏都

統阿賴等屢挫賊衆敗僞巡撫姜輝兵僞參將羅英壇率所部降是月睿親王多爾袞赴大同招撫壤承制晉尼堪爲親王四月圍大同八月僞總兵楊振威等斬壤及其兄琳弟有光降七年二月命理六部事八月以徇隱尙書阿哈尼堪不親往迎朝鮮王弟事降郡王八年正月晉封和碩敬謹親王二月同諸王奏削故睿親王封爵三月以英親王私藏兵器事隱不奏降郡王尋命諸王分管六部王掌禮部五月復封親王九年六月掌宗人府事時獻忠餘孽孫可望李定國等皆受明桂王朱由榔封爵分犯湖南貴州七月命爲定遠大將軍征之瀕行賜御服佩刀鞍馬上親送至南苑八月定國陷桂林敕王母往貴州取湖南寶慶後入廣西剿賊十一月抵湘潭由榔將馬進忠遁我師進擊於衡山縣敗其兵千八百是夜兼程趨衡州詰旦大兵方列陣定國兵四萬餘猝至王遣首隊進擊大破之逐北二十餘里獲象四馬八百有奇方進擊時林中賊伏發城內賊出應之師欲退王曰我兵凡臨陣無退者我爲宗室不斬除逆寇何面目歸乎遂奮勇直入賊環圍之王率諸將士縱橫衝擊矢盡拔刀力戰歿於陣年四十有二十年十月喪還上輟朝遣親王以下郊迎諡曰莊十六年追論分取睿親王所遺財物掌禮部時不

參劾尙書譚泰罪削爵詔王以宗室陣亡仍留王爵 初次襲尼思哈敬謹莊親王尼堪第二子順治十年十二月襲封和碩敬謹親王十七年十一月薨年十歲諡曰悼 二次襲蘭布敬謹莊親王尼堪第一子順治十三年正月封三等輔國將軍十八年六月襲封多羅貝勒康熙六年二月諭宗人府曰尼堪以親王陣亡殊屬可憫世祖章皇帝復嘗矜念仍留所襲之爵又無不准承襲之旨蘭布著封爲郡王仍與原號七年八月蘭布以父陣亡功請復得旨蘭布著襲封和碩親王八年五月議蘭布娶輔臣鼇拜孫女爲妻詰鼇拜罪狀狡稱不知降鎮國公十三年六月隨貝勒尙善討逆藩吳三桂於湖南十七年十月卒於軍年三十有七十九年十一月追論在岳州時退縮罪削爵 三次襲賴土原襲親王蘭布第四子康熙十八年四月降襲輔國公三十五年正月上親征噶爾丹賴土統兵赴歸化城駐守十一月師還五十三年四月議賴土不安靜守分探聽消息散布流言削爵五十四年五月赴阿爾台軍前效力五十九年七月隨征西將軍祁里德至額爾齊斯河擊殺賊衆議敘得頭等功牌一雍正八年二月復封輔國公十年閏五月卒年七十有一 四次襲富增原襲親王蘭布孫輔國公務友第六子康熙四

十八年十二月封二等鎮國將軍五十三年五月襲封輔國公雍正四年二月諭宗人府曰輔國公富增人甚不及前革退賴士公爵時因無可承襲之人始令伊承襲今賴士在軍前行走數年其子伊爾登又甚勤謹竭力行走著將富增公爵革退與伊爾登承襲 五次襲伊爾登輔國公賴士第三子雍正三年五月管武備院事九月任鑲藍旗漢軍副都統四年二月遷右翼前鋒統領是月襲封輔國公六年八月擢正黃旗蒙古都統八年三月攝鑲紅旗護軍統領十一月復署右翼前鋒統領乾隆十四年四月卒年六十有六諡曰簡恪 六次襲富春簡恪輔國公伊爾登第七子乾隆十四年十月襲封奉恩輔國公三十五年四月授吉林將軍四十一年六月調杭州將軍十一月以前任吉林時不能禁止採獲議革將軍得旨富春著革去公爵另襲仍革職留杭州將軍之任四十二年十一月革任 七次襲賓寧原襲奉恩輔國公富春第二子乾隆二十六年十二月授四等待衛二十七年正月封二等奉國將軍十一月遷三等待衛三十九年十二月遷二等侍衛四十年十一月遷頭等待衛四十二年十一月襲封奉恩輔國公四十二年三月上念敬謹親王尼堪功勳頗顯且以力戰捐軀晉封賓寧爲鎮國公世襲

罔替四十七年八月任正紅旗蒙古副都統十月授宗人府左宗人四十八年五月任鑲藍旗護軍統領嘉慶五年□月卒諡曰恪勤 八次襲果勒豐阿恪勤輔國公賓寧第一子乾隆四十九年十二月歲滿封二等輔國將軍嘉慶五年閏四月襲封奉恩鎮國公是月授散秩大臣九年十二月往守西陵

和碩穎親王薩哈璘

薩哈璘太祖高皇帝孫禮烈親王代善第三子初授台吉天命十年十一月察哈爾林丹汗圖科爾沁薩哈璘以精騎五千援之林丹汗遁十一年四月征喀爾喀巴林部十月征扎嚙特部俱有功是年封貝勒天聰元年五月上征明同貝勒德格類等率護軍精騎爲前隊上由大凌河至錦州城明兵遁薩哈璘邀殲之復同三貝勒莽古爾泰等領偏師衛塔山糧運敗明兵二萬大軍薄寧遠城擊明總兵滿桂斬級無算薩哈璘以力戰被創三年十月上征明次波羅河屯大貝勒代善莽古爾泰密請班師上不憚薩哈璘偕貝勒岳託等力勸決進取遂由洪山口克遵化進偪明北京十二月薩哈璘略通州焚其船克張家灣圍永平克香河縣復殲沙河驛蒙古兵之出奔山海關者五百人四年正月克永平同貝勒濟爾哈朗

駐守永平李春旺者譌言將屠城以慰衆臬之招諭所屬之遷安灤州建昌臺頭營鞍山堡皆降事具鄭獻親王傳三月遣軍敗明副將張宏謨兵四月明兵自樂亭撫寧攻灤州薩哈璘率兵援之敗遁二貝勒阿敏來代乃攜所俘還五年三月命諸貝勒直言時政薩哈璘奏曰圖治在乎用人人主灼知邪正則臣下爭尚名節竭力圖功惟皇上慎簡貝勒大臣及審事官任以政務遇大征伐上親在行間諸臣自悉遵方略若遣發宜選賢能者爲帥給符節畀事權仍限官品某以下干軍令者許軍法從事七月初設六部命掌禮部事是月上證明與貝勒杜度豪格留守六年五月同濟爾哈朗等率右翼兵略歸化城黃河諸路俘蒙古千餘復指授歸順蒙古諸貝勒牧地申約法十月師還七年六月詔問證明及察哈爾朝鮮三者何先奏言常寬朝鮮拒察哈爾而專證明察哈爾雖不加兵彼如蟲食穴中勢必自盡至於明我少緩一年彼守禦益固臣意視今歲秋成圖進取乘彼禾稼方熟因糧於彼爲再進計量留兵防察哈爾上先與諸貝勒以騎往來襲擊俘獲蹈躡之再命貝勒率精兵自一片石入山海關則彼寧錦諸州爲無用或仍從寧錦入斷北京四路度地形奪糧足之地據守勿歸乘機伺便二三年中大勦克集

矣八月同貝勒阿巴泰阿濟格略明山海關師還上以不乘勝入內地責之八年
二月同貝勒多爾袞往迎明降將尙可喜招撫廣鹿長山二島戶口三千八百有
奇六月上征明薩哈璘自喀喇鄂博攻克得勝堡殲明兵參將李全自縊八月略
代州偵崞縣城頽夜襲拔之王東板鎮二堡居民棄城遁復敗代州騎兵百步兵
三百追薄城乃率兵會御營於大同籍俘獲數以聞九年二月同多爾袞岳託豪
格等統兵收察哈爾林丹汗子額哲途遇察哈爾汗之妻及台吉索諾木率屬來
降進抵托里圖進取額哲全部師還岳託駐軍歸化城薩哈璘復同多爾袞豪格
略明山西府縣仍由歸化城旋事具睿忠親王傳先是諸貝勒大臣以遠人歸附
國勢日隆合詞請上尊號上卻之十二月諸貝勒以收察哈爾全部復請上仍不
允薩哈璘乃令內院大臣希福等奏曰臣等屢請未蒙俯鑒夙夜悚惶罔知所措
伏思皇上不受尊號咎在諸貝勒不能殫竭忠信屢布嘉猷爲久大計今諸貝勒
誓改行竭忠輔開太平之基皇上宜受尊號上稱善曰薩哈璘爲朕深謀善承皇
考開拓之業開陳及此實獲我心其應誓與否爾身任禮部當自主之翌日薩哈
璘集諸貝勒於朝各書誓詞以奏上以內外諸貝勒誠難固讓而朝鮮乃通好之

國宜使告知薩哈璘復奏諸貝勒當遣人與使臣前往告以內外之誠并示以各國來附兵力強盛之實上嘉納之崇德元年正月薩哈璘有疾上遣希福等傳諭曰朕望爾病速痊念之甚切爾則不可強圖亟愈卽思見朕也羣子弟中啟我所不及助我所遺忘整理治道惟爾是賴爾但當勤於調治以冀病痊薩哈璘對曰蒙皇上溫旨眷顧竊冀仰荷恩育或可得生卽不幸先填溝壑亦復何憾但當國家大勳垂就不能盡力捐軀輾轉牀蓐爲可恨耳希福等以其言奏上惻然曰國家豈有專事甲兵以爲政治者儻疆土日增克成大業無此明哲人何以整理乎是月上臨視薩哈璘疾見其羸瘠淚下薩哈璘悲痛流涕五月薨年三十有三薩哈璘明達聰敏通曉滿漢蒙古文義掌部事贊謨猷上深嘉之病革上復親臨及薨不勝震悼入哭者四自辰至午乃還宮仍於庭中設幄居不御飲食輟朝三日祭時上親奠哭追封和碩穎親王讀冊畢復痛哭三奠六月上御翔鳳樓偶假寐夢人請曰穎親王乞賜牛一如是者再寤以問希福等皆奏曰此皇上悼念所致上曰不然當別有故於是希福檢會典凡親王薨初祭例賜一牛穎親王初祭未用牛上命致祭如禮康熙十年六月追諡曰毅乾隆十九年九月入祀盛京賢王

祠 初次襲阿達禮追封穎毅親王薩哈璘第一子崇德元年六月襲封多羅郡王三年二月從征喀爾喀至博碩堆偵扎薩克圖汗遠遁而還五年五月同鄭親王濟爾哈朗等駐義州迎來歸蒙古多羅特部於杏山西五里臺敗明追兵賜御廐良馬一六年三月同鄭親王圍錦州降城中蒙古台吉諾木齊吳巴什等四月敗明援兵於錦州南山西岡六月敗明松山援兵九月圍松山明兵犯我鑲黃旗正紅旗正黃旗營擊敗之斬級千四百餘七年二月克松山城俘明總督洪承疇巡撫邱民仰等具詳鄭獻親王傳七月敘功賜鞍馬一蟒緞九十尋命管禮部事預議政先是上御篤恭殿王以下及衆官皆立侍九月王請更定儀制上御殿及賜宴親王以下衆官等皆跪迎上升陛方起駕興亦如之十月貝勒阿巴泰征明薊州同豫郡王多鐸屯寧遠牽制援兵八年八月世祖章皇帝嗣位以阿達禮與貝子碩託謀立睿親王伏誅爵除

和碩端重親王博洛

博洛太祖高皇帝孫饒餘敏郡王阿巴泰第三子天聰九年五月大軍由明宣府大同邊境征朔州代州應州別遣貝勒多鐸從廣寧入寧遠錦州界牽制明關外

兵使不得援山西博洛隨征有功崇德元年封固山貝子隨父阿巴泰征明延慶州凱旋預宴二年四月預議政三年七月任理藩院承政十月從上征明寧遠分軍趨中後所明總兵祖大壽猝襲我後衝潰土默特蒙古兵護軍統領哈寧哈等與相持博洛突前奮擊敵乃卻五年五月同鄭親王濟爾哈朗駐營義州迎來歸之蒙古多羅特部於杏山西五里臺敗明追兵賜良馬一尋與諸王更番圍錦州六年八月明總督洪承疇來援敗之松山追至塔山獲其筆架山積粟事具英親王傳又同貝勒羅洛渾等設伏桑阿爾齊堡擊敗王樸吳三桂七年春松山錦州相繼下博洛與兄輔國公博和託暨貝子尼堪等更番駐防錦州順治元年四月隨睿親王多爾袞入山海關破流賊李自成十月晉封多羅貝勒隨親王多鐸征河南破李自成於潼關下西安南定江寧豫親王分兵半以博洛領之招撫常州蘇州同鎮國將軍拜音圖等趨杭州明兵分拒皆敗夜渡錢塘江逃我軍追至江岸駐營敵見之以爲潮且至營必沒而潮連日不至敵驚爲神明潞王朱常滂遂率杭州官屬開門納款淮王朱常清亦自紹興渡江來歸十月凱旋賜金二百兩銀萬五千兩鞍馬一三年二月命爲征南大將軍往平浙閩五月至杭州時明魯

王朱以海稱監國於紹興舊將方國安等營錢塘江東岸縣亙二百里我軍無舟不得渡忽江沙暴漲水淺可涉護軍統領圖賴等策馬徑渡敵驚遁博洛遣貝子屯齊等繼進國安棄舟遁以海走台州斬殪無算擒敵將武將科等撫定紹興六月圍金華七月克之斬明蜀王朱盛濃等遂克衢州浙江悉平明唐王朱聿鍵猶據福建我軍分常山江山兩路並進博洛偕圖賴與前鋒統領努山護軍統領都爾德破敵仙霞關克浦城建寧延平聿鍵先由延平走汀州博洛遣護軍統領阿濟格尼堪等克其城擒聿鍵及曲陽王朱盛渡西河王朱盛淦松滋王朱演漢西城王朱通簡及其官屬敵將姜正希引兵二萬來援夜襲城擊卻之斬級萬餘鎮國將軍海岱等敗敵將師福於分水關克崇安縣副都統卓布泰等克福州先後二十餘捷斬其巡撫楊廷清李暄楊文忠降僞國公鄭芝龍等二百九十餘人馬步兵十一萬有奇撫定興化漳州泉州等府十一月朔捷聞得旨嘉獎是月博洛駐福州令總兵佟養甲進征廣東時聿鍵弟聿鏞據廣州僞稱紹武年號養甲既克潮州惠州遂薄廣州克其城斬聿鏞及其宗屬十餘人撫定廣州四年二月博洛承制以佟養甲爲兩廣總督自率貝子博和託都統圖賴等凱旋優賚所獲金

帛人口敘功晉封多羅郡王加號端重五年十一月同英親王阿濟格往大同偵防喀爾喀至則總兵姜瓖已據城叛遂圍之六年正月叛黨劉遷陷代州王偕郡王碩塞赴援克其鄂賊遁三月旋軍大同瓖潛期助馬得勝兩路賊五千由北山偪我營自驅騎千餘出犯王與護軍統領鼇拜徹爾布等分禦之擊斬過半北山賊竄瓖亦閉城不敢復出是月睿親王赴大同招撫瓖承制晉博洛爲親王四月命爲定西大將軍移師討汾州叛賊五月奏清源交城文水徐溝祁縣賊平六月奏賊犯平陽遣副都統譚布擊敗之賊渡河遁七月賊萬餘犯絳州遣副都統洛碩擊走之斬級二千餘又分遣諸將剿賊孝義縣克其城屢敗賊於壽陽平遙遼州榆社時英親王與敬謹親王尼堪圍大同親王滿達海與郡王瓦克達剿賊朔州寧武有旨令博洛酌撤閒駐兵率還京王疏言太原平陽汾州三府屬州縣雖漸收復然未復者尙多恐撤兵後賊乘虛襲據應仍留守禦上是其言令俟滿達海自朔州移師至汾州併力剿賊八月大同降將楊振威斬瓖首獻英親王軍王與滿達海合兵攻汾州九月克其城斬僞巡撫姜建勳僞布政使劉炳業復嵐縣永寧州遣軍分剿餘賊於岳陽縣絳州孟城驛老君廟殲之乃班師七年二月命

理六部事八月以徇隱尙書阿哈尼堪不親往迎朝鮮王弟事降郡王八年正月
晉封和碩端重親王二月同諸王奏削故睿親王封爵三月以英親王私藏軍器
事隱不奏降郡王尋命諸王分管六部王掌戶部五月復封親王八月上察尙書
譚泰狂悖逞私持六部權下諸王勘問王與貝子錫翰等證其罪狀伏誅九年三
月薨年四十諡曰定十四年正月王第四子塔爾納封多羅郡王三月卒年十有
五諡曰敏思十六年十月追論王分取睿親王財物掌戶部時不參劾譚泰罪削
博洛及塔爾納爵諡 初次襲齊克新原封端重親王博洛第八子順治十二年
四月襲封和碩端重親王十六年十月追論博洛罪降齊克新多羅貝勒十八年
正月薨年十有二諡曰懷思爵除

多羅通達郡王雅爾哈齊

雅爾哈齊顯祖宣皇帝第四子與太祖高皇帝及追封親王舒爾哈齊俱爲宣皇
后所生舒爾哈齊事蹟見其子鄭親王濟爾哈朗傳雅爾哈齊無嗣其卒年及事
蹟舊史不著世祖章皇帝順治十年五月追封多羅郡王諡曰通達十一年三月
配享太廟與武功郡王禮敦慧哲郡王額爾袞宣獻郡王齋堪並列東廡高宗純

皇帝乾隆十九年九月入祀盛京賢王祠四十三年正月諭曰通達郡王係顯祖之子武功慧哲宣獻三郡王係景祖之子當時雖身與配享第以三郡王宗支已在覺羅之列宗室王公表傳內亦未立通達郡王傳國史傳又以屬在宗潢令此四王無所附麗亦覺缺典著交內閣國史館補爲立傳通達郡王入於宗室武功等三郡王列於國史諸大臣傳之前或當時記載簡少功績無由稽覈不拘詳略各立一傳以徵信實

多羅饒餘郡王阿巴泰

阿巴泰太祖高皇帝第七子初授台吉歲辛亥七月同費英東安費揚古率兵千征東海窩集部之烏爾固辰穆稜二路俘千餘人還天命八年四月同台吉德格類宰桑古岳託征扎嚕特部渡遼河由額爾格勒行百餘里攻其部長昂安所居昂安攜妻子從二十餘人遁我總兵官達音布先驅追及戰沒阿巴泰督諸將繼進斬昂安及其子俘其衆以還上行郊勞禮隨征將士分賜所俘十年十一月同三貝勒莽古爾泰貝勒濟爾哈朗等援科爾沁時察哈爾林丹汗圍科爾沁之克勒珠爾根城已數日我軍至農安塔林丹汗夜遁軍還十一年九月太宗文皇帝

卽位封阿巴泰貝勒阿巴泰語額駙揚古利達爾漢曰戰則我擐甲胄行獵則我佩弓矢出何不得爲和碩貝勒揚古利等以奏上命勸其勿怨望天聰元年五月上親征明錦州同貝勒杜度居守十二月察哈爾昂坤杜稜來歸設宴阿巴泰語納穆泰曰我與小貝勒列坐蒙古貝勒明安巴克俱坐我上實恥之納穆泰入奏上宣示諸貝勒於是大貝勒代善率諸貝勒訓責之曰德格類濟爾哈朗杜度岳託碩託早隨五大臣議政爾不預阿濟格多爾袞多鐸皆先帝分給全旗之子諸貝勒又先爾入八分列爾今爲貝勒心猶不足欲與和碩貝勒抗將案紀綱耶阿巴泰引罪願罰於是罰甲胄雕鞍馬各四素鞍馬八二年五月同貝勒岳託碩託證明錦州敵棄城退守寧遠自十三山站以東毀堠二十一斬守者三十人獲人畜毀錦州杏山高橋三城師還上出五里迎勞三年十月從上證明由喀喇沁之波羅河屯行七日同貝勒阿濟格率左翼軍克龍井關敗明援兵進克漢兒莊事詳英親王傳時右翼軍克大安口上親統師進克洪山口並趨遵化城十一月敗明援兵自山海關至者下遵化城由薊州三河縣趨通州明大同總兵滿桂宣府總兵侯世祿屯順義縣阿巴泰同岳託擊走之獲馬千餘駝百餘順義知縣降大

軍駐京城北土城關之東北明寧遠巡撫袁崇煥錦州總兵祖大壽以兵二萬來援屯廣渠門外阿巴泰同貝勒莽古爾泰阿濟格多爾袞多鐸豪格攻之聞敵右伏甚衆因約軍入隘趨右由正路入者與避敵同豪格趨右敗伏兵轉戰至城壕阿巴泰與豪格離由正路衝潰敵兵亦抵壕既收軍諸貝勒大臣議阿巴泰違約罪應削爵奪所屬人員給豪格上曰阿巴泰原非怯懦無能者比不過以顧其二子致離豪格耳朕奈何以子故加罪於兄因宥之十二月同阿濟格焚通州克張家灣從上至薊州敗敵援兵事具英親王傳四年正月捕斬叛將劉興祚於山海關事具鄭獻親王傳二月上旋蹕以阿巴泰同濟爾哈朗薩哈璘鎮永平四月明兵攻我軍駐守灤州者擊走之事具穎毅親王傳五年三月命諸貝勒直言時政阿巴泰奏曰國人怨惟患不知未有見善而不以爲善見惡而不以爲惡者臣無他能謹識上諭自今凡事從公斷而已七月初設六部命掌工部事八月從上圍明大凌河城正黃旗兵圍北之西鑲黃旗兵圍北之東阿巴泰軍其中策應十月明總兵祖大壽以城降上議取錦州策命阿巴泰同貝勒德格類多爾袞岳託率兵四千作漢裝偕大壽及降兵三百五十人乘夜襲錦州二更行礮聲不絕錦州

城中聞之以爲大凌河圍者得脫分路應援我軍擊斬甚衆會大霧皆失隊伍乃收軍還七年三月監築蘭磐城五月召宴賜御用蟒衣一紫貂皮八馬一六月詔問征明及朝鮮察哈爾三者何先奏言明之情形皇上既悉知之其地利臣等亦熟識之襲其不備關門可得上親統大軍駐關外擇貝勒大臣分路入關獲其人可用者用之消息易得錦州無足顧慮天時既至可令祖大壽入山海關與我兵合攻八月同阿濟格征明略山海關而還以不能乘勝入關訓誡之八年五月從上征明宣府八月同阿濟格克靈邱縣及王家莊獻捷大同城南山岡御營九年七月諭阿巴泰曰爾嘗自謂手疼似覺不耐勞苦不知人身血脈勞則無滯惟圖家居佚樂身不涉郊原手不持弓矢忽爾行動疾病易生若日以騎射爲事奚復慮此凡有統帥士卒之責者非躬親教演士卒誰肯專心武事騎射之藝精於勤而荒於嬉不可不時加練習爾當努力奮勵毋偷安旦夕斯克敵制勝能報先帝養育之恩爲國盡忠矣崇德元年四月晉封多羅饒餘貝勒六月同武英郡王阿濟格等征明大捷九月凱旋事詳英親王傳十二月上親征朝鮮令駐防噶海城二年二月遣兵入明義州境捉生得二人是月朝鮮降上班師阿巴泰攜駐噶海

兵還瀋陽三年二月上親征喀爾喀以阿巴泰與禮親王代善等留守並監築都爾弼城治盛京至遼河大路九月同睿親王多爾袞征明四年四月凱旋賜馬二銀五千兩事俱詳睿忠親王傳九月同武英郡王等赴明錦州寧遠偵敵五年六月同睿親王等赴明義州督兵屯田有功七月同貝勒杜度率兵設伏寧遠路殲明運糧兵獲米千石九月敗明杏山松山兵時大軍更番圍錦州受代而還十二月往圍錦州六年三月以聽從睿親王離錦州城三十里駐營及遣兵還家事論削爵奪所屬戶口詔從寬罰銀二千兩六月復攻圍錦州敗明總督洪承疇援兵十三萬於松山獲馬五百七十上親征殲敵數萬九月駕旋留軍合圍松山杏山高橋命阿巴泰仍與諸王更番圍錦州七年三月錦州降同鄭親王濟爾哈朗進克杏山回駐錦州七月受代還敘功賜蟒緞七十是年十月授奉命大將軍同內大臣圖格等證明上親送郊外十一月由黃崖口入敗明總兵白騰蛟白廣恩於薊州破河間景州趨兗州擒明魯王朱以派及樂陵陽信東原安邱滋陽諸王分兵徇萊州登州青州莒州沂州南至海州凡攻克撫降城八十八還略滄州天津三河密雲八年六月由牆子嶺凱旋上遣鄭親王睿親王等郊迎三十里賜銀萬

兩順治元年四月敍功晉封多羅饒餘郡王二年正月統兵鎮山東剿平滿家洞
土賊時明福王朱由崧兵屯徐州東北遣都統準塔等往剿捷還三年三月薨年
五十有八康熙元年二月以子岳樂晉和碩親王贈如其爵十年六月追諡曰敏
乾隆十九年九月入祀盛京賢王祠 初次襲岳樂饒餘敏郡王阿巴泰第四子
初封鎮國公順治三年正月隨肅親王豪格征四川誅流賊張獻忠五年八月隨
英親王阿濟格剿平天津土賊十一月復隨英親王駐防大同六年九月晉封多
羅貝勒八年二月襲封多羅郡王改號曰安九年二月掌工部事十月預議政十
年七月以喀爾喀部土謝圖汗車臣汗等違旨不還所掠巴林戶口又來索歸順
同部蒙古命爲宣威大將軍駐歸化城相機進剿尋因喀爾喀悔罪入貢撤還十
二年八月掌宗人府事十四年十一月諭獎性行端良莅事敬慎晉封和碩安親
王康熙十三年十月命爲定遠平寇大將軍赴江西剿逆藩吳三桂耿精忠賊黨
進征廣東十二月抵南昌詔移師征湖南王奏江西形勢爲廣東咽喉江南湖廣
要衝今三十餘城皆賊盤據且吳逆造木城於醴陵置僞總兵十餘人兵七萬猱
猱三千堅守萍鄉諸隘若撤撫州饒州都昌防兵往湖南則諸處復爲賊有否則

兵勢單弱不能長驅且廣東諸路恐亦多阻臣欲先平江西賊無卻顧憂然後分防險要移師湖南得旨令速行整理江西要地旋奏遣副都統穆成額等擊走吳逆僞總兵張泰殺賊五千餘復安福縣又奏副都統雅賚等招撫康山餘賊復都昌縣十四年二月奏護軍統領桑格等陣斬僞總兵朱一典謝以泰等復上高新昌二縣三月奏將軍希爾根前鋒統領舒恕敗賊撫州之唐埠及七里岡四月奏副都統珠喇禪等敗賊五桂寨徐汝等處并招撫冷口南湖西湖銅鼓營諸僞官復餘干東鄉二縣王親攻建昌耿逆僞將軍邵連登迎戰長興鄉擊走之復建昌府城分兵破賊於石頭街鸞石嶺白水山遂復萬年安仁二縣閏五月諭留兵守建昌速回南昌居中調度是月奏都統霍特敗賊新城縣副都統珠喇禪敗賊武寧縣將軍額楚敗賊弋陽縣復廣信府六月奏將軍希爾根敗賊餘干縣復饒州又敗賊碣碑鋪及景德鎮復浮梁樂平二縣前鋒統領舒恕總兵許眞敗賊宜黃躡之踰崇仁及樂安三縣並復七月奏泰和龍泉永新廬陵永寧及湖南茶陵並就撫七月奏遊擊周志新等破吳逆僞總兵桂芳等復靖安縣十一月疏言吳逆聞臣進取長沙必固守要害非綠旗兵無以搜險非紅衣礮不能破壘乞令提督

趙國祚都督陳平各率所屬隨臣進討並敕發新造西洋礮二十又奏希爾根額楚剿滅浮梁餘賊招降僞將張輔聖等復貴溪縣十二月耿逆僞總兵張存遣來告領兵八千屯順昌俟大兵進閩爲內應詔以簡親王喇布已自江寧移駐南昌閩事付之料理王卽進征長沙十五年二月王至萍鄉分兵四路破賊寨十二吳逆僞將軍夏國相遁收復萍鄉縣遂進薄長沙七月奏賊船集長沙城下我兵無船難破賊長沙附近林木甚多請先敕撥戰艦七十濟用并令督撫委員伐材造船詔並如所請八月諭曰朕聞王恢復萍鄉大創逆賊直抵長沙甚爲嘉悅王其善撫百姓俾困苦得紓至脅從叛變之人原係朕之臣子當加意招徠十六年正月遣副都統阿進泰等敗僞總兵解先聲及馬棚賊於瀏陽縣十二月遣兵敗賊平江縣復其城十七年閏三月奏遣兵追剿馬棚賊邱義尙於七家洞擒斬無算招降僞總兵揭玉慶朱永升等僞將軍林興珠率僞官楊廷言等自湘潭來降九月詔以三桂旣伏冥誅賊勢漸潰宜廣示招徠速行攻剿王請自赴岳州布置舟師調諸路大礮攻賊陸營上命大將軍貝勒察尼急圖岳州王仍圍攻長沙十八年正月岳州僞將軍陳珀僞總兵王度冲降於察尼軍餘賊潰竄長沙賊亦棄城

遁王入城撫定遣前鋒參領沙納哈等復湘潭縣賊退據衡山縣王遣兵會簡親王敗賊衆衡州寶慶相繼復六月疏言臣所統護軍驍騎兵每佐領下十五人蒙古兵一百餘人喇布既進取新寧臣當率每佐領兵十一綠旗兵一萬與喇布相機進剿武岡東口賊留每佐領兵各一綠旗兵一千二百及荊州水師二千守衡州留每佐領兵各一綠旗兵一千守寶慶撥每佐領兵各二協同綠旗兵守岳州詔如所議行是月遣都統釋迦保敗賊寶慶之巖溪斬級數百獲船四十餘僞總兵王熙忠僞副將陳起鳳僞知府金世正降七月王統師抵紫陽河見賊營對岸令提督趙國祚副將尼滿偕降將林興珠渡河直前護軍統領瓦岱等繞出賊後夾擊大潰追斬二百餘級僞知縣周冠陳廷颺等降進攻武岡賊帥吳國貴胡國柱以賊二萬餘據隘口我軍奮攻礮殲國貴賊駭竄貝子彰泰追至木瓜橋殺賊無算遂復武岡州及楓木嶺八月奏捷得旨嘉獎十一月命以敕印付貝子彰泰撤每佐領兵八率還京十九年正月上遣官迎宣諭曰王連年以來遠莅巖疆親經百戰櫛風沐雨歷暑逾寒競揚貔虎之雄克清梟獍之孽湖湘諸處已見蕩平滇黔餘氛俱成坐困更體朕軫念窮荒之心廣示招徠深加撫恤王師所至遐邇

來歸捷奏屢宣中外稱慶朕既嘉碩畫益篤親親爰命班師副朕懷想頃者聞王已抵武昌奏凱可期特遣使臣慰勞兼賜駱駝良馬以示優眷王其按程而來朕計日以待三月凱旋上行郊勞禮於盧溝橋南二十里俘明僞太子朱慈燦以來先是順治元年冬有赴故明外戚周奎家自稱太子者奎白諸朝令舊宮人及東宮官屬辨視非真法司鞠實太監楊玉取劉玉子詐冒狀並伏誅康熙十二年冬京師聞吳三桂反有自稱三太子朱慈璫者僞署廣德元年糾黨京城內外舉火作亂擒其黨於鼓樓西街及鐙市口詰以朱慈璫云卽楊起隆已遁矣十八年秋王駐營楓木嶺土人首擒僞軍師戴必顯無爲教姚文明因獲朱慈燦於新化縣僧寺追訊前在京城逆謀慈燦訴已係崇禎帝長子十二歲遭闖難出奔南京後並未再至北京福王由崧曾寘諸獄釋爲民卽往河南隨朽木和尚爲僧流落江西湖廣二十餘年因病還俗往來永州寶慶欲聲討吳三桂悖逆反覆不忠不孝不義諸罪商之戴必顯姚文明招兵散筭一年因三桂死中止王疏陳讞詞因言前此屢有冒明太子事朱慈燦雖云欲討吳逆招兵散筭但當大軍復寶慶時不卽自首應與戴必顯姚文明並論斬其曾受僞筭人已示許自首續繳僞筭銷燬

免罪慈燦既自稱眞係明嗣當械至京辨識得旨朱慈燦等著王帶來俟到日再議至是王移送法司令與前繫獄之朱慈璫逆黨對質俱不識詰其造印散笥與戴必顯姚文明謀亂屬實皆擬凌遲如律詔並改爲處斬是年秋復有以朱慈璫之名在陝西煽誘者擒之漢中三河口大將軍圖海械送至京敕法司勘訊而有刺痕實非明嗣并非楊起隆依大逆律磔於市二十年十二月命王仍掌宗人府事二十七年七月以噶爾丹擾喀爾喀同簡親王雅布各率兵五百赴蘇尼特汛界駐防十月撤還二十八年二月薨年六十有五諡曰和二十九年十二月禮烈親王代善之曾孫原封貝勒諾尼訴岳樂康熙四年掌宗人府事偏聽諾尼姑母讒言枉坐諾尼不孝死罪革爵繫獄蒙鑒原釋放岳樂誣陷無辜理應反坐詔宗人府會同領侍衛內大臣察議復諾尼貝勒追降岳樂郡王削其諡 二次襲瑪爾渾安郡王岳樂第十五子康熙十六年正月封世子二十九年二月襲封多羅安郡王三十五年正月大將軍征噶爾丹命率兵往歸化城偵防四十年十月掌宗人府事四十五年充玉牒館總裁四十八年十一月薨年四十有七諡曰愨三次襲華圮安愨郡王瑪爾渾第二子康熙四十九年二月襲封多羅安郡王五

十八年九月薨年三十有五諡曰節雍正元年十二月諭廷臣曰曩時安郡王岳樂詔附輔政大臣又自恃長輩每觸忤皇考蒙聖德寬仁始終容宥而伊諸子全不知感不務竭誠效力弟兄之間互相傾軋競爭營求妄冀得爵讒害骨肉此衆所共知者瑪爾渾係應襲王爵之人似屬安分其子華圮尙無劣蹟而其嗣夭折封爵虛懸是以皇考審擇其人躊躇有待乃安郡王岳樂之子伍爾占孫色亨圖等遽生怨望形於辭色夫國家恩施豈可倚恃而強邀今廉親王允禩借此逞其讒說以離間宗室舊人致朕從容施恩之本念俱不可行將襲封安郡王之本章發回不准承襲舊所屬佐領撤出另撥乾隆四十三年三月上追念饒餘敏郡王阿巴泰安郡王岳樂累著功績賜奉恩輔國公爵世襲罔替 四次襲奇昆安節郡王華圮孫追封奉恩輔國公錫貴第二子乾隆四十三年三月襲封奉恩輔國公四月授散秩大臣四十七年七月卒年四十有四 五次襲崇吉奉恩輔國公奇昆第三子乾隆五十九年二月襲封奉恩輔國公嘉慶八年四月往守泰陵九年十二月以公盛住往陵寢重地青椿內開採石塊及朔望委員拈香等款崇吉未奏參復亦委員行禮二次削爵 六次襲布蘭泰安節郡王華圮曾孫追封奉

恩輔國公岱英第二子嘉慶十年正月襲封奉恩輔國公

清史列傳卷二終

清史列傳 卷三

宗室王公傳三

多羅克勤郡王岳託

岳託太祖高皇帝孫禮烈親王代善第一子初授台吉天命六年二月大兵略明奉集堡將旋有小卒指明兵所在岳託同台吉德格類等擊敗之三月上征拔瀋陽大軍方追明總兵李秉誠於白塔鋪岳託後至逐北四十里途斬三千餘人初喀爾喀扎嚕特貝勒昂安執我使者送葉赫被殺八年四月同台吉阿巴泰等討之事詳饒餘敏郡王傳十一年十月復隨父大貝勒代善征扎嚕特部有功是年封貝勒天聰元年正月同二貝勒阿敏貝勒濟爾哈朗等征朝鮮攻義州定州漢山三城克之渡嘉山江克安州至平壤其守者棄城遁遂渡大同江次中和遣諭朝鮮王李倭降阿敏欲直趨至其都岳託知不可止密與濟爾哈朗議駐師平山城復遣副將劉興祚諭李倭倭報願歲貢方物岳託謀曰吾等事已成矣蒙古與明皆敵國或有邊事當思備禦宜盟而班師既盟以告阿敏以己未與盟仍縱掠

岳託曰盟旣成縱掠非義也勸之不可復令李倬弟覺與盟乃班師五月從上征明同三貝勒莽古爾泰等率偏師衛塔山糧運又從圍寧遠並有功八月敗明兵於牛莊斬守備一千總二兵二百二年五月同貝勒阿巴泰碩託征明錦州有功事詳饒餘敏郡王傳三年八月略明錦州寧遠焚其積聚十月上征明岳託同濟爾哈朗由大安口入日見明兵營山上岳託率兵半駐以待濟爾哈朗以其半擊之復見明兵自遵化來援者顧謂濟爾哈朗曰吾當擊此是日五戰皆捷十一月同阿巴泰敗大同總兵滿桂宣府總兵侯世祿於順義薄北京復從父代善擊敗明援兵十二月同貝勒薩哈璘等圍永平府克香河縣四年正月同貝勒豪格還守瀋陽五年三月命諸貝勒直言時政岳託奏曰刑罰舛謬實在臣等祈皇上擢用直諫士近忠良絕讒佞行黜陟之典明加甄別則諸臣咸知激勸矣七月初設六部命掌兵部事八月上征明大凌河城自白土場趨廣寧岳託同貝勒阿濟格等率兵二萬別由義州進會大軍都統葉臣率鑲紅旗兵圍城西南岳託軍爲策應十月明總兵祖大壽請降以子可法質可法見貝勒欲下拜岳託曰戰則爲仇敵和則爲弟兄何以拜爲命以國禮見因問爾等死守空城何意曰畏屠戮耳岳

託曰遼東以久抗不降故誅之殺永平人乃貝勒阿敏所爲已論繫之矣我皇上卽位以來敦行禮義治化一新養民愛士仁心仁政爾等豈不聞之可法曰上於貧者衣食之富者秋毫無擾寬仁愛民之德實皆聞之遂辭歸越三日大壽以城降夜襲敗錦州兵事具饒餘敏郡王傳六年正月奏言前克遼東廣寧漢人拒命者誅之後復屠永平灤州漢人縱極力撫諭人懷疑懼今天與我以大凌河漢人正使天下知我善養人也臣愚以爲善撫此衆歸順者必多當先予以室家出公帑給其需儻蒙天眷奄有其地仍給還家產彼必悅服衆官宜令諸貝勒給莊一區每牛索取漢男婦二名牛一頭編爲屯人給二屯其出口耕牛之家牛彘以官值償至明兵棄鄉土窮年戍守一苦也畏我誅戮又一苦也今慕義歸降之漢兵令滿漢賢能官善爲撫恤毋令一人失所則人心歸附大業可成上嘉納之五月同濟爾哈朗等略察哈爾部於歸化城俘獲以千計九月同貝勒德格類拓疆自耀州至蓋州以南七年六月詔問證明及朝鮮察哈爾三者何先奏言時不可失山海關通州北京三路乘時圖其一則丕基定矣是月同德格類等率右翼楞額禮葉臣左翼伊爾登昂阿喇漢軍都統石廷柱元帥孔有德總兵耿仲明攻明

旅順口俘獲無算八月奏言前蒙聖諭留一都統守旅順口今留葉臣伊爾登帥兩翼每旗留官三員兵二千五百名漢軍以遊擊佟圖賴主之統防禦二員兵百名駐守臣等自木場驛啟行俟抵我界貯礮車於蓋州留俘振旅是月師還上宴勞於郊以金卮酌酒賜之八年二月奏定馬匹倒斃擇牛彘殷實之家酌免丁徭責令償補又奏減牛彘下廝養卒得旨惟哨長許留餘悉罷三月上大閱岳託率滿洲蒙古等十一旗行營兵赴瀋陽城北郊列陣二十里許上駐蒲馬岡岳託指示紀律軍容嚴肅上嘉獎之五月上征察哈爾諭留守盛京諸貝勒及將領等畢岳託復曉於衆曰自隄岸以東巨流河以西原置十四哨爾等酌量布置晝則令軍士習射夜勿解衣張弓開甲囊以備不虞岳託隨行有疾六月上臨視命還盛京九年二月同貝勒多爾袞薩哈璘豪格收降察哈爾林丹汗子額哲六月師還諸貝勒略明山西岳託有疾以兵千留駐歸化城會土默特部人告博碩克圖汗子俄木布遣人偕阿嚕喀爾喀及明使者至將謀我岳託伏兵邀之俄木布乳母之夫毛罕知之趣還伏猝起誅毛罕擒明使者隨命土默特捕斬阿嚕喀爾喀之謀匿馬駝者部分土默特壯丁三千有奇爲十隊隊以官二員主之授條約並頒

於鄂爾多斯尋諸貝勒會師於歸化城岳託偕還崇德元年四月晉封和碩成親王八月以徇庇莽古爾泰碩託且有離間鄭親王濟爾哈朗及肅親王豪格事論死特旨寬之降多羅貝勒罷兵部任十一月復命攝部事十二月從上征朝鮮國王李倬奔南漢山城同豫親王多鐸進圍之敗其援於城下二年八月命兩翼較射岳託奏不能執弓上曰爾徐引射之不射如他王貝勒等何諭再三始引弓弓墮地者五遂擲之諸王論岳託驕慢當死上復寬之降固山貝子罷部任罰鍰三年正月復封多羅貝勒管旗務二月從上征喀爾喀至博碩堆偵知扎薩克圖汗遁而還八月命爲揚威大將軍貝勒杜度副之統右翼兵與左翼奉命大將軍睿親王多爾袞分道伐明九月至牆子嶺明兵入堡外爲三寨我師攻克之獲敵卒知堡堅且有重兵不易拔嶺東西有閒道可趨於是分兵攻其前以牽敵師潛從閒道踰嶺入克臺十有一尋以疾薨於軍年四十有一四年三月睿親王奏捷上覽奏無岳託名驚問知病卒慟哭久之命勿使禮親王知四月喪還駕至沙嶺設幄遙奠還御崇政殿命王以下及諸大臣往奠覆命乃回宮輟朝三日詔封爲多羅克勤郡王賜駝二馬五銀萬兩葬盛京城南五里萬柳塘康熙二十七年十一

月命立碑以紀其功乾隆八年駕幸盛京親詣王園寢賜酹四十三年正月上追念王忠勳命配享太廟其見襲之平郡王復封號曰克勤八月入祀盛京賢王祠是年駕幸盛京復詣王園寢賜酹四十八年如之 初賜襲羅洛渾克勤郡王岳託第二子崇德四年九月襲封多羅貝勒管旗務五年五月同鄭親王濟爾哈朗等迎蒙古多羅特部蘇班岱等降衆敗明兵事詳鄭獻親王傳九月同鄭親王圍錦州六年三月復圍之設伏敗明援兵於南山西岡六月睿郡王多爾袞肅郡王豪格來代合擊明山海關援兵追及松山城而還八月從上征明克松山擒明總督洪承疇巡撫邱民仰等七年七月敘功賜蟒緞七十八年正月以怨懟誹議又敏惠恭和元妃薨時絲竹不輟論罪削爵五月封多羅貝勒仍管旗事上命濟爾哈朗多爾袞召羅洛渾諭曰爾父屢獲罪愆因皇考太祖皇妣太后撫養爲子朕視之如弟歿後猶追封克勤郡王并加恩於爾命爲多羅貝勒管旗務爾不思率由善道以輔國政嗜酒作慝致干國法朕又追念爾父特行寬宥復爾多羅貝勒仍令管旗事爾當敬慎修身勤思善行若今仍嗜酒妄亂不第爾祿位難保卽置爾於法亦所不赦至本旗所屬諸臣俱宜戒酒仍勸勉貝勒效力贖罪羅洛渾率

諸臣叩首謝罪順治元年十月以從定京師破流賊功晉多羅衍禧郡王三年正月同肅親王豪格征四川八月薨於軍年二十有四五年正月喪還命貝子屯齊等迎之輟朝二日康熙十年六月追諡曰介 二次襲羅科鐸衍禧介郡王羅洛渾第一子順治五年閏四月襲封多羅衍禧郡王八年二月改封號曰平十五年正月隨信郡王多尼征明桂王朱由榔於雲南破其晉王李定國鞏昌王白文選等兵十六年六月賜蟒衣弓刀鞍馬旌其勞康熙二十一年七月薨年四十有三諡曰比 三次襲訥爾圖平比郡王羅科鐸第四子康熙十八年正月封貝子二十二年正月襲封多羅平郡王二十六年四月以毆斃無罪人羅朶及折傷之桂菩薩保手足削爵 四次襲訥爾福平比郡王羅科鐸第六子康熙二十四年正月封固山貝子二十六年五月襲封多羅平郡王四十年七月薨年三十有一諡曰悼 五次襲訥爾蘇平悼郡王訥爾福第一子康熙四十年十二月襲封多羅平郡王五十七年十一月隨撫遠大將軍允禩收西藏尋駐博羅和碩五十九年正月移駐古木六十年十月攝大將軍事六十一年十一月復攝印如故雍正元年正月回京管上駟院事四年七月以前在西寧軍前貪婪受賄削爵乾隆五年

九月卒命仍以郡王禮葬 六次襲福彭原襲平郡王訥爾蘇第一子雍正四年七月襲封多羅平郡王十年正月任鑲藍旗滿洲都統四月奏凡外省來京襲職旗員到日隨奏不令久候多費以仰副體恤至意從之閏五月授宗人府右宗正十一年二月充玉牒館總裁四月命軍機處行走七月命爲定邊大將軍討逆賊噶爾丹策凌十一月師駐烏里雅蘇臺十二月奏言軍中駝馬最要今喀爾喀扎薩克貝勒班第等感恩獻駝馬力請停償價值伏念遠臣當軍興際不肯私所有況宗室王貝勒貝子公等皆有馬場滋生馬匹豈不內愧於心臣家有馬五百匹願送軍前備用並將臣奏宣示諸王貝勒貝子等臣料諸宗臣等必以臣言爲當彌切踴躍急公之義得旨允行十二年六月奏言烏里雅蘇臺扎克拜達里克推河並應撤京城滿洲漢軍右衛寧夏察哈爾土默特兵三千六百所有內扎薩克及烏蘭察布兵三百七十調赴推河駐防見在烏里雅蘇臺餘兵九千不敷調遣請以洪鄂爾鄂隆所調滿洲兵六百再增撥四百速赴軍營從之是月王率將軍傅爾丹赴科布多總統北路軍營令內大臣薩木哈掌威遠將軍印辦理烏里雅蘇臺軍務八月詔量撤北路兵王率副都統王常等領兵還十三年閏四月命總統

大兵駐鄂爾坤七月於額爾德尼昭迤北築城尋以公慶復代還京乾隆元年二
月上以北路所存糧米如何令蒙古兵支領並屯穫糜米出陳易新之處詔令查
議奏言蒙古兵向不給糧臣前以坐卡兵遠臨賊境取羊未便曾折給一月米糧
茲蒙皇上軫念蒙古一視同仁加恩賞米臣議將存留之喀爾喀兵及坐卡臺站
蒙古兵攬米支給今王大臣等又議將派駐鄂爾坤之蒙古兵給糧在此時存米
充裕不難槩給儻日久米少議停轉生怨望且準噶爾鬼蜮多端將來或仍須蒙
古兵移駐又豈能一例支給北地寒涼蓋藏得宜米可經三四年不壞臣愚於駐
防蒙古兵酌量賞給餘請仍給羊價爲便再鄂爾坤種地兵已撤糜麥無從易新
青稞大小麥較米尤不耐蒸遏應請恩賞蒙古米糧先給此項麥石又奏言喀爾
喀所牧馬除留軍營備用外各游牧處見有馬二萬九千餘內扎薩克各游牧處
馬四萬餘伏思鄂爾坤駐兵以歸化城爲聲援其閒距三千餘里鞭長莫及中途
須接換有馬往來緩急始足恃請度適中地近臺站水草佳處設馬廠於土默特
察哈爾兵內擇有眷屬者移駐牧放令歸化城都統協理再請撥騾馬萬兒馬二
千令臺站總管撥入官馬廠牧放備用有事無難輕騎疾馳馬力足而人心可恃

雖道遠無慮矣詔並下王大臣議行三月任正白旗滿洲都統十月調正黃旗滿洲都統三年七月預議政十三年十一月薨年四十有一諡曰敏 七次襲慶寧敏郡王福彭第一子乾隆十四年三月襲封多羅平郡王十五年九月薨年十九諡曰禧無嗣 八次襲慶恆原襲平郡王訥爾蘇孫貝子品級福秀第一子出爲福彭後乾隆十五年十二月襲封多羅平郡王十九年八月任鑲紅旗漢軍都統二十六年十二月授宗人府右宗正尋管理鑲紅旗覺羅學二十七年閏五月坐旗屬冒借官銀降固山貝子餘任悉罷四十年閏十月復封多羅平郡王四十四年正月命復克勤郡王始封之號仍爲克勤郡王四十四年二月薨年四十有七諡曰良 九次襲雅朗阿原襲平郡王訥爾圖孫閒散宗室訥清額第十子乾隆十六年十月授三等侍衛二十六年七月任鑲紅旗蒙古副都統九月授烏里雅蘇臺參贊大臣二十七年八月調正紅旗滿洲副都統尋授科布多參贊大臣三十一年十二月任成都副都統三十四年三月授荊州將軍三十五年十月以袒護所屬驍騎校楚德降三級調用十一月以副都統品級往庫爾喀喇烏蘇辦事三十七年五月復以徇隱臺站屬員不法削副都統品級在伊犁印務筆帖式行

走八月奉旨著在庫爾喀喇烏蘇章京處辦事十月以副都統品級赴塔爾巴哈
臺十一月奉旨雅朗阿辦事得宜仍留庫爾喀喇烏蘇辦事三十八年十二月任
三姓副都統三十九年十二月調盛京副都統四十年十月調黑龍江副都統四
十一年十二月遷綏遠城將軍四十四年四月襲封多羅克勤郡王四十五年九
月管理鑲藍旗覺羅學尋授宗人府右宗正四十七年二月任正白旗漢軍都統
四十八年四月調鑲紅旗滿洲都統七月調正黃旗滿洲都統五十一年十一月
充玉牒館總裁五十九年二月以病解都統任五月罷右宗正任並覺羅學十二
月薨年六十二諡曰莊 十次襲恆謹克勤莊郡王雅朗阿第三子乾隆四十九
年十二月歲滿封三等鎮國將軍六十年三月襲封多羅克勤郡王嘉慶四年五
月皇后出神武門恆謹失避道削爵賞四品頂帶往守西陵十二月授散秩大臣
七年十月封不入八分輔國公八年二月故 十一次襲尙格克勤莊郡王雅朗
阿孫原任三等侍衛佐領晉封多羅克勤郡王恆元第一子嘉慶四年六月襲封
多羅克勤郡王

多羅謙郡王瓦克達

瓦克達太祖高皇帝孫禮烈親王代善第四子天聰元年五月上親征明寧遠明總兵滿桂拒戰大敗之迨至寧遠城下瓦克達以力戰被創崇德五年七月隨睿親王多爾袞圍明錦州見敵兵出樵者以十餘人越前鋒統領布顏軍擊斬之六年八月明總督洪承疇集兵十三萬援錦州次松山大軍進擊之敵騎來奪我紅衣礮瓦克達同輔國公滿達海力戰卻之會天雨敵復來戰又敗之復進擊承疇三營步兵前鋒什長費雅思哈失馬瓦克達與之累騎出參領哈寧阿墜馬創甚敵圍之數重瓦克達直入其陣挈以歸順治元年四月隨睿親王入山海關敗流賊李自成追剿至望都十月隨英親王阿濟格由邊外趨綏德二年五月自成遁湖廣躡追至安陸府賊衆千餘方乘船遁瓦克達同護軍統領鼇拜率師涉水登岸射殫賊衆無算獲其船以濟大軍三年正月敘功封三等鎮國將軍先是崇德八年八月因兄碩託兄薩哈璘之子阿達禮謀立睿親王伏誅瓦克達坐黜宗室至是復入宗室五月隨豫親王多鐸剿蘇尼特部騰機思騰機特等大敗之圖拉河進至布爾哈圖山瓦克達與貝子博和託合軍斬千餘級擒八百餘人獲駝馬牛羊無算又擊敗喀爾喀土謝圖汗等兵十月師旋四年三月封鎮國公五年十

一月晉封多羅郡王十二月以喀爾喀部擾我邊界命隨英親王阿濟格駐防大同姜瓖叛據大同附近郡邑應之王隨英親王圍渾源州六年三月睿親王統師拔渾源州令還京七月命同親王滿達海剿賊朔寧武八月以巨礮攻克朔州城僞總兵姜之芬僞兵道孫乾高奎遁王與輔國公薩弼擊敗其還戰兵移師攻寧武關僞總兵劉偉僞兵道趙夢龍焚城西遁王追之時大同僞總兵楊振威通款英親王軍斬瓖首以降偉夢龍等亦率僞將五十餘人兵五千四百餘降於軍平靜樂縣及寧化所八角堡諸寨十月詔滿達海還京以王代爲征西大將軍剿撫山西餘賊七年二月疏報大兵分剿潞安平陽澤州叛黨僞總兵申亥郭中傑魏閔各率餘黨歸順廢官李建泰叛據太平縣圍之二十餘日窮蹙遂出降詔誅建泰及其兄弟子姪籍家產入官三月奏復平陽府屬三十六州縣四月班師八年二月加封號曰謙三月命諸王分管部務王掌工部十月預議政九年正月以醫人何大福出入部署辱罵職官招搖嚇詐伏誅王坐徇縱罰緩解部任四月罷議政八月薨年四十一有七康熙十年六月追諡曰襄初王剿山西賊時嘗駐平陽後平陽民追思其戢軍安民建祠以祀榜曰多羅謙郡王廟 初次襲哈爾薩謙襄

郡王瓦克達第三子順治十年閏六月議政王等以瓦克達曾獲罪郡王爵不應承襲上憐其子留雍哈爾薩命食奉國將軍品級俸康熙六年四月哈爾薩等訴其父軍功輔政大臣鼈拜尙書馬爾賽爲哈爾薩姻戚議封哈爾薩鎮國公留雍鎮國將軍八年七月留雍以已不得與弟一例晉爵訴不平議政王奏留雍等俱賁緣得封應革哈爾薩鎮國公并原有之奉國將軍品級留雍應革鎮國將軍仍食奉國將軍品級俸旨哈爾薩奉國將軍品級俸乃世祖章皇帝恩給仍如舊二十一年五月哈爾薩復訴父爵係軍功所得例得襲宗人府以奏命襲封鎮國公并封其子海青爲輔國公二十二年八月授宗人府左宗人二十四年九月遷右宗正二十五年十月諭責哈爾薩鑽營不安分罷右宗正任削鎮國公及海青輔國公爵 二次襲留雍謙襄郡王瓦克達第二子康熙二十五年十月襲封鎮國公三十七年四月詔宗人府會同領侍衛內大臣察劾行走懶惰者削留雍爵停襲乾隆四十三年三月上追念謙襄郡王瓦克達勞績賜一等鎮國將軍爵世襲罔替 三次襲洞福原襲鎮國公留雍曾孫初留雍第三子原封三等輔國將軍台渾生忠端爲閒散宗室洞福忠端第二子也乾隆四十三年三月襲封一等鎮

國將軍四十九年十月授護軍參領五十七年五月卒年五十有二 四次襲德文泰一等鎮國將軍洞福第二子乾隆五十五年十二月歲滿封二等奉國將軍五十七年十一月襲封一等鎮國將軍嘉慶三年二月授佐領

多羅順承郡王勒克德渾

勒克德渾太祖高皇帝曾孫追封穎毅親王薩哈璘第二子兄阿達禮以謀立睿親王多爾袞伏誅勒克德渾亦坐黜宗室順治元年十一月上念勒克德渾年幼未與謀命復入宗室封多羅貝勒二年七月命爲平南大將軍代豫親王多鐸駐江寧分兵剿撫兩浙時明魯王朱以海據浙東稱監國其大學士馬士英等率兵渡錢塘江立營擊卻之九月遣左翼副都統珠瑪喇敗士英於餘杭右翼副都統和託敗其總兵方國安於富陽兩翼合營杭州城三十里外敵來突復大敗之士英國安復渡江來窺爲副都統濟席哈等所敗溺死無算時明唐王之總督何騰蛟合流賊一隻虎竊據湖廣州郡十一月命同鎮國將軍鞏阿岱都統葉臣征之三年正月大兵自江寧抵武昌偵知叛賊總兵馬進忠王進才應騰蛟於長沙遣護軍統領博爾輝等進擊賊千餘掠臨湘殲之抵岳州叛將遁降其副將黑運昌

至石首聞賊渡江犯荊州遣尙書覺羅郎球等以偏師赴南岸伺賊渡擊之大兵乘夜疾馳詰旦抵城下分兩翼躡賊營大破之斬獲甚衆薄暮郎球等亦尋奪賊船歸翌日遣奉國將軍巴布泰等分追賊於安遠南漳喜峰山關王嶺襄陽府擊斬殆盡次彝陵流賊李自成弟孜僞磁侯田見秀僞義侯張耐僞武陽伯李佑僞太平伯吳汝義及僞將三十九人馬步賊五千有奇詣軍前降獲馬羸牛萬二千餘捷聞得旨優獎七月班師十月賜金百兩銀二千兩五年九月晉封多羅順承郡王尋同鄭親王濟爾哈朗拔湘潭擒騰蛟事詳鄭獻親王傳移師征廣西賊渠趙廉犯全州率前鋒統領席特庫等敗之獲馬四十餘曹楨子據永安關破其營斬關入九月曹楨子復率黨萬餘寇道州又擊敗之七年正月師還賜金五十兩銀五千兩五月預議政八年三月掌刑部事九年三月薨年三十有四康熙十年六月追謚曰恭惠 初次襲勒爾錦順承恭惠郡王勒克德渾第四子順治九年八月襲封多羅順承郡王康熙十一年八月掌宗人府事十二年十二月逆藩吳三桂反命爲寧南靖寇大將軍由湖南進征十三年三月駐荊州時沅州常德相繼失陷賊兵自蜀道直抵巴東襄陽勢甚急遣都統鄂訥馳防是月僞將劉之復

率舟師犯彝陵夾江立五營遣護軍統領額司泰等水陸並擊賊大敗遁歸宜都
四月僞將陶繼智復自宜都來犯敗之七月敗僞將軍吳應麒等十四年五月賊
犯均州遣都統伊里布屢敗之斬獲無算六月僞將軍楊來嘉列陣山頂自山溝
下斷我歸路我師分擊之陣斬三千餘級是月疏言逆賊偪彝陵兵衆舟多又於
虎渡口運糧及火器請益戰艦以斷運送從之七月奏僞將軍張以誠王會等連
來嘉犯南漳遣伊里布期總督蔡毓榮分擊之八月疏言賊立壘掘塹騎兵不能
衝突須簡綠旗步兵造輕箭簾車礮車駕以連進填其壕用礮轟擊繼以滿兵則
逆賊可滅上如所請十月復興山縣十二月疏請益禁旅上以遷延時日責之十
五年三月統兵自荊州渡江遣前鋒參領卦爾察敗賊文村又敗之石首尋以擊
賊太平街失利退荊州具疏請罪上復切責之九月奏副都統塞格剿賊鄖西復
其縣十七年十一月奏先後投誠僞官及房縣來歸之僞總兵何以敬等雖授箭
示鼓舞而乏兵糧生計難給上以何以敬等募化來歸悉予半俸十八年正月疏
言新增兵萬二千請設隨征前後左右四營總兵官分轄從之是月渡江分路剿
松滋枝江宜都及澧州以次復守百里洲僞將軍洪福率舟師降二月進取常德

賊先期焚廬舍舟艦遁僞按察使陳寶鑰等迎降又招撫僞巡撫李益陽知縣張文明總兵黃志功副將楊達武等又遣游擊許嘉謨兵至青石渡賊首潘龍等迎敵我兵左右夾擊追至平峪鋪斬首及落崖死者無算復興山縣進攻歸州敗賊廖進忠於馬黃山賊向巴東遁至西壤大敗之復歸州巴東十九年二月命進取重慶尋奏留將軍噶爾漢之兵於荊州防禦七月王率兵赴重慶中途返具疏自劾請解大將軍任往沅州效力上責令率所屬官兵還京十一月議以老師糜餉坐失事機削爵 二次襲勒爾貝原襲順承郡王勒爾錦第三子康熙十九年十二月襲封多羅順承郡王二十一年二月薨年五歲 三次襲揚奇原襲順承郡王勒爾錦第四子康熙二十一年七月襲封多羅順承郡王二十六年四月薨年七歲 四次襲充保原襲順承郡王勒爾錦第七子康熙二十六年五月襲封多羅順承郡王三十七年九月薨年十四歲 五次襲布穆巴原襲順承郡王勒爾錦第五子康熙三十八年正月襲封多羅順承郡王五十四年五月以御賜鞍馬給優人爲護軍校賴圖庫妻所訐削爵 六次襲諾羅布順承恭惠郡王勒克德渾第三子康熙三十七年正月授頭等侍衛三十八年二月擢鑲黃旗漢軍副都

統十二月調鑲藍旗滿洲副都統四十年九月遷正黃旗蒙古都統預議政十一月攝右翼前鋒統領四十二年四月授杭州將軍五十四年五月襲封多羅順承郡王五十六年二月薨年六十有八諡曰忠 七次襲錫保順承忠郡王諾羅布第四子康熙五十六年十月襲封多羅順承郡王雍正三年三月掌宗人府事並命在內廷行走四年五月諭曰順承郡王錫保才品優長乃國家實心效力之賢王今在內廷行走差遣甚多王之費用亦多著給與親王俸護衛官員俱照親王之數用九月授鑲藍旗滿洲都統五年九月調正黃旗漢軍都統先是錫保徇庇貝勒延信罪狀不奏又將不能騎馬之章京派拏延信以致遲誤十一月議削爵得旨寬免其特恩賞給之親王俸及護衛官員俱撤回旋降任左宗正七年三月大軍征噶爾丹策凌王署振武將軍印赴阿爾台軍營八年十一月奏八旗駐防官兵軍營效力兩年巡牧均已習練請仍留俟大兵凱旋不必如例三年更代詔如所請行初王奏喀爾喀游牧處安頓妥協其三路副將軍各思效力已將禦賊守城之策商酌預備九年七月上以錫保防範有方傳諭慎籌喀爾喀等處戰守機宜八月諭宗人府曰錫保自派往軍營以來辦理軍務克殫誠心勤勞宣力甚

屬可嘉王之祖多羅穎郡王亦係國家懋著勞績之賢王著將錫保晉封順承親王九月命嚴守察罕廋爾十月疏言準噶爾賊大策凌敦多卜小策凌敦多卜多爾濟丹巴等自華額爾齊斯至索勒畢烏拉克沁留兵四千應援率兵二萬六千犯科布多等處見我軍強盛不敢輕進遂抵克魯倫令賊將海倫鄂勒錐等掠喀爾喀牧大策凌敦多卜兵向蘇克阿勒達呼屯筈小策凌敦多卜子曼濟掠鄂爾海西喇烏蘇臣令王丹津多爾濟等合兵邀擊至鄂登楚勒遣台吉巴海夜入大策凌敦多卜營挑其衆賊將袞楚克扎卜喀喇巴圖魯復率兵三千來禦我兵誘斬喀喇巴圖魯袞楚克扎卜傷遁擒殺數百大策凌敦多卜移營台什哩山曼濟兵亦敗歸俱由哈布塔克拜達克遁疏入詔嘉獎之十一月授靖遠大將軍先是上以軍前大臣甚少命錫保於軍營營總官中擇可勝副都統護軍參領之任者密封陳奏十年二月疏言新調吉林佐領委署前鋒翼領阿思哈黑龍江協領委署前鋒翼領布爾沙均屬效力請賞給副都統職銜詔允之七月偵知賊赴額爾德尼河源遣王丹津多爾濟等率兵於奔博圖山嶺堵截八月師至額爾德尼昭遇賊兵鏖擊十餘次賊且戰且卻日暮抵大山梁一面偪水戰益酣殺賊萬餘尸

滿山谷餘賊負傷奔獲械畜無算十一年四月奏言察罕度爾當阿爾台諸路要道建城駐兵歷有年所嗣以薪芻不足移駐阿勒達爾托羅海去年又移駐烏里雅蘇臺此外尙有額德爾齊德爾特啟塔密爾地各寬闊然並在杭愛山陽與內地近至特斯等處僻在迤北若賊由南路來犯邀擊堵禦呼應不靈並不便駐大兵今已於烏里雅蘇臺山嶺分建礮臺左近令滿洲蒙古兵駐劄且特斯台什哩各駐萬人賊不敢偪應請卽於烏里雅蘇臺內外植木中實土爲城設倉庫明春以察罕度爾所貯銀米軍裝火藥等物陸續解運上從之七月議賊越克爾森齊老時不速發援失機罷大將軍任削爵 八次襲熙良原封順承親王錫保第一子雍正三年十月封輔國公尋授散秩大臣五年七月晉封鎮國公十年正月封世子三月署鑲紅旗漢軍都統十一年七月以父罪革世子十二月襲封多羅順承郡王乾隆元年二月管鑲藍旗覺羅學九年四月薨年四十諡曰恪 九次襲泰斐英阿順承恪郡王熙良第一子乾隆九年九月襲封多羅順承郡王十三年十二月授宗人府右宗正十五年九月管鑲紅旗覺羅學十九年四月任左翼前鋒統領十月遷正黃旗漢軍都統二十一年六月轉左宗正七月薨年二十有九

諡曰恭 十次襲恆昌順承恭郡王泰斐英阿第七子乾隆二十一年十月襲封多羅順承郡王四十三年二月薨年二十有六諡曰愼 十一次襲倫柱順承愼郡王恆昌第一子乾隆五十一年二月襲封多羅順承郡王

和碩貝勒阿敏

阿敏顯祖宣皇帝孫追封莊親王舒爾哈齊第二子初授台吉歲戊申三月太祖命同長子褚英征烏拉宜罕山城克之斬千人獲甲三百俘其衆以歸癸丑正月從上征烏拉布占泰以三萬衆迎拒諸將欲戰上止之阿敏偕貝勒代善等奏曰布占泰已出舍不戰何耶上遂決進克其城滅之丙辰太祖建元天命封和碩貝勒以齒序阿敏爲二貝勒四年三月從上破明兵於薩爾濟山及尙閒崖復奉命禦明總兵劉綎於棟鄂路代善等繼之陣斬綎阿敏偕大臣扈爾漢擊敗明游擊喬一琦兵一琦奔固拉庫崖與朝鮮都元帥姜功烈合營阿敏同諸貝勒攻之功烈降一琦自縊八月從上征葉赫滅之六年三月從上取明瀋陽遼陽七月鎮江城軍陳良策叛投明將毛文龍阿敏遷鎮江沿海居民於內地十一月文龍屯朝鮮阿敏渡鎮江夜入朝鮮斬其守將及兵千五百文龍僅以身免十一年四月

征喀爾喀巴林部取所屬屯寨十月征扎嚕特部俘其衆天聰元年正月同貝勒岳託等征朝鮮瀕行諭曰朝鮮累世獲罪理宜聲討然此行非專伐朝鮮也明毛文龍近彼海島納我叛民故整旅徂征如朝鮮可取並取之因親授方略是月大軍薄義州拔其城分兵擣文龍所居鐵山文龍敗歸海島師克宣川連定三城次平壤朝鮮王李倬遣使請和阿敏書數其罪七次黃州倬復請和阿敏欲進攻諸貝勒議許之事詳克勤郡王傳凱旋上郊勞於武靖營賜御衣一襲五月從上征明錦州復圍寧遠擊斬千餘人四年正月大兵克永平灤州遷安三月命阿敏代貝勒濟爾哈朗等駐守師至合略迤西路並招降榛子鎮四月諭歸降漢文武官曰我國法度從來賄賂不行廉者舉之貪者勿錄況皇上簡用者俱廉潔忠直之輩爾等若有罪雖賂千金無益若無罪即衆貝勒何懼焉五月明監軍道張春等圍灤州阿敏怯不往援灤州陷阿敏遽棄永平殺降者夜出冷口歸六月上御殿諸貝勒大臣議阿敏十六罪上命岳託宣示於衆諸貝勒大臣合詞請誅阿敏詔特宥其死削爵幽禁崇德五年十一月卒於幽所爵除

多羅誠毅貝勒穆爾哈齊

穆爾哈齊顯祖宣皇帝第二子初授台吉以功賜號誠毅歲乙酉四月從太祖高皇帝征哲陳部嘉哈部長蘇庫賚呼密告哲陳部主於是托摩和章嘉巴爾達薩爾濟界藩五城集兵以待上執麾前進穆爾哈齊及近侍延布祿烏靈阿皆奮勇直入重圍斬二十餘級敗其衆涉渾河走穆爾哈齊復隨上渡河躡其後至吉林崖見兵由旁徑來上慮爲彼見去冠纓隱身以待射前至者一人貫脊而殪穆爾哈齊復射殪其一餘多墜崖死太祖曰今日之役以四人敗八百衆天助我也天命五年九月卒年六十上親奠順治十年六月追封多羅貝勒諡曰勇壯爵除

多羅篤義貝勒巴雅喇

巴雅喇顯祖宣皇帝第五子初授台吉歲戊戌正月太祖命同長子褚英征安楚拉庫路夜取屯寨二十降萬餘人賜號篤義丁未四月命征東海窩集部取赫席赫鄂謨和蘇嚕佛訥赫托克索三路俘二千人天命九年九月卒年四十有三順治十年五月追封多羅貝勒諡剛果爵除

多羅廣略貝勒褚英

褚英太祖高皇帝第一子初授台吉歲戊戌正月上命征安楚拉庫路以功賜號

洪巴圖魯尋封多羅貝勒初東海瓦爾喀部斐悠城長策穆特赫苦烏拉布占泰之虐乞移家歸附丁未正月命同貝勒舒爾哈齊代善率兵徙之軍夜行陰晦忽大霧上有光衆以爲異捫視無有復建之光如初舒爾哈齊曰吾幼從上征討所閱事多矣未見此異疑非吉兆欲班師褚英同代善持不可曰吉凶兆已定遽還何以報命決進抵斐悠城收其屯寨五百戶令大臣扈爾漢衛之先行兵僅二百布占泰以萬衆邀諸路傷我一人大將揚古利斬其七人乃卻褚英與代善至策馬前諭軍士曰上每征伐無不以少擊衆今雖未親行聞我等奉命來此爾衆無憂昔擒布占泰宥歸俾主其地時不久背恩如故今豈不能再縛之衆皆曰願效力褚英遂與代善各率兵五百夾擊天方晴明忽大雪寒冽烏拉兵大敗斬其統兵貝勒生擒貝勒常住瑚哩布及常住之子死者相枕藉獲馬五千甲三千上以褚英率先敗敵嘉之復賜號廣略戊申三月同貝勒阿敏征烏拉宜罕山城克之布占泰與蒙古科爾沁貝勒翁阿岱合兵出烏拉城二十里遙望我軍知不可敵相約還復以矢宜罕山城大懼遣使來盟乙卯閏八月褚英以罪伏誅爵除

多羅貝勒芬古

芬古顯祖宣皇帝孫追封莊親王舒爾哈齊第八子天聰五年三月授鑲藍旗都統八月隨上征明抵大凌河芬古率本旗兵圍城之西南時貝勒阿濟格敗明兵於松山上將幸其營城中兵來突芬古等夾擊大敗之九月上令軍士向錦州幟而馳如明援兵狀距城十里礮聲不絕總兵祖大壽統衆出西南隅攻軍臺芬古等迎擊大壽敗回不敢出七年六月詔問征明與朝鮮察哈爾三者何先奏言我軍蓄銳已久勢可用宜卽入明邊毀其城堡戮力進取何憂無成八年七月從上征明同貝勒德格類進師獨石口七月克長安嶺殺其守備官攻赤城克其郭復入保安州謁上於應州城籍俘獲以獻九年五月命芬古等隨貝勒多鐸入寧錦界牽制明兵俾毋援山西大壽營大凌河西我軍擊敗之崇德元年五月隨武英郡王阿濟格等征明薄延慶州先後克城十二月從征朝鮮同都統譚泰以騎入其城朝鮮王遁盡收其輜重而還敍功封固山貝十四年五月坐取外藩蒙古賄削爵八月復封輔國公六年八月大軍圍松山明兵夜遁芬古追破之七年十月隨饒餘貝勒阿巴泰征明抵薊州敗明總兵白騰蛟等克其城八年十月駐防錦州十二月卒年三十有九順治十年五月追封多羅貝勒諡曰靖定乾隆十五

年七月以曾孫德沛襲封和碩簡親王贈如其爵 初次襲尙善追封靖定貝勒
芬古第二子順治元年四月襲封輔國公十月晉封固山貝子二年正月隨豫親
王多鐸南征至潼關賊李自成以騎三千橫衝我師尙善與貝勒尼堪敗之三月
平河南五月渡江平江南尙善並在事有功賜圓補紗衣一襲金百兩銀五千兩
鞍馬一五年八月隨英親王阿濟格剿天津土寇殲之十二月駐防大同六年十
月晉封多羅貝勒九年二月掌理藩院事十月預議政十五年正月隨信郡王多
尼證明桂王朱由榔於雲南薄其城由榔奔永昌尙善同征南將軍卓布泰進鎮
南州破其將白文選於玉龍關渡瀾滄江下永昌由榔先遁乘勝取騰越界進剿
南甸至孟村而還十六年六月賜蟒袍一玲瓏刀一鞍馬一十七年七月議尙善
預撤永昌守門兵致軍入城傷百姓降固山貝子康熙十一年閏七月諭宗人府
尙善性行端良凡事小心敬慎勤勞爲國著仍復多羅貝勒十二年六月任宗人
府右宗正十三年三月以疾罷宗正是時逆藩吳三桂反上命順承郡王勒爾錦
由荊州進征六月復命尙善爲安遠靖寇大將軍率師之岳州速滅賊尙善至軍
移書三桂其略曰王以亡國餘生乞師我朝殄殲賊寇爲國雪恥爲父復讎感我

聖恩傾心報國蒙恩眷顧列爵分藩榮施後嗣忠孝慈義之節炳於天壤富貴寵榮之盛絕於近代迄今三十餘年矣而末路晚節復效童昏頓喪初心自取顛覆竊爲王不解也何者王藉言興復明室則曩者大兵入關奚不聞王請立明裔且天下大定猶爲我計除後患翦滅明宗安在爲故主效忠哉將爲子孫謀創大業則公主額駙曾偕至滇其時何不遽萌反側至遣子入侍乃復背叛以陷子戮可謂慈乎如欲光耀前人則王之投誠也祖考皆膺封錫今則墳塋毀棄骸骨遺於道路可謂孝乎爲人臣僕迭事兩朝而未嘗忠於一主可謂義乎不忠不孝不義不慈之罪躬自蹈之而欲逞志角力收復人心猶厝薪於火而云安結巢於幕而云固也諺曰老將至而耄及之王非老諄何乃至是如卽輸誠悔罪聖朝寬大應許自新毋蹈公孫述彭寵故轍赤族湛身爲世大僂三桂得書不報十一月疏請發荊州綠旗兵撥京口沙唬船五十並赴岳州進剿從之十四年六月賊犯彝陵急遣舟師絕其餉道十五年三月以舟師敗賊於洞庭取君山四月分遣兵助安親王岳樂攻長沙十六年正月征南將軍穆占由岳州赴長沙深入賊境命尙善率水陸兵進援四月三桂奔衡州復進湘潭分遣其衆侵兩粵尙善請撥烏船四

十精兵每佐領四名水陸夾擊十七年二月諭賁尙善殄賊緩令率所部每佐領五人駐守長沙而以岳樂統大軍取岳州尙善願統舟師克岳州自效上從其請遣湖廣總督蔡毓榮率標兵三千荊州綠旗兵二千馳赴岳州協擊六月賊將杜輝犯柳林嘴大軍迎擊君山扁山舟師亦至合戰賊敗走斬獲甚衆賊固守套湖峽總兵萬正色等又擊破之捷聞下部議敘八月薨於軍年五十有八十九年十一月廷議出師湖廣功罪尙善坐退縮追削爵 二次襲門度原封貝勒尙善第四子康熙七年正月封鎮國公二十五年十一月任宗人府右宗正三十七年四月以惰削鎮國公時門度之弟鎮國公根度亦以乖張削爵五月諭大學士等門度根度乃貝勒尙善之子今兩公爵俱革尙善別無公爵之子孫則其爵遂絕矣著交宗人府議尋議奏門度之祖芬古係輔國公門度應襲公爵得旨門度著襲輔國公雍正四年十一月以病削爵 三次襲裕綬原封貝勒尙善孫原封鎮國公根度第四子康熙五十五年正月授三等待衛雍正四年十一月襲封輔國公尋授散秩大臣九年五月管正藍旗覺羅學十三年十一月任宗人府左宗正乾隆五年十月卒年五十有二諡曰敏恪 四次襲嵩椿敏恪輔國公裕綬第六子

乾隆六年二月襲封奉恩輔國公十二年四月授散秩大臣十三年二月任正紅旗漢軍副都統閏七月授正藍旗護軍統領十四年五月遷鑲黃旗漢軍都統兼左翼前鋒統領十五年四月調鑲黃旗蒙古都統十月任宗人府右宗人十九年四月署領侍衛內大臣十二月管理鑾儀衛事二十二年正月授荊州將軍二十五年十二月調西安將軍二十六年十一月授察哈爾都統二十七年閏五月復任西安將軍二十九年十一月與副都統成德互參議嵩椿徇私保題官屬又不將違例放債之沙爾圖及坐扣錢糧之佐領朱林泰究參等罪革任回京三十年正月任散秩大臣十二月授綏遠城將軍三十一年十二月以不裁轎夫餉銀革任三十三年九月署領侍衛內大臣十月任正紅旗蒙古都統三十五年四月任右宗人三十六年六月授內大臣三十七年十一月授江寧將軍四十六年三月調綏遠城將軍四十九年六月調寧夏將軍五十一年八月調綏遠城將軍五十二年十月調西安將軍五十四年四月調盛京將軍五十六年六月奏請牛莊蓋州及各海口流寓閩人中雖經編甲恐有遺漏見添設保長儻保長回籍再行選補捕魚船按船給票巡哨船查拏私船仍准漁人互相稽察若獲私船者卽給之

獲洋面盜船及見盜報官者加獎賞秋冬時商船南旋地方官親往查驗附船回
閩者冊內除名年終結報流寓人等有無增減仍令各該處副都統稽察得旨所
定章程合宜爲之在人勉之九月以病解將軍任五十七年三月奏請解內大臣
任並輔國公爵六十年十月卒年七十有二謚勤僖 五次襲景熠勤僖輔國公
嵩椿第一子乾隆三十年十二月封二等輔國將軍四十年四月授鑲紅旗滿洲
副都統五月署正藍旗蒙古副都統十二月署鑲白旗護軍統領是月授正黃旗
護軍統領仍兼副都統四十一年正月授嚮導大臣五月調鑲黃旗護軍統領四
十七年九月任右翼前鋒統領五十七年三月襲封奉恩輔國公五十八年二月
管理上虞備用處九月以情解前鋒統領仍授鑲白旗護軍統領六十年九月復
任右翼前鋒統領嘉慶四年正月任內務府大臣二月授御前侍衛三月授清字
經館總裁是月任宗人府右宗人五年正月授黑龍江將軍六年二月齊齊哈爾
副都統恆伯奏參景熠剛愎貪鄙屢於私署演劇令兵丁習歌曲赴布特哈審案
及查災布特哈墨爾根黑龍江時受餽送皮張銀兩又擅造連枷致斃人命借籌
辦兵丁馬匹爲名派員赴呼倫貝爾買馬轉賣私用價銀並用稅課餘錢放俸餉

扣存平餘等款命刑部侍郎瑚素通阿等鞠之擬絞監候在宗人府圈禁九月得旨景熠著從寬仍圈禁八年六月命釋之授黏杆處拜唐阿八月授四等待衛十一月遷三等待衛授哈密辦事大臣十年十二月命更換回京十六年正月故六次襲祿義勤僖輔國公嵩椿孫追封奉恩輔國公景煥第三子嘉慶六年五月襲封奉恩輔國公是月授散秩大臣九年二月因祭關帝廟未到革散秩大臣是月往守東陵十一月回京十二月仍授散秩大臣十年十二月以不進班革散秩大臣

多羅安平貝勒杜度

杜度太祖高皇帝孫原封廣略貝勒褚英第一子初授台吉天命九年正月喀爾喀巴約特部台吉恩格德爾請移居東京杜度隨大貝勒代善等徙其戶口來歸尋封貝勒天聰元年正月同二貝勒阿敏貝勒岳託等征朝鮮李倬請和諸貝勒許之阿敏欲直趨至其謂都杜度可同往杜度變色曰皇上乃吾叔父何可遠離耶遂與岳託等議定盟而還二年二月上征多羅特部杜度留守三年十一月從上征明薄京城敗滿桂侯世祿又同貝勒阿巴泰等焚通州克張家灣從上至薊

州敗敵援兵事具英親王傳十二月命杜度統本旗兵駐遵化四年正月明兵來
攻敗之斬其副將獲駝馬千計五年三月命諸貝勒直言時政杜度奏曰讞獄務
求明允請別選賢能聽訟必事理是非斟酌悉當者庶有成效七月上征明杜度
留守六年四月上征察哈爾復留守七年三月監築赫場城五月明將孔有德耿
仲明來降杜度等迎護其衆事具英親王傳六月詔問征明及朝鮮察哈爾奏言
朝鮮與我偪則征之破則天下自然膽裂然後遠取大同邊地秣馬乘機深入明
境八年五月命駐防海州崇德元年四月敘功晉封多羅安平貝勒九月守海州
河口伊勒慎奏明將造巨艦百餘橫截遼河爲戰禦計命杜度濟其師明兵敗卻
乃還十二月上征朝鮮杜度護輜重後行諭簡精騎略皮島雲從島大花島鐵山
至則居民先遁杜度焚其廬舍二年二月抵臨津江前一日聞冰解不可渡夕大
雨雪冰復凝軍數萬徑渡狀聞上曰嘉祥洊至皆天意也是月同睿親王多爾袞
取江華島敗其水師再敗其兵於江岸克其城三年二月上征喀爾喀同代善濟
爾哈朗等留守並監築遼陽都爾弼城是月明石城島總兵沈志祥挈屬降杜度
運米濟之八月命岳託爲揚威大將軍杜度副之統右翼軍伐明抵密雲東北牆

子嶺明兵迎戰敗之進攻牆子嶺堡分兵入破明黑峪關古北口黃崖口馬蘭峪等關岳託以病薨於軍杜度總軍務與左翼會於通州河西越北京西抵山西南抵濟南降城克敵事具睿忠親王傳四年四月凱旋賜駝一馬二銀五千兩八月命掌禮部事九月同貝勒濟爾哈朗等略明錦州寧遠五年四月上巡視義州杜度留守六月同睿親王等於義州屯田七月杜度率右翼兵伏寧遠路殺明運糧兵三百人尋往錦州誘敵敗其兵八月獲大凌河海口船九月代還十二月圍錦州餘詳睿忠親王傳六年三月以聽從睿親王離城遠駐遣兵私回論削爵奪所屬戶口詔從寬罰鍰六月復往圍錦州敗明兵於松山八月從上親征九月駕旋留杜度圍錦州七年六月薨年四十有六病革時諸王貝勒方集篤恭殿會議出征功罪上聞之罷朝計至命護軍統領圖賴往奠雍正二年立碑以旌其功 初次襲杜爾祜安平貝勒杜度第一子初封貝子崇德元年七月有蒙古及漢人自伊嚕逃杜爾祜駐兵藩城屏城間伺之不獲而還議削爵詔免之六年八月從上圍松山明兵遁諸將相繼追擊杜爾祜疑後有敵兵少待已而無至者遂隨衆追破之七年三月隨大軍圍錦州祖大壽以城降命杜爾祜還京六月降襲鎮國公

十月以參領拜山等首告怨望削爵黜宗室順治元年十月隨豫親王多鐸南征
二年二月仍入宗室封輔國公十月敘功賜金五十兩銀二千兩五年九月隨鄭
親王濟爾哈朗征湖廣六年四月敗賊於永興抵辰州賊渠一隻虎遁追擊之進
剿廣西定全州餘詳鄭獻親王傳七年正月凱旋敘功賜銀六百兩八年二月晉
封多羅貝勒九年十月命議政十二年二月卒年四十有一諡曰愨厚 二次襲
敦達愨厚貝勒杜爾祜第五子順治十二年八月降襲固山貝子康熙十三年十
月卒年三十有二諡曰恪恭 三次襲普貴恪恭貝子敦達第二子康熙十三年
十二月降襲鎮國公三十七年四月諭宗人府察行走勤惰議奏普貴原有瘋疾
今雖愈不便令其行走應革退得旨普貴向來行走尙優既稱瘋疾已痊著照常
行走雍正元年十月以病削爵 四次襲智保原襲鎮國公普貴第十一子雍正
元年十月降襲輔國公三年正月卒年七歲 五次襲蘇保原襲鎮國公普貴第
十三子雍正三年正月襲封輔國公四年十二月卒年四歲 六次襲誠保原襲
鎮國公普貴第七子雍正五年二月襲封輔國公乾隆十九年九月卒年四十有
三諡曰溫禧 七次襲慶春溫禧輔國公誠保第二子乾隆二十年二月襲封奉

恩輔國公三十八年六月卒年二十有四 八次襲恆寧奉恩輔國公慶春第一子乾隆三十八年十月襲封奉恩輔國公嘉慶四年四月委署散秩大臣五月署鑲黃旗蒙古副都統尋署鑲黃旗滿洲副都統授鑲紅旗漢軍副都統八月署正紅旗蒙古副都統五年三月署正紅旗護軍統領五月以不值宿革署護軍統領任是月彈壓試繙譯生員至晚同副都統都爾哈滅收卷處燭不准收卷徑行出場革副都統任九年八月往守西陵

多羅貝勒察尼

察尼太祖高皇帝孫豫通親王多鐸第四子順治十三年正月封多羅貝勒康熙七年正月授宗人府左宗正七月預議政九年三月充玉牒館副總裁十二年十二月逆藩吳三桂反命隨順承郡王勒爾錦由湖廣進剿參贊軍務十三年三月至荊州賊已陷岳州七月察尼同將軍尼雅翰進征僞將軍吳應麒以賊七萬由陸路來拒敗之斬級甚衆舟師抵七里山以礮攻沈其船十餘因溽暑風逆仍回荊州十四年五月賊陷穀城察尼佩靖寇將軍印往援都統伊里布等先至賊遁時南漳興山爲賊陷又徧彝陵據城外鎮荆山掘壕結寨八月察尼至彝陵以賊

寨難進攻其糧由江運議增舟師斷賊連困之十月遣兵敗賊於牛皮丫口進攻黃連坪焚其積聚興山賊遁十五年二月吳逆移南漳彝陵賊往長沙順承郡王令察尼回荊州渡江剿賊三月同都統伊里布等趨石首縣賊據虎渡口迎戰敗之追至太平街斬級三百餘泊江南岸翌日再登岸擊賊過太平街遇賊伏失利退荊州詔責勒爾錦老師糜餉察尼參贊無能令立功贖罪十七年八月貝勒尙善薨於岳州軍命察尼代爲安遠靖寇大將軍規復岳州九月疏言舟師入湖三月餘雖未大挫賊鋒賊亦不能出戰近聞賊餉將絕宜於湖水涸後圍以木棧立木椿列火礮俾小船巡警以困之然水涸爲期尙遲兩三月間賊中安知不變今乘水勢未退立一營於南津港俟水涸酌撥舟師營於君山高家廟絕其糧道賊勢窮蹙不難撲滅上善其言令副都統關保率兵赴岳州聽調遣是月遣提督桑額協同撫遠將軍彰泰率師至南津港大敗賊衆十一月奏僞將軍杜輝巴養元姜義舟師犯陸石將軍鄂訥等敗之斬千餘級署副都統葉儲赫等進攻岳州破賊萬餘又疏言賊屯岳州偵知其糧已匱以舟師悉出意在通餉道鏖戰移時僞帥復率衆五千自高家廟渡江來犯增遣前鋒統領杭奇禦退之先是察尼以舟

師屢經出戰疏請發江南子母等礮一千又請調荊州水師總兵張忠並標兵營君山高家廟上皆從之至是又疏言湖水漸涸陸地漸出我兵營伍隔絕恐賊潛通饋餉請增發滿漢兵議政王等議不准行上以圍取岳州關係重要賊糧將絕令安親王岳樂以長沙間駐兵量調赴之十八年六月疏請調兵六千圍岳州城並請兵隨征左右前後四營總兵官分轄詔允之是月僞總兵王度冲陳珀等各以舟師降吳應麒棄城遁復岳州計招撫僞官六百餘兵五千餘獲船六十五礮六百四十餘二月安親王自長沙進取衡州察尼發綠旗兵沙船助其軍尋奏都統珠滿追擊賊於湘陰斬獲無算復其城提督桑額取安鄉降僞員外郎等三人四月命察尼由常德進征辰龍關軍務在澧州以南者聽調度十九年三月同都統鄂訥等攻克辰龍關抵辰州賊潰遁僞知府傅祖祿等以城降並招撫僞將軍楊有祿周禎楊寶蔭祖述舜等五月疏言自常德進辰沅沿途雨澤馬乏詔暫屯沅州酌量進發六月疏計在軍前鋒四百有奇護軍驍騎每佐領二十餘人應簡前鋒三百每佐領護軍六驍騎九進取雲貴上命彰泰統師進征察尼領先出征效力勞苦之滿洲兵還京十一月議察尼出師湖廣退縮不速扼要害應削貝勒

及議政宗人府職籍其家屬財產仍行拘禁上念克岳州功僅削爵爲閒散宗室二十四年十二月特授奉天將軍二十七年九月卒年四十有八喪至京命領侍衛內大臣公費揚古往奠祭葬如輔國公例諡曰恪禧爵除

多羅貝勒喀爾楚渾

喀爾楚渾太祖高皇帝曾孫追封克勤郡王岳託第三子順治元年四月隨睿親王多爾袞入山海關破流賊李自成追擊至望都二年二月封鎮國公三年正月隨肅親王豪格討流賊張獻忠時賊黨據陝西同貝子滿達海進剿僞參將石國璽以下五十餘人率賊七百迎降賊首高如礪遁三台山掘壕圍之如礪亦率衆降十一月肅親王進征四川斬獻忠於西充喀爾楚渾在事有功五年八月任鑲紅旗滿洲都統六年正月隨敬謹親王尼堪討大同叛鎮姜瓖師至太原賊由寧武關迎戰遣都統阿賴等敗之進圍寧武賊犯我鑲紅鑲黃兩旗營擊敗其衆四月由左衛往圍大同僞總兵楊振威斬瓖降十月晉封多羅貝勒八年二月攝理藩院事八月薨年二十有四諡曰顯榮立碑紀功康熙十三年三月復立碑旌之初次襲克齊顯榮貝勒喀爾楚渾第一子順治九年十月襲封多羅貝勒康熙

六十一年六月薨年七十有二 二次襲魯賓貝勒克齊第一子康熙二十三年正月封固山貝子三十年正月授宗人府左宗正三十五年二月上征噶爾丹同都統喀岱等統領鑲藍旗營三十八年十二月以惰罷宗正任雍正元年三月改降襲固山貝子四年二月坐舉動狂悖削爵三月以魯賓無應襲貝子之人復降封輔國公乾隆八年六月卒年七十有四諡曰恪思 三次襲訥穆金顯榮貝勒喀爾楚渾元孫初喀爾楚渾孫魯賓以弟奉恩將軍品級蘭鼎子宗智爲嗣未襲卒訥穆金宗智第四子也乾隆九年四月降襲奉恩將軍二十五年十二月授三等侍衛四十八年十月卒年四十有四 四次襲薩賓圖奉恩將軍訥穆金第二子乾隆四十九年五月襲封奉恩將軍五十五年十月授三等侍衛嘉慶三年二月授佐領八年三月以失察閒散宗室慶成保滋事削爵並革侍衛佐領任 五次襲恆璫奉恩將軍訥穆金第三子嘉慶八年四月襲封奉恩將軍

多羅貝勒巴思哈

巴思哈太祖高皇帝曾孫追封克勤郡王岳託第五子崇德四年正月封鎮國將軍順治六年十月晉封多羅貝勒九年七月流賊張獻忠餘黨孫可望等犯湖南

隨敬謹親王尼堪征之賜蟒衣鞍馬弓矢十一月尼堪戰沒於衡州命貝勒屯齊代其軍巴思哈合營三月由永州趨寶慶敗賊兵十萬於周家坡十一年十月議隨敬謹親王出征敗績罪削爵十二年三月任鑲紅旗滿洲都統八月封鎮國公品級十五年正月隨信郡王多尼征明桂王朱由榔於雲南合四川廣西兩路軍期進取十一月抵貴陽趨安隆擊斬其衆十六年正月大軍薄雲南省城同貝勒尙善等克鎮南州玉龍關永昌府騰越州六月賜蟒袍鞍馬勞之十七年五月師旋七月議前征雲南時撤永昌門兵致軍士入城擾民降鎮國將軍品級十八年二月卒年三十 初次襲固克度渾原封貝勒巴思哈第二子順治十八年六月降襲三等輔國將軍品級康熙四年六月卒年十歲 二次襲庫布素渾原封貝勒巴思哈第三子康熙四年九月降襲三等奉國將軍品級十二年正月晉三等輔國將軍品級三十四年十月以病誤較射削爵 三次襲蘭鼐原封三等輔國將軍品級庫布素渾第一子康熙三十四年十月降襲三等奉國將軍品級五十八年正月卒年四十有一 四次襲宗智奉國將軍品級蘭鼐第三子康熙五十八年十二月降襲奉恩將軍品級雍正八年二月授三等侍衛尋遷二等侍衛乾隆

隆元年九月授前鋒參領四年十二月擢副都統八年十月卒年四十有三
五
次襲宗熹奉國將軍品級蘭第第六子乾隆九年七月降襲雲騎尉品級四十年
十二月因軍政虛報年歲削級爵除

固山貝子務達海

務達海顯祖宣皇帝孫追封誠毅勇壯貝勒穆爾哈齊第四子天聰八年十二月
授騎都尉崇德三年七月任刑部左參政四年八月封三等輔國將軍五年二月
任鑲白旗滿洲副都統十一月隨鄭親王濟爾哈朗圍錦州偵知敵於杏山塔山
間運糧芻夜略之擒斬甚衆七年六月擢刑部承政先是務達海隨貝勒阿巴泰
證明分畧山東登州未至離衆先歸八年七月部議削世職罷副都統任奪所賞
俘獲上祇命奪俘獲入官順治元年四月隨睿親王多爾袞入山海關敗流賊李
自成二年二月敍功晉封二等輔國將軍四年正月以議鄭親王造府踰制罪贖
徇削世職六月復封一等輔國將軍九月晉三等鎮國將軍五年四月同都統阿
賴等戍漢中是年晉封固山貝子六年四月同鎮國公屯齊喀輔國公巴布泰往
大同代英親王阿濟格討叛鎮姜瓖八月上仍命阿濟格赴大同務達海還京七

年五月預議政八年五月攝都察院事十一年十二月隨鄭親王世子濟度討福建海敵鄭成功中途疾還京十二年五月卒年五十有五諡曰襄敏爵除

固山貝子博和託

博和託太祖高皇帝孫饒餘敏郡王阿巴泰第二子初封輔國公崇德元年十二月上親征朝鮮豫親王多鐸等先驅博和託隨軍圍其都進圍南漢山城先後敗援兵二萬餘上駐營城西博和託以所獲獻二年二月李倬降分賜所俘三年八月隨睿親王多爾袞等證明由董家口入略京西南六府至山西界移師山東克濟南四年四月凱旋賜銀二千兩六年三月隨鄭親王濟爾哈朗等圍錦州七年三月錦州下圍杏山七月駐防錦州十月隨父阿巴泰證明入黃崖口攻薊州由河間景州進克兗州八年六月凱旋賜銀三千兩十月同輔國公芬古駐防錦州順治元年四月隨睿親王入山海關破流賊李自成十月晉封固山貝子三年五月隨豫親王剿蘇尼特部騰機思騰機特等有功十月凱旋優賜俘獲五年九月卒年三十有九諡曰溫良 初次襲彰泰溫良貝子博和託第四子順治八年閏二月封鎮國公尋封固山貝子九年四月改襲其父固山貝子康熙十三年春逆

藩吳三桂陷湖南命順承郡王勒爾錦由荊州渡江剿賊別敕貝勒尙善爲大將軍規復岳州以彰泰參贊軍務十五年二月諭責尙善暨彰泰進取遲延三月彰泰同尙善議分軍水陸並進遣護軍統領額司泰等剿賊洞庭湖賊船入南津港泊君山及由岳州出犯者皆敗之獲船五十餘賊攢立枿樁於套湖峽口阻我舟大軍仍駐陸十七年六月伐枿樁掉輕舟擊賊柳林嘴發礮燬其船斃賊無算八月尙善卒於軍詔以貝勒察尼代爲大將軍授彰泰撫遠將軍九月師出南津港賊船數十泊癩子山下令前鋒統領杭奇提督桑額擊斃賊百餘獲船四十月敗賊於陸石口連營白米灘絕賊舟餌十八年正月岳州賊乏食僞將軍陳珀僞總兵王度沖出降彰泰偕桑額復華容石首二縣三月詔彰泰會安親王岳樂軍於衡州七月由寶慶進征武岡賊帥吳國寶據隘口我軍礮斃國寶賊潰追至木瓜橋殺賊甚衆十一月命岳樂還京以彰泰代十九年三月奏都統穆占總督董衛國等破賊帥吳應麒復沅州降靖州及綏寧縣附近各土司八月疏言將軍蔡毓榮奉有調遣漢兵之旨今進取貴州滿漢旣合兵一路若調遣不相知恐礙事機上詔毓榮一切軍機關白大將軍酌行閏八月自沅州進征十月距鎮遠十五里

駐營賊據大路及兩山結壘先令衛國等攻鎮遠衛關口穆占等截賊旁遁隘口自與毓榮攻賊壘賊敗潰衛國奪取十向口敗賊將張足法等於大巖門穆占躡賊至偏橋衛賊由山徑竄遂復鎮遠府進定平越府及新添衛直趨貴陽逆擊吳世璠與應麒等皆遁彰泰駐守貴陽進復安順石阡都勻思南諸府十一月遣軍復永寧州敗賊於安籠鋪追剿至雞公背山鐵索橋十二月疏言訶賊兵萬三千欲據盤江遣前鋒統領薩克察等率兵至鐵索橋諸處守隘上以大兵秣馬貴陽已月餘諭趣彰泰親統大兵撲賊進定雲南二十年正月渡盤江偵賊將線絨等據普安縣之江西坡二月前驅至沙子哨賊迎戰敗之彰泰督兵繼進抵臘茄坡賊至江西坡者夜竄都統拉賽等追之復新興所逐北三十里賊千餘還拒陣斬二百餘仍躡蹤疾追復普安州時大將軍賴塔由廣西入雲南曲靖府彰泰由普安進霽益州會嵩明州議合圍雲南省城距城三十里賊胡國柄劉起龍引衆萬餘列象陣拒戰賴塔軍右彰泰軍左卯至午賊殊死戰彰泰密遣前鋒統領沙納哈等衝其旁賊潰遁陣斬國柄起龍及僞總兵九人俘獲無算彰泰與賴塔毓榮進歸化寺駐營令諸軍分布南壩薩石衛走馬街雙塔寺得勝橋重關等處以扼

其吭仍廣宣招撫敕諭於是大理臨安永順姚安武定諸僞官相繼詣軍門降先是賊將馬寶胡國柱夏國相等掠四川聞雲南圍急還救彰泰遣桑額及都統希福剿賊楚雄寶據烏木山扼險拒希福擊敗其衆寶越山遁至姚安知僞鎮將等俱先歸順乃乞降七月疏言馬寶已投降夏國相黨羽解散奔竄廣南惟胡國柱往鶴慶麗江尙未撲滅提督桑額都統希福追捕逆賊情形與前不同臣等圍城兵力有餘頃聞將軍噶爾漢總督哈占自四川移師貴州將由威寧來雲南恐餉不敷臣等議令哈占兵還四川噶爾漢並旋師四川酌防要地餘皆遣歸彰泰又疏多糜圍城兵亦足用詔哈占噶爾漢並旋師四川酌防要地餘皆遣歸彰泰又疏言馬寶屢經招撫不卽悔罪投誠反奔尋甸攜妻子赴楚雄糾逆黨爲大兵所敗窮蹙已極始率衆不滿百人乞降莫贖其罪同時來降之僞將軍巴養元鄭旺李繼業等應並羈禁候旨九月希福至雲龍州國柱自縊死總兵李國樑與土司儂朋剿賊廣南圍國相於西板橋國相降彰泰奏其罪與寶同並械送京十月彰泰與賴塔及將軍趙良棟等破賊營於南壩得勝橋太平橋走馬街賊竄入城大軍薄城環攻世璠自縊死僞將軍何進忠林天擊線絨黃明等出降彰泰戒將士勿

搶掠令都統瑪奇穆占先入城撫民清理倉庫籍賊黨屬戮世璠屍函首馳獻闕下雲南全省底定是年卽軍前授宗人府左宗正二十一年十月凱旋上率王大
臣至盧溝橋南二十里迎勞二十二年二月議出征岳州遷延應以恢復貴州雲
南功抵罪命仍紀功封冊賜金二十兩銀千兩二十四年九月以濫舉宗人府屬
官品行不端罷左宗正二十九年正月卒年五十有五 二次襲屯珠貝子彰泰
第三子康熙十一年正月封鎮國公二十七年二月以庸懦降鎮國將軍二十九
年六月襲封鎮國公五十二年十月授宗人府左宗正五十六年十月任禮部尙
書五十七年閏八月卒年六十有一詔贈固山貝子諡曰恪敏 三次襲逢信恪
敏貝子屯珠孫初屯珠子安詹殤以兄百綬子文昭第三子逢信嗣安詹爲子康
熙五十七年十二月降襲輔國公乾隆十二年八月卒年四十有二諡曰恭恪
四次襲盛昌恭恪輔國公逢信第二子乾隆十二年十二月襲封輔國公二十二
年七月以侍班失儀削爵二十三年二月封鎮國將軍十二月晉封輔國公五十
二年七月卒年四十有七 五次襲慶怡奉恩輔國公盛昌第二子乾隆四十九
年十二月封二等輔國將軍五十二年十一月襲封奉恩輔國公是月授散秩大

臣五十七年十一月授歸化城副都統嘉慶六年五月命守祖母制回京七年二月任鑲黃旗蒙古副都統管健銳營事九月稽察寶坻縣等四處十一月署鑲黃旗漢軍副都統十二月授廣州將軍十年三月以病解任

固山貝子固爾瑪渾

固爾瑪渾顯祖宣皇帝曾孫原封貝勒阿敏第三子崇德三年九月隨睿親王多爾袞證明由北京至山西復東至濟南克城四十餘年四月凱旋賜駝一馬一銀二千兩是年封輔國公先是內大臣多爾濟所屬蒙古及漢人盜馬自伊嚕逃命同鎮國公扎喀納等伺諸藩城屏城閒既望見以淖不追而還八月議削爵旨免之五年六月以父阿敏罪削爵黜宗室順治五年閏四月復入宗室封輔國公六年正月隨鄭親王濟爾哈朗征湖廣擒何騰蛟於湘潭進師永興奪門入固爾瑪渾俱在事有功凱旋賜銀六百兩十月晉封固山貝子康熙二十年十月卒年六十有七諡曰溫簡 初次襲瓦三溫簡貝子固爾瑪渾第四子康熙四年正月封三等輔國將軍十三年十月隨安親王岳樂征江西進定湖廣十八年十一月還京二十年十二月降襲輔國公二十一年八月授宗人府左宗人二十二年三

月議瓦三前在長沙退縮罪削爵得旨瓦三才具甚優況其公爵乃伊父貝子固爾瑪渾效力年久恩賜之爵著革去右宗人從寬留其公爵二十三年四月任鑲藍旗蒙古都統五月調鑲藍旗滿洲都統先是鄂羅斯竊據雅克薩尼布潮二城上諭黑龍江將軍薩布素收其田禾以困之薩布素以失機請罪是年命瓦三偕侍郎果丕會薩布素議雅克薩應否攻取嗣奏我兵於來年四月抵雅克薩招撫不就撫則攻其城萬一難取卽遵前旨毀田禾以歸上命都統朋春等會剿十二月議政王大臣奏請黑龍江將士應遣大臣統轄得旨軍機關係緊要非熟練戎行者不可公瓦三素諳行師遣往必能勝任護軍統領佟寶佛可託皆堪效力之人可令公瓦三統轄之二十四年正月卒年三十有五諡曰襄敏 二次襲齊克塔哈襄敏輔國公瓦三第二子康熙二十四年正月襲封輔國公三十二年十二月任宗人府右宗人三十五年正月從上征噶爾丹同護軍統領鄂克濟哈統領正紅旗營三十九年四月濬永定河齊克塔哈分董其事四十年正月任正黃旗蒙古都統四十六年五月以鑽營削爵 三次襲鄂斐溫簡貝子固爾瑪渾孫鎮國公瑪爾圖第四子康熙六年三月封三等奉國將軍三十三年五月任鑲藍旗

蒙古副都統三十五年正月從上征噶爾丹同康親王傑書等統領鑲藍旗營三十八年九月調正紅旗蒙古副都統三十九年十二月調正黃旗滿洲副都統四十年二月擢正黃旗漢軍都統九月調正黃旗滿洲都統四十一年九月授領侍衛內大臣四十六年六月襲封輔國公四十七年七月任宗人府左宗人五十二年八月卒年六十有一 四次襲鄂齊輔國公鄂斐第五子康熙三十八年八月封奉恩將軍四十八年二月以事削爵尋授散秩大臣雍正三年五月任正黃旗漢軍副都統十一月以陝甘總督岳鍾琪奏將羅隆宗諸部給達賴喇嘛管理遣大臣往諭命鄂齊偕學士班第會提督周瑛詳細妥辦嗣鄂齊奏言臣至西藏審視情形首領辦事者互不睦請降旨諭達賴喇嘛等和衷共事詔允之十二月上諭鄂齊自委任以來竭力行走差往西藏辦事公明著將伊父鄂斐未襲輔國公爵給與承襲四年十月擢鑲黃旗漢軍都統五年七月晉鎮國公十一月調天津水師營都統六年九月以兵丁滋事削爵授三等待衛效力七年二月任正紅旗滿洲副都統十月奏請八旗訓練必弓箭相稱嫻熟中的爲要除官射用鈚子箭外常演俱用飽頭則指發與梅針箭同視製鈚子箭價省議如所奏九年八月署

鑲紅旗蒙古都統十一年革任爵除

固山貝子洛託

洛託顯祖宣皇帝曾孫追封和碩貝勒寨桑古第一子天聰八年八月從上征明有功籍所俘獻於大同南西岡御營崇德元年封固山貝子十二月從征朝鮮同貝勒多鐸圍南漢山城殲援兵八千又敗其援兵五千二年四月命議政四年二月隨英親王阿濟格圍明塔山連山五年六月隨睿親王多爾袞屯田義州九月錦州兵夜襲我鑲藍旗營同鎮國公屯齊擊敗之六年三月以圍錦州時不臨城及私遣兵回議削爵詔罰鍰八月上征松山大敗明總督洪承疇兵洛託橫擊其潰軍於塔山十一月復圍錦州七年三月隨鄭親王濟爾哈朗駐塔山四月克之六月任都察院承政九月同貝子博洽尼堪駐錦州八年八月家人都塔里訐其陰事勘實上以其悖亂違法重撻之削爵幽禁順治八年三月復封三等鎮國將軍十三年五月諭吏部三等鎮國將軍洛託當太宗時曾犯大罪因愛其才且係宗室特加寬宥今值國家用人之際久令閒住深爲可惜著補授鑲藍旗滿洲都統時川寇餘孽孫可望李定國馮雙禮並叛賊岳州總督馬進忠均受明桂王朱

由榔封爵可望據黔擾湖南十四年四月命洛託爲寧南靖寇將軍駐防荊州與經略洪承疇商度剿撫至則遣兵攻取心潭隘度巴東渡口可望所屬僞總兵趙世超僞副將趙三才等降十二月可望與定國內訌戰不勝亦來降命同都統濟席哈由湖南進取貴州十五年三月會承疇師於常德抵辰州收復沅陵瀘溪麻陽黔陽溆浦諸縣進軍沅州進忠遁檄偏沅巡撫袁廓宇招撫靖州並屯鎮遠二十里山口堵禦是日雙禮遣僞總兵馮天裕閻廷桂等先後自平越降四月大軍至貴州由榔之總兵羅大順復收潰卒襲新添衛城敗之洛託與承疇守貴陽十六年二月凱旋敘功授雲騎尉晉一等鎮國將軍十七年七月命爲安南將軍同尙書車克內大臣達素都統索渾征海敵鄭成功大破賊衆十一月師還康熙四十四年四月卒年五十 初次襲富達禮原封貝子洛託第七子康熙四年九月襲洛託軍功所得雲騎尉世職十二月改襲奉恩將軍八年七月晉一等輔國將軍二十三年正月任頭等待衛二十五年四月授散秩大臣十一月以詔領侍衛內大臣索額圖恃勢致富爲其從弟蘇起所訐削爵除

固山貝子傅喇塔

傅喇塔顯祖宣皇帝曾孫追封靖定貝勒芬古第四子順治二年二月封輔國公十一月隨順承郡王勒克德渾征湖廣凱旋賜金五十兩銀千兩五年九月復隨鄭親王濟爾哈朗征湖廣追剿至廣西凱旋賜銀六百兩六年十月晉封固山貝子十六年二月以朝參失儀降輔國公十八年二月復封固山貝子康熙十三年六月逆藩耿精忠反命爲寧海將軍偕奉命大將軍康親王傑書討之師至浙江温州處州已陷王駐金華傅喇塔進師台州十二月僞都督曾養性僞總兵陳理屯黃瑞山擊之斬僞副將陳鵬等賊犯天台復破之紫雲山九里寺山十四年八月養性與叛鎮祖宏勳復犯台州遣副都統吉勒塔布自仙居襲其後疾馳至半山嶺破僞都督劉邦仁乘勝進攻黃巖至黃土嶺賊迎拒大破之遂圍其城養性遁僞副將朱鎮山以城降進敗賊於上塘嶺及小河渡先後復太平樂清青田三縣及大荆盤石二衛十月攻温州敗賊於南江十五年二月賊水陸四萬餘犯我軍遣吉勒塔布等分路迎擊陣斬僞都督孫可得僞總兵李節等三百餘員賊二萬餘初傅喇塔之攻温州也始以俟紅衣礮爲辭繼云須戰船康親王疏聞諭責其前後言互異負委任命尅期取溫三月傅喇塔疏言臣屢奉康親王檄促心思

惶惑以致語言違謬但臣前駐台州王以俟台州破進閩臣得黃巖又云候取温州以是責臣何辭相抵今蒙皇上寬恩惟勒期速下温州臣敢不力戰自效但環溫皆水我兵不能猝進疏入命康親王量留兵圍温州親統大軍由衢州進取福建仍頒諭曰王貝子皆朕懿親受任討賊師克在和近覽王貝子章奏似不相和睦嗣後務同心一志合謀合力以奏膚功是月傅喇塔亦留兵圍温州偕吉勒塔布剿處州賊以入閩六月師過三角嶺沂甌江將抵得勝山養性等聯數百艘江中復立兩營於對山及得勝山下之古溪分掘水陸遂遣吉勒塔布及總兵陳世凱等攻古溪伏兵林中邀賊歸路賊敗遇伏截殺賊船並對江營皆爲我漢軍礮碎水陸俱潰進師溫溪渡口敗僞都督馬成龍兵降其都司以下各僞官尋會康親王軍於衢州八月僞都尉連雲登據雲和縣石塘嶺遣副都統穆赫林連破二十八營殺賊七千餘復雲和九月大兵抵福建耿精忠降浙江諸寇悉平十一月卒於軍年五十有五喪還特遣內大臣公頗爾益至天津迎奠諡曰惠獻十七年七月諭宗人府貝子傅喇塔係宗室懿親躬履行閒剿禦賊寇撫綏兵民勲猷懋著積勞薨逝深爲可憫理應優卹以示朕酬庸之意不拘定例著封其子富善仍

爲固山貝子次子福存爲鎮國公乾隆五年十二月入祀浙江賢良祠六年四月復入祀福建賢良祠十五年七月以孫德沛襲封和碩簡親王贈如其爵初次襲富善惠獻貝子傅喇塔第二子康熙六年正月封鎮國公十七年七月襲封固山貝子十九年十一月任宗人府右宗正二十四年九月轉左宗人二十九年十二月以病乞解任諭責富善所行乖亂有負眷念交宗人府嚴行議處削爵 二次襲福存惠獻貝子傅喇塔第五子康熙十七年七月封鎮國公三十年十月襲封固山貝子三十九年九月卒年三十有六乾隆十五年七月以子德沛襲和碩簡親王贈如其爵 三次襲德普貝子福存第二子康熙三十九年十二月降襲鎮國公雍正元年四月任宗人府右宗人五月轉左宗人十月授正黃旗滿洲都統尋預議政七年五月卒年四十有七 四次襲恆魯鎮國公德普第一子雍正七年八月降襲輔國公乾隆七年四月授散秩大臣十年二月授正紅旗漢軍副都統五月授鑲藍旗護軍統領十三年閏七月授工部□侍郎十五年五月授宗人府右宗人九月轉左宗人二十四年六月授綏遠城將軍二十五年九月調吉林將軍三十四年正月調盛京將軍三十七年正月授內大臣六月卒年五十有一

諡曰恭愨 五次襲興兆恭愨輔國公恆魯第二子乾隆三十年封二等輔國將軍三十七年十月襲封奉恩輔國公尋授正藍旗護軍統領是月奉旨興兆著授爲領隊大臣出征金川旋授宗人府右宗人三十九年剿賊於當噶拉得里絨布寨卡卡角庚額特等處九月卽軍前授荊州將軍四十年大軍進征得楞基木斯丹當噶薩克薩谷甲雜獨古木等處興兆並在事有功得頭等功牌六三等功牌二四十一年正月回荊州是年金川平命圖像紫光閣御製贊曰憶當國初創業開基宗室王公宣力率師承平襲慶安享榮華董軍建勳斯爲可嘉五十二年十二月調西安將軍五十三年十月調綏遠城將軍五十七年十月以旗人藥神保等行竊擬發遣充徒輕縱命來京聽候部議尋議革職退出乾清門行走罰公俸五年是年十二月授散秩大臣五十八年八月復授荊州將軍六十年六月以苗匪石柳鄧等滋事赴湖南鎮筵七月諭興兆帶兵沿途並未與賊打仗及到鎮筵僅將兵分駐城外如何商辦剿賊無一字奏及庸懦無能交部嚴加議處是月奏擊賊於楊柳坪山梁八月得旨革職留任九月與貴州提督花連布等克馬腦等寨會大兵圍高多寨克之賊吳半生降進克龍角峒十月與內大臣額勒登保等

分剿大坡腦得勝山等處木城石卡進克鴨保山十月攻鴨保寨克臥盤寨擒吳
八月十二月克高斗山及普定寨是年得恩賚荷包等三次嘉慶元年正月大兵
攻擒頭坡興兆紫營高斗山以牽制賊進克吉吉寨山梁二月焚騎馬山火里坪
撲高吉坨抵巴金灣盡燬其寨三月克高吉坨對面山梁兵前進兩又溪等處伏
苗來拒擊之追至平逆坳奪其卡尋由納共山克長吉山石城及茶山茨巖諸大
山四月克結石岡燬牧牛坪等處寨五月攻得鋒山等處六月由黃蓮坡復乾州
與額勒登保等分剿附近苗寨匪七月搜鴉溪等處賊八月由強虎哨克復坡
新寨麻里灣諸賊卡九月從牛心地象心地至山家坳截平隴賊巢正面山口又
援攻其左巖人坡兵十月攻平隴由老石巖一帶以礮轟之並擊自貴魚坡等處
來援賊十一月由養牛塘進援攻剛息衝菜衝兵十二月賊聚石隆與護軍統領
德楞泰等由大頂坡繞出右山剿之殲石柳鄧得頭等功牌五加三等功牌三是
年得恩賚蟒袍荷包等六次二年二月以湖北教匪姚之富等滋事命往襄陽三
月以賊擾河南興兆由桐柏剿之是月與巡撫景安奏王文雄擊賊於裕州之古
石灘賊竄羅曲灣賊應之景安由東北進賊西竄興兆由西北進豫伏兵擊之追

剿三十餘里上獎之四月賊由陝西商州竄山陽往澇峪口杜其北回上責其行走遲緩是月奏澇峪口西山外賊北來擊之向南竄嗣又與西安將軍恆瑞聯銜奏賊西竄上以前後互異責之復奏賊楊一喜等在睿溝諸處勾結匪徒盡擒殺之八月與都統伯明亮奏賊屯宜昌羅耳坪兵分東西路進賊拒擊之又於遠安綠豆坳一路搜獲匿賊是月隨明亮與都統子德楞泰會兵剿之奏賊偪宜城繞道兜截之賊將犯襄陽追至獨樹塘會公惠倫副都統阿哈保等擊之兵至茨河鎮遇賊自西南山出明亮與兆由楓樹壩德楞泰由耗子溝擊之追至茅坪村擊斃及生擒者千數百賊竄穀城南新店子等處將往河南沿江北截之兵抵花石嶺上屢獎之九月奏賊向均州竄追至館驛與兆自迤北山擊之兵至草甸賊自黃龍灘分五路折回我兵分應之與兆由左吳家灣進賊來犯自山頂壓之合兵偪至九鋪灣楊溝口等處共擊斃及生擒者千數百十月奏剿賊後隊於銅錢關並擊退撲平利城賊賊由八卦廟向曾家壩遁抄擊之兵至鎮坪遇賊前來與兆伏峽口對面山林擊之賊竄樹河口與兆由三溪子一帶進與德楞泰等合兵殺獲數千十一月奏殺賊於周家壩山梁賊由西鄉白沔峽竄與都統惠齡等合擊

之共殺獲賊千數百十二月奏賊竄漢中由黃官嶺向長寨一帶偷渡江與副都統烏爾圖那遜等合擊之殲賊千餘又奏擊賊於五郎廟諸處是年得恩賚玉搬指荷包等八次三年正月奏兵至元壩子遇賊張漢潮等將撲廣元抄擊之殺獲千數百是月駐漢中二月奏添派鄉勇防江上以賊齊王氏等已從石泉渡江興兆尙稱籌辦堵截責其無恥時賊李全等分股竄洋縣鐵冶河興兆與護理提督柯藩剿之奏賊屯石板壩擊之賊敗三月奏擊賊於懷陽並擊退撲熬屋賊又擊之於西南鄉姚村自尹家衛追至庫峪口鳳凰嘴諸處上責成興兆與都統德楞泰副都統銜額勒登保護理總兵柯藩剿賊高均德李全四月總督宜綿奏賊阮正通等竄漢陰於雙廟子觀音河諸處環城屯外委沙朝棟帶兵劫賊營興兆柯藩兵撲之賊北竄赴冷水溝截之追至石泉池河又抄至洋縣遏之尋賊竄城固上以首逆未獲責其庸懦無能賊自新街渡江伏兵乘其半渡擊之躡其折回者至石泉上以任賊阮正通復入川責其疏縱是月以賊張漢潮等復擾湖北命興兆與額勒登保協總督景安剿之五月奏賊直趨荊門州伏山後伺擊之賊偪南漳與景安等擊退之向穀城遁追殺之於章村棚一帶兵前進西北山伏賊起興

兆白山後剿之共殺獲數千六月奏截賊於房縣大木廠等處賊由竹溪竄陝西之平利上責之諭宜絲額勒登保興兆爲一路專剿見竄平利賊七月奏擊賊於孟石嶺等處賊向四川太平遁又奏擊賊於袁家廟顧金壩等處興兆與副都統銜明亮兩路兵抵長壩剿賊追至滾嶺坡時賊王光祖從太平平壩與張漢潮合上屢責之八月與明亮奏擊賊於通江清池子山南鄭小壩西鄉堰口等處節次殺獲數千上以首逆竄逸空言粉飾屢責之是月以賊又掠石泉梅湖諭明亮等帶如許勁兵任賊縱橫如入無人之境明亮興兆著革去花翎戴罪自贖九月奏擊賊於王黑壩等處賊竄南江又擊之於白林灣一帶賊由合桃園遁明亮由丁家嘴追擊白號賊突出擊之上以首逆未獲任剿敗餘匪合夥責之是年冬奏擊賊於巴東羅坪東峽口大昌火石嶺兵由黃河荆壩進殲賊後股又擊賊龔建等於石塘壩山樊人傑等於鐵溪河錢家坪諸處張漢潮由城固向五郎奔擊之於兩河關兵至王家河後股賊自沙子嶺來伏擊之賊竄河南魯山之下湯屯二十餘里將拔營遁擊之追殺至伏牛山由南召南陽倍道追之賊從白馬寺欒川旁徑遁上以首逆未擒任輾轉奔逃屢責其無能無恥四年正月奏自商州龍駒寨

至劉家莊遇賊擊之賊向五郎遁又擊其分竄者於茅池子溝共殺獲數百諫此
次剿殺亦恐皆懦弱良民若不趁賊窮竄之時剋日擒渠惟執法嚴懲斷不稍從
寬貸二月與參贊明亮奏賊從鳳縣草涼驛竄進口關一帶山梁直撲之殲賊百
餘擒四十二人賊上雪山遁興兆率步隊由左山梁搶上明亮帶馬隊從山腰突
出奮力直前賊竄上嘉其陟險仰攻又奏擊賊於秦嶺賊竄涼沁河兵至賊已拔
營追殺六十餘里及其大隊賊據山頂興兆與明亮等擊之傷斃二百餘擒三十
五人三月奏擊賊馬家坪越山遁由山陽商州繞出賊前杜其入豫之路至泉村
賊竄追殺之至康家河賊自山下壓兵擁上擊之共殺獲二百餘至石洞子殺獲
其分竄者二百餘上以杜入豫獎之四月奏近日大雨泥濘兵日行七八十里探
賊屯紅門寺兵至山徑險仄牽馬魚貫行賊竄山頂仰攻之殺獲數十賊遁沿途
追殺五十餘人諫曰賊不畏雨水泥濘而官兵獨畏泥濘賊能亟走而官兵不能
捷追殊可愧恥又奏扼商州入豫路追磨至石溝殺獲百餘七月奏賊掠金竹溝
分路進賊奔及山口殺獲百餘訊獲賊稱張漢潮專聽冉學聖高玉春徐潮亨李
潮等指使上以添數賊名氏爲事後餘匪未清地步責之八月與經略明亮奏擊

賊於紅河寺山梁官兵殺獲百餘追至柿坪是月明亮仍任參贊與興兆奏兵抵廟溝探賊在犁澤坪豫伏兵離營十里之大山壩鄉勇在山陽誘敵至進擊之斃騎馬賊百餘賊竄由龔家山君子溝及賊後隊追至楓樹坪殺獲百餘九月與明亮恆瑞奏賊自石家關竄成縣復折入石峽子派兵伏野雞溝截之明亮興兆由雪水河截之從山壓下追殺六十餘里尋賊屯成縣黑峪河達家莊等處至達家莊乘賊睡殺之賊上天賜山督兵在祁家壩廟兒壩等處圍三面要隘連次截殺千餘恆瑞在黃渚關按察使廣厚在北面截住上大兵合圍可不日辦竣嘉之尋明亮等奏賊由箐林溜下山坡過三渡水遁出甘境追至紅花鋪賊已竄安河離賊二百餘里見由寶雞抄至子午峪入山剿之諭工部尙書那彥成總督松筠曰明亮等上次合圍之語如奏報屬虛治以欺妄之罪儻分路兜圍係何人堵禦不力且何以一經逃竄卽離二百里之遠可見並未跟蹤追躡著將縱賊之人一面奏聞一面革職拏問先是六月興兆與明亮奏殺賊於商州龍駒寨抵大商塬追及後隊共殺賊二百餘擒八十四人救被擄百姓二百餘交隨營知府趙洵辦理賊自欒莊越界嶺竄追至牌樓溝口賊由西溝竄明亮由茅河興兆由燕子河

抄擊之斃二百餘擒七十五人又奏賊自牧護關折回米湯河前隊兵勇殺賊五十餘馬隊殺七十餘追至湯峪口官兵與百姓追殺掠張家寨賊百餘林箐內搜賊六十三人仍交洵辦理督兵至秦嶺沿途殺五十餘至是那彥成及巡撫台布據革署巡撫永保稱趙洵與隨營知府朱勳書言龍駒寨欒莊牧護關打仗殺賊及救被擄百姓俱虛並永保差往探信之外委張起鳳言明亮一路五月至八月止在紅花寺獅子坪前隊鄉勇殺賊二十餘官兵並未打仗並近日在甘省奏殺賊千名據鳳縣都司稟報殺賊百餘等款奏參諭明亮欺罔罪狀較之縱賊爲尤重興兆扶同入奏罪亦難道著革職拏問交松筠嚴審定擬是月與明亮奏兵抵冷水溝賊將往洵陽壩繞道迎擊之又擊之於月河對面山梁兵至張家坪副都統銜綸布春正與賊敵恆瑞派千總張起鼈亦帶鄉勇至俱擁上擒李潮張漢潮中矛斃十一月松筠覆奏龍駒寨地方鄉勇殺賊兵至賊已竄大商塬所獲賊解到軍營賊自欒莊越界嶺明亮追至牌樓溝口賊奔飭豫省鎮將並督兵由燕子河分道抄擊賊自牧護關折回時兵追至湯峪口賊在張家寨已被百姓同官兵追殺賊竄走至沿途兵勇獲賊及百姓獲送軍營逐日交營員辦理摺內所敘係

湊齊逐日散數而言其未將鄉勇打仗殺賊分敘明白實屬冒功興兆扶同朦混應於明亮罪減一等發新疆效力贖罪並奏明亮等前在野雞溝殺賊二十餘至達家莊掩斃賊在屋內者餘匪入天賜山剿殺及滾崖死者約百餘明亮興兆在山西南防堵恆瑞在山東面本非合圍賊逃由東北一路實無官兵諭興兆糊塗無能惟知隨同明亮朦混節次所發奏摺或未必與閱看卽打仗處所未必親到非因伊宗室卽從末減著改發烏魯木齊效力贖罪五年閏四月賞四等待衛赴和闐辦事七年七月賞二等待衛仍留辦事十月調塔爾巴哈臺參贊大臣九年十月更換回京十年二月以佐領穆特布等鞭斃哈薩克擬罪輕革職留任六月以應擬斬監候侵用官銀之署同知文海罪失出革職 六次襲成寬原襲奉恩輔國公興兆第一子乾隆四十七年十二月擢三等待衛乾清門行走四十九年十二月歲滿封三等輔國將軍嘉慶四年二月授侍衛班領十二月襲封奉恩輔國公是月委署散秩大臣五年九月授鑲白旗漢軍副都統管火器營十月管健銳營六年正月調正白旗滿洲副都統二月署正黃旗滿洲副都統右翼前鋒統領四月署正紅旗護軍統領九月署馬蘭鎮總兵兼內務府大臣七年正月署正

白旗護軍統領二月署左翼前鋒統領四月署鑲藍旗護軍統領七月署右翼前鋒統領正黃旗漢軍副都統九月授右翼前鋒統領十月署正紅旗滿洲副都統八年二月署鑲紅旗蒙古都統正藍旗漢軍副都統七月授烏里雅蘇臺將軍

固山貝子穆爾祜

穆爾祜太祖高皇帝曾孫安平貝勒杜度第二子天聰九年五月命隨貝勒多鐸率偏師入寧遠錦州界以牽制明俾毋援山西穆爾祜在事有功崇德元年封輔國公六年八月從上圍松山明兵遁穆爾祜率騎兵追擊七年十月以怨望削爵黜宗室順治元年十月隨豫親王多鐸南征破流賊李自成於潼關先後拔兩營賊犯我前鋒兵同參領鄂博敗之我軍設伏近山賊自山來襲擊敗其衆二年二月復入宗室封三等鎮國將軍三年正月敘功晉一等鎮國將軍隨豫親王征蘇尼特部騰機思騰機特等有功四年三月復封輔國公六年正月大同總兵姜瓖叛命同敬謹親王尼堪等討之十月晉封固山貝子九年七月復隨敬謹親王征湖南賜蟒衣鞍馬弓矢師至衡州敬謹親王戰沒上命貝勒屯齊代其軍穆爾祜合營三月明桂王朱由榔之秦王孫可望自寶慶與僞都督馮雙禮軍會我師擊

敗之獲馬七十一年十月議隨敬謹親王戰沒罪削爵 初次襲長源原封貝子穆爾祜第二子順治十六年三月降襲三等鎮國將軍品級康熙三十四年九月以病削爵 二次襲察爾岱原襲三等鎮國將軍品級長源第四子康熙三十四年十月降襲三等輔國將軍品級雍正十一年八月卒年四十有五 三次襲諾爾博三等輔國將軍品級察爾岱第三子雍正十二年三月降襲三等奉國將軍品級乾隆二十五年十一月以病乞休二十六年十二月卒年四十有三 四次襲鳳文三等奉國將軍品級諾爾博第四子乾隆二十五年十二月降襲奉恩將軍品級四十年十一月授三等侍衛五十年二月授護軍參領嘉慶六年四月以病乞休九年正月卒年四十有八 五次襲榮光奉恩將軍品級鳳文第一子嘉慶六年六月降襲雲騎尉品級

固山貝子薩弼

薩弼太祖高皇帝曾孫安平貝勒杜度第七子崇德七年十月以兄杜爾祜穆爾祜特爾祜怨望削爵黜宗室薩弼亦從坐順治元年四月隨睿親王多爾袞入山海關破流賊李自成二年二月復入宗室封輔國公三年正月隨順承郡王勒克

德渾征流寇一隻虎於荊州屢敗賊衆凱旋賜金五十兩銀千兩初大同鎮總兵姜瓖叛郡縣多應之六年十月同親王滿達海剿賊於朔州寧武並有功十月詔還京晉封固山貝子十二年二月卒年二十有八諡曰懷愍 初次襲固爾懷愍貝子薩弼第二子順治十二年八月降襲鎮國公十五年三月卒年六歲諡曰悼愍 二次襲巴爾懷愍貝子薩弼第一子順治十八年七月襲封鎮國公康熙二十三年正月卒年三十有三 三次襲阿布蘭鎮國公巴爾第三子康熙二十三年四月降襲輔國公五十七年四月授宗人府右宗人十月轉左宗人五十八年十二月任鑲藍旗滿洲都統五十九年四月命議政六十一年十一月遷右宗正雍正元年三月奉上諭公阿布蘭人謙和自皇考任用以來所交事務一心勤慎效力著晉封爲多羅貝勒二年五月以奏事不敬降輔國公五年閏三月坐擅以玉牒底本私示隆科多削爵 四次襲法爾善鎮國公巴爾孫三等輔國將軍阿布蘭第一子雍正五年五月襲封輔國公乾隆五年閏六月卒年四十有七諡曰和愍 五次襲祿慶和愍輔國公法爾善第二子乾隆五年十一月襲封奉恩輔國公二十三年十一月坐守護陵寢儀樹不勤降三等鎮國將軍二十七年四月

卒年四十有二 六次襲倫成三等鎮國將軍祿慶第一子乾隆二十七年十月襲封三等鎮國將軍五十七年十二月卒年三十有九 七次襲定敏和愨輔國公法爾善嗣孫閒散宗室明森嗣子乾隆五十八年五月襲封三等鎮國將軍嘉慶五年三月卒年四十 八次襲碩壽三等鎮國將軍定敏第一子嘉慶五年七月襲封三等鎮國將軍

固山貝子蘇布圖

蘇布圖太祖高皇帝曾孫追封賢懿貝子尙建第一子初封輔國公順治二年七月隨貝勒勒克德渾駐防江寧十二月移師征湖廣三年正月至武昌破流賊餘黨一隻虎等事詳順承恭惠郡王傳凱旋頒賚有功將士蘇布圖得賜金五十兩銀一千兩尋晉封固山貝子五年九月隨鄭親王濟爾哈朗征湖廣十一月卒於軍年二十有四諡曰悼愨爵除

固山貝子溫齊

溫齊顯祖宣皇帝元孫鎮國公品級屯齊第一子順治六年十月封固山貝子康熙十三年三月授宗人府右宗人四月授鑲藍旗滿洲都統是年四川叛應逆藩

吳三桂命隨定西大將軍貝勒洞鄂由陝西進征時陝西提督王輔臣叛大軍駐漢中敗賊於先逸關復關山關及秦州禮縣追剿至西和復清水伏羌事詳信郡王傳十六年二月上以洞鄂等久屯平涼無功削洞鄂爵溫齊降輔國公革都統及右宗人嗣三桂陷湖南安遠靖寇大將軍貝勒尙善規復岳州九月命溫齊統京兵往參贊軍務十七年六月敗賊於柳林嘴君山八月尙善卒於軍貝勒察尼代仍以溫齊爲參贊十月敗賊於陸石口進擊岳州克之十八年正月溫齊追逸賊吳應麒至二百餘里以未攜纍具引還應麒遁且虛報陣斬僞官兵五千餘數事聞上命察尼嚴取供詞七月察尼以其詞奏諭曰國家軍法嚴明並無虛僞多報首功之事溫齊乃有罪之人不思效力自贖岳州徒步奔逸之寇不卽窮追且殺賊不過三百餘人與原疏迥異削爵罷參贊爵除

鎮國公阿拜

阿拜太祖高皇帝第三子天命十年十月與弟塔拜巴布泰征東海北路呼爾哈部俘千五百戶師還上出城迎勞尋授騎都尉天聰八年四月晉授三等男崇德三年七月任吏部承政四年八月封三等鎮國將軍六年十月命往錦州南乳峯

山駐防八年八月以老罷承政任順治四年九月晉二等鎮國將軍五年二月卒年六十有四十年五月追封鎮國公諡曰勤敏 初次襲鞏安勤敏鎮國公阿拜第六子順治三年十一月封奉恩將軍五年三月襲封二等鎮國將軍六年十月晉封輔國公康熙二十年五月卒年五十有四爵除

鎮國公巴布泰

巴布泰太祖高皇帝第九子天命十年十月征東海北路呼爾哈部有功十一年八月命理正黃旗事天聰四年三月隨大貝勒阿敏駐永平明兵陷灤州巴布泰不能禦議罷職八年四月授副都統五月從大軍征明克保安州十一年以巴布泰匿所獲議罷職崇德六年五月封三等奉國將軍七年十一月命駐錦州順治元年四月隨睿親王多爾袞定京師同都統譚泰擊敗流賊逐北至望都二年正月敍功晉一等奉國將軍三年正月隨貝勒勒克德渾征湖廣敗賊於安遠南漳西峯口關王嶺襄陽府四年九月晉三等輔國將軍尋晉封輔國公六年四月同貝子務達海討大同叛鎮姜瓖十月晉封鎮國公十二年正月卒年六十有四諡曰恪僖 初次襲祜錫祿恪僖鎮國公巴布泰第三子順治十三年九月降襲三

等鎮國將軍康熙三十四年十月以庸劣削爵 二次襲富良原襲三等鎮國將軍
軍祐錫祿第一子康熙二十六年三月封三等輔國將軍三十四年十月改降襲
三等輔國將軍三十九年六月卒年二十有八 三次襲尼雅翰三等輔國將軍
富良第二子康熙三十九年七月降襲三等奉國將軍雍正五年五月卒年三十
有七 四次襲佛照三等奉國將軍尼雅翰第四子雍正六年十月降襲奉恩將
軍九年正月卒年十有二 五次襲多義三等奉國將軍尼雅翰第五子雍正十
年九月襲封奉恩將軍乾隆十六年九月授佐領四十一年十二月卒年五十
六次襲恩額穆奉恩將軍多義第三子乾隆四十二年四月授佐領七月襲封奉
恩將軍五十四年十一月授正黃旗副護軍參領

鎮國公漢岱

漢岱顯祖宣皇帝孫追封誠毅勇莊貝勒穆爾哈齊第五子天聰八年十二月授
騎都尉尋封一等奉國將軍崇德二年四月預議政六年八月從上圍松山敗明
總兵吳三桂等漢岱率所部追擊大破之七年十月隨貝勒阿巴泰攻明薊州河
間景州克充州十二月卽軍前授兵部承政八年六月凱旋賜銀二百緞六順治

元年四月隨睿親王多爾袞定京師敗流賊李自成敘功晉三等鎮國將軍十月隨豫親王多鐸南征破流賊於潼關二年二月同副都統伊爾德率兵由南陽趨歸德克州一縣四四月渡淮克揚州獲船百餘十月賜金三十五兩銀千三百兩三年正月任鑲白旗滿洲都統五月同貝勒博洛趨杭州追擊明魯王朱以海於台州是月晉一等鎮國將軍十一月同博洛進兵福建破明唐王朱聿鍵之總兵師福於分水關入崇安斬其巡撫定興化克漳州泉州敘功晉輔國公五年四月命同貝子屯齊征陝西逆回會總督孟喬芳已擊斬米喇印丁國棟漢岱旋赴英親王阿濟格軍戍大同六年七月隨禮親王滿達海剿賊朔州寧武克其城移師攻遼州賊迎戰大敗之並降屯留襄垣榆社武鄉等縣七年十二月任吏部尙書兼攝正藍旗滿洲都統八年二月調刑部尙書三月以不陳奏英親王私藏兵器事削世職罰鍰五月晉鎮國公九年四月復調吏部尙書七月隨敬謹親王尼堪征湖南賜蟒衣鞍馬弓矢十一月敬謹親王戰沒命貝勒屯齊代其軍漢岱合營十年三月擊敗明桂王朱由榔之秦王孫可望等兵十一月追議隨敬謹親王戰沒罪削爵十二年正月復任吏部尙書二月加太子太保八月封鎮國將軍

品級十三年四月以河西務鈔關員外郎朱世德虧課萬餘兩戶部援赦免罪吏部亦弗置議廷議解漢岱任得旨漢岱於湖南失事情罪重大考之成憲卽應正法朕念係宗室姑從寬免且加任用乃不思感奮報效圖改前愆反依阿蒙蔽負朕大恩本當重處復念宗室姑從寬著革任削太子太保鎮國將軍級爵除

鎮國公恭阿

恭阿顯祖宣皇帝曾孫原封貝勒阿敏第四子阿敏得罪恭阿廢爲庶人後復入宗室順治五年九月隨鄭親王濟爾哈朗征湖廣六年正月大軍抵長沙擒明桂王朱由榔之總督何騰蛟進剿廣西分兵定道州黎平府先後克六十餘城恭阿俱在事有功十月封鎮國公十一月卒於軍年二十有六 初次襲法塞鎮國公恭阿第一子順治八年閏二月降襲輔國公康熙四十九年正月卒年六十有四 二次襲阿裕爾輔國公法塞第二子康熙二十年正月封一等輔國將軍四十九年十月改降襲三等奉國將軍五十八年八月卒年五十有三 三次襲蘇赫訥三等奉國將軍阿裕爾孫閒散宗室德色勒第一子康熙五十八年十二月降襲奉恩將軍雍正二年七月卒年十歲爵除

鎮國公品級屯齊

屯齊顯祖宣皇帝曾孫追封恪僖貝勒圖倫第二子崇德元年五月隨武英郡王阿濟格征明有功四年五月隨鄭親王濟爾哈朗略明錦州松山杏山力戰被創常賚外加賜銀百兩八月封輔國公五年六月隨睿親王多爾袞圍明錦州明兵夜襲我鑲藍旗營擊敗之嗣以不臨城及私遣兵回議削爵詔從寬罰鍰六年八月從上征明敗明於錦州塔山十一月復隨睿親王圍錦州順治元年十月晉封固山貝子尋隨豫親王多鐸破流寇平陝西河南並有功二年四月賜圓補紗衣一襲五月隨豫親王下江寧與貝勒尼堪等追明福王朱由崧至蕪湖擒之十月凱旋賜金百兩銀五千兩鞍馬一是年授鑲藍旗滿洲都統三年正月隨肅親王豪格西征五月破流賊賀珍等解漢中圍敗一隻虎孫守法於漢陰復興安五年四月陝西逆回犯鞏昌諸郡命爲平西大將軍同輔國公漢岱討之會總督孟喬芳已擊斬米喇印丁國棟屯齊旋赴英親王阿濟格軍駐大同六年十月晉封多羅貝勒流賊張獻忠餘黨孫可望李定國等附明桂王朱由榔擾湖南九年七月屯齊隨敬謹親王尼堪征之十一月敬謹親王戰沒詔屯齊爲定遠大將軍時定

國及由榔將馬進忠四萬餘衆在永州大軍至定國度龍虎關遁可望率兵來靖州僞都督馮雙禮來武岡州遂進師寶慶至周家坡雙禮進忠等據險抗我師會暮天雨列陣相拒是夜可望自寶慶以兵來合衆號十萬屯齊分兵縱擊大破之捷聞得旨嘉獎十一年十月議隨敬謹親王戡沒罪削爵十二年八月封鎮國公品級十五年正月隨信郡王多尼征由榔於雲南薄其城定國挾由榔奔永昌餘衆悉降師還康熙二年六月卒年五十 初次襲富爾泰鎮國公品級屯齊第二子康熙二年八月降襲輔國公品級十六年八月任宗人府右宗人二十二年三月降三等鎮國將軍品級四十年六月卒年五十有八 二次襲彭齡鎮國公品級屯齊曾孫初屯齊第五子原任二等侍衛謨啟生德成額任三等侍衛彭齡德成額第四子也乾隆四十三年三月詔以鎮國公屯齊著有勞績賜一等奉國將軍爵世襲罔替以彭齡襲封十一月授三等侍衛五十七年十月遷二等侍衛五十八年三月授公中佐領五十九年二月授侍衛班領九月授總族長十月授前鋒侍衛

輔國公塔拜

塔拜太祖高皇帝第六子天命十年十月征東海北路呼爾哈部有功尋授三等輕車都尉天聰八年四月晉一等輕車都尉尋封三等輔國將軍崇德四年九月卒年五十有一順治十年五月追封輔國公諡曰愨厚康熙五十二年四月塔拜曾孫正白旗漢軍副都統楚宗奏塔拜於太祖高皇帝時建立功績懇請撰文立碑從之 初次襲額克親愨厚輔國公塔拜第二子崇德元年五月隨武英郡王阿濟格征明進偪北京明兵自涿州來拒額克親陷陣破之四年八月封三等奉國將軍九月襲封三等輔國將軍五年六月隨睿親王多爾袞攻明錦州十一月隨貝勒多鐸追擊明兵於塔山六年八月上征明錦州敗明總督洪承疇兵十三萬移營近松山掘壕環困之敗軍夜突御營額克親同內大臣錫翰等嚴守以拒敵敗卻十二月敍功賜銀八十兩順治元年四月隨睿親王定京師有功二年三月晉二等輔國將軍四年九月晉一等輔國將軍尋封輔國公六年十月晉封鎮國公七年八月任正白旗滿洲都統晉封固山貝子八年二月以御前大臣羅什博爾惠詔媚諸王造言搆釁伏法額克親坐附和削爵黜宗室九年二月復入宗室任內大臣十二年正月卒年四十有七爵除

輔國公賴慕布

賴慕布太祖高皇帝第十三子天聰八年四月授騎都尉崇德四年九月預議政
七年二月隨武英郡王阿濟格征明敗寧遠兵十月上御篤恭殿宴賚武英郡王
不俟賞先歸賴慕布坐失勸阻革世職罷議政是月又議隨武英郡王駐高橋時
會敏惠恭和元妃喪武英郡王令鎮國公扎喀納於帳內歌舞賴慕布坐容隱應
黜宗室上免之八年七月奉特旨凡戮力行間勤敏素著者准令其部下人自行
保奏賴慕布下五十人與焉順治二年二月封奉恩將軍三年五月卒年三十有
六十年五月追封輔國公諡曰介直 初次襲來祜介直輔國公賴慕布第一子
順治三年六月襲封奉恩將軍尋晉三等鎮國將軍八年閏二月晉封輔國公康
熙八年五月以才力不及削爵 二次襲扎坤泰原襲奉恩將軍來祜孫三等侍
衛愛珠第三子雍正十三年九月今上御極奉諭旨太祖太宗子孫內從前或係
本支無人未經封爵或因別有事故革退未襲者著宗人府查奏宗人府以賴慕
布後裔係閒散宗室並無官階奏聞乾隆元年五月奉旨扎坤泰承襲奉恩將軍
二十二年三月卒年四十有六 三次襲永武奉恩將軍扎坤泰第一子乾隆二

十二年七月襲封奉恩將軍二十八年十月卒年三十有四爵除

輔國公瑪瞻

瑪瞻太祖高皇帝孫禮烈親王代善第六子天聰元年五月隨貝勒多鐸從廣寧入寧遠錦州界牽制明兵俾母援山西敗明兵於大凌河西陣斬副將劉應選追奔及松山城克一臺瑪瞻並在事有功崇德元年五月隨武英郡王阿濟格征明至安州連克十二城九月凱旋上行郊勞禮設大宴瑪瞻預賜金卮酒是年封輔國公三年八月隨貝勒岳託征明由牆子嶺毀邊城入敗明總督吳阿衡兵連克臺堡越北京趨山東十一月卒於軍年二十有七無嗣四年四月櫬歸上遣貝子及大臣等奠酒賜銀二千兩駝馬各一爵除

輔國公巴穆布爾善

巴穆布爾善太祖高皇帝孫追封愨厚輔國公塔拜第四子崇德元年十二月從上征朝鮮敗其兵於陶山是年九月兄三等奉國將軍額克親襲父輔國將軍遂以巴穆布爾善襲兄爵順治元年四月隨睿親王多爾袞定京師破流賊有功二年三月晉二等奉國將軍四年九月晉一等奉國將軍六年十月晉三等鎮國將

軍八年閏二月晉封輔國公康熙四年三月任領侍衛內大臣六年二月擢祕書院大學士九月充纂修世祖實錄總裁八年五月議巴穆布爾善結黨行私等罪二十一款伏誅子黜宗室爵除六月諭宗人府自順治十八年後宗室有犯罪革除宗室者著將原案情節查明具奏尋宗人府奏革退宗室內巴穆布爾善係與鼇拜結黨情罪重大其子郭禮博禮七十五觀音保革去宗室之處應毋庸再議得旨巴穆布爾善之子本應依議念係宗室朕心不忍俱著爲閒散宗室

輔國公巴爾堪

巴爾堪顯祖宣皇帝曾孫鄭獻親王濟爾哈朗第四子順治十一年十二月封三等輔國將軍康熙十三年四月命同鎮東將軍拉哈達鎮兗州巴爾堪署副都統六月詔率蒙古兵赴江寧八月以逆藩耿精忠賊黨由饒州犯徽州詔江寧將軍額楚偕巴爾堪進剿巴爾堪先驅九月至旌德聞賊據績溪疾進度徽嶺賊千餘迎戰敗之額楚繼至並抵績溪賊衆環偪合兵擊逐十餘里斬三千餘級復徽州剿賊黟縣至董亭橋賊五千拒阻擊之悉遁別賊千餘越山來援復敗之陣斬僞遊擊魏澄僞千總翁達等十一月進師婺源休寧賊據奇台嶺擊走之趨黃茅新

嶺賊三千餘據木柵拒令步兵分攻嶺左右騎兵攻中斬五百餘級賊盡棄甲仗遁復縣城躡之樂平縣段家村叛將陳九傑糾賊八千餘拒敗竄入縣卽樹梯登城攻復之餘賊據鄱陽雲吉峯下搜捕百餘級復饒州十四年四月進攻萬年縣之石頭街賊四萬餘斷渡口巴爾堪與額楚水陸並進破賊五十七營斬五千餘級擒九傑獲船二百餘趨安仁縣賊八千餘架船遁風逆泊岸巴爾堪追及賊棄礮焚船竄又分兵擊敗齊爪郎諸賊於南頓山五月至貴溪賊奔復縣城至弋陽僞總管蔣德輅以木石壘斷西岡橋立木柵城北賊五萬爲九營僞總兵柯昇以賊五千自廣信趨救別立六營巴爾堪同額楚分隊夾擊斬溺二萬餘擒僞遊擊張二奇都司張明德等八月攻永豐賊於金石山陣斬僞都司李定等僞總兵何起先以賊六千餘據玉山僞遊擊林二瞻以賊五百餘掠鉛山又掠浙江之閩逆餘黨八千自江山常山犯玉山巴爾堪先後擊斬無算十六年正月隨簡親王喇布征吉安與吳逆僞帥韓大任戰於螺子山失利議削職戴罪圖功同額楚進征廣東九月剿賊韶州蓮花山陷陣中中創裹創力戰大破賊十九年八月簡親王統師廣西上詔王進征時宜以巴爾堪總統營伍俾立功自效十月創發自度不

能痊語都統額赫納副都統幹都海曰吾爲宗室不能臨陣死今創發勿令家人以陣亡冒功卒年四十有四喪還上命內大臣宗室輝塞往奠二十二年四月上以巴爾堪出征有年隨處奮身前進傷亡可憫下部議卹復輔國將軍雍正元年正月追封輔國公賜諡武襄立碑紀功乾隆十七年十二月孫奇通阿襲封和碩簡親王贈如其爵 初次襲巴賽武襄輔國公巴爾堪第一子康熙二十一年四月封三等奉國將軍三十四年三月任鑲藍旗漢軍副都統三十五年二月從上征噶爾丹五月至克魯倫河同平北大將軍馬思喀追寇至巴顏烏蘭而還三十六年十月調正黃旗蒙古副都統三十八年八月罷任五十四年三月復授正紅旗蒙古都統五月調鑲紅旗滿洲副都統十一月遷正紅旗蒙古都統五十七年七月署黑龍江將軍世宗憲皇帝御極實授寧古塔將軍雍正元年五月奏陳父巴爾堪勞績請賜碑文得旨俞允追封輔國公卽以巴賽襲二年二月召來京四年六月授振武將軍赴阿爾台軍營既至奏請令前鋒統領穆克登率察哈爾兵於特斯駐牧副將軍貝勒博貝率喀爾喀兵於特斯河駐牧前鋒統領定壽率蒙古兵於扎布罕駐牧均俟降雪後撤回從之五年十月詔遣大臣於來年赴阿爾

台更代十二月以喀爾喀郡王丹津多爾濟奏巴賽辦事妥協管兵整飭詔仍留駐防七年三月命靖邊大將軍傅爾丹剿禦噶爾丹策凌以巴賽爲副將軍八年五月召傅爾丹來京籌議軍務其大將軍印以巴賽暫護九年四月同傅爾丹進駐科布多六月噶爾丹策凌糾賊三萬來犯傅爾丹偕巴賽至扎克賽河獲賊二十餘人訊之詭言賊不滿千在察罕哈達游牧尙隔三日程傅爾丹遂進至庫列圖嶺賊據險阻我軍傅爾丹令移營和通呼爾哈諾爾賊兵二萬伏山谷伺我軍甫移突出蒙古兵俱潰散收滿洲兵四千設方營護輜重退渡哈爾哈納河登山列陣賊衆復踵至傅爾丹趨右仍回科布多巴賽同副將軍查弼納左越嶺至河濱力戰沒於陣年六十有九尋陷賊之正紅旗前鋒校薩明阿脫歸得巴賽與查弼納陣沒狀上諭廷臣曰準噶爾賊衆侵犯北路將軍等急欲滅此朝食忿激迎擊倉猝失利此皆國家養育多年之人朕遴選任用冀其大樹功勳重邀爵賞伊等亦以世受國恩竭力捐軀雖誤墮狡計而矢死效忠情殊可憫賜卹如例諡曰襄愍入祀昭忠祠乾隆十七年十二月子奇通阿襲封和碩簡親王贈如其爵

二次襲奇通阿襄愍輔國公巴賽第十子雍正四年八月封三等輔國將軍九年

十二月襲封輔國公乾隆十七年十二月襲封和碩簡親王別詳鄭獻親王傳後
三次襲經訥亨簡親王奇通阿第二子兄豐訥亨襲父爵別有傳乾隆三十年
六月諭曰從前因奇通阿襲封簡親王銷去其原襲公爵近閱宗室王公表傳奇
通阿之王爵係按派應襲而其公爵係伊祖父積有軍功相繼陣亡所遺不可泯
沒且豐訥亨頻年出征頗有勞績曾給雲騎尉世職亦因已襲王爵銷去朕追思
伊先世功勳又念豐訥亨近日勞績所有從前銷去公爵著宗人府帶領豐訥亨
近派子弟引見請旨承襲七月命經訥亨襲封輔國公四十年十一月卒年三十
有三 四次襲積拉堪輔國公經訥亨第一子乾隆四十一年五月襲封輔國公
四十三年十二月授散秩大臣嘉慶二年二月以陪祀七次不到降二級留任罰
散秩大臣俸二年五月授鑲白旗蒙古副都統四年正月調鑲白旗滿洲副都統
十月授鑲黃旗護軍統領五年三月管理圓明園八旗內務府三旗官兵是月授
右翼前鋒統領九月管鄂羅斯佐領兼管寶坻縣等九處六年二月調正藍旗滿
洲副都統四月署正紅旗漢軍副都統七年四月授荊州將軍

輔國公品級扎喀納

扎喀納顯祖宣皇帝曾孫贈貝勒扎薩克圖第一子崇德三年八月隨睿親王多爾袞征明分兵八道扎喀納趨臨清州渡運河破濟南府還破天津衛所向有功四年四月師還賜駝一馬一銀二千兩是年封鎮國公時內大臣多爾濟下有蒙古及漢人自依嚕逃命扎喀納等伺諸藩城屏城間未獲而還議削爵詔從寬降輔國公六年八月從上征明錦州明總督洪承疇以兵犯我鑲紅旗營擊敗之師還敵襲我後相距僅百步扎喀納轉戰敵驚遁明總兵吳三桂白廣恩王樸等沿海潛逃同輔國公芬古追擊至塔山七年七月駐防錦州九月還十月以駐高橋時遇敏惠恭和元妃喪扎喀納從武英郡王歌舞爲樂坐大不敬罪削爵黜宗室幽禁順治二年二月敍從睿親王多爾袞定京師功仍入宗室授輔國公品級九月同鎮國公博勒赫駐江南十一月隨貝勒勒克德渾征湖廣凱旋賜金五十兩銀千兩五年十二月隨郡王瓦克達赴英親王阿濟格軍駐防大同六年九月晉封固山貝子九年七月隨敬謹親王尼堪征湖南賜蟒衣鞍馬弓矢至衡州敬謹親王戰沒上以貝勒屯齊代其任扎喀納合軍敗賊兵十萬於周家坡十一年十月議隨敬謹親王戰沒罪削爵十二年八月復授輔國公品級十五年正月隨信

郡王多尼征明桂王朱由榔於雲南抵貴陽沿途敗賊降僞官劉之扶王宗臣等百餘馬步兵千餘師進雲南省城由榔遁攻永昌克之十六年閏三月卒於軍年四十有九 初次襲瑪喀納輔國公品級扎喀納第五子康熙四年三月降襲三等鎮國將軍品級四十三年二月因校射不嫻削級 二次襲瑪商阿原襲三等鎮國將軍品級瑪喀納孫閒散宗室瑪稷第二子雍正七年閏七月授七品筆帖式十一年九月降襲三等奉國將軍品級乾隆四年十二月授護軍參領十四年四月卒年四十有三 三次襲英祿三等奉國將軍品級瑪商阿第二子乾隆十四年十月降襲奉恩將軍品級四十年閏十月卒年四十有一 四次襲福亨額奉恩將軍品級英祿第一子乾隆四十一年十月降襲雲騎尉品級嘉慶七年七月卒年五十爵除

和碩貝勒莽古爾泰

莽古爾泰太祖高皇帝第五子歲壬子九月從上征烏拉克城六莽古爾泰等請渡水擊上止之曰我且削其外城無僕無以爲主無民無以爲君遂燬所得六城移駐富勒哈河越日於烏拉河建木城留兵千守天命元年授和碩貝勒以齒序

莽古爾泰爲三貝勒四年三月明總兵杜松等率師六萬出撫順關上親統師迎擊莽古爾泰從至界藩設伏薩爾濟谷口明兵過將半尾擊之我師據界藩之吉林崖明兵營薩爾濟山以二萬衆來攻吉林莽古爾泰同大貝勒代善等以兵千衛吉林復合力攻薩爾濟山破之又破明兵於尙閒崖時明總兵劉綎出寬甸略棟鄂上命同代善等禦之至瓦爾喀什窩集擊敗明兵二萬陣斬綎事詳禮烈親王傳八月從上征葉赫圍其城其貝勒布揚古及弟布爾杭古降葉赫平五年八月上征明由懿路蒲河進明兵出瀋陽城者各引退諭莽古爾泰領本部追之莽古爾泰遂率健銳百人追殺總兵李秉誠副將趙率教兵越瀋陽城東至渾河始返六年七月鎮江城降將陳良策叛投明總兵毛文龍同代善遷金州民於復州十年正月明葺城守旅順口攻克之殲其衆十一月率師援科爾沁解其圍十一年四月上征喀爾喀巴林部命代善諸貝勒略西拉木倫諸貝勒以馬乏不能進莽古爾泰獨領兵夜渡擊之俘獲無算天聰元年五月攻明右屯衛又以偏師衛塔山糧運三年十月從上證明貝勒阿巴泰阿濟格先從龍井關入斬明漢兒莊副將易愛等莽古爾泰偕貝勒多爾袞多鐸至其守將遂以城降並招撫潘家口

守備金有光中軍范民良蔣進喬翌日上統師克洪山口趨遵化莽古爾泰自漢兒莊合營敗明山海關總兵趙率教兵擒其副將臧調元旋奉命赴通州視渡口是月大軍進薄京城明諸道兵入援屯廣渠門外莽古爾泰分遣護軍前行令阿巴泰阿濟格等攻之追殺至壕莽古爾泰與貝勒多鐸留後值明潰卒來犯擊殲之十二月從上視薊州破明山海關援兵四年二月克永平遵化還與明兵遇敗之五年三月命諸貝勒直言時政莽古爾泰奏曰讞獄據供詞以定是非未敢明知枉斷惟恐事久怠生臣與諸貝勒大臣倍加策勵八月從上圍明大凌河城正藍旗兵圍其南莽古爾泰軍其中爲策應九月敗明監軍道張春總兵吳襄等援兵事詳禮烈親王傳十月議莽古爾泰於御前露刃大不敬罰銀萬兩撤五佐領歸公六年五月從上征察哈爾林丹汗遁移師征明歸化城略大同宣府七月師還十二月薨年四十六上臨哭丙夜始還翌日設幄議祭奠事是夜乃還宮九年十二月以所屬冷僧機追首莽古爾泰朋謀不軌事削貝勒黜宗室爵除

多羅貝勒德格類

德格類太祖高皇帝第十子初授台吉天命六年二月大軍略明奉集堡將旋有

小卒指明兵所在德格類同台吉岳託碩託擊敗明兵二百追偪明總兵李秉誠營其衆二千潰遁三月同台吉寨桑古閱三岔橋至海州城中官民張樂與迎德格類等令軍毋擾民奪財物士皆登城宿勿入民室次日安撫居民而還八年四月同台吉阿巴泰征喀爾喀扎魯特部十一年十月復隨大貝勒代善征扎魯特部是年封多羅貝勒天聰三年九月同貝勒濟爾哈朗等略明錦州焚其積聚俘獲無算五年六月命諸貝勒直言時政德格類奏曰國家要在慎選正直任以國事屏讒邪遠奸佞則賢不肖皆知取法臣等與諸貝勒皆以公正自持效忠竭力至讞獄或刑罰不中請卽罷斥另選良臣任法司則政簡刑清國家何憂不太平七月初設六部命理戶部事八月從上圍明大凌河城正藍旗兵圍其南德格類軍其中爲策應九月敗明監軍道張春總兵吳襄等援兵事詳禮烈親王傳十月明總兵祖大壽降同貝勒阿巴泰夜襲錦州擊斬甚衆事詳饒餘敏郡王傳六年五月同貝勒濟爾哈朗等俘察哈爾部衆於歸化城及黃河諸路九月同貝勒岳託等拓疆自耀州展至蓋州迤南七年六月攻旅順口克之八年五月從大軍征明六月招撫蒙古來歸戶衆七月克獨石口進攻赤城未拔入保安州會大軍於

應州師還九年十月薨年四十上臨哭丙夜乃還設幄而居撤饌三日諸貝勒大臣勸慰再三始還宮十二月莽古爾泰既爲冷僧機所告以大逆削爵除籍德格類其母弟曾與謀追削貝勒黜宗室爵除

多羅貝勒拜音圖

拜音圖顯祖宣皇帝孫追封篤義貝勒巴雅喇第三子天聰八年四月太宗文皇帝加恩宗室授拜音圖三等子爵與功臣同六月隨貝勒阿濟格迎察哈爾來降之士巴濟農九年十二月授鑲黃旗都統崇德元年五月隨武英郡王阿濟格征明略保定府攻安肅縣克之九月師還十月同諸王大臣以所獲陳獻篤恭殿前部臣差等以聞上曰朕聞拜音圖不忘君上俘獲之時卽簡選收藏攜歸進獻具見敬忱甚爲可嘉十二月從征朝鮮以騎入其城收其輜重三年十月隨睿親王多爾袞征明同都統圖爾格敗敵於董家口毀邊牆入克青山關下城六年八月議拜音圖弟鞏阿岱隨大軍圍錦州時臨陣退縮罪下王大臣會鞫拜音圖拂袖出坐徇庇論死得旨革職罷都統任並罰鍰尋率兵助睿親王軍於錦州復同貝勒多鐸圍守松山七年六月復都統任順治二年正月隨豫親王多鐸敗賊將劉

方亮於潼關是月封一等鎮國將軍三月賜繡服一襲四月南征克揚州以舟師破其兵於江南岸六月同貝子博洛攻下杭州十月敘功賜金八十兩銀四千兩鞍馬一三年五月授三等公尋隨豫親王擊敗喀爾喀部兵晉封鎮國公五年十一月晉固山貝子隨英親王阿濟格戍大同六年九月攻叛鎮姜瓖餘黨於沁州賊遁拔其城復圍僞道胡國鼎於潞安殲之十月晉封多羅貝勒九年三月以阿附睿親王削爵幽禁黜宗室爵除嘉慶四年四月奉特旨拜音圖後裔海福等七人著復入宗室

多羅貝勒碩託

碩託太祖高皇帝孫禮烈親王代善第二子初授台吉天命六年二月從上證明奉集堡敗明兵二百十年十一月同貝勒莽古爾泰等援科爾沁解其圍十一年四月隨父大貝勒代善征喀爾喀巴林部十月征扎嚕特部有功授貝勒天聰元年正月隨二貝勒阿敏等征朝鮮定盟而還五月從上證明大凌河圍錦州四年五月明兵復圍灤州阿敏殺降者棄永平歸六月議碩託不力阻借歸罪削爵五年八月從上證明錦州明兵攻貝勒阿濟格營碩託同擊敗之傷股上親勞以金

厄酌賜九月明兵趨大凌河碩託擊敗明監軍道張春兵手復被創七年正月以力戰受傷獎賜綵緞十布百八年七月隨代善征明白喀喇鄂博攻得勝堡克之又擊敗朔州騎兵八月同貝勒薩哈璘略代州拔崞縣分克原平驛尋封固山貝子崇德元年十二月從上征朝鮮敗其援兵二萬餘於南漢山城二年四月同武英郡王阿濟格攻明皮島克之三年八月同鄭親王濟爾哈朗征明寧遠四年正月以僭上越分降輔國公二月同武英郡王征明五月論錦州寧遠功賜駝馬各一五年六月隨睿親王多爾袞圍錦州嗣以我軍離城遠駐又遣弁私歸諭責之曰爾曾獲罪朕屢寬宥不思竭力效忠報朕屢次宥罪之恩反若事不關己今後再罹於罪任法司治之必不爾宥也廷議削爵詔從寬罰鍰尋復封固山貝子八年八月以同郡王阿達禮謀立睿親王伏誅黜宗室爵除

多羅貝勒延信

延信太祖文皇帝曾孫肅武親王豪格孫父猛峩封多羅溫郡王傳子佛永輝無嗣傳弟延綬坐行止不端降貝勒延綬子揆慧降襲輔國公坐昏庸削爵延信猛峩第三子康熙二十六年正月封三等奉國將軍三十七年十二月授二等待衛

四十年十月預議政授正藍旗滿洲都統四十五年十月以病解都統任五十二年四月復任都統五十七年十月隨貝子允禔征策妄阿喇布坦延信稱準噶爾與青海部世婚我軍衆寡青海知之準噶爾亦知之今年既未進兵我軍可無出口駐劄允禔疏聞詔大軍駐西寧五十九年正月授平逆將軍由青海往平西藏八月擊敗策零敦多卜於布克河齊諾郭勒綽瑪喇遂定西藏事聞得旨嘉獎六十年六月諭宗人府平逆將軍延信統領滿洲蒙古綠旗兵過自古未到之烟瘴惡水無人居住之絕域殲滅醜類平定藏地克展勇略深屬可嘉著封爲輔國公六十一年十二月攝撫遠大將軍事尋授西安將軍雍正元年二月兄子揆慧旣削爵議以延信襲延信故公爵遂晉封固山貝子八月敘功晉封多羅貝勒五年九月回京十二月上以延信與阿其那阿靈阿拉錫普奇蘇努等結黨在西寧軍前又因結允禔徇隱年羹堯後令伊進藏防守託病遷延西安將軍任內不實心辦理軍務亦未陳奏要事訓練不親往濫保官兵詢以應否進藏輒云路有烟瘴畏懼出征進藏時並侵帑十萬兩在御前傲慢無禮種種罪惡盡行敗露命革貝勒交王大臣逐款嚴審定擬具奏尋經王大臣審訊延信罪凡二十款奏言黨援

之罪七一延信向與阿其那阿靈阿拉錫普奇等結爲黨羽與二阿哥爲敵一徇
隱年羹堯不臣之心一在西寧時陰與允禩交結一令伊進藏時託病遷延鑽營
年羹堯代伊解釋一延信原係阿其那阿靈阿蘇努等同黨奉旨交問伊反將無
干之漢人路振揚舉出一稱阿其那樸實阿靈阿爲人傑與阿爾松阿結爲姻親
一捏造逆言告知年羹堯希脫黨謀又大不敬之罪四一當御前昂然伸足一諭
旨切責坐聽不跪聆一時屆萬壽聖節不俟慶祝卽起程回任一在西寧時不遵
諭旨將地方要務陳奏又欺妄之罪一假捏病狀扶杖行走及令署大將軍棄杖
前往負恩之罪一在將軍任內不親加訓練要結人心之罪一妄行保題官兵九
十餘人貪婪之罪一進藏時侵帑十萬兩入己擾亂政事之罪二一混行痛責士
卒一詢以應否進藏輒云路有烟瘴希圖惑衆失誤兵機之罪三一因青海用兵
擅調遠處兵丁幾致可危一聞賊臨邊擁兵不發迨新城子失陷後始發兵一將
拳到逆賊阿拉布坦溫布屬下蒙古七人並不究審竟行釋放罪凡二十款供狀
明白請按律斬決得旨延信從寬免死著監禁黜宗室爵除

清史列傳 卷四

大臣畫一傳檔正編一

費英東

費英東姓瓜爾佳氏世居蘇完後隸滿洲鑲黃旗驍果善射引強弓十餘石太祖高皇帝勦業之初隨其父蘇完部長索爾果首率所部軍民五百戶來歸太祖嘉之授一等大臣尙主有兌沁巴顏者費英東女兄之夫也謀逆費英東擒而誅之初征瓦爾喀部取噶嘉路殺部長阿球降其衆以歸戊戌年正月同台吉褚英等統兵千人再征瓦爾喀取安楚拉庫路圍屯寨二十餘所屬人戶悉招降之丁未年正月斐悠城長苦烏拉侵擾請內附費英東同貝勒舒爾哈齊等遷之盡收其環城屯寨令侍衛扈爾漢護五百戶先歸烏拉以兵追擊相持未下費英東率師繼至大敗之五月討東海渥集部與貝勒色雅喇等取赫席赫路鄂摩和蘇魯路佛訥赫託克索路俘二千人而還辛亥年七月同台吉阿巴泰等取烏爾固辰穆稜二路癸丑年正月從太祖征烏拉同諸貝勒大臣力戰破敵乘勝奪門遂拔其

城尋命與何和哩額亦都扈爾漢安費揚古爲五大臣佐理國事天命四年二月明兵四路來侵一軍據薩爾濟山巔費英東率本旗兵進擊破之太祖之征明取撫順也明兵來援礮驚費英東馬旁逸諸軍不前費英東廻馬大呼揮諸軍並進遂破之太祖拊髀歎曰萬人敵也從攻葉赫城上矢石雨下太祖命之退對曰我兵已薄城下矣再命之退對曰勢垂克必不退竟拔其城費英東自少從太祖征討諸國三十餘年身先兵士衝突堅陣當其鋒者莫不披靡性忠直遇事敢言毅然不撓以功授三等子世襲五年三月卒年五十有七太祖聞之哀慟親臨其喪太宗文皇帝天聰六年追封直義公配享太廟八年以其子察喀尼襲爵賜勳免死二次太宗嘗諭羣臣曰費英東見人不善必先自斥責而後劾人見人之善必先自獎勵而後舉之被劾者無怨言被舉者亦無驕色朕未聞諸臣以善惡直奏似斯人也順治十六年世祖章皇帝念佐命勳臣詔晉費英東世爵爲三等公康熙九年聖祖仁皇帝御製碑文勒石紀勳雍正九年世宗憲皇帝加封號曰信勇乾隆四十三年上追念費英東忠勳晉世爵爲一等公

額亦都

額亦都姓鈕祜祿氏世居長白山後歸太祖高皇帝隸滿洲鑲黃旗幼時父母爲人所害額亦都以鄰人匿之得免年十三手刃其仇避走嘉木瑚地依於其姑居數歲太祖過其地額亦都識爲眞主請事太祖白於姑姑止之不可遂從行歲癸未從太祖討尼堪外蘭於圖倫城先登攻色克濟城掩敵無備取之又別率兵攻舒勒克布占克其城額亦都驍果善戰挽弓十石能以少擊衆所向克捷太祖知其能日見信任丁亥年八月命督兵取巴爾達城至渾河河漲不能涉以繩聯軍士魚貫而渡夜薄其城率驍卒先登城中兵猝驚起拒跨堞而戰飛矢貫股著於堞揮刀斷矢戰益力被五十餘創不退卒拔其城而還太祖迎於郊燕勞之其所俘獲悉以賜遂賜號巴圖魯薩克察之入寇也額亦都率數人禦敵大敗之夜入其城進攻連克尼瑪蘭城及章嘉城索爾瑚寨功最師還上迎勞如初界藩有科什者以勇聞盜九馬遁額亦都單騎追斬之盡返所盜馬家穆瑚之貝勒揮巴顏謀叛附哈達命討之誅其父子五人以還癸巳年九月葉赫九國之師來侵太祖陳兵古埒山命額亦都以百騎挑戰敵悉衆來犯奮擊殪九人敵卻大兵繼之斬葉赫貝勒布齊九國之師皆潰遂乘勝略諾賽寨及兆嘉村會我軍有齊法罕者

戰歿額亦都直入敵陣以其尸還訥殷路者九國之一也其長收穩色克什既敗歸復聚七寨之衆據守佛多和山命同理事大臣噶益等以兵千人圍其寨三月下之斬收穩色克什上賜所乘馬以旌其勞丁未年五月同大臣費英東隨貝勒巴雅喇征東海渥集部有功庚戌年十一月命招撫窩集部之那木都祿綏芬寧古塔尼瑪察四路降其長康果哩等十九人師旋乘勝擊取雅攬路俘萬人而還辛亥年十二月同額駙何和哩等征渥集部之呼爾哈路克扎庫塔城天命二年同內大臣安費揚古攻明馬哈單花豹衝岔兒堡並克之四年明經略楊鎬率六總兵統兵二十餘萬分四路來侵大貝勒代善出禦明總兵杜松王宣趙夢麟兵於撫順過扎喀關議駐師僻地以竅太祖太宗文皇帝時爲四貝勒謂界藩山有築城夫役急往護之宜耀兵向敵以壯夫役士卒之膽不當駐僻地示弱衆議未決額亦都曰貝勒之言是也遂進師界藩會太祖大兵亦至指揮夾擊大破明兵於吉林崖及薩爾濟山明三總兵皆歿於陣還破明總兵馬林於尙閒崖劉綎於阿布達哩岡額亦都皆在事有功連歲太祖親征各部之不用命者若哈達輝發烏拉葉赫以次削平額亦都在行間輒爲軍前鋒用兵垂四十餘年未嘗挫衄每

克敵受賜輒分給將士之有功者不以自私太祖特優遇之當天命建元之初國人有私訴於額亦都者額亦都壇自聽斷太祖以大臣不應聽受私訴恐一人獨斷必至生亂因罪額亦都并著爲禁令然心知其忠誠寵顧不少衰初妻以宗女後尙和碩公主與費英東等同爲五大臣佐理國政累官至一等內大臣授爵一等子天命六年卒於官年六十大祖親哭之慟祭葬如禮太宗文皇帝天聰元年追封宏毅公配享太廟議功以其子遏必隆襲一等子世祖章皇帝復建碑墓道用表勳焉

扈爾漢

扈爾漢姓佟佳氏世居雅爾古寨後隸滿洲正白旗太祖高皇帝戊子年從其父扈喇虎率所屬來歸恩遇之賜姓覺羅尋授一等大臣居五大臣之列扈爾漢感上撫育恩誓以戎行效死每出戰輒爲前鋒瓦爾喀部斐悠城長策穆特黑者苦烏拉貝勒布占泰之虐請內附上命扈爾漢隨貝勒舒爾哈齊往徙之扈爾漢以兵三百護五百戶先行烏拉聞之遣萬人邀諸路扈爾漢結寨山巔分百人衛降者身率二百人與烏拉軍相持不下翌日敵悉衆來戰同揚古利擊卻之丁未年

從貝勒巴雅喇等征東海渥集部有功己酉年復率兵千人征渥集部所屬淖野路盡降其部落收二千戶而還太祖嘉之賞甲冑駟馬賜號達爾漢辛亥年同何和哩等征渥集部之虎爾哈路圍扎庫塔城三日攻克之癸丑年從征烏拉乘勢奪門遂克其城天命元年同安費揚古統兵二千征東海薩哈連部至兀爾簡河刳舟二百水陸並進收河南北三十六寨黑龍江北十一寨又招降使犬諾洛石拉忻諸部長四年明兵四道來侵扈爾漢從擊撫順開原二路大敗其衆明總兵劉綎復由寬奠口進董鄂扈爾漢先奉命率大兵千人伏山隘以扼其衝衆貝勒繼至引左右兩翼兵夾攻綎倉卒不及陣殲其兵五萬人綎戰死先是扈爾漢率兵往禦董鄂路遇明遊擊喬一琦擊敗之一琦奔孤拉庫崖朝鮮營自縊死明年上復征明扈爾漢從又擊敗明總兵賀世賢等軍於瀋陽歷加世職至三等總兵官六年十月卒年四十八太祖親臨哭之以其子準塔襲

佟養正 子佟圖賴

佟養正遼東人其先爲滿洲世居佟佳以地爲氏祖達爾哈齊以貿易寓居開原繼遷撫順遂家焉天命初佟養正有從弟佟養性輸誠太祖高皇帝於是大軍征

明克撫順佟養正遂挈家并族屬來歸隸漢軍六年從征遼陽以功授三等輕車都尉世職奉命駐守朝鮮界之鎮江城時城守中軍陳良策潛通明將毛文龍詐令諜者稱兵至各堡皆呼譟城中大驚良策乘亂據城叛佟養正被執不屈死之長子佟豐年并從者六十人俱被害詔以次子佟圖賴襲世職佟圖賴初名佟盛年後改今名天聰五年太宗文皇帝征明圍大凌河破監軍道張春援兵佟圖賴以從征有功晉二等輕車都尉崇德三年授兵部右參政五年隨睿親王多爾袞圍錦州取白官兒屯臺六年隨鄭親王濟爾哈朗復圍錦州取金塔口三臺七年攻松山城明人突出騎兵奪我紅衣礮佟圖賴擊敗之又敗山口步兵克塔山杏山諸臺遂下其城二論功晉一等輕車都尉始分漢軍爲八旗佟圖賴隸鑲黃旗授正藍旗都統是時軍士多奉命分略明邊地佟圖賴以爲不如深入明境直取燕京乃與都統李國翰等奏言天意歸於聖主大統攸屬明國人心搖動當因天時順人事攻拔燕京控扼山海則萬世鴻基由此而定上大兵不取關外四城何能卽克山海優旨開諭之八年隨鄭親王收前屯衛中後所二城加一雲騎尉世職順治元年調鑲白旗都統同都統巴哈納石廷柱招降山東四府七州三十

二縣七月下太原招降九府二十七州一百四十一縣師還賜白金四百兩尋隨豫親王多鐸剿流賊李自成屢破賊衆於黃河岸毀其柵獲戰艦十五遂平河南二年五月軍次江南敗明舟師於揚子江先後攻揚州及嘉興諸府皆下之晉爵二等男賜蟒服黃金三十兩白金千五百兩五年授定南將軍與都統劉之源率左翼漢軍駐寶慶時湖廣賊渠馬進忠等寇衡湘辰永間陷寶慶佟圖賴至擊破賊衆進拔其城六年鄭親王率師征湖廣佟圖賴分兵趨衡州所向皆捷陣斬偽總兵陶養用破偽伯胡一清等七營兵於城南乘勝疾擊連破賊兵於望公嶺山峪口一清窮竄集潰衆萬餘距廣西全州三十里立六營以自保又破之遂下全州還師駐衡州賊犯常寧遣佐領陳天謨等馳剿之戰於石鼓洞賊衆大敗斬其渠二人八年凱旋賜宴得優賞尋授禮部侍郎復調正藍旗都統疊奉恩詔晉秩至三等子世襲十三年八月引疾乞休世祖章皇帝篤念前勞命加太子太保以原官致仕十五年卒於家年五十有三上聞之輟朝震悼予祭葬如典禮贈少保兼太子太保諡勤襄康熙十六年聖祖仁皇帝以孝康皇太后推恩所生特贈佟圖賴一等公爵令其子佟國綱承襲並令改隸滿洲雍正元年追封佟養正一等

公諡曰忠烈詔祀昭忠祠與佟圖賴並加贈太師明年勅建佟圖賴專祠賜額曰功崇元祀

西喇布 子瑪喇希

西喇布世居完顏以地爲氏太祖高皇帝時率所部來歸常翼衛太祖列理事十大臣癸巳年富爾佳齊之役哈達西忒庫以兩矢射叔貝勒西喇布並奮身當之中創而沒卹贈二等輕車都尉後定八旗佐領俾其子噶祿瑪喇希隸滿洲鑲紅旗噶祿襲世職從征沙嶺有功加二等輕車都尉卒無嗣天聰九年太宗文皇帝命免功臣徭役瑪喇希以父功授佐領並襲其兄二等輕車都尉崇德二年隨都統葉克舒等征卦勒察有功明年七月任刑部理事官八月擢蒙古副都統又明年授都統尋隨睿親王多爾袞等圍錦州坐阿徇王貝勒等私遣官兵歸家離城遠駐論罪罰贖復隨貝勒阿爾泰等證明奪黃崖口入長城所至克捷七年部臣奏大軍擊明總督洪承疇時瑪喇希承勘護軍統領噶布喇敗走罪狀任其狡辨不能確審應請議罪上命免之順治元年四月隨睿親王多爾袞自山海關破流賊李自成復追擊至望都十二月與都統阿山征陝西自蒲州渡河擊斬賊衆紘

功加一等輕車都尉兼雲騎尉尋奉命移師往會豫親王多鐸南征二年五月自歸德渡河率衆奪泗北淮河橋明守泗總兵焚橋遁走大軍遂夜渡瑪喇希與都統宗室拜音圖以紅衣礮攻克武岡寨引兵而東擊敗明守將黃蜚等步兵數萬於常州下宜興進攻崑山途遇明水軍戰艦擊破之值都統恩格圖等列礮攻崑山縣城瑪喇希率所部兵趨頹堞先登遂拔崑山克常熟師旋晉三等男四年八月隨定遠大將軍肅親王豪格西征軍至漢中叛將賀珍遁走西鄉縣瑪喇希與都統鼇拜分兵馳擊躡及於楚湖斬獲甚衆敍功加二等男五年以失勘冒功妄爭之參領希爾根罪論罰贖得旨寬免會睿親王出獵瑪喇希坐與都統噶達渾等私行射獵鐫秩一等八年世祖章皇帝親政瑪喇希訟削秩冤詔復職贈其父西喇布兼一騎都尉兩遇恩詔晉三等子九年九月奉敕偕定南將軍護軍統領阿爾津平定廣東十月調鎮漢中十二月復調征湖廣辰常諸賊十一年以病卒賜祭葬越明年上復追念西喇布之效命於太祖也賜諡順壯視一品大臣例立碑墓道賜瑪喇希諡忠僖子瑪爾漢襲爵

覺羅拜山 子顧納岱 孫莫洛渾

覺羅拜山滿洲鑲黃旗人景祖翼皇帝第五弟寶郎阿之曾孫也天命六年從太祖高皇帝征明攻瀋陽斬其驍將號秃尾狼者明兵自城南悉衆來戰復斬一副將降其衆既克遼東授三等輕車都尉世職天聰元年從攻錦州不下環守之復移師往攻寧遠錦州兵潛出躡我軍後拜山與佐領巴希爭先還擊奮戰歿於陣太宗文皇帝親臨其喪酌酒哭之賜人戶牲畜贈三等男子顧納岱襲爵崇德三年從征明擊敗明兵於山海關追奔至豐潤又敗之時我軍有出取芻束者爲敵所乘顧納岱馳往奮擊援衆以歸至山東敗明內監馮永盛總兵侯應祿軍攻博平克之晉爵一等男世祖章皇帝順治元年四月顧納岱以護軍統領隨睿親王多爾袞入山海關擊流賊李自成兵十月復隨豫親王多鐸追流賊至陝州賊據山爲陣顧納岱與護軍統領圖賴率兵馳擊斬獲過半三年二月賊將劉元亮以兵千餘乘夜窺我營中有備出擊敗之於是鑲黃正藍白三旗兵協力進攻賊騎奔竄遂克潼關賊逼西安敍功加一雲騎尉三月隨豫親王徇河南乘勝渡淮四月至揚州與護軍統領伊爾都齊等軍於南城獲船二百餘明日合師薄城下七日拔之又敗明帥黃得功舟師於蕪湖貝勒博洛徇蘇州顧納岱破敵於江涇還

克崑山攻江陰大兵以紅衣礮擊破其城顧納岱先登移兵趨浙江敗明守將水陸兵於平湖收其戰艦進攻嘉興明兵悉衆出戰背城結陣顧納岱與都統恩格圖漢岱等合擊之三戰三捷七月旋師明年敘功晉三等子會蘇尼特部騰機思等叛奔喀爾喀顧納岱隨豫親王率兵往剿騰機思等遁走分遣蒙古追擊敗之於歐特克山復自土喇河西行擊敗喀爾喀兵於查濟布喇克尋以恩詔晉二等子世襲五年隨征南將軍譚泰討叛鎮金聲桓至九江大破逆將吳將軍進攻南昌中礮歿於陣卹贈一等子命其子莫洛渾襲莫洛渾歷官一等待衛順治十七年授參領從安南將軍達素討海寇鄭成功攻廈門力戰死康熙二年聖祖仁皇帝念拜山顧納岱皆陣亡莫洛渾又以戰歿嘉其世篤忠貞特贈莫洛渾爵三等伯立碑墓側諡剛勇無嗣從弟諾爾遜席特庫分襲世職

武理堪 子武拜

武理堪姓瓜爾佳氏世居義屯父伊蘭柱徙居哈達之費德哩太祖高皇帝未滅哈達時武理堪來歸歲癸巳葉赫貝勒布寨糾哈達烏喇輝發科爾沁席北卦爾察朱舍里訥殷諸路兵來侵武理堪奉命偵敵出東道百餘里將陟嶺羣鴉諫集

馬前若阻其行武理堪心異之自度與敵左馳歸以告復奉命出扎喀路薄暮至
渾河敵營河北方會食武理堪擒葉赫一卒訊之言敵衆三萬將乘夜渡沙濟嶺
而進遂攜以還報時夜方半傳諭諸將俟達旦出師我兵有謂敵兵衆者武理堪
宣言曰敵雖衆心不一誰能禦我及戰諸路敵兵果潰布寨爲我兵吳談所殺天
命四年明分兵四路來侵太祖親統師擊之敗其三路兵明經略楊鎬總兵李
如柏引兵還瀋陽武理堪率二十騎至呼蘭山見敵軍行山麓乃於山巔駐馬大
呼弓手四顧爲指麾伏兵狀敵望見驚潰武理堪遂縱騎疾馳擊之斬四十人獲
馬五十敵相蹂躪死者千餘初定滿洲旗制武理堪隸正白旗分轄人戶爲佐領
每有征伐任前鋒統領既卒太祖追念曰武理堪從朕摧鋒陷陣幾死者數矣以
其長子武拜襲管佐領事武拜年十六卽隨大軍略明撫順所遇敵輒奮戰矢中
額不顧嘗從太祖出獵有熊突圍上峻嶺太祖遠見一人躍馬射熊貫胸而墮諭
侍臣雅蓀曰是非武拜不能遣視之果然復諭諸皇子曰武拜之勇今共見之矣
遂授侍衛天命四年從征葉赫負重創力戰不退師還賜良馬是時明總兵毛文
龍誘我新附之衆往歸皮島武拜循徼三日擒八十餘人其來誘者乘騎遁追及

射殫之還奏卽以所獲賜之管轄六年從征明破敵於南壽山授騎都尉世職遼城旣下諸將分隸所俘有差太祖以武拜能繼父志年少建功命視一等大臣例隸千人十一年蒙古巴林部貝勒囊努兔背盟劫掠武拜隨大軍征之我謀者爲敵困援之出殲敵百人太宗文皇帝初卽位擢列十六大臣佐理鑲白旗事命追捕叛逃蒙古至都爾弼有十五人拒戰武拜旣被創仍奮擊盡殲之太宗諭諸大臣曰是固先帝數嘉許者特予優賚天聰四年大軍取明永平灤州武拜隨貝勒阿敏守永平聞明兵圍灤州率護軍馳援乘夜破明步兵營會阿敏棄永平武拜隨歸逮繫論罪以其曾夜入敵營破敵命釋其縛尋授前鋒參領五年從征明圍大凌河城同參領蘇達喇赴錦州偵敵有斬獲六年從征察哈爾率精銳先驅遇叛逃蒙古五人斬首以獻察哈爾林丹汗攜其丁壯牲畜渡黃河西奔土默特部大軍還克歸化城武拜奉命撫輯降戶八年征明大同額駙多爾濟將中軍前鋒統領圖魯什將左軍武拜將右軍明總兵曹文詔迎戰敗之復同參領席特庫薩海設伏宣府擒明守備殲其游騎尋與承致阿什達爾漢等招察哈爾汗之子額哲及其大臣來歸九年五月明屯兵大凌河西武拜與都統阿山石廷柱圖賴邀

截其歸路陣斬副將劉應選殲步騎五百餘擒遊擊曹得功及守備三人攻克松
山城南臺堡師還復設伏敗敵兵敘功晉三等輕車都尉世職是時上遣諸貝勒
征明朔州代州忻州命武拜率兵駐上都城舊址偵軍事會軍中遣使奏捷遂與
俱歸崇德元年同前鋒統領勞薩等齎書至喜峯山潘家口諭明守邊將吏斬其
邏卒二十三人擒二人獲馬十是年冬上親征朝鮮命同承政馬福塔等率兵三
百先行襲其國都尋敗拒戰兵國王李倧潛遁南漢山城大軍進圍之武拜與勞
薩殲敵援兵二百餘二年授前鋒統領列議政大臣時參領丹岱阿爾津等往土
默特貿易將還遣武拜率將校赴歸化城護之遇明哨卒十六人斬十五人獲馬
十九擒一人以還三年四月略明寧遠逐敵墮壕塹斬殪甚衆八月率兵八十人
至洪山口遇明兵斬其裨將二擊走羅文峪騎兵五百奪其羸獲馬四十又殲密
雲步兵百餘五年與勞薩率兵過中後所略海濱斬級二百獲馬騾牲畜旋受上
方略策應圍錦州大軍駐要隘屢擊敗敵兵明年春以大軍攻圍錦州弗力論統
帥王貝勒及諸將罪武拜坐罰鍰秋上親征松山明兵敗遁武拜未截擊命拘繫
旋釋之七年隨貝勒阿巴泰入明邊敗敵於豐潤三河靜海及通州八年隨鄭親

王濟爾哈朗取明中後所前屯衛是年十一月改任正白旗副都統世祖章皇帝順治元年隨睿親王多爾袞入山海關擊敗流賊李自成追至望都逾年解副都統任列內大臣三年蘇尼特部長騰機思叛武拜隨豫親王多鐸征之斬獲無算四年同輔國公鞏阿岱內大臣何洛會率兵駐防宣府先是兩敍軍功晉一等輕車都尉至是論征騰機思功晉爵一等子屢遇恩詔晉二等伯八年同內大臣羅什博爾輝等舉發英親王阿濟格謀干政事優敍三等侯未幾羅什博爾輝以詔媚諸王造言搆讐伏誅武拜坐附和削職籍沒十五年世祖念武拜戰陣功命復一等子爵世襲罔替康熙四年四月卒年七十賜祭葬如例謚曰果壯子郎坦襲爵別有傳

偉齊 子穆里瑪

偉齊滿洲鑲黃旗人姓瓜爾佳氏費英東第九弟也天命十年太祖高皇帝命同侍衛博爾晉等率兵二千往征虎爾哈收獲五百戶凱旋上郊勞賜宴並念其父索爾和歸附功授騎都尉世職會蒙古逃亡十戶偉齊追之盡俘以歸天聰三年從太宗文皇帝征明畧地至遵化三擒哨卒明兵犯我師偉齊遮擊數逐北論功

晉三等輕車都尉上統大軍出征嘗令偉齊留守盛京任八門提督九年命免功臣徭役偉齊與焉並增給佐領人戶使之專轄尋卒以第六子穆里瑪襲職世祖章皇帝以偉齊歷事兩朝忠誠素著賜諡端勤視一等大臣例立碑墓道擢穆里瑪一等侍衛順治四年授參領屢遇恩詔晉一等輕車都尉又一雲騎尉予世襲五年隨征江西叛鎮金聲桓師至童子渡賊將列陣以拒穆里瑪與參領喀爾塔喇等擊敗之復率兵渡河衝擊敗賊衆二千至饒州下其城移師前進賊集兵騎二萬追襲同參領巴都還擊賊兵卻走我軍攻南昌掘壕圍守聲桓與其僞帥王得仁悉衆拒戰穆里瑪以本旗兵奮勇撲剿連敗賊衆十七年六月擢工部尙書八月授都統康熙二年四川賊李來亨等竄伏湖廣鄖襄山中聚寇劫掠穆里瑪奉聖祖仁皇帝命爲靖西將軍與都統圖海率禁旅會楚蜀之師討之時來亨擁衆據茅麓山穆里瑪督兵攻圍九戰皆捷賊復夜襲總督李國英提督鄭蛟麟等營穆里瑪分遣諸將先後援剿追斬甚衆來亨勢蹙自焚死招撫僞王侯及僞總督等官論功超晉一等男世爵內大臣公鼈拜穆里瑪兄也輔政攬權穆里瑪及大學士班布爾善等私相黨附凡朝政皆就鼈拜家取進止八年鼈拜伏誅穆里

瑪坐黨惡營私削爵與班布爾善等並棄市六十年上念偉齊功復以穆里瑪之曾孫察克慎襲騎都尉世職

額爾德尼

額爾德尼世居都英額姓納喇氏太祖高皇帝時來歸隸滿洲正黃旗賜號巴克什每從上征討蒙古諸部能因其土俗語言文字傳宣詔令招納降附著有勞績天命三年上親征明取撫順師還明總兵張承蔭自廣寧糾衆追躡額爾德尼同諸將還擊敗其衆斬承蔭授男爵初己亥年二月額爾德尼奉命同理事大臣噶蓋創立國書噶蓋奏曰蒙古字傳習已久難以更製上曰我國之語必譯蒙古爲語讀之則未習蒙古語者不能知也奈何以我國語製字爲難反以習他國語爲易耶額爾德尼奏曰更製之法臣等未能明故難上曰無難也以蒙古字合我國語音聯綴成句即可因文見義矣會噶蓋以事伏法額爾德尼遵上指授獨任擬製奏上裁定頒行國書傳布自此始額爾德尼既卒太宗文皇帝復命儒臣達海庫爾禪等述其義益之天聰七年諭文館諸臣曰額爾德尼遵太祖指授創造國書乃一代傑出之人今也則亡世祖章皇帝順治十一年追諡文成子薩哈

連官至鑾儀衛冠軍使改入大學士希福族中賜姓赫舍里

達海

達海滿洲正藍旗人世居覺爾察以地爲氏祖博洛於國初歸附父艾密禪官至散秩大臣達海其第三子也九歲讀書能通滿漢文義弱冠太祖高皇帝召直文館凡國家與明及蒙古朝鮮詞命悉出其手有詔旨應兼漢文音者亦承命傳宣悉當上意旋奉命譯明會典及素書三略天聰三年十月太宗文皇帝親統大兵征明十二月破滿桂等四總兵軍上不欲究武遣達海齎書與明議和明人閉關不啟踰日復齎議和書二通一置德勝門外一置安定門外旋回軍由遵化略地而歸四年正月從大兵征明至沙河驛以漢語諭降其衆至永平乘夜攻其城克之上命達海執黃旗登城諭官軍百姓薙髮來降城中望見車駕環跪呼萬歲時貝勒阿巴泰等率明投誠副將孟喬芳楊文魁遊擊楊聲遠自永平入見達海承旨慰勞之先是三屯營漢兒莊俱已歸順旣而明兵襲三屯營上慮漢兒莊降人復叛令達海與啟心郎穆成格副將石廷柱等率兵往偵仍以漢語諭之遂撫定漢兒莊四月貝勒大臣等將自永平凱旋上命從容謁見所行事宜卽令乘便奏

聞達海傳諭還奏悉稱旨是年繙譯書成授三等輕車都尉五年七月賜號巴克什九月從征大凌河既破明兵擒監軍道張春等文武三十三人達海宣上恩德諭之使降十月復偕石廷柱招降明總兵祖大壽先遣陣獲參將姜新入城既而新偕大凌河遊擊韓棟至傳大壽意曰乞使石副將過壕將布心腹於麾下達海曰未奉上命不敢令往棟因送大壽子爲質乃使廷柱往與大壽語越日遂降十一月上宴歸降各官達海傳諭慰勞如初十二月議定朝賀禮儀明年三月詳定國書字體初太祖指授文臣額爾德尼及噶蓋創立國書形聲規模本體略具達海繼之增爲十二字頭至是上諭達海曰國書十二字頭向無圈點上下字雷同無別幼學習之遇書中尋常語言視其文義猶易通曉若人名地名必致錯誤爾可酌加圈點以分析之則音義明曉於字學更有裨益矣達海遵旨尋譯酌加圈點又以國書與漢字對音未全者於十二字頭正字之外增添外字猶有不能盡協者則以兩字連寫切成其切音較漢字更爲精當由是國書之用益備是年六月卒疾亟時上召侍臣垂淚諭曰朕以達海偶爾疾病猶冀其全愈今聞病篤深軫朕懷其及身未曾寵任當優卹其子爾等以朕言告之賜蟒緞令侍臣齋往達

海聞命感愴垂淚已不能言矣時方譯通鑑六韜孟子三國志大乘經未竣而卒
七年二月詔以其長子雅秦降一等襲職授騎都尉仍管佐領文臣例無世職蓋
異數也十年二月上以達海通漢書習典故爲國宣力注念不忘復召見其子三
人賜饌幣并諭其次子辰德勤習漢書賜達海諡曰文成康熙八年五月聖祖仁
皇帝詔賜立碑長子雅秦第三子喇捫以前鋒統領從征逆藩吳三桂與賊戰衡
州沒於陣贈雲騎尉第四子常額當雅秦卒後特授學士雅秦子禪布康熙八年
任祕書院學士爲達海請賜立碑得旨達海巴克什通滿漢文字於滿書加添圈
點令其分明又照漢字增造字樣於今賴之念其效力年久著有勤勞著仍追立
石碑

希福

希福姓赫舍里氏曾祖穆瑚祿祖特赫訥父瑚什穆巴顏世居都英額再遷哈達
太祖高皇帝旣滅哈達希福從其兄碩色率所屬來歸以通滿漢蒙古文字召直
文館屢奉使諸蒙古部賜號巴克什文字之任一以委之後隸滿洲正黃旗天聰
二年九月太宗文皇帝親征察哈爾令往徵科爾沁兵還土謝圖額駙奧巴止之

曰寇騎塞路行將安之卽有罪譴誰執其咎答曰君命安得辭死則死耳事不可誤也遂行再宿達大營復命曰科爾沁兵不赴調土謝圖額駙奧巴已率兵他往侵掠掠畢然後來會上怒復遣壯士八人隨之往促其速赴調行四晝夜至小屯遇敵擊殺三十餘人卒達科爾沁所以其兵來會明年奧巴至上命希福與館臣庫爾禪等責讓之奧巴服罪獻駝馬以謝敍功授騎都尉世職復以從征燕京敗明兵於北門外大凌河之役同都統譚泰等爭先奮擊錦州援兵師還敵兵襲我後又擊敗之晉三等輕車都尉崇德元年改文館爲內三院希福爲國史院承政尋授弘文院大學士晉二等輕車都尉四年請定察治譌言惑衆之例三年與大學士范文程請更定部院官階之制詔並可其奏希福雖居內院筦機務猶閒奉使察哈爾喀爾喀科爾沁諸部編戶口設佐領頒法律於蒙古平其獄訟或往來軍營宣示機宜覈功賞相度形勢諭上德意於諸降人還奏未嘗不稱旨也順治元年繙譯遼金元三史奏進世祖章皇帝展閱再四賞賚有加時都統譚泰附睿親王多爾袞希福素譏譚泰衰庸又以所得分撥第宅二區相隔甚遠囑譚泰更易之譚泰不允希福使人謂之曰爾爲都統卽爲我更撥一屋有何不可而不能

爾誠衰邁矣譚泰銜之會譚泰弟副都統譚布詣希福希福曰日者大學士范文程以堂餐華侈語我我對曰吾儕儒臣也非六部大臣及功勳大臣比安得盛饌若此遂偕往啟王王以予言爲然且自咎曰吾過矣譚布退以告譚泰譚泰訐之法司希福坐僞傳王言詆謾大臣欲搆釁亂政應論死讞成啟王王令免死革職罷任尋籍其家八年二月上親政雪其冤復職給產仍授弘文院大學士九年正月充纂修太宗實錄總裁官二月充會試主考官遇恩詔晉三等男又奉特旨以希福爲太祖太宗任使銜命馳驅能盡心力嘉其功晉一等男又遇恩詔加一雲騎尉復以定鼎燕京時希福方罷任未獲加授世職至是特晉爲三等子世襲十月授議政大臣十一月病卒年六十四贈太保諡文簡長子奇塔特襲爵

康果禮

康果禮先世居那木都魯以地爲氏歲庚戌太祖高皇帝命巴圖魯額亦都率兵千人征東海渥集部招降那木都魯寧古塔尼馬察諸路屯長昂古明安圖巴顏烏祿喀僧格尼喀哩泰松阿等時康果禮爲綏芬屯長與其地喀克都里哈哈納綽和納伊勒占蘇爾休率兵壯千餘來歸賜金幣宴勞授康果禮喀克都里三等

子哈哈納三等男綽和納三等輕車都尉伊勒占蘇爾休騎都尉分轄其衆爲世管佐領六隸滿洲正白旗旋以貝勒穆爾哈齊女妻康果禮封和碩額駙天命三年大兵征明取撫順克撫安三分等十一堡進鴉鵲關破清河城康果禮並在事有功六年從大兵征明瀋陽樹雲梯先登遂克其城太宗文皇帝初卽位以康果禮列十六大臣佐理正白旗事尋擢護軍統領天聰元年隨大貝勒阿敏征朝鮮凱旋分賜所俘獲三年從上征明入洪山口克遵化城薄燕京上親統大軍駐德勝門外明寧遠巡撫袁崇煥錦州總兵祖大壽率兵二萬赴援屯於城東南上命康果禮隨諸貝勒擊之諸貝勒擊敗敵兵俱追至城壕康果禮與參領郎球漢岱等未至城壕而返並論罪削爵罰鍰奪俘獲五年卒

佟養性 孫國瑞

佟養性遼東人先世爲滿洲居佟佳以地爲氏因業商遷撫順天命初見太祖高皇帝功德日盛傾心輸款爲曠所覺置之獄潛出來歸賜尙宗室女號曰西屋裏額駙授三等男六年從克遼陽晉二等子天聰五年正月太宗文皇帝命督造紅衣礮初軍營未備火器至是礮成鐫曰天祐助威大將軍征行則載以從養性掌

焉時漢軍未分旗敕養性總理官民俱受節制額駙李永芳及明副將石廷柱鮑承先等先後來降者與佟氏族入皆爲所屬上以漢官漸多慮養性無以服衆志特諭養性曰凡漢人事務付爾總理各官分別賢否以聞爾亦當殫厥忠忱簡善絀惡恤兵撫民竭力供職勿私庇親戚故舊陵轢疏遠仇讐致負朕委任之意昔廉頗藺相如一將一相以爭班位幾成嫌釁宰相如重視國事不念私讐是以令名垂於千祀願爾之效之也又諭諸漢官曰爾衆官如能恪遵約束非敬謹養性是重國體而欽法令也八月從上征明大軍圍明總兵祖大壽於大凌河養性遵上方略率漢軍載紅衣礮立營錦州通衢擊賊城西隅臺降守臺兵又擊賊城南隅壞樓堞翌日擊東一臺臺圯守者宵遁盡殲之九月關內兵援錦州上遣親軍擊敵養性率漢軍五百從敵望風遁明監軍道張春與總兵吳襄等赴援大凌河乘夜向城上督騎兵破之方追奔明潰卒復陣養性承旨屯敵營東舉礮攻燬敵營十月攻克子章臺礮擊臺堞臺內兵死者無算十一月祖大壽以大凌河城降上命城中所得槍礮鉛藥悉付養性尋率兵攻克馬家湖臺自大凌河至廣寧明所置臺墩悉毀之六年正月上幸演武場閱兵養性率所轄漢軍試礮擐甲列陣

上嘉其軍容整肅且以出兵大凌河時能遵方略有克敵功賜雕翎良馬一白金百兩設宴勞之四月上親征察哈爾命隨貝勒阿巴泰等留守瀋陽七月奉敕宣諭大凌河投誠各官察哈爾之役上命參領顏布祿佐領董山移哈爾占所貯糧於烏蘭哈達顏布祿調遣失人遲久不至下廷臣會議罪當死有旨覆勘諭曰儻有可矜則釋之衆皆言法當不宥修養性奏曰顏布祿等不知留賢員協助而用不更事之人誤也罪固應死或懲責而曲貸之實惟聖恩前鋒參領圖魯什亦以懲之而全其生爲請上允二人議顏布祿等遂從末減未幾養性卒於官詔以其子普漢襲爵普漢卒弟六十襲崇德七年隸漢軍正藍旗順治初六十屢遇恩詔晉三等伯仕至本旗都統十三年世祖章皇帝追錄舊勳賜修養性諡曰勤惠六十卒子國瑤襲

阿什達爾漢

阿什達爾漢姓納喇氏葉赫貝勒金台石同族兄弟之子太宗文皇帝諸舅也太祖高皇帝初年滅葉赫阿什達爾漢率屬來歸授佐領隸滿洲正白旗天命六年二月從征明攻奉集堡圍其城時八旗並進諸將無出其先者三月攻遼陽城先

登克之論功授一等輕車都尉賜敕免死一次太宗嗣位以阿什達爾漢典外藩蒙古事嘗奉使朝鮮並齎敕諭歸附諸蒙古部落天聰六年明遣使議和上命阿什達爾漢與文臣白格龍什等往報之既盟而歸白格以阿什達爾漢與龍什等私取明餽遺事奏聞詔追奪其所取財物七年六月隨貝勒濟爾哈朗薩哈璘翰獄蒙古部齎敕諭二十道遺失其九所司奏劾論罰如律十一月宣布欽定律令於諸蒙古部落八年五月奉命徵兵科爾沁會大兵於宣府左衛時上親征察哈爾其汗林丹遁走海上殂於道所部潰散其屬額爾德尼囊蘇等率衆來降上命阿什達爾漢與前鋒統領武拜等及額爾德尼囊蘇往偵察哈爾汗子額哲九月攜其台吉塞冷等還復命奏曰察哈爾大臣若祁他特等率千人而來者踵相接也旋奉命至春科爾大會蒙古諸部分畫牧地使各守封疆復與諸貝勒訊獄斷罪十一月還報稱旨令專轄一佐領事九年二月隨貝勒多爾袞等率兵萬人往收察哈爾汗子額哲四月師抵托里圖貝勒等遵上所授方略遣阿什達爾漢偕其族孫護軍統領南褚先詣額哲母營見之額哲之母南褚女兄阿什達爾漢族孫女也既見諭之降額哲遂從其母舉部來降當我軍未至時有鄂爾多斯濟農

圖巴者來招額哲與盟而去阿什達爾漢察其有異志追及圖巴羈留之遂破其謀令悉還察哈爾之貨賄遺於鄂爾多斯者又領兵略明宣大界至山西多俘獲凱旋上親迎勞之崇德元年六月授都察院承政上御崇政殿侍臣巴圖魯詹額爾克戴青後至阿什達爾漢與承政多爾濟達爾漢面責之曰汝扈從臣何擅離職守而後至乎叱出之十月偕文臣希福往察哈爾喀爾喀科爾沁部明刑申禁宣諭而還十二月從征朝鮮其國王李倬遁走南漢山豫親王多鐸率師追之圍其城朝鮮巡撫合兵萬八千來援分樹二柵悉衆出戰阿什達爾漢同貝子碩託帥驍銳競進大破其軍其副將以兵五千營山麓遙爲聲援別遣兵百人沿河而下阿什達爾漢馳擊殲之復攻拔其營餘衆皆潰明年正月李倬降七月論功晉三等男世襲會遣大臣往科爾沁巴林扎魯特喀喇沁土默特等部頒赦詔并會諸外藩清理刑獄阿什達爾漢爲正使三年五月部議阿什達爾漢前往科爾沁察審諸事徇庇失實且濫收諸藩貝勒財賄應削職得旨寬貰解部任追奪財物入官七月復任都察院承政五年與參政祖可法等疏奏時事略曰皇上欲恢張治道深思篤行之今諸國景附朝廷清明而諸王以下至都統彼此觀望顧念身

家莫肯精白一心爲國陳奏不知果無可言耶抑有所畏忌而不敢言耶夫刑法者所以防民之奸也軌於法則麗於刑此不可宥也今刑部斷獄不依本律或從重論輒削其職臣思諸臣經戰陣出死力恩授一官一旦有過豈可不論重輕而遽革之乎臣等竊思先時簡選議事十人此時皆不稱職宜罷斥又例職官陣亡者子孫襲兵士陣亡者妻受賞今未盡行惟聖主裁察疏入上嘉納之六年大兵攻明錦州明總督洪承疇率師來援陳師松山上親統大軍擊之明師宵遁分布諸將以追我偏將伊拜等駐兵杏山阿什達爾漢按其營壘及斬獲多寡之數敵衆旣潰上合衆圍松山明總兵曹變蛟營於乳峯山堅壁不敢戰乘夜棄山寨率步騎直犯中軍入御營時右翼大臣侍衛等俱未歸部伍軍中大驚將士以死禦之始退上以阿什達爾漢爲故舊大臣受心膂寄常隨侍左右是夜反安處帳中不至御前防護遂歸本旗七年論松山失律諸臣罪罷承政任降世職爲騎都尉尋以疾卒年六十三子三席達禮次阿爾賓席達禮襲世職

達爾漢

達爾漢姓郭絡羅氏初隸滿洲鑲黃旗後改隸正藍旗父揚舒爲沾河寨長太祖

高皇帝時率所部來歸尙長公主爲額駙從征尼堪外蘭攻薩爾濟城以計擒其長納米納而誅之嗣從征屢有功及卒太祖親臨其喪達爾漢爲長公主所出初任佐領尙和碩公主爲額駙從征葉赫誅其貝勒錦台什積功授一等男太宗文皇帝卽位擢列八大臣任鑲黃旗都統隨大貝勒代善征扎魯特部單騎追擒其台吉以歸復征棟揆俘古穆楚赫爾杜喀爾岱青多爾濟三塔布囊父子晉爵三等子天聰元年隨大軍征朝鮮克義州定州安州斬其府尹李莞等朝鮮國王李倬請議和達爾漢與都統納穆泰等莅盟師旋上賜宴勞之復從上征明攻錦州有功先是貝勒阿巴泰因賜宴時不得與大貝勒並列使達爾漢以恥與子弟列坐意代奏上諭達爾漢曰爾宜勸諭之奏朕何爲者至是察哈爾使臣昂坤等來歸設宴阿巴泰復使納穆泰申奏上以達爾漢有啟導貝勒之責前此不能勸諭而以其言入奏命解都統任尋復之三年從攻遵化率鑲黃旗兵攻北面之西克其城四年敖漢奈曼諸蒙古兵從征明攻昌黎不克詔遣達爾漢與都統喀克篤禮等率兵千人馳赴應援達爾漢進攻又不克會永平灤州皆有詔班師遂焚其近城廬舍而還五年三月上諭八大臣指陳政事闕失達爾漢奏曰臣以微賤

之軀拔至大臣之列如國家果有過舉豈敢不言既無闕失指諫何從至於小民懷怨實有自來豈有政治和平而致怨者臣請自今洗心正己矢公審斷以協羣情凡有所見盡心直告以圖報稱而已七月從攻大凌河城率本旗兵圍北面之東深溝築壘與都統楞額禮等環城固守八月明人以步騎五百出戰達爾漢率八十人擊敗之越日敵復出兵誘戰又率本旗兵邀擊明兵墮壕死者百餘人六年從上親征察哈爾軍次哈納崖達爾漢從者蒙古二人於軍中盜良馬六潛奔察哈爾告以大軍至林丹汗舉部西奔驅歸化城富戶及牲畜盡渡黃河而去達爾漢坐家人漏洩軍情降爵一等男七年明登州參將孔有德以所部及戰艦來降達爾漢與都統篇古駐兵江岸守其船八年復從征察哈爾遂入明上方堡毀其邊牆進略朔州分兵直抵宣府右衛是歲命免功臣徭役達爾漢與焉並增給佐領下人戶九年上遣諸貝勒統師征明山西命達爾漢同都統阿山等營於要地制明寧錦兵使不得西援途遇敵兵八百共擊敗之斬錦州副將劉應選凱還得賞所俘獲崇德元年五月都統篇古拜音圖譚泰葉臣阿山石廷柱奏劾都統伊爾登讒謗諸王及大臣下法司勘訊達爾漢助伊爾登訴辨以證辭先後互異

坐罰鍰是月武英郡王阿濟格征明攻順義縣達爾漢率本旗兵先登敍功晉爵一等子尋以克順義府城不謀固守致敵復攻陷且縱兵離伍爲敵所殺坐罰鍰奪所俘獲十二月隨征朝鮮明年部議朝鮮王李侗謁上時達爾漢亂班釋甲又於上前言不飲酒出輒私飲並論其失察徇情諸罪應罰鍰追奪賞賜得旨罰鍰以懲六年隨鄭親王濟爾哈朗等征錦州師還部議達爾漢於王召議禦敵時不卽至及護軍統領鼇拜擊敗明步兵達爾漢妄謂敵兵爲豫親王多鐸所敗且嗾副都統翁阿岱等與諸護軍爭功坐革世職並罷都統任順治元年卒年五十有五

伊勒慎

伊勒慎姓費莫氏世居薩齊庫烏喇攻薩齊庫降其衆伊勒慎遂率所屬六部來歸後隸滿洲鑲黃旗兄曰古蘇太宗高皇帝戊申年征烏喇命古蘇招降斐悠城策穆特諸部烏喇惡之盡俘殺古蘇妻子太祖念其家以歸誠被害授伊勒慎騎都尉世職尋從征明有功加三等輕車都尉又以沙嶺戰功加二等輕車都尉天聰五年七月奉命統兵鎮海州時明邊將窺伺瀋陽屢縱士卒入遼河採捕伊勒

慎既之鎮密爲防禦嚴偵緝設遊哨率所部駕輕舟追斬逋逃先後收獲人戶及舟艦器械無算七年九月敘功並以從征旅順口多斬馘加一等輕車都尉崇德元年四月晉三等男九月明將造巨艦百餘橫截遼河爲戰禦計伊勒慎與各守將烈渾寨薩等沿河分立營寨別遣兵遷移近邊居民仍率將士設伏河口執其謀者以獻明兵望風引遁由此不敢犯四年十一月同刑部承政索海等征瓦爾喀部陣獲噶凌阿及餘黨二百餘人旣而伊勒慎監守俘囚疎防脫逃烏喇博穆博果爾復糾衆來攻伊勒慎先衆敗走索海等擊破賊衆伊勒慎又不於汛地邀擊坐視博穆博果爾及餘衆遁去論罪應死詔革職鞭百籍其家六年十二月鑲紅旗大臣哈哈納劾伊勒慎防守海口時託言祭天則多方苛斂兵丁財物及私造浮圖諸劣蹟勘實復論死仍奉旨鞭百八年六月復鎮海州順治元年八月命爲牛莊城守官二年卒年七十有九子朗圖隨征薩哈連烏喇陣亡卹贈騎都尉世職

圖賚

圖賚姓瓜爾佳氏費英東第七子也先隸鑲黃旗後與兄納蓋弟蘇完顏改撥正

黃旗天聰初隨征董夔追擊察哈爾及攻明寧遠所至有功三年從太宗文皇帝伐明進兵燕京其大同總兵滿桂以師赴援圖賚直前衝擊斬殺甚衆授騎都尉世職四年隨大貝勒阿敏等鎮守永平明監軍道張春等圍灤州圖賚與副都統阿山等率護軍自永平馳至乘夜擊敗之師還大貝勒阿敏棄永平出邊明將率步卒百人以追擊圖賚率十六人還戰盡殲其衆尋授三等輕車都尉五年八月從征大凌河圍其城太宗指授方略令與護軍統領南褚立兩旗之間遇逐我樵採者邀擊之及明兵誘戰圖賚先馳入陣諸軍各進戰圖賚被創上以其違命輕進切責之九月明發兵四萬餘來戰圖賚統右翼兵躍馬衝陣敵兵潰走遂擒張春旋征大同拔靈邱縣及小石城敍功晉二等六年大軍破走察哈爾遂移師征明次於布里渡圖賚奉命同參領蘇喇達齎敕諭明沙河堡守將明人遣官齎牛酒幣帛以獻七年隨貝勒岳託等攻取旅順口統兵守旅順口係漢軍遊擊佟圖賴明年從攻朔州以越界出略又不至期會地盡奪所獲物入官九年任護軍統領隨貝勒多鐸入廣寧同都統阿山等率兵四百先趨錦州明總兵祖大壽遣其將合松山兵三千餘人來禦未及戰明兵驚潰我兵分路剿擊俘獲無算軍還敍

功得優賞崇德二年授爲議政大臣明年復隨貝勒岳託征明率師先驅踰牆子嶺攻克十一臺進兵山東明將合步騎八千餘來禦正紅旗隨營蒙古阿藍泰旁卻圖賚方營部馳擊敵以百騎突至圖賚搏戰陷堅大敗之旋與都統譚泰敗明閣部劉宇亮等兵於通州河上攻拔二城又分兵略地取二城累功晉爵三等男六年圍錦州明兵自杏山赴援擊敗之先是蒙古有降明者曰諾木齊在圍中遣人約獻東關以降至是明兵覺圍諾木齊家圖賚登城力戰殺敵出諾木齊以歸復破松山騎兵指揮漢軍拔塔山杏山二城晉一等男部議錦州之役諸貝勒所屬三旗護軍有退怯不戰者貝勒大臣未經察治圖賚坐附和徇隱論罪罰贖得旨寬免八年攻拔中後所及前屯衛晉三等子順治元年大軍至山海關流賊李自成遣兵拒戰圖賚率前鋒軍破賊將唐通於一片石旣入關破自成兵復會大軍追敗之於望都縣超授三等公是年十月豫親王多鐸帥師下河南自成走陝西圖賚主孟津率精兵先渡河明守將黃士欣等各遁去瀕河十五寨堡兵民望風歸附睢州總兵許定國等率衆來降進薄潼關賊遣僞侯劉宗閔沿山列陣以拒圖賚以騎兵百四十人進戰一以當百設伏掩擊盡殪之明年賊將劉方亮整

兵千餘來窺我營圖賚與護軍統領阿濟格尼堪等率正黃鑲白正紅鑲紅鑲藍五旗將領迎擊賊懼而奔俘獲甚衆自成聞敗集兵拒敵圖賚復合鑲黃正藍正白三旗兵力戰殲其步卒餘騎奔竄賊糾衆又至連戰敗之遂破潼關賊衆大潰遁走陝西既定移兵收江南攻克揚州獲明閣部史可法斬之追福王朱由崧於蕪湖據江口截擊靖南伯黃得功兵敗之得功中流矢死遂獲由崧餘衆悉降師旋進爵一等公圖賚嘗謂睿親王多爾袞曰圖賚自誓於天効忠主上不避諸王貝勒大臣嫌怨久矣圖賚有過王若不言將恐不免於罪戾我欲改過自新王幸毋姑息不我教誡也會睿親王於午門集議譚泰擅隱諭旨罪三日議未定圖賚面詰之曰何爲遲久不結耶聲色俱厲王怒曰爾曩追流賊至望都分兵前進諸將爭先爾於肅豫諸王前諂讓且唾逞威自恣今又以言詞逼我我固不能堪此怒色疾聲也遂去諸王執圖賚將罪之王曰雖然此非退有後言比且爲國效勤矢忠無他咎也解其縛而釋之三年任本旗滿洲都統隨端重親王博洛進師浙閩軍次杭州時明魯王朱以海據紹興其總兵方國安等營於錢塘江東岸艤舟以拒圖賚率諸將士從上流浮渡江廣十餘里人馬無溺者分兵縱擊之國安驚

以爲神盡棄戰艦攜魯王遁保台州圖賚奮力追剿拔金華衢州各城會端重親王令與都統漢岱分兵進師福建圖賚自衢州統所部兵擊敗明閣部黃鳴駿於仙霞關攻克浦城漢岱亦自廣信破分水關入崇安明唐王朱聿鍵遁走汀州諸將乘勝追擊擒斬聿鍵等五人及其總兵等官盡降其衆閩海悉平回次金華病卒年四十七子輝塞襲爵圖賚既卒之後二年貝子吞齊等誣告圖賚黨徇肅親王鄭親王又與譚泰等私相盟誓睿親王追論之奪輝塞爵並沒其家世祖章皇帝親政知圖賚無辜且念舊功追諡昭勳配享太廟賜文勒石復輝塞一等公還其資產雍正九年加號曰雄勇

阿山

阿山姓伊爾根覺羅氏世居穆溪太祖高皇帝時阿山與其弟阿達海濟爾垓噶賴從父阿爾塔什率七村戶口來歸隸滿洲正藍旗太祖以宗室女妻阿爾塔什爲額駙而以阿山與阿達海等令大貝勒代善轄之阿山以大貝勒置之間散缺望有異志與諸弟及其子塞赫等逃之明太祖命收其孥遣兵往追斃其二子阿山至明界明臺軍戮其從人於是阿山惶懼與阿達海等復歸請罪上以其悔罪

來也宥之而還其孥不令屬代善置諸左右備使令責立後效天命六年從征遼陽有功授二等輕車都尉世職太宗文皇帝嗣統擢居十六大臣之列佐理正白旗事扎魯特之役阿山奉命與都統楞額禮率六百人入巴林多俘獲還晉爵三等男天聰元年從征朝鮮攻克義州城三年同額駙揚古利至雅爾古偵軍事遇明故將毛文龍部下探獲者擊斬甚衆大兵證明從攻洪山口取其城趨燕京軍於城西南隅阿山同參領圖魯什周視敵營請速進攻上是其言命卽以是夜三鼓列陣明日陣獲其總兵麻登雲等四年圍永平乘夜力戰會城上礮裂藥發阿山與副都統葉臣以猛士二十四人冒火登諸軍繼進大破之遂取永平太宗嘉其驍勇晉三等子五年從征大凌河率銳騎偵錦州松山路俘獲明兵其守將來援阿山與前鋒統領勞薩以兵三百敗其衆二千斬首百餘級獲三纛上特召至酌以金卮尋授都統六年上統大軍親征察哈爾阿山與副都統布爾吉先率兵防邊聞駕臨西拉木輪河以衆來會遂奉命率八旗將領及精兵三百人往助圖魯什前哨軍值察哈爾汗道遁乃還復率兵防邊捕斬逋逃蒙古五人以獻明年與布爾吉往偵鹿島俘獲甚多八年三月與圖魯什等稟受方略至明錦州略地

貝勒岳託謂圖魯什曰軍中調遣事宜當就阿山商之勿違其言遂往略地獲牲畜五月復從征察哈爾收集蒙古之潰亡者以歸十二月詔免功臣徭役阿山與焉並給虎爾哈俘百人編屬佐領九年明國聞我師征山西將調山海關兵往援上命貝勒多鐸軍廣寧阿山與都統石廷柱領前鋒兵四百先趨錦州會明副將劉應選劉成功等引兵三千五百人來禦遇於大凌河未及戰貝勒兵疾馳繼至自山而下士馬騰藉軍容甚盛敵望塵驚潰阿山突入掩擊我軍分路追剿陣斬應選擒遊擊曹得功等四員殲其兵五百人復攻克臺堡一凱旋上率諸貝勒郊勞賜良馬鎧甲以旌異之崇德元年隨武英郡王阿濟格征明攻下鷓鴣長安嶺二城又率本旗兵攻克東安縣師還明兵來追阿山殿後擊斬略盡既班師上率諸貝勒迎勞如初是役也以出邊先歸不俟後軍俱至論奪所俘獲二年與葉臣率左翼舟師攻皮島西北隅先登克之斬守將沈世魁晉一等子予世襲四年部臣追論阿山於朝鮮王謁上時亂班釋甲及士卒離伍諸罪坐罰贖六年二月隨睿親王多爾袞圍廣寧先登斬敵襲其城有俘獲三月隨征錦州以聽從睿親王離城遠駐私遣兵歸家論死命改輸罰鍰八月復攻錦州掘濠環守敗松山騎兵

之援錦州者錦州兵突圍出犯我營松山守將潛謀奪我紅衣礮阿山連擊敗之七年三月部議錦州兵犯鑲黃旗營貝子尼堪不察舉我軍之未戰者阿山坐徇情附和應論罰有詔寬免先是阿山從武英郡王出征時欲奏其雄縣石橋會戰功屬藁啟王王曰石橋會戰無殺敵俘獲功無可書取其奏藁削之既而阿山子塞赫與護軍洪科忿爭洪科遂訐塞赫隨征雄縣石橋退縮事兵部以問武英郡王王以削阿山奏藁爲證及詢阿山阿山又曰石橋未嘗交戰亦未嘗以疏藁啓王及察疏藁王言實於是部臣議曰阿山邀功則云我曾交戰聞訐其子退縮則云未嘗對敵誕妄偏袒應革世爵罷都統任尋又以私取外藩蒙古進獻財物事論罪應奪所俘獲並得旨寬貰令罰贖十月奉命與饒餘貝勒阿巴泰復證明入牆子嶺取邊城至兗州屢敗敵兵分遣將領攻拔數城恩賞銀幣順治元年從擊流賊李自成於山海關自成敗走阿山復偕左翼副都統阿哈尼堪右翼都統瑪喇希濟蒲津擊破之遂同諸將鎮守平陽二年敘功晉爵三等公是時西安已定豫親王多鐸移師安撫河南進取江南阿山奉詔與諸將各領所部從至泗州與瑪喇希等取淮河橋遂渡淮攻拔揚州進取揚子江明鎮海伯鄭鴻逵等以水師

扼瓜州及儀徵阿山率舟師浮運河而南與右翼舟師分列大江東西岸敵至則以礮夾擊之遂攻下江寧追擒明福王朱由崧於蕪湖江南既定同貝勒博洛及都統拜音圖招撫浙江軍次杭州明潞王朱常澆迎降嘉興湖州紹興寧波嚴州皆下凱旋賜金銀鞍馬三年正月巫者薩海以阿山佐領下雅巴海之妻與人私通事告阿山阿山信之徒雅巴海而幽其妻雅巴海妻奔逸訴於刑部部鞫訊得薩海誣告狀阿山坐妄聽巫言削爵罷都統任旋復授一等子四年五月卒子塞赫襲

葉臣

葉臣姓完顏氏世居兆佳後隸滿洲鑲黃旗天命四年從太祖高皇帝征明有蒙古兵助明拒戰於鐵嶺奮擊敗之六年從征遼陽積功授三等輕車都尉世職太宗文皇帝卽位設十六大臣葉臣與焉佐理鑲紅旗事天聰元年隨大貝勒阿敏征朝鮮過明邊境以兵八十人夜襲斥堠六所盡俘其軍士旣至朝鮮攻義州城與佐領艾博先登敍功晉二等輕車都尉尋率兵戍蒙古追斬逋逃晉三等男四年太宗征明將攻永平城召入御幃授方略與副都統阿山乘夜率兵薄城下城

上礮矢交集葉臣伺敵礮裂驚擾領精兵二十四人立雲梯先登城遂破太宗嘉之稱爲驍將並諭衆曰後遇攻城如彼欲先登當阻止愛惜之遂晉三等子列議政八大臣諭以政有關失隨時陳奏葉臣對曰臣荷恩隆重願罄所知入告勉矢忠良但恐識有未逮耳五年任鑲紅旗都統從征大凌河列營城西南明總兵祖大壽守城突出襲我營葉臣與額駙和碩圖等督兵夾擊之殲敵過半七年六月詔諸貝勒大臣各陳時務時有議攻山海關者葉臣疏言今兵力聚集宜先往大同宣府偵察哈爾聲息近則往征若已遠遁卽入明內地進逼北京伐木造梯牌晝夜攻圍城卽不克可以震懾敵人太宗是其言是月隨貝勒岳託攻明旅順口斬獲無算八年隨大貝勒代善自喀拉鄂博入得勝堡略大同西至黃河擊敗朔州騎兵二百崇德元年五月隨武英郡王阿濟格征明旣入邊分兵克安州又合攻寶坻縣拔其城十二月太宗親征朝鮮葉臣率兵入其國都二年四月率步兵助武英郡王征明皮島乘艦進攻島西北隅斬其總兵沈世魁師還晉一等子四年偕副都統八人簡諸佐領下兵各三入明邊青山口由太平寨奪青山關七年代貝勒阿巴泰駐防錦州順治元年世祖章皇帝遣諸王討流賊李自成自成敗

走西安奉命率兵赴山西任招撫由饒陽至懷慶附近郡邑悉下賊黨猶據太原會師進攻克其城先後平二十七州一百四十一縣置官屬安輯居民明總兵李際遇守河南山寨定西伯唐通副將董學禮從賊擁衆邊關葉臣並招降之又徵薦明翰林朱之俊主事胡全才等十二人山西底定還至定州值土賊埽地王聚衆劫掠遣兵剿滅之比至京坐擅拆禁城牆停止敘功賜白金六百兩二年七月隨順承郡王勒克德渾代豫親王多鐸統兵江南時大學士洪承疇任招撫凡不順命者咨葉臣討之輒奏績十一月以李白成餘黨一隻虎等出沒武昌襄陽荊州諸郡詔葉臣隨勒克德渾移師剿除三年十月凱旋賜黃金三十兩白銀五百兩五年病卒年六十有三改二等子爲一等子兼一雲騎尉命其子分襲長子車爾布襲二等子第五子車赫圖襲雲騎尉

恩格圖

恩格圖科爾沁蒙古人世居哈達太祖高皇帝時挈家來歸隸正紅旗授佐領與參領阿岱駐伊蘭布里庫防游牧蒙古率十人巡徼海濱遇敵百人追斬幾盡聞明兵千餘犯海州率兵三百馳擊敗之天聰三年從太宗文皇帝征明北京明總

兵滿桂等赴援恩格圖首先奮擊斬獲有功尋攻遵化破山嶺敵營入大安口皆先衆軍力戰敍功授三等輕車都尉世職擢兵部承政考滿晉職二等尋授本旗蒙古都統崇德元年隨武英郡王阿濟格征明同阿岱等分率甲士設伏明三屯營守備率兵來探伏發圍之盡殲焉又與都統譚泰等征朝鮮豎雲梯登城朝鮮兵潰走盡收其牲畜貨賄以歸先是隨武英郡王征明戰松山正藍正白鑲白三旗營汛錯亂恩格圖隱匿不舉及還師又不俟後隊齊至先行出邊猝遇敵兵戰敗遁走至是論罪罰鍰奪其俘獲明年又議征朝鮮時恩格圖在軍營方食奉召不卽赴且約束不嚴致廝卒妄行爲朝鮮兵所殺論鞭百詔免之罰贖以懲三年隨貝勒岳託征明密雲距牆子嶺五里恩格圖率兵先諸軍越高峯入邊破敵五年隨鄭親王濟爾哈朗等圍錦州松山城松山兵夜襲我營恩格圖率本旗兵敗之六年從上征明明總督洪承疇等合軍十三萬赴援松山上分遣諸將並授方略令恩格圖與前鋒統領武拜進擊之及諸軍並進恩格圖詐言未奉上命不至期會之地將戰猶披氈而坐遇敵不前旣旋師論罪應褫職仍輸罰鍰得旨寬免罰如律部臣又論攻明錦州時明兵出犯鑲黃旗汛貝子尼堪失察我兵之未戰

者恩格圖坐徇情附和議罰上以諸王貝勒及大臣等久駐錦州素著勞績凡罪概予寬宥恩格圖亦免議命更番駐守松山順治元年隨睿親王多爾袞入山海關敗流賊李自成二年敍功晉一等輕車都尉兼一雲騎尉復隨豫親王多鐸破流賊於潼關賊夜犯正黃旗營恩格圖率兵往援俘斬甚衆師旋賊分兵躡我後恩格圖殿四戰皆捷進征江南破明將鄭鴻逵於瓜洲隨端重親王博洛下浙江至錢塘大破敵衆獲舟三十五旋攻克嘉興府與都統瑪喇希圍崑山縣城內敵兵迎戰恩格圖連擊敗之遂取其城三年晉爵三等男隨征福建同都統漢岱招降一府五縣又同副都統鄂羅色臣招降一府八縣遣兵助大軍擊敗僞帥吳凱兵攻克賊衆萬餘於分水關進剿海賊七千於南靖縣皆有功四年晉二等男尋晉一等五年征叛鎮金聲桓卒於軍子鄂爾濟圖尙幼以兄子克什圖襲爵遇恩詔晉三等子十八年分授克什圖騎都尉職命鄂爾濟圖襲一等男

哈寧阿

哈寧阿姓富察氏世居額宜湖父阿爾圖山率其族攻薩齊庫城殺部長喀穆蘇尼堪招撫二百餘人來歸太祖高皇帝命隸滿洲鑲白旗任佐領復分編人戶俾

哈寧阿亦任佐領天聰二年隨貝勒岳託等證明錦州略松山杏山高橋諸臺堡奮勇擊敵授護軍統領三年太宗文皇帝統大軍證明燕京哈寧阿從與明巡撫袁崇煥及祖大壽戰於廣渠門外以敗敵授騎都尉世職四年奉命率精兵百人往略明境五年從征大凌河八年大軍證明大同哈寧阿先馳至小西城列雲梯攻具我師遂畢登復以二十人出略擊敗敵兵三百九年同承政圖爾格徇地入明山西界師旋過平魯衛明兵躡我後還擊敗之追至城壕斬馘無算敍功晉二等輕車都尉崇德元年從征皮島有功二年列議政大臣三年隨豫親王多鐸往會鄭親王濟爾哈朗軍證明道經中後所祖大壽輕師來襲參領翁克及土默特部兵先奔哈寧阿且戰且退士卒被陷論罪應死奉詔免死革世職籍家產之半四年論證明失律之佐領阿蘭泰罪哈寧阿復以徇庇論死上仍貸之坐鞭責六年從圍錦州再敗敵兵明總督洪承疇以十三萬兵赴援上親統大軍環松山而營度明兵必宵遁命哈寧阿同護軍統領鼇拜率左翼軍列陣右翼地右翼軍以次遞列屬於海濱夜一鼓明兵果沿海走哈寧阿率師掩擊敵自蹂躪死者枕藉尋進攻松山屢戰俱捷惠敏恭和元妃之喪也哈寧阿隨武英郡王阿濟格方守

高橋輔國公扎喀納於軍中絃歌而舞事覺哈寧阿以不舉劾逮繫既而釋之八年三月同護軍統領阿爾津征虎爾哈部獲男婦二千五百有奇牲畜貂皮無算七月凱旋得優賚順治元年隨睿親王多爾袞入山海關擊流賊李自成至望都大破其衆又同都統譚泰率前鋒兵追敗之正定賊倉皇焚輜重遁二年復授三等輕車都尉是年擊賊綏德州賊聞風遁走追敗之延安府城內兵出犯左翼軍又擊卻之時李自成已奔武昌進師馳擊至安陸府獲賊艘八十復與譚泰合兵下江南遇敵於揚子江奪其戰艦追至富池口敵列陣岸上又擊敗之三年二月隨順承郡王勒克德渾征湖廣流寇敗僞伯吳汝義降其衆四月晉二等輕車都尉五月隨肅親王豪格擊敗叛鎮賀珍於漢中窮追至秦州賊黨武大定退據三寨山山勢壁立未可攻我師圍之僞遊擊周克德者遣其子來降導我師由僻徑登其守將石國璽爲內應哈寧阿同副都統阿拉善署護軍統領噶達渾率兵六百破壁壘入賊皆自山墮崖下斬殺略盡進征川賊張獻忠略夔州茂州資州遵義相繼克捷五年正月師旋敘功晉一等輕車都尉世職是年卒子率顏襲

準塔

準塔滿洲正白旗人姓佟佳氏扈爾漢第四子也天聰八年授騎都尉世職任參領同參領鼇拜等率兵略明錦州復與前鋒都統勞薩等率將士百人往迎察哈爾國來歸者崇德二年隨武英郡王阿濟格征明皮島王以敵兵堅守不能克集諸將問進取之策準塔與鼇拜對曰吾二人先登誓必克之否則不復見王遂連舟越衆渡海舉火爲號以待後師敵兵據堡列陣準塔與鼇拜冒矢石奮勇衝擊遂取其島敍功超授三等男賜巴圖魯號尋擢任都統隨貝勒岳託征明至密雲攻牆子嶺八旗並進準塔先據嶺以導諸軍遂毀邊城入敗明內監馮永盛及總兵侯世祿軍三屯營守將以步騎三千截我輜重同都統武賴擊敗之連敗敵兵二千於董家口遂往略地克取二城敍功晉爵二等男六年三月隨睿親王多爾袞征明錦州以聽從遣兵回家離城遠駐論罪應革職籍沒得旨改罰鍰九月命隨安平貝勒杜度等圍錦州有功七年復同都統葉臣等率將士鎮錦州先是圍錦州時城內明兵出犯鑲黃旗壕塹三旗護軍避敵壕內王貝勒等袒護不報準塔坐徇情附和論罰詔免之明年隨征明山東與都統葉克舒等遣將領攻孟家臺以調度失宜致傷士卒且誑稱率五人突入敵圍衝出敵陣論罪革巴圖魯號

降爲一等輕車都尉罰贖十二月復鎮錦州順治元年從睿親王入山海關擊流賊李自成與都統譚泰等追至正定大破之賊焚輜重倉皇遁去於是燕京迤北居庸關內外各城及天津正定皆降敘功復授爵爲三等男二年正月率右翼兵隨饒餘郡王阿巴泰征山東平定郡縣趨江南時明福王朱由崧遣兵渡河圍徐州沛縣李家樓準塔督兵馳擊敗之擒斬其將六人明兵赴河死者無算下徐州奉命屯兵鎮守五月自徐州進兵南下擊敗明副將高雅軍於宿遷師次清河總兵劉澤清率步兵四萬船千餘據黃淮清三河口連營十里準塔遣副都統康喀賴等率兵渡清河列營相拒以礮擊敗敵艦復遣都司楚進功率步兵六百人拒黃河北岸鳴礮相應隨分兵兩路一自清河上游進擊一攻對岸馬步敵兵俱敗之合軍追至淮安界斬其副將二參將一有僞新昌王者潛遁海島雲臺山聚衆攻陷興化準塔遣兵進剿破其巢穴擒斬之通州如臯泰興等城皆下遂平定淮安鳳陽廬州望風納款敘功晉爵三等子仍賜巴圖魯號三年奉命隨肅親王豪格勦流賊張獻忠於四川賊糾衆迎戰準塔指揮八旗前鋒及兩黃正白三旗騎兵奮勇進擊俘斬甚衆復同貝勒尼堪等分兵攻克遵義夔州茂州榮昌富順內

江資陽諸郡縣川寇悉平復隨肅親王剿陝西賊黨武大定等四年凱旋卒五年論準塔前後功加世職爲一等子無子以弟阿拉密襲十二年追諡曰襄毅詔立碑墓道

和託

和託滿洲鑲紅旗人姓棟鄂氏父郎格太祖高皇帝時隨棟鄂部之屯長對齊巴顏阿格巴顏等來歸任佐領天命六年從征明瀋陽城既下明總兵陳策等來援郎格與參領布哈錫爾泰等拒戰歿於陣予三等輕車都尉世職以長子棟世祿襲和託其次子也太宗文皇帝崇德七年正月授鑲紅旗滿洲副都統隨鄭親王濟爾哈朗等圍明錦州降其總兵祖大壽四月進攻塔山克其城鄭親王遣和託以所俘人口及所獲財物籍數馳奏上命還諭以所俘獲分賜軍中陣亡及被傷者並齎敕招撫明杏山守將諭曰汝以善言招撫來降則已否則用礮攻之礮當擊城中間俟城全頽方令我兵登進倘舉礮彼卽歸順亦許其降也和託至軍遵旨曉示城中猶固守及舉礮遂開門乞降師還和託得優賚七月部議圍錦州時諸將徇隱軍士失律罪和託應罰緩得旨以前勞寬免十月隨貝勒阿巴泰征明

自界嶺口毀邊牆入至黃崖口我軍議分兩翼夾攻而輔國公斐洋古令和託督左翼兵建雲梯攻城和託周視畢復曰城可登無以梯爲也乃率護軍四十人毀城入斬守備一餘悉潰走遂偕右翼兵進圍薊州敗總兵白騰蛟白廣恩兵直抵山東攻克兗萊青諸府明年凱旋擢吏部參政仍兼副都統世祖章皇帝順治元年隨大兵入山海關擊流賊李自成追至望都連敗賊兵敘功予騎都尉世職時明福王朱由崧立於江南其副總兵楊威踞登州四出侵擾招撫山東侍郎王鼐永請發兵進剿上命和託同副都統李率泰額孟格率師討之有趙應元者舊爲自成裨將敗竄長山聞鼐永至清州儲庖芻餉佯受撫旣入城伏兵戕鼐永以叛和託至山東聞變卽率師往援并牒巡撫陳錦總兵柯永盛會師速剿應元復僞以撫請和託與李率泰議曰我兵旣集破城卽可滅賊顧如良民何知府張文衡副將李國威在城中賊以民望未卽加害誠與審計令應元出城議撫縛而斬之餘黨不足平也旣定計遂許應元降應元隨張文衡出謁和託慰勞遣還密令我兵隨張文衡入城分布防守乘夜擒斬應元及其黨數十人徧諭脅從者弗罪青州賊平登萊諸賊亦爲陳錦招降楊威伏誅詔和託李率泰移兵河南會豫親王

多鐸軍優賚黃金紫貂等物晉世職爲三等輕車都尉二年隨豫親王下江南尋隨貝勒勒克德渾征浙江先是明福王就擒其大學士馬士英竄杭州總兵方國安守嚴州至是大兵定杭州士英走依國安糾衆來犯和託率左翼兵禦之富陽斬僞副將二僞參將二僞遊擊五大敗賊衆復破賊下關直溝燬其木城奉詔同副都統朱瑪喇率所部滿洲蒙古兵駐防杭州三年四月卒無嗣以兄之子碩色納襲職

焦安民

焦安民漢軍正紅旗人初授吏部啟心郎崇德九年甄別各部院官安民列二等賜人戶牲畜八年考滿授佐領順治元年遷山西雁平道二年四月擢寧夏巡撫疏言雁平村舍凋零寇盜充斥守備上官清都司鄭應亨晝夜巡緝士民得安請攜二人隨往寧夏委用從之十一月上諭督撫等宣力封疆躬勤勞苦茲值嚴寒尤深注念賜安民綿裘貂褂各一十一月疏言臣巡歷河東諸營堡惟靈州營水灌沃壤兵多務農餉或不足猶可藉農養贍其餘營堡兵皆鶉衣百結鵠立難支查靈營西南有民堡八向招人耕種屯糧以供兵馬需近因花馬興武等營歲荒

將此項屯糧通融分給以資接濟伏思守土在軍足食在農斯時有荒可墾苦無牛隻現存耕牛六十一隻堪給兵開墾又原任總兵南一魁將舊存馬價銀二百兩製弓矢攜去應追價入庫寧驛久廢稽延公務請將此銀買驢騾發附郭等驛稍供走遞庶齎奏無誤又言寧兵月餉現在屯課征收者支放殆盡貧民逋欠者追比難完三軍枵腹待哺請撥秦餉三萬兩以濟飢兵下部議如所請三年三月副將王元馬德以營兵趙銳等罪責入獄乘釁統衆突入撫署安民遇害元德等尋伏誅安民贈右都御史廕一子賜祭葬如例

佟養甲

佟養甲遼東人先是爲滿洲居佟佳繼遷撫順父佟拱隨族人養正等來歸後隸漢軍正藍旗太宗文皇帝時養甲入直內院理事順治元年從世祖章皇帝定鼎燕京二年授總兵官銜隨貝勒博洛率師南征越明年下杭州平福建十月加巡撫廣東銜署兩廣總督事與署總督李成棟率兵定廣東是時明唐王朱聿鍵弟聿鎮據廣州擁兵聚寇僭號紹武養甲與成棟定惠潮二府亟趨廣州令前鋒軍悉用紅帕裹首僞爲廣州援兵狀以惠潮道印爲文書給守者奪門入擒其諸王

世子十三人復與成棟議以南雄韶州兩郡連控江楚肇慶爲粵西咽喉梧州爲粵西門戶宜先撫南韶以通江右之援定肇慶以扼兩粵之吭取梧州以固肇慶之藩乃檄總兵葉承恩及副將李仰臣等兵進南韶成棟兵進肇慶皆授策剿撫三郡悉平會明閣部下魁楚擁明桂王朱由榔自肇慶竄梧州養甲復令成棟移兵進剿魁楚等皆遁走遂下梧州分遣總兵徐國棟等取高雷廉瓊四府養甲自駐廣州招降海上四姓賊首鄭昌四年加兵部尙書銜實授總督兼任廣東巡撫時標管將士調遣四出廣州駐兵僅存百餘人海賊馬元生石壁徐貴相及白旗賊黃信林芳等窺伺兵力單弱集衆數萬突犯廣州養甲督令官兵守陴躬冒矢石扼太平門關外橋梁鼓勵鄉勇力戰殺賊陣斬數百級生擒百餘人餘賊遁入海尋偕成棟率兵徇增城順德東莞三水新寧諸邑皆就剿撫明總兵李承志李明忠以平樂潯州二郡兵來降卽令收定左江右江諸路六月招降明趙王裔朱由棖及其將李士璉七月明閣部陳子壯尙書張家玉率賊萬餘寇廣州指揮楊可觀將以城爲內應養甲伺其謀擒斬之督兵守禦成棟亦以兵赴剿焚賊舟賊遁越六日復來犯又敗之是時廣州初定監司守令未及銓授養甲疏請廣東布

政司耿獻忠爲廣東巡撫復慎簡廉吏請旨酌用又請移大同兵五千至兩廣資防剿其頻年隨征士卒增給資糧以示優卹凡新降將卒才勇者或留營訓練或分駐要隘餘令歸農會部議徵順治三年額銀四分之一以給餉養甲言粵省連遭寇掠請緩至順治四年爲始諸疏並下部議行先是雷廉二郡珠池每歲例遣官開採養甲以地險費繁恐傷民力請罷其役得旨俞允時明桂王朱由榔據桂林兩廣人心觀望有潛赴由榔黨屬孫可望入滇黔爲寇者養甲策遣將士進攻由榔疏請造弓矢火器備戰具分遣禁旅進剿雲南貴州上以廣西未定而恭順王孔有德已奉詔進軍湖南防剿孫可望特諭養甲悉心安輯兩廣所請俟有德疏報再議養甲之署兩廣總督也成棟以總兵署兩廣提督率師皆往旣而養甲奏平定粵嶠成棟功多請實授成棟爲廣東提督成棟自負功績以養甲奏授官職不兼兩廣意殊不平又素與養甲部將郝尙久爭功有隙遷怒養甲五年閏四月成棟據南雄叛受由榔封爵與江西叛鎮金聲桓互爲聲援養甲遺書贛州守將策應書爲成棟所獲益恨之乃以兵四百人劫養甲擁至肇慶養甲詈賊不屈成棟密使其黨張祥賊殺之事聞贈太子少保廕一子入監予祭葬入祀昭忠祠

及廣東名宦祠

羅繡錦 弟繪錦

羅繡錦遼陽人後隸鑲藍旗漢軍太宗文皇帝天聰五年始設六部繡錦由諸生授工部啟心郎八年命禮部試滿洲漢人通文義者爲舉人繡錦與選賜衣一襲免四丁尋授國史院學士纂修太祖高皇帝實錄書成得優賚崇德七年兼授佐領世祖章皇帝順治元年七月擢河南巡撫至則流賊李自成之黨率衆二萬餘寇掠衛輝懷慶間而原武新鄉諸邑復有土賊爲患繡錦同總兵官祖可法等協力防剿並請敕發八旗勁旅會豫親王多鐸統師征陝西上命取道河南相機剿賊諸賊或降或遁繡錦疏請以河北荒地凡萬餘畝令守兵屯種得旨允二年十一月擢湖廣四川總督時湖南郡邑爲明巡撫何騰蛟等所據自成遺黨一隻虎劉二虎等復寇擾湖北繡錦至荊州一隻虎率衆犯城順承郡王勒克德渾自江寧移師擊走之及順承郡王班師賊復窺犯繡錦飭兵防剿屢奏捷土賊胡公緒踞天門縣之八百洲糾黨四出焚掠殺署鹽道周世慶繡錦遣中軍副將唐國臣署總兵楊文富等分路進剿陣擒公緒平毀賊巢四年恭順王孔有德等征湖

廣取長沙衡州寶慶辰州等府繡錦條奏增設鎮協移兵駐守事宜並下部議行先是襄陽總兵王光恩與鄖陽道李之綱互訐賊私下撫按會核光恩獲罪逮問其弟光泰遂糾衆作亂踞鄖陽提督孫定遼戰歿上遣侍郎喀喀穆率師自河南進剿繡錦以兵會之復鄖陽光泰遁四川五年喀喀穆將班師值江西總兵金聲桓叛湖南騷動常德武岡辰州沅州復爲自成遺黨郝搖旗馬進忠所陷繡錦奏留喀喀穆駐守荊州而分遣總兵徐勇馬蛟麟等防守要地屢敗賊衆上復命鄭親王濟爾哈朗等統師征湖南諸陷賊郡邑以次恢復繡錦疏言湖南叛服不常大兵凱旋之後恐餘孽跳梁煽誘降將如故凡勢窮乞降之衆宜安插腹地以靖疆圉上嘉納其言九年七月卒於官年六十有三賜祭葬如例贈兵部尙書廕一子入監弟繪錦順治八年授通政司理事官十三年擢順天府府尹十八年遷貴州巡撫康熙四年繪錦以定例荒地招民間墾種三年後起科復經戶部定議各省荒地限兩年墾徧遇期遣官履勘因疏言黔省雖開闢數年而連年逆苗倡亂攻剿頻仍不能不借用民力又復疊遇水災已熟之田輒多荒棄未墾之地尙事招徠通計各府衛新墾之地有一萬二千九百餘畝應照例起科此外請酌寬年

限並暫停遣官履勘疏下部議從之六年十一月以年老乞休後卒於家

譚泰

譚泰滿洲正黃旗人姓舒穆祿氏揚古利從弟也初授佐領天聰八年任護軍參領與都統圖爾格分統左右翼兵略錦州還從太宗文皇帝征明由上方堡毀邊牆入敗明兵克保安州擢爲護軍統領領關內諸軍事九年侍衛宗室濟馬護欲得揚古利舊居揚古利不允濟馬護囑譚泰轉奏譚泰庇其兄不以聞濟馬護入奏并訴狀太宗諭責譚泰曰爾爲朕耳目凡事當不徇偏私入告無隱爾乃欺罔巧詐大負委任且濟馬護乃朕叔父之子其言尙壅蔽不達彼小民有勞苦嗟怨之事何由得達乎爾恃宗族強盛欺陵愚弱似此奸惡朕所深惡遂下刑部質訊罷護軍統領任尋復授本旗都統崇德元年五月隨武英郡王阿濟格等征明克延慶州等十二城進圍定興縣先登有功九月與都統阿山等設伏敗明遵化三屯營守備兵盡殲其衆凱旋賜宴勞之以部議不俟後隊齊至從王貝勒先行出邊論罰鍰奪俘獲十二月從上征朝鮮朝鮮王棄城遁譚泰率兵入城盡收其輜重以獻復隨上渡江追朝鮮王至南漢城降之又以部議失察所部軍士先歸委

碌因人耶譚泰銜之希福欲更易賜第不從又使人謂譚泰曰爾爲都統爲我更撥第宅易易耳而不能爾誠衰邁矣譚泰怒會其弟副都統譚布以希福述睿親王曾自言過誤事告譚泰譚泰訐之法司坐希福僞傳王言黜爲民二年八月英親王阿濟格獲罪詔令譚泰會同都統鼈拜等集衆傳示譚泰匿諭旨不以示索尼舉發其罪削譚泰公爵降爲子解都統任譚泰怨索尼訐索尼於內庫鼓琴牧馬及禁門橋下捕魚事罷索尼職十一月譚泰復任本旗都統都統阿山譚泰婦翁也譚泰嘗乞公主園亭於圖賴圖賴惡之三年正月譚泰坐與阿山遣巫治病下廷臣議罪先是江南未定大軍分道進師譚泰自西安剿流寇還慮己不與平江南功遣使謂圖賴曰我軍以道路迂險是以後至今南京未下可讓我軍取之圖賴作書使護軍賽爾特賚送索尼轉啟睿親王佐領希恩漢竊觀之恐譚泰得罪也令賽爾特沈之河誑云已達索尼索尼曰吾發譚泰擅隱諭旨罪願匿其書以庇之乎王訊賚書者賽爾特以實告且曰譚泰使啟心耶覺和託囑我勿言也至是并議之譚泰論死下獄已而睿親王遣使者視之并遺其食譚泰曰王若拯我我當殺身報恩使者以告乃出之獄中而優養之五年三月復原官以逆鎮金

聲桓據江西敕爲征南大將軍統兵進討賊領步騎七萬來禦譚泰督諸軍進戰
屢敗賊兵復麾將士以雲梯攻城拔之聲桓中二矢投水死擒斬其將王得仁南
昌九江南康瑞州臨江袁州皆下移兵擊廣東逆賊李成棟成棟據信豐聞大兵
將抵贛謀夜遁譚泰遣諸將乘勝襲擊之賊衆潰散成棟溺水死復信豐別遣將
定撫州建昌破僞總兵楊奇盛軍二千有奇江西悉平凱旋敘功加一等子七年
世祖章皇帝親政授譚泰爲吏部尙書八年復晉一等公是時圖賴早卒索尼方
罪廢譚泰毀圖賴營室以洩忿值御史張煊劾大學士陳名夏一疏下王大臣會
勘逮名夏就羈禁譚泰力袒名夏於廷議時咆哮起爭及讞詞入旨未下譚泰挺
身前奏曰煊言皆虛且就所劾論亦事在赦前煊誣忠臣以死罪應反坐遂殺煊
又嘗爲其妻弟岳爾多冒所襲一等子優陞十級爲三等侯令襲之至是又將以
其女弟之夫佟圖賴駐防杭州妄稱杭州駐防都統員缺以佟圖賴擬補上命執
譚泰付廷臣議罪諭曰譚泰昔在部中尙有爲國之意邇來但知營私朦朧奏請
或經朕察出卽厲聲爭論內則一任己意外則矯旨而行明知金礦駐防杭州妄
稱缺出遂越用佟圖賴豈非恣意妄行乎且於六部之事無不把持諸王大臣或

懼其威權羣起而附和之朕慮遷延日久則干連者必多故執付卽行勘問以聞於是會訊譚泰俱服議未上護軍統領鼇拜劾譚泰營私及黨附睿親王各款質訊皆實遂伏誅時年五十有八子三唐古哈孔鈕羅忠鈕

祁充格

祁充格姓烏蘇氏世居瓦爾喀國初隨其族吉思哈等來歸初隸滿洲正白旗後改隸鑲白旗太宗文皇帝在藩邸時以祁充格嫻習文史令掌書記天聰五年七月初設六部命祁充格爲禮部啟心郎六年八月諭曰朕以爾等爲啟心郎當顧名思義克盡厥職如諸貝勒及各部院有闕失卽明言以啟迪其心俾知改悔勿面從而退有後言八年十一月考績居上等授佐領崇德元年八月睿親王多爾袞證明錦州祁充格奉命隨宗室鞏阿岱等往助其軍九月凱旋由義州馳報大捷三年九月睿親王多爾袞復帥師證明太宗親餞於郊祁充格以不啟豫親王多鐸隨駕出送復於是日私往屯莊逮繫論死命從寬革職貫耳鞭責給隸睿親王府順治二年二月起爲弘文院大學士五月同大學士馮銓洪承疇范文程剛林等充明史總裁官十一月冊封朝鮮國王李倬世子溟命爲正使齎敕往諭四

年六月考滿稱職加授一佐領六年充纂修太宗實錄總裁官復爲會試主考八年閏二月刑部審訊黨附睿親王諸臣罪狀以祁充格前犯大辟邀恩寬宥因睿親王驟擢爲大學士一意詔附與剛林等擅改太祖實錄削匿睿親王罪愆增載功績並預遷駐永平逆謀讞成應斬遂伏法

剛林

剛林姓瓜爾佳氏世居蘇完初隸滿洲正藍旗爲筆帖式掌繙譯漢文天聰八年以漢文考試中式舉人命直文館崇德元年授國史院大學士與范文程希福等參議政事疏請重定部院承政以下官各五等又請定考取生員舉人之例俱報可當時太宗文皇帝四征不庭疆宇日闢剛林屢奉命往軍前宣布威德咸當上意積功授騎都尉世職八年八月郡王阿達禮以謀逆誅剛林係其屬下人因逮繫尋以其曾先事舉發免罪改撥正黃旗供職如故世祖章皇帝定鼎後敘功晉二等輕車都尉順治三年四年兩充會試主考官曾考滿晉一等輕車都尉五年以贊理機務忠勤懋著授三等男賜巴克什號六年充纂修太宗文皇帝實錄總裁官再充會試主考官是年疏言臣工章奏天語批答應編輯以垂法戒備章程

爲纂修國史之用請令六科每月錄送史館并命翰林院分任編纂報可八年以纂修明史闕天啟四年至七年實錄又崇禎一朝事蹟無考請敕內外各官懸賞購求以期必得其有野史外傳集記等書並令訪送備採章下所司知之是年睿親王多爾袞僭逆事發下刑部鞫其黨剛林坐阿附論斬籍沒遂伏法

何洛會

何洛會滿洲鑲白旗人父阿吉賴從太祖高皇帝征戰有功官佐領既卒何洛會仍其任兼護軍參領太宗文皇帝天聰八年隨都統阿山等略明錦州獲馬牛九年命免功臣徭役何洛會與馮崇德五年授正黃旗蒙古都統隨睿親王多爾袞圍明錦州明年三月以大軍離錦州城遠駐私遣兵丁歸家議統兵王大臣罪何洛會應革職籍沒詔從寬罰鍰十一月調本旗滿洲都統七年錦州下追論圍錦州時護軍統領鄂羅塞臣先入敵陣何洛會隱其功應革職罰鍰上復宥之何洛會初隸肅親王豪格下頗見任使世祖章皇帝順治九年睿親王攝政與肅親王不相能何洛會因訐肅親王與兩黃旗大臣揚善俄莫克圖伊成格羅碩詆誹睿親王且將謀亂下法司鞫實削肅親王爵揚善等四人並棄市以何洛會舉發悖

逆籍俄莫克圖伊成格家產給之授一等輕車都尉世職尋隨睿親王入山海關
擊敗流賊李自成追至望都還齎睿親王疏迎上遷都燕京奉命擢內大臣總管
左右翼留守盛京二年二月敍擊敗流賊李自成功晉一等男六月命統兵駐防
西安道經河南剿滅西平縣叛賊劉洪起等十一月命爲定西大將軍進剿四川
時自成餘黨劉體純等由湖廣犯商州叛將賀珍與其黨孫守法胡向宸等分踞
漢中興安三年賀珍合賊七萬餘犯西安何洛會督兵禦擊殲賊無算追敗之濠
泗河復擊敗劉體純於山陽及商州並多斬獲會肅親王奉敕爲靖遠大將軍征
四川何洛會還京四年正月命率兵駐防宣府六月仍授正黃旗滿洲都統五年
三月調鑲白旗尋命同征南大將軍譚泰討江西叛鎮金聲桓師至九江敗迎戰
賊衆七月進圍南昌鑿壕築壘困之六年正月何洛會督兵樹雲梯登城大軍並
進聲桓中二矢投水死其黨王得仁等就擒伏誅盡復所陷郡邑進剿廣東叛鎮
李成棟於信豐成棟亦溺水死江西平凱旋賜所獲金銀珠玉等物遇恩詔晉爵
三等子初肅親王爲何洛會所訐削爵旋以山海關敗流賊功復之及征四川滅
張獻忠還京貝子屯齊等訐鄭親王濟爾哈朗徇隱肅親王悖妄事何洛會復證

之鄭親王坐降爵肅親王以幽繫終七年冬睿親王卒何洛會語貝子錫翰曰兩黃旗大臣素與我爲讐今殆將殺我矣八年二月議政大臣蘇克薩哈首睿親王曾欲率兩白旗人還永平謀不軌與何洛會定議事下王大臣質訊時譚泰爲吏部尙書證何洛會辱詈肅親王諸子錫翰亦以何洛會慮遭仇害語證其罪坐悖逆其弟瑚什並磔死籍其家

冷僧機

冷僧機世居葉赫姓納喇氏葉赫旣滅來歸隸滿洲正藍旗屬大貝勒莽古爾泰下太宗文皇帝天聰元年敖漢部長索諾木率衆內附尙公主爲額駙冷僧機改屬其下五年十月莽古爾泰於御前露刃大貝勒代善等劾其不敬論罰降同諸貝勒六年十二月以暴疾卒九年十月貝勒德格類亦以暴疾卒冷僧機首於法司言莽古爾泰德格類曾與公主及索諾木結黨設誓謀不軌冷僧機同參領屯布祿巴克什愛巴禮皆與謀下法司鞠實並坐謀逆冷僧機以自首免罪所籍屯布祿愛巴禮家產悉以與之改隸正黃旗授三等男世襲崇德二年兵部參政穆爾泰因都統都類逮繫於部令在繫者徙避有囚出繫所遇冷僧機訴之冷僧機

遂告侍衛轉奏命法司鞠議穆爾泰及部臣並坐降罰冷僧機尋授一等待衛七
年上幸牧馬所命內大臣侍衛與明降將祖大壽等校射獎賞有差冷僧機得賜
駝一世祖章皇帝卽位睿親王多爾袞攝政以冷僧機列內大臣順治二年晉爵
一等男兼一雲騎尉會都統譚泰訐內大臣索尼詆誹睿親王引冷僧機證之以
未與聞對坐徇庇又曾與索尼取內庫琴與人並弗阻索尼於庫院牧馬論削爵
籍家產詔賞之嗣遇考滿晉爵三等子七年睿親王有疾冷僧機同貝子錫翰等
奏請上駕臨視睿親王罪以擅請降一等男遇恩詔予復旋晉一等伯先是睿親
王以豫親王多鐸子多爾博爲子及睿親王薨上命多爾博襲爵冷僧機引之入
見多爾博出冷僧機奏曰昔日兩黃旗大臣誓立肅親王豪格睿親王持議輔上
嗣統今於多爾博雖破格優遇未足酬功又言侍衛羅什乃睿親王所優遇者上
宜寵異之旣而羅什亦爲冷僧機要請加恩八年羅什以蠱惑諸王爲鄭親王濟
爾哈朗等劾奏伏誅上命議政大臣巴哈哈什屯等詰冷僧機所指誓立肅親王
事冷僧幾詞沮遂下法司集諸大臣鞠訊質其誣陷及阿諛睿親王諸罪論斬籍
沒詔從寬免死九年命諸王大臣鞠訊內大臣西訥布庫宗室鞏阿岱錫翰罪復

得冷僧機朋比奸惡狀與西訥布庫等並伏誅

敦拜

敦拜滿洲正黃旗人姓富察氏其先世居沙濟父木科理當太祖高皇帝時來歸有朱舍理部長尤額楞梗化不服命同鄂佛洛總管達賴往征之有功賜號蘇赫巴圖魯官佐領事尋卒子三人敦拜其長也初任佐領天命十一年從大兵征明寧遠先驅偵敵擊敗城中出戰兵師旋遇敵二十人與步戰盡殲之敵復以騎追射我師敦拜還擊卻敵殿後以歸天聰八年太宗文皇帝嘉其克副任使授騎都尉世職崇德五年擢護軍統領隨鄭親王濟爾哈朗圍明錦州敵出城誘戰敦拜突入其隊斬三人餘衆俱遁敵騎自杏山一再來犯並戰卻之六年復圍錦州明總督洪承疇曰松山遣兵犯我兩紅旗營敦拜先後率所部禦敵尋復來犯我外藩蒙古營敦拜趨援敗敵斬首二百餘級獲其雲梯十四七年敍功加一雲騎尉八年同護軍統領阿濟格尼堪率兵駐防錦州世祖章皇帝順治元年隨大軍入山海關擊敗流賊李自成兵追至望都二年敍功晉世職二等輕車都尉先是自成敗遁還西安明福王朱由崧自立於江南上敕豫親王多鐸征江南取道河南

先除自成賊黨敦拜率護軍以隨師至陝州賊將劉方亮領兵千餘來犯敦拜同護軍統領圖賴阿濟格尼堪等奮擊敗之賊復夜襲我營敦拜率兵連敗賊衆遂破潼關進定西安自成由商州遁走湖廣敦拜同護軍統領阿爾津等追斬三百餘人豫親王移師下江南敦拜復從破揚州趨江寧朱由崧聞大軍至遁走蕪湖將登舟渡江敦拜追及之與阿爾津圖賴等扼據江口截其去路明將黃得功迎戰我兵奮擊盡奪其舟得功中流矢死由崧爲其總兵田雄等執以獻三年敘功晉世職一等是年隨端重親王博洛由浙江進征福建同副都統朱瑪喇擊敗僞總兵黃某等拒戰兵五年隨征南大將軍譚泰討江西叛鎮金聲桓賊黨踞九江府敦拜先驅直抵城下敗賊衆聲桓與其黨王得仁糾步騎七萬自南昌迎戰敦拜合兵奮擊敗之復招撫臨江一府四縣六年命統兵剿畿南土賊斬賊渠李玉三陳金玉邢少川吳臨瑞席快等獻縣雄縣任邱寶坻諸邑土賊悉平七年五月敘平定西安福建江西功晉爵三等男尋隨睿親王多爾袞獵於中後所以同都統噶達渾等私行射生降一等輕車都尉明年上親政復爵如故九年遇恩詔晉二等男十一年僞晉王李定國自廣西犯廣東上遣朱瑪喇爲靖南將軍以敦拜

佐之統兵往征時定國擁衆新會據山峪立寨平南王尙可喜先以兵防禦未及戰敦拜同朱瑪喇至遂合兵進剿破賊巢斬獲甚衆復追至橫州江岸定國遠竄獲賊衆十六馬二百餘所陷郡邑悉復凱旋敘功晉爵二等子得旨從優再議晉一等子會有疾乞休上念其勤勞年久加太子太保以原官致任四十年起爲盛京總兵十七年正月卒賜祭葬如典禮諡襄壯無子以從孫瑚錫布爲嗣襲爵

沈文奎

沈文奎浙江會稽人少時寄養外家冒姓王氏年二十爲明諸生北遊遵化天聰三年太宗文皇帝征明下遵化文奎來歸貝勒豪格攜至瀋陽命直文館後隸漢軍鑲白旗六年貝勒阿濟格等征明至宣化明守臣遣使輸貢議和師還召賜文奎饌問此次和議於爾意云何文奎奏曰漢人以宋轍爲鑒俱諱言和雖以聖主好生之念不忍明國生民塗炭欲安息待時而漢人反以我爲可欺邊塞小臣區區盟誓安足信哉但彼旣民窮財竭盜賊蜂起且去年大凌河陷沒人人膽喪當此危急之際翻然悔禍則允其和議實明國之幸也不然以聖主之威武乘中原擾亂之秋率兵直入黃河以北非明有矣崇德元年特旨甄別內院人員分爲四

等文奎名列一等第二賜人戶及牲畜等物授弘文院學士七年八月以飲醉乘馬失避御前儀仗罪論死上特宥之仍諭以嗣後毋飲酒致有誤順治元年世祖章皇帝定鼎京師授保定巡撫駐正定明三關總兵郝之潤既投誠願除寇自效旋以被劾解任文奎將抵任得其手書且聞其率部卒馳至倒馬關暫駐形跡乖張慮其外連山右流寇釀成禍患特劄諭寬慰曉以禍福旋令總兵吳勝兆率精銳步騎疾馳赴鎮以備不虞而密疏奏請收其所部以圖後效之潤遂留保定交文奎策遣先是畿南未定土賊蜂聚若大名之開州內黃正定之井陘獲鹿保定之束鹿唐完所在千百成羣焚掠村堡文武守吏分剿不遑閒復招撫諭降給劄獎勵而賊勢愈熾一賊聞剿羣賊援拒文奎既莅任訓練標兵飭厲將士與按臣衛周允商摧機宜設策剿撫賊黨趙崇陽等數百人絡繹歸誠會寧晉叛寇韓國璧等抗師負固文奎卽遣崇陽星夜擒剿陣斬國璧殲其逆黨復遣署總兵王燦等討滅香鑪寨賊渠錢子亮喬家寨賊渠趙建英別遣守備劉文選等攻圍深州賊渠于小安晉州賊渠馬數全所至賊巢蕩洗於是冀州賊郭世先保定賊李庫內黃賊李君相順德賊袁三才等數十渠魁一時並就俘戮賊黨解散其投誠驍

健獻械及馬願自效者收標下驅策之畿南始定十二月疏薦明修撰兼給事中陳名夏才學兼優可當倚任章下所司是時保定等府州縣徵納賦課猶沿襲明季舊例有優免太濫致虧正額者亦有取盈攤派刻薄厲民者文奎奏定悉照正條一切陋弊概行禁革又以寧晉莊地利廣租輕多爲各郡邑豪右占據遞年逋欠籽粒銀兩守令代償墊解疏請嗣後凡莊地盡召土著小民佃種立甲徵收豪右紳衿概行禁絕明年正月疏言畿南兵燹之餘民力困竭每歲解京之絲絲等物俱購之別省既難卽得且物貴民貧運解不易請俱改爲折色二月又疏請各衛所地畝錢糧令州縣徵收屯丁兼屬管攝凡軍宅屯莊概入保甲且於邊戍旣裁軍裝雜派之需應行革除諸疏並見採擇四月天津土寇李聯芳張成軒等橫行南皮鹽山閒聚衆千人文奎遣都司楊澄守備徐景山等率精銳閒道星馳擒剿復與天津道張鵬舉等分路追襲擒斬聯芳等九十三人特旨嘉獎旋命調任陝西未赴任復詔仍留保定巡撫五月擢淮揚漕運總督文奎以漕運當明代末年百務隳廢加以江淮寇殘兵虐凋瘵之後今欲規制一新永垂久遠事非易易奏請陛見叩聆聖訓有旨淮揚初定督漕正急著星馳受事殫力經理以副委任

文奎至則淮揚徐三府方遭寇逆高進忠魏用通高升之亂文奎檄調官兵剿撫並用先諭降進忠營將孔道興等八人皆率所屬兵丁戰艦軍械投誠進忠等遂潛遁入海有僞招討鄂報國僞兵部司邦基者假擁立明宗新昌王爲名譌言惑衆於是魏用通高升復突入內河拒捕劫殺鎮臣王天寵率將士奮擊陣斬高升文奎遣遊擊裴應賜與降將孔道興等追斬魏用通於白駒場賊衆殲滅殆盡尋鄂報國司邦基爲其將王大功馬西祿擒縛以獻進忠走崇明納降十二月復擒斬如皋叛渠于錫藩劉一雄等散其餘黨萬餘人海濱底定三年二月奏增設淮北淮南淮西各道標營兵戰艘八月邳州土寇楊秉孝王君實等嘯聚餘黨掠民肆害將攻邳城文奎率淮徐道張兆熊調兵擒斬之十月疏請禁革漕弊其略曰江南蘇松等府徵漕前代以來積弊殊甚有司催徵止及城鄉小戶運船到次先兌民糧里書倉蠹串通旗丁抑勒索小民受累非一官戶儒戶之糧堆貯私家運官旗丁沿門赴兌米色好醜斗斛完欠概置不問此紳衿誤漕之害也府縣吏胥假濟農倉耗米爲名乾沒侵肥臨兌升合無完此吏胥誤漕之害也臣請嗣後不論官戶儒戶濟農名色概令有司與民戶一體督催及時上倉候船領兌如倉

糧驗係乾潔運船刁難不速領兌者領運官重置以法如紳衿豪勢抗不交倉以致稽延漕運者題劾逮問並治有司以不能革弊之罪部議准行且著爲令四年正月以擅免荒田稅賦又瀆請明朝陵寢祀典坐革職五年十二月起補弘文院學士六年正月充纂修太宗實錄副總裁官二月充會試主考官八年閏二月部議文奎於大學士剛林等擅改實錄不行陳奏應革職議政王大臣等覆勘論文奎罪得旨免議四月復受命往淮陽總督漕運七月疏陳漕政四事一曰慎選運官明季世職既裁勢必選用舊弁其身家殷實者又多巧爲規避所餘窮員無幾以致白丁市儈鑽營領運無不逋欠今請一體遴選道府各官毋許徇隱一曰清覈舍餘前明衛所世職裁汰既久所有親族謂之舍餘不入民籍不當軍差今請旗丁十名以舍二軍八爲率以均勞逸一曰合選殷丁一伍之中殷實有限今請自臣衙門爲始不論吏書及生員之餘丁悉令僉選不許隱庇一曰清句黃快屯丁江南各衛軍丁明季編定各差如屯軍領種屯田歲照科則輸糧黃快船丁每年止納丁銀三錢運戶則專供撥運近來運戶稍富厚者皆竄入黃快屯軍借爲護符以致運戶日減僅餘空乏閒丁僉報抵數今請嚴密清句以杜隱漏之弊下

部議行十年十月膠州總兵海時行叛文奎奉命偕直隸河南山東總督馬光輝統官兵進剿軍次永城兩路夾擊俘斬甚衆時行勢窮自殺其黨李文進率子弟及所部赴軍前降文奎以功加一級予廕一子時江北廬鳳淮陽等府州縣水旱相繼被災甚者已奉詔蠲免文奎請將十年漕糧照被災分數議折十年見徵及九年前宿逋酌量蠲免部臣以漕糧爲軍餉儲需萬難議折而鹽通及廬鳳各屬覆勘被災分數尙未詳悉申報亦難議蠲往返咨駁各屬候覆改折至冬盡猶未開徵十一年通泰海濱叛寇朱周錡稱僞號糾衆惑民爲同謀者所首文奎遣兵擒獲悉誅其黨又奏墾江北荒地九千九百餘頃是歲九月以催運稽遲降三級調用尋補陝西督糧道卒於官入祀名宦祠

張大猷

張大猷遼陽人後隸漢軍鑲黃旗太祖高皇帝天命六年大兵克遼陽大猷時爲明千總自廣寧來降授佐領逾年明邊將誘我新附之衆往歸遣人爲閒諜匿游擊郎某所大猷發其事太宗文皇帝嘉之予三等輕車都尉世職天聰九年以所管丁壯缺額論罰鍰崇德三年任刑部理事官尋擢右翼漢軍副都統四年正月

大兵征明錦州以礮擊破城旁一臺臺中敵兵尙拒守既而乘閒遁去大猷坐防範不嚴部議革職罷任得旨從寬罰鍰六月更定漢軍旗制授鑲黃旗副都統五年隨睿親王多爾袞圍錦州率本旗兵攻取五里臺及晾馬山馬家湖諸處又克金塔口臺六年隨鄭親王濟爾哈朗圍錦州會松山騎兵突出奪我紅衣礮大猷擊卻之復同都統劉之源等攻克塔山杏山及附近諸臺論功晉二等輕車都尉七年六月擢兵部參政十月隨貝勒阿巴泰征明師至渾河築橋以濟明總督范志完集兵拒戰大猷與副都統祖澤洪擊敗之八年隨鄭親王征明寧遠取前屯衛中後所二城晉一等輕車都尉世祖章皇帝順治元年同都統葉臣劉之源等征山西追逐流賊李自成之將郭某擒斬之合兵攻克太原府城復同都統李國翰招撫郡邑賊衆踞黃河濱立柵大猷攻毀之賊潰遁獲船十有五二年隨大軍定江南同都統吳守進率兵征浙江至石門縣明兵自錢塘乘夜來襲我營大猷奮擊卻之進取嘉興府同都統格恩圖擊敗城中出戰兵遂克其城先後取揚州崑山常熟江陰諸郡縣皆督兵以礮克城有功三年二月命同侍郎巴山率兵鎮守江寧總管漢軍及綠旗兵旋授爲提督江南總兵官五月敘元年以來軍功晉

爵三等男四年明故官侯峒曾之子侯元澗等潛遣人通明魯王朱以海於海島取僞鎮黃斌卿書以歸爲柘林遊擊陳可所獲大猷與巴山以其書入奏得旨嘉獎諭曰爾等嚴察亂萌具見公忠盡職六年率兵剿六安州山賊賊渠張福寰自明季結黨倡亂聯踞英山霍山倚險立寨負固有年至是江南總督馬國柱以兵進剿大猷與巴山率兵會之陣斬福寰諸賊寨俱翦平國柱奏捷謂大猷身先士卒履險摧鋒功居第一屢遇恩詔晉爵至三等子世襲罔替九年正月卒於官以其子應庚襲爵

李思忠子塞白理

李思忠先世居鐵嶺父如挺明寧遠伯成梁之從姪也初官太原同知後罷歸寓居撫順我太祖高皇帝天命三年大兵克撫順思忠來歸明年師克開原鐵嶺如挺家居與弟如梓及子一忠存忠俱死焉六年太祖定遼陽敕思忠收集其族人之流亡者思忠招徠人戶並復故業上深嘉之授佐領予騎都尉世職尋以擒獲閒諜功晉世職至三等輕車都尉天聰三年太宗文皇帝親統大兵征明取遵化命思忠與參領英固勒岱等留守旣而明將謝尙忠等來攻城思忠開門出戰敵

兵三進三卻時大安口三屯營等十一城既降復叛明監軍道張春等合步騎犯灤州貝勒阿敏等怯不赴援灤州失守士卒奔潰阿敏大驚並檄遵化守將等棄城東歸值遵化軍中火器營猝爲敵火箭所焚衆心驚懼思忠戒無輕動徐結陣出城招明官之降者四人以行身自爲殿及出關無一亡失者既歸上命議阿敏等棄城罪以思忠爲偏裨非能主其事而貸之五年隨都統楞格哩等征明南海島未至遇明兵戰於茨榆坨擒十一人獲戰艦五敵復率衆來奪思忠迎戰礮傷額不爲動仍奮擊敗之晉世職爲一等輕車都尉九年考察戶口思忠所轄之沙河堡郎寨增丁百十有三晉爵三等男尋奉命駐守蓋州城崇德二年疏言遼陽各城今悉爲丁夫修築而蓋州又復頽圯部議丁夫不足應調餘丁供役查蓋州城地處邊陲軍士防守靡寧其餘丁僅堪耕種今若棄農就役不過用土補苴而城工不堅歲功亦廢不若就應修處所勤加巡視守護俟各城歲工再集丁夫造甃修築則城垣永固而人得及時盡力農事得旨如所請行七年以漢軍分隸八旗思忠隸正黃旗世祖章皇帝順治元年隨豫親王多鐸征流賊李自成破潼關隨征江南克揚州招撫江北得十州縣三年二月奉命爲西安駐防副都統三月

擢陝西提督七年八年三遇恩詔晉爵一等男兼一雲騎尉十一年以年老致仕十四年七月卒賜祭葬如例子六人次子蔭祖別有傳第三子顯祖襲爵世祖賜名塞白理授二等侍衛任參領聖祖仁皇帝御極擢隨征江南左路總兵官康熙六年遷廣東水師提督八年改浙江提督招降海賊鄭錦之僞寧遠將軍林伯馨都督施轟等十三年逆藩耿精忠反塞白理疏言耿逆交通三桂及鄭成功沿海所在敵踪皆可揚帆直入江南之崇明孤懸海外尤爲可虞又黃巖圍困日久請援孔亟寧海象山新昌餘姚四縣賊衆蠡起恐寇拒寧海斷我餉道請速援台州護守寧波疏入並奉敕授方略調兵防禦尋隨貝子傅喇塔擊走賊將會養性等於台州十四年九月卒於軍年四十有二賜祭葬如例祀浙江名宦祠子李俊襲爵

柯永盛 弟永昇

柯永盛遼陽人隸鑲紅旗漢軍副都統柯汝極從子也太宗文皇帝崇德六年任佐領隨大軍圍錦州以礮攻克晾馬山臺及杏山塔山二城七年奉命同副都統馬光輝鑄神威礮八年隨鄭親王濟爾哈朗征明取前屯衛中後所二城敘功予

騎都尉世職世祖章皇帝順治元年任刑部理事官大軍初定山東授膠州總兵至則剿平昌樂土賊秦尙行趙慎寬等流賊李自成裨將趙應元詭就侍郎王鼐永招撫入青州害鼐永踞城猖獗永盛率兵赴援同副都統和託李率泰駐兵城外輕騎入城設計誘執應元斬之復率兵圍高密擒斬僞元帥張輿二年濰縣土賊張廣既降復叛糾衆數千犯萊州永盛遣遊擊楊遇明擊敗其衆廣中鏃死餘賊悉平三年調江寧總兵總督洪承疇遣永盛領兵會剿山西叛賊南贛巡撫苗胙土奏言江西諸郡叛服靡常贛州爲全省要區請留永盛鎮守詔調永盛南贛總兵四年正月湖廣興國州土賊柯抱衝陳珩玉等殺武昌同知張夢白寇掠江西武寧永盛遣將分剿連破賊寨抱衝珩玉並就擒斬時明桂王朱由榔據湖南江西之石城寧都雩都瑞金長寧安遠諸邑叛應之倚山結寨四出劫掠永盛遣副將劉伯祿徐啟仁參將董大用游擊孔國治等次第剿平之八月擢湖廣提督五年江西總兵金聲桓叛興國孝感雲夢黃安麻城蘄州諸土賊亦皆蠢動永盛移兵防守要地分遣參將卽乘鸞遊擊張國忠等剿平賊寨十年流賊張獻忠遺黨李定國孫可望等掠湖南寧遠大將軍貝勒屯齊統師由衡州進征永盛督兵

繼其後策應援剿屢敗賊衆擒斬無算遇恩詔晉世職三等輕車都尉十八年調山西提督聖祖仁皇帝康熙三年考滿加左都督七年永盛以年老乞休上慰留之尋以宣力年久加太子少保八年致仕十四年正月卒賜祭葬如例子鍵襲世職弟永昇由員外郎出任湖南糧儲道十九年遷江西按察使二十二年遷安徽布政使二十七年二月擢湖廣巡撫時裁湖廣總督令督標兵老弱者歸農強壯者候缺食糧五月永昇甫之任裁兵夏逢龍結衆作亂突入巡撫廨署遇拒阻者輒刃之傷永昇臂奪其印復傷永昇足仆地悉驅其親屬及家人出走搜掠財物永昇乘間自縊死子鉉由九江走安慶以其事訴於巡撫楊素蘊入奏賜卹如例世宗憲皇帝時以永昇入祀昭忠祠

陳泰

陳泰滿州鑲黃旗人姓鈕祜祿氏額亦都孫也父曰車爾格陳泰初以護軍參領從征攻明錦州遇寧遠援兵先衆直入斬執纛者獲其纛焉天聰三年從太宗文皇帝征明北京駐軍德勝門外分兵攻巡撫袁崇煥營遇伏奮擊有斬獲五年大軍圍大凌河城明監軍道張春率衆赴援陳泰設伏擒其偵卒復以步戰殲敵衆

崇德元年從征朝鮮與副都統薩穆什喀乘夜襲黃州守將營二年隨睿親王多爾袞率師征明敗明兵於豐潤縣攻內監馮永盛總兵侯世祿營皆拔之又以護軍三十敗總兵祖大壽騎卒百餘俘獲紀功五年隨征明錦州有降明蒙古蘇班代來歸陳泰率之進攻杏山敗敵兵獲牲畜六年圍錦州敗松山兵我樵採者爲敵兵所困陳泰率兵六人援之出又敗敵兵之來襲我後隊者連戰皆捷遂克其郭是年由騎都尉世職晉三等輕車都尉七年從圍錦州掘壕困松山明兵夜犯正黃旗蒙古營陳泰往援擊敗之八年隨貝勒阿巴泰等征明敗總兵馬科於渾河築浮梁以濟明總督范志完以兵來拒復擊之至山東攻克東阿汶上寧陽三城晉二等輕車都尉順治元年從入山海關破走流賊李自成明年世祖章皇帝詔敘勳臣晉一等輕車都尉四年授禮部侍郎從征湖廣敗流賊一隻虎於荊州尋奉命爲靖南將軍同副都統棟阿賚征福建至則擊賊渠曹大鎬敗之又於建寧敗賊張耀星步兵四千克同安平和二城五年破海敵鄭彩兵彩遁入海復長樂連江二縣擒僞總督顧世臣等十一人於興化斬之以次克復郡縣全閩底定奉旨嘉獎六年授護軍統領七年論功晉二等男擢刑部尙書八年二月遷吏部

尙書三月授國史院大學士七月以加上皇太后尊號誤增恩詔赦款奉上詢問以有例對下廷議坐巧飾誑奏罷任降世職爲一等輕車都尉九年正月起爲禮部尙書二月充會試主考官三月授鑲黃旗都統先是兩遇恩詔晉三等子兼一雲騎尉旋以吏部覃恩升襲過濫命改爲一等輕車都尉兼一雲騎尉至是奉特旨晉二等子十年授寧南靖寇大將軍征湖廣十一年改吏部尙書兼都統仍任大將軍十二年流賊張獻忠餘黨孫可望遣賊帥劉文秀與賊將盧明臣馮雙禮等帥衆六萬樓船千餘分兵犯岳州武昌而文秀以精兵攻常德陳泰遣護軍統領蘇克薩哈設伏以待參領呼尼牙羅和先與賊遇擊敗其衆復令參領蘇拜希福等並以舟師迎擊八旗繼進三戰三捷賊復列艦拒戰發伏兵擊之焚其船賊大敗別遣兵破賊衆於德山下師抵龍陽縣賊又集兵二千來犯我兵奮剿賊潰奔明臣赴水死雙禮被創遁文秀走貴州降其僞副將等四十餘員兵三千餘紮功晉世襲一等子兼一雲騎尉未幾以病卒於軍明年正月世祖召凱旋諸臣勞之以酒諭曰大將軍陳泰南征效力卒於戎行朕甚傷悼因揮淚不已復諭學士麻勒吉等曰若大將軍班師生入國門朕將親酌宴勞不意中途棄捐不復相見

爾等以此一觴奠大將軍靈次少抒朕追悼之懷諸臣及左右侍從無不感涕賜祭葬如典禮諡忠襄以其子尼滿襲爵旋卒無嗣以弟喇哈達之子白啟爲後襲焉

阿爾津

阿爾津伊爾根覺羅氏世居穆溪父齊瑪塔太祖高皇帝時來歸隸滿洲正藍旗任侍衛阿爾津初與其從兄阿山屢從征伐積功授二等輕車都尉世職任參領太宗文皇帝天聰四年都統納穆泰等駐守灤州明兵來攻阿爾津力戰弗能卻敵發巨礮擊城城將墮納穆泰等度不能支率衆走永平阿爾津隨行遇敵斬殺甚衆及永平復失守上命盡繫諸將以阿爾津於灤州城內曾力戰旣出復能殺敵特賞之九年大軍征察哈爾阿爾津隨貝勒岳託駐歸化城有博碩克圖汗之子結阿祿部喀爾喀部陰與明通阿爾津及參領吳巴海等擒其往來使者並獲馬駝及貂皮等物晉世職一等輕車都尉崇德元年上親征朝鮮國王李倬遁入南漢山城阿爾津率精銳追躡敗其援兵於要隘二年率每旗親軍五人往鐵山緝明哨卒尋列議政大臣管護軍統領事三年隨豫親王多鐸證明過中後所明

總兵祖大壽以兵襲追阿爾津殿後部卒被殺及王督兵還擊阿爾津戰弗力又不收載亡卒骸骨革世職籍家產之半仍管護軍統領事五年隨大軍圍錦州以離城遠駐坐罰鍰六年明總督洪承疇守松山阿爾津屢擊敗其步騎兵敵走保一臺阿爾津率三旗護軍攻克其臺斬敵將三人盡殲其衆復破敵營三并援出前鋒之被圍者上嘉其善戰仍授三等輕車都尉世職七年從征寧遠敗城中出戰兵八年同護軍統領哈寧阿等往征虎爾哈等部攻克博和哩諾爾噶勒都里三屯其大噶勒達蘇小噶勒達蘇綽康纏能吉勒四屯皆降俘獲無算師還得優賚順治元年隨大軍入山海關擊敗流賊李自成率前鋒軍追及於安肅縣斬殺甚衆二年晉二等輕車都尉兼一雲騎尉尋隨豫親王討流寇至潼關賊將劉芳亮來窺我營阿爾津率五旗將士破其衆賊望風奔潰我師遂入關賊渠李自成焚所居室挈子女奔商州阿爾津將兵往追不及別圍賊三百於途盡殺之乃還復從征江南有功晉三等男三年五月同護軍統領鼇拜等擊敗叛鎮賀珍兵於漢中張獻忠自四川率馬步兵來戰阿爾津與護軍統領鼇拜等連擊敗之時正藍旗兵爲賊困復與鼇拜等往援之出進攻敘州所至克捷五年六月晉一等男

十月率兵赴宣化平赤城叛兵六年解護軍統領任七年復任護軍統領八年與都統額克青等舉發英親王阿濟格罪狀初睿親王多爾袞薨英親王以阿爾津舊隸豫親王麾下使人召之阿爾津因睿親王嘗禁諸王屬下人與英親王往來謂使者曰吾弗至王所三年矣當告之睿親王屬下大臣遂詢之額克青等僉曰宜往覘其言動乃往英親王責其不附己且妄爲大言阿爾津告額克青等於是共訐英親王言動悖亂諸罪鞫實幽禁阿爾津得旨嘉獎旋晉爵二等子兩遇恩詔晉一等子加一雲騎尉九年授西安將軍鎮守漢中尋命爲定南將軍移剿湖廣賊寇十一年由護軍統領遷都統十二年授寧南靖寇大將軍統師之荊州時歸州賊姚黃等出沒宜昌襄陽間阿爾津率兵往剿連破走之招撫兵民萬餘分置枝江松滋諸邑十三年同都統卓羅等征辰州賊聞大兵至棄城走追破之於瀘溪賊盡竄入山谷斬獲無算遂復辰州凡寶慶永順諸土司悉籍所轄人戶來降先是辰州屢下緣守兵寡輒復爲賊陷至是阿爾津議移常德鎮兵守之而別移兵駐常德爲應援否則以所部兵留守辰州咨商經略大學士洪承疇承疇以常德兵力難分禁旅不宜擅留覆之阿爾津復移咨曰辰州境內之民及各土司

相率歸順若增兵守之則沅靖可達沅靖一得可進滇取黔今棄而不守賊必復來我士馬疲煩豈能數踰越險阻且百姓既歸附一旦棄之去非惟失向化之心亦無以示信於後也承疇以其言疏聞上命阿爾津班師以征守事委承疇速籌十五年正月奉命統本旗兵隨信郡王多尼進取雲南五月病劇卒於軍贈太子太保諡端果立碑如例子濟世襲爵

李國翰

李國翰漢軍鑲藍旗人父繼學初以商人隨明經略楊鎬軍通使我朝太祖高皇帝天命六年大兵取遼陽繼學來歸授都司以副將劉興祚婪索民財劾罷之復屢擒間諜追殺逃人敘功予三等男爵以年老致仕國翰襲父爵任侍衛賜號墨爾根太宗文皇帝天聰三年從征明北京還攻永平先衆步戰有斬獲五年圍大凌河城內兵突出國翰率兵戰卻之旋攻克其臺又擊敗民兵之自錦州赴援者九年考察所管人戶以善於拊循晉二等男崇德三年七月任刑部理事官十月隨貝勒岳託證明於邊外發敵所藏火藥數處比入邊遇敵千餘人據山列陣國翰率兵奮擊敗敵獲馬四十進克牆子嶺轉戰至山東克濟南府城師還攻望都

獲鹿二城並以礮擊毀其垣四年授鑲藍旗漢軍副都統五年隨睿親王多爾袞圍錦州攻克呂洪山臺擊敗山口步兵敵兵自松山遁入高橋迤南山臺國翰偕衆攻克之斬百餘級生擒副將王希賢參將崔定國等七年明總督洪承疇就擒總兵祖大壽以錦州降移師攻克塔山杏山國翰並在事有功晉一等男加一雲騎尉是年擢鑲藍旗漢軍都統八年隨鄭親王濟爾哈朗取明前屯衛中後所二城敘功晉爵三等子世祖章皇帝順治元年五月大兵旣擊敗流賊李自成定燕京國翰同都統劉之源祖澤潤等率兵剿滅饒陽土賊康文斗郭壯畿等進征山西時李自成遁陝西其黨猶分踞太原平陽等府國翰同都統葉臣等合兵攻克太原府城復分兵剿賊衆於汾西縣山西旣平凱旋賚白金五百兩尋隨英親王阿濟格征陝西屢敗賊衆自成遁湖廣移師追剿攻賊應山縣進征武昌同都統金礪等奪賊船數百二年十一月命同都統巴顏率兵征四川甫至西安值叛鎮賀珍自漢中糾賊黨孫守法等來犯國翰與駐防西安內大臣何洛會期師兩路夾擊斬級無算三年三月肅親王豪格統師至西安遣國翰同巴顏搜剿延安餘賊追至張果老崖掘壕困之乘夜攻克其寨殲賊渠獲馬二百餘遂隨肅親王征

四川滅流賊張獻忠於西充復率兵渡涪江擊敗僞總兵袁翰五年四月命爲定西將軍同平西王吳三桂鎮漢中六年僞王朱森淦僞侯趙榮貴糾衆萬餘犯階州國翰先衆趨擊陣斬森淦榮貴尋擊僞將軍王永強斬級數千獲駝馬數百復宜君同官蒲城宜川安塞清澗等縣上深嘉其勇略並諭以自後但發縱指示不必身先士卒時叛鎮姜瓖踞大同其黨劉登樓張鳳翼任一貴謝汝德萬鍊等分踞城邑國翰遣兵會剿殲賊甚衆招撫河東諸處攻復府谷縣擒斬僞經略高有才及僞官三百餘人招降僞總兵郝自德等先是張獻忠既滅其黨孫可望劉文秀白文選李定國等竄遁旣而降附明桂王朱由榔與其所設官屬並據川東川南九年國翰同三桂督兵攻復成都嘉定擒斬僞總兵李明廷林時泰龍名揚等文秀文選皆敗走別遣將分徇重慶敘州皆下之僞將軍王復臣等糾猓羅列象陣合衆五萬犯保寧薄城下國翰自緜州聞急趨援率兵奮擊斬復臣及賊萬餘捷聞頒賜紫貂冠服鍍金甲冑囊韃等物及鞍馬敕部覆敘初國翰以征剿自成獻忠兩敍功復兩遇恩詔洊晉一等伯至是晉三等侯可望懲保寧之敗與定國併力犯湖廣不復窺四川國翰奉詔同三桂還鎮漢中而僞侯譚文譚洪譚詣與

自成遺黨劉二虎等聯結爲寇尋復陷重慶使僞都督杜子香據之十五年三月國翰同三桂進征由南郡西充至合州杜子香率衆迎戰敗遁遂復重慶以總兵嚴自明率所部留鎮而自與三桂進兵桐梓僞總兵王友臣迎降遂趨遵義僞將軍劉正國據險隘拒戰我師擊之潰由水西遁入雲南遂取遵義及所屬州縣五月進擊僞將軍楊武僞總兵梁亦英等於開州斬級千餘獲其象馬器械開州及附近城邑俱降水西土司安坤等並歸順時寧南大將軍宗室洛託與經略洪承疇已取貴陽國翰與三桂奉詔俟信郡王多尼征南將軍卓卜特兩路兵並進雲南乃還駐遵義七月疾卒喪至京命內大臣致奠贈太子太保賜祭葬如典禮諡敏壯長子海爾圖襲爵世宗憲皇帝時以國翰入祀賢良祠其侯爵既襲三次循例改襲三等伯今上乾隆十五年加伯號曰懋烈

濟什哈

濟什哈滿洲正黃旗人姓富察氏佐領木科里之次子也初任佐領太宗文皇帝崇德四年擢授護軍統領五年隨鄭親王濟爾哈朗征明錦州遇松山兵邀戰同參領布丹希爾根囊古等擊卻之尋駐義山衛我兵屯田上誠諸將勿與敵迎戰

惟固守營壘俟敵近乃禦擊會敵猝犯鑲藍旗營濟什哈越鑲紅旗營助戰以擅離汛地論罪籍家財三之一罷護軍統領旋奉命同副都統席特庫率護軍並外藩蒙古兵征索倫部擒部長博穆博果爾並獲其家屬人衆及馬牛數百六年正月凱旋遣官迎於北驛館賜宴勞之是年復隨鄭親王圍錦州屢擊敗松山敵兵七年授正紅旗蒙古副都統八年兼任戶部參政世祖章皇帝順治元年大兵入山海關濟什哈同都統恩格圖擊敗流賊李自成追至望都敘功授騎都尉世職二年隨端重親王博洛征浙江既下杭州以副都統駐守時明福王朱由崧已滅其大學士馬士英總兵方國安踞嚴州糾衆二萬餘屢犯杭州濟什哈督兵禦擊五戰皆捷尋還京仍任工部侍郎四年考滿加一雲騎尉五年三月命率兵駐防東昌府尋以海賊鄭彩等寇掠福建移兵隨靖南將軍陳泰征剿賊踞長樂連江同安平和等縣並合兵攻復之敘功晉二等輕車都尉七年四月調刑部侍郎十二年二月遷本部尙書兩遇恩詔晉爵三等男九年授正紅旗蒙古都統仍兼刑部尙書列議政大臣十年三月解尙書任九月膠州總兵海時行叛濟什哈奉命與副都統瑚沙率兵往剿師未至時行奔宿州漕運總督沈文奎與山東總督馬光輝

合兵剿擊時行窮蹙降伏誅詔濟什哈移兵鎮守湖南十一年召還復署刑部尙書尋仍命專管都統事十四年四月調滿洲都統十二月命率副都統四員護軍參領八員赴寧南大將軍宗室羅託軍前证明桂王朱由榔十五年大兵三路並進上以征南將軍卓布泰自廣西進征貴州所部兵漸少命濟什哈率將士助之遂進次都勻連敗僞晉王李定國等拒戰賊衆合湖南四川兩路師攻克雲南城逐由榔入緬甸十六年頒賚有功諸將濟什哈等賜蟒服鞍馬十七年以勘鞫隨征將士功罪不實降世職爲一等輕車都尉停其敘功十八年山東土賊于七糾黨踞棲霞縣之距嶠山出掠郡邑聖祖仁皇帝命濟什哈爲靖東將軍率兵圍其山寨斬賊無算于七竄入海賊平康熙元年五月班師八月卒賜祭葬如例子阿祿襲職六十年阿祿任西安副都統上疏爲濟什哈請諡允之追諡勇壯

朱瑪喇

朱瑪喇姓碧魯氏世居葉赫太祖高皇帝時率所部虎爾哈人來歸隸滿洲鑲白旗任佐領天聰三年隨大兵入明邊至遵化擊敗敵兵閱三日太宗文皇帝親臨遵化城明山海關兵赴援將入城朱瑪喇率哨卒十人至擊斬甚衆至燕京遇明

總兵滿桂黑雲龍麻登雲孫祖壽等軍入大紅門同參領音達戶齊額駙揚古利擊卻之旋克永平復攻昌黎奮勇先登身被六創敍功授騎都尉世職尋緣事削去五年圍大凌河城明監軍道張春赴援朱瑪喇同參領鄂諾連戰破其前後隊六年從征察哈爾獲布延圖台吉於穆魯哈岱殲其從者百餘人俘其妻子以歸七年隨貝勒德格類岳託攻旅順口率護軍十人乘船登岸擊甕城步軍統領巴奇蘭曰誰能用命先登者朱瑪喇與佐領雍舜超躍而上向敵大呼曰我朱瑪喇登城矣連被三創不少卻卒拔其城上爲嘉歎親酌金卮以賜復授騎都尉世職九年隨貝勒多鐸征明夜設雲梯攻錦州被創甚劇崇德元年征朝鮮白山巔力攻奪其寨門大兵繼之不戰而入遂取一寨又率兵征明敗其總兵海某軍取四縣師還擊敗開平兩營兵三年七月授兵部理事官十月從圍錦州率甲士四千人攻襲廣寧北岩峙山山寨收降駱駝山兵衆又與都統石廷柱招降大凌河北山四寨六年同參領禧福奉命往張家口董理互市事及還法司劾其以私財市貨物向藩部人索馬諸罪狀論死籍沒得旨寬宥革世職輸所市貨物入官尋隨鄭親王濟爾哈朗圍錦州敗敵騎之來奪我紅衣礮者敵騎復犯我軍朱瑪喇注

矢射之應弦而仆敵衆退走七年與前鋒統領沙爾虎達征松阿里江虎爾哈部落招降喀爾喀木等十屯俘丁壯千餘及牲畜輜重以歸命禮部官迎勞宴賚之世祖章皇帝順治元年朱瑪喇任參領率兵從睿親王多爾袞入山海關擊敗流賊李自成七月授正藍旗滿洲副都統尋擢兵部侍郎明年正月敍克明燕京破流賊及克錦州松山功復授騎都尉世職十一月與副都統和託等駐防杭州任左翼副都統時明福王朱由崧之大學士馬士英竄嚴州與其總兵方國安糾衆犯餘杭朱瑪喇率兵擊走之還距杭城三十里突遇土賊復大破其衆國安等仍聚衆數萬於江東諸山及杭州之朱橋范村所在肆掠朱瑪喇同總兵田雄副將張杰等分兵進剿賊悉平三年從征福建與護軍統領敦拜擊敗僞總兵黃某等軍四年考滿加一雲騎尉五年隨征南大將軍譚泰剿江西叛鎮金聲桓敗賊兵七萬又與都統何洛會及沙爾虎達連敗賊兵焚其戰艦千三百餘招撫九江一府五縣七年三月遇恩詔賜敕授三等輕車都尉世襲罔替又以平江西功晉世職爲二等八年擢正白旗蒙古都統遷吏部尙書兩遇恩詔晉三等男十年冬吏部擬銓廢員房之麒爲山東驛道之麒嘗任山東按察使罷職占籍青州爲山東

巡按馮右京列薦起用至是改歸直隸東明籍有旨詰問吏部以直隸縉紳保結可憑覆奏會給事中許作梅劾之麒於青州置田宅朦朧就銓復奉旨嚴飭察核乃議之麒應革職上以部臣於銓授時不行詳勘及詰問仍支飾命王大臣察奏朱瑪喇坐罰緩罷尙書任專管都統事十一年流賊張獻忠餘黨孫可望李定國自雲貴寇廣西分兵犯廣東連陷郡邑朱瑪喇奉命爲靖南將軍同敦拜往征之賜敕諭曰賊犯廣東故特遣爾等爾等至唯以安民爲首務嚴飭兵將恪遵紀律賊若竄入廣西可與平南靖南兩王及總督李率泰相機酌議剿撫若入雲貴則擇善地休兵奏聞候旨至遇賊對壘時爾二人居中調度毋以輕謀致敗用全我師是時定國寇新會平南王尙可喜靖南王耿繼茂等先率兵往援至三水縣分布沿江隘口以待大軍比朱瑪喇至遂合兵進剿敗賊於珊洲斬其副將一擒賊將十餘人獲首級百五十餘旣抵新會定國糾步騎四萬分據山峪列礮象拒戰朱瑪喇遵上方略指揮將士奮勇衝擊賊兵潰奔定國復出兵四千自山巔馳下迎截我師又擊敗之奪其山定國遁走十二年正月奏捷得旨嘉獎二月定國竄高州朱瑪喇與敦拜授策副都統畢力克圖鄂拜等分兵追躡敗定國於興業再

敗之於橫州定國渡江焚橋驚走我師躡之三戰皆捷定國率殘兵走賓州入南寧竄安隆朱瑪喇與尙可喜等遂復高雷廉三府三州八縣及粵西二州四縣獲象十六及馬二百餘器械無算下部議敘復賜敕諭曰頃者逆賊李定國棲據南方頻侵兩粵二王及諸臣宣厥忠勇謀操必勝於新會等處殺賊既多復追至橫州江岸降其軍將獲其器械克定高雷廉等府州縣先後屢捷功績懋著朕甚嘉之特賜敕諭以示獎勵爾等其益勵忠勤垂名永久九月班師上召見於南苑諭大學士馮銓等曰朱瑪喇以元戎統領大兵出征廣東捷歸今五旬矣如此年齒建立大功殆福人也賜茶獎勞明年部臣敘功擬晉世職一等男兼一雲騎尉上以朱瑪喇功多不應循常格議敘特諭吏兵二部曰都統朱瑪喇等率兵擊賊李定國雪衡州桂林之忿快慰衆心朕甚嘉悅其軍功再加議敘尋議晉爵三等子十五年十一月以年老致仕康熙元年卒年五十有八賜祭葬諡襄敏次子博通鄂襲爵

愛星阿 子富善

愛星阿滿洲正黃旗人姓舒穆祿氏額駙揚古利孫也順治四年襲父塔瞻一等

公八年世祖章皇帝追念揚古利功加給愛星阿三等輕車都尉俸尋授領侍衛
內大臣十六年大軍征雲南明桂王朱由榔與其黔國公沐天波等奔緬甸僞晉
王李定國奔孟良僞鞏昌王白文選奔木邦世祖命吳三桂移平西藩屬鎮雲南
十七年三桂疏請發兵入緬滅由榔以除邊患愛星阿奉敕爲定西將軍與都統
卓羅果爾欽遜塔護軍統領畢力克圖費雅思哈前鋒統領白爾赫圖等率禁旅
會同三桂進征十八年九月督兵次大理秣馬逾月出騰越州取道南甸隴川猛
卯十一月至木邦擒白文選所遣之僞副將馮國恩訊知李定國走景線文選與
定國不睦屯兵錫箔江濱愛星阿令白爾赫圖費雅思哈果爾欽遜塔畢力克圖
等先簡精銳疾馳三百餘里至江濱文選已毀橋遁走茶山大軍繼至結筏以濟
別遣總兵馬寧沈應時追剿文選愛星阿同三桂領兵趨緬先是三桂屢檄諭緬
人令擒獻由榔緬酋莽猛白盡殺由榔從官沐天波王維恭馬吉翔魏豹等數十
人密使人守由榔謀生擒以獻十二月大軍次奮挽坡離緬城六十里緬使人詣
軍門請遣兵百人薄城愛星阿遣白爾赫圖率前鋒百人進次蘭鳩江濱復令畢
力克圖等率護軍二百居後策應緬人聞大兵將薄城以船載由榔與其親屬及

故從官妻女獻之軍前時文選爲馬寧等追及於猛養度不能脫率衆數千降定國竄死猛獵康熙元年奏捷聖祖仁皇帝優旨嘉獎諭以所俘獲委三柱區處愛星阿振旅還京仍爲內大臣加少保兼太子太保增紀軍功予世襲一等公敕書三年二月卒恩卹其家白銀三千兩賜祭葬如典禮諡敬康子富善襲一等公爵十九年授領侍衛內大臣三十五年二月聖祖以噶爾丹背約肆逞分路進討命撫遠大將軍費揚古出西路親統大軍出中路富善領鑲紅旗兵隨御營駕駐沙河諭富善曰古北口一路兵衆以爾統率所過城池村舍遵朕法令毋絲毫擾累其有以捕獸馳騁竭馬力者並飭禁之四月駕駐西巴爾臺離噶爾丹所居之克魯倫河計程五日議者謂宜俟西路兵會剿富善奏言西路兵至尙遲時日恐賊聞風逃竄卽以中路兵剿賊未爲不足宜乘其不備速遣精兵擊之奏入稱旨命仍進征克魯倫河會噶爾丹知上親征盡棄其廬帳器械潰竄上已密諭費揚古等絕其歸路先整兵特勒爾濟口以待陣斬二千餘級噶爾丹僅以身免厄魯特部衆千餘來降上仍命班師每行營閱選駝馬徵輸芻粟富善承旨以行咸當上意敍功加太子太保嘗扈蹕至會岐口有疾上親臨視賜醫藥四十七年卒賚白

金二千兩遣官經紀其喪予祭葬如典禮以其子海金襲一等公雍正八年敕建賢良祠愛星阿富善並入祀乾隆元年追諡富善曰恭懿

卓羅

卓羅滿洲正白旗人姓佟佳氏三等男巴篤理第三子也天聰八年襲父爵兼任佐領崇德三年隨貝勒岳託征明燕京明太監馮永盛率兵拒戰卓羅以三百人擊敗之進征山東屢敗敵衆四年略錦州入其郭擒守備一人六年大軍圍錦州明總督洪承疇率衆赴援駐松山卓羅隨武英郡王阿濟格擊敗之七年復破松山兵於山北八年授刑部參政順治元年從入山海關擊敗流賊李自成二年敕功晉一等男任正白旗副都統三年隨順承郡王勒克德渾征湖廣敗自成餘黨一隻虎於荊州凱旋賚黃金十兩白金三百兩先是明桂王朱由榔據武岡以總兵王進才等分據長沙衡州寶慶上命恭順王孔有德統師征之至是遣卓羅同副都統藍拜赴有德軍協謀進剿四年自岳州趨長沙進才聞大兵至遁走卓羅同藍拜追擊敗之遂與智順王尙可喜擊敗僞總兵徐松節軍統舟師還長沙遣參領張國柱扎蘇藍等敗僞總兵楊國棟於天心湖卓羅會合孔有德軍趨祁陽

由熊巖嶺入城斬僞總兵副將各一進攻武岡州擊敗僞安國公劉承允於夕陽橋承允降由榔遁桂林遂取武岡五年師還復賚黃金十兩白金三百兩六年考滿加一雲騎尉旋擢禮部尙書列議政大臣七年調都察院左都御史八年二月兼鑲白旗滿洲都統閏二月上甄別部院大臣以卓羅緘默曠官罷左都御史專任都統九月擢吏部尙書三遇恩詔晉爵至一等子兼一雲騎尉九年十一月授靖南將軍率兵征廣東旋以廣東漸平召還十一年復任吏部尙書十二年八月命同都統阿爾津率兵駐防荊州初朱由榔僭號於粵孫可望李定國白文選等皆以張獻忠餘黨附由榔竊王號至是踞辰州十三年八月卓羅同阿爾津自澧州常德進征辰州可望焚舟夜遁卓羅與副都統泰什哈護軍統領費雅思喀等率兵渡江攻之發其伏追擊至瀘溪屢戰破之僞參將段文科及守備四員來降復辰州十四年可望率所部赴長沙歸順定國文選等隨由榔竄入雲南十五年寧南大將軍宗室羅託自湖南定貴州軍貴陽上命平西王吳三桂由四川進征南將軍卓布泰由廣西進而卓羅隨信郡王多尼以師會之規取雲南十六年正月合攻雲南城下之屢敗文選定國兵遂克永昌騰越追剿至南甸乃還詔留卓

羅及都統伊爾德分八旗兵駐守雲南賚蟒服鞍馬時由榔奔緬甸定國竄踞孟
良復謀入犯約降將高應鳳爲內應以由榔印劄誘元江土司那嵩倡叛十月卓
羅同前鋒統領白爾赫圖參將穆克爾等擊敗賊衆於磨隴口賊將馬秉忠孫應
斗馬忠君皆敗卻進師鑿壕困之以雲梯克其城斬應鳳於軍那嵩自焚死殲其
黨無算十八年定西將軍愛星阿同吳三桂征由榔於緬甸詔卓羅駐守雲南是
年十二月緬人執由榔以獻雲南平康熙元年四月奉詔率兵駐守雲南八旗兵
還京敘功晉爵二等伯世襲七年卒予祭葬如典禮諡忠襄以其孫赫特赫襲

清史列傳 卷五

大臣畫一傳檔正編二

范文程

范文程瀋陽人曾祖鏢明嘉靖時官兵部尙書祖沈瀋陽衛指揮同知父楠未仕
文程少好讀書穎敏沈毅與兄文案並爲生員天命三年大兵克撫順文程年二
十有一太祖高皇帝見而器之召與語知其熟於當世之務使隨行及取遼陽度
三岔攻西平下廣寧皆參謀帷幄天聰三年以文館官從太宗文皇帝伐明入薊
門克遵化招服潘家口馬蘭峪等五城會我師在大安爲敵所圍文程以火器進
攻圍解太宗自將臨永平令守遵化敵兵掩至文程率先力戰敵敗走論功授三
等輕車都尉世職五年師圍大凌河城文程招降西山一臺命卽統其衆六年太
宗詢廷臣伐明之策文程與寧完我等言我軍如欲深入當乘其無備直抵北京
訊其和否毀山海關水門而歸以壯軍威計所從入惟雁門關爲便並諭沿路軍
民俟版圖歸我酌免賦稅示愛養意太宗嘉納之崇德元年授祕書院大學士初

八旗置都統衆議首推文程太宗曰此職一軍耳朕方資爲心膂其別議之時文程所領皆樞密事每入對必漏下數十刻始出或未及食息復奉召入凡宣諭各國敕書率撰擬以進至是改文館爲內院遂有是命八年世祖章皇帝嗣位命以其族屬隸鑲黃旗順治元年睿親王多爾袞將統兵伐明文程上議曰迺者明之流寇煽亂其君若臣不能相保雖天數使然良由我先皇帝憂勤肇造諸王大臣夾輔冲主忠格蒼穹上帝潛爲啓佑也竊惟承丕業以垂休萬禩者此時失機會而貽悔將來者亦此時何以言之中原荼苦已極黔首無依思歸令主以圖樂業明之受病已不可治其土地人民不患不得患得而不爲我有耳曩者棄遵化屠永平一再深入而返彼以我爲無大志縱來歸附未必撫恤因懷攜貳今日有已服者有未服宜撫者是當申嚴紀律秋毫無犯復宣諭以昔日不守內地之由及今進取中原之意官仍其職民復其業錄賢能恤無告大河以北可傳檄而定也此行或直趨北京或相機攻取必於山海長城以西擇一堅城頓兵而守以爲門戶惟諸王察之大軍遂發文程從師渡遼河明山海關總兵吳三桂以闖賊陷北京來乞師文程曰自闖寇猖狂中原塗炭近且傾覆京師戕厥君后此必討之賊

也我國家上下同心兵甲選練誠聲罪以臨之恤其士夫拯厥黎庶兵以義動何功不成乎復言好生者天之德也兵者聖人不得已而用之自古未有嗜殺而得天下者國家欲統一區夏非乂安百姓不可於是申嚴紀律妄殺者有罪既敗流賊二十萬於山海關我兵長驅而西民多逃匿文程草檄宣諭曰義兵之來爲爾等復君父仇所誅者惟闖賊師律素嚴必不汝害民心遂安師入北京建議備禮葬明崇禎帝時宮闕灰燼百度廢弛文程收集諸曹冊籍布文告給軍需事無巨細咸與議焉明季賦額屢增而籍皆燬於寇惟萬曆時故籍存或欲於直省求新冊文程不可曰卽此爲額猶恐病民豈可更求哉自是天下田賦悉照萬曆年間則例徵收除天啟崇禎時諸加派民獲蘇息二年正月敍功晉三等男十月江南旣平上疏言治天下在得民心士爲秀民士心得則民心得矣宜廣其途以蒐之請於丙戌會試後八月再行鄉試丁亥二月再行會試從之三年四年兩充會試主考官五年晉一等男賜巴克什號六年正月充纂修太宗實錄總裁官二月復爲會試主考官七年遇恩詔加一雲騎尉世職八年正月晉二等子閏二月大學士剛林以黨附睿親王多爾袞獲罪其刪改太祖實錄辭連文程並議罪先是三

年二月睿親王誠大學士等宜時具條奏文程以凡有聞見卽面啟無庸具本對王曰爾素有疾毋過勞自後可早出休沐逾數月甘肅巡撫黃圖安請終養部議借端規避應革職文程白鄭親王濟爾哈朗曰終養乃人子至情不宜如部議睿親王怒其不先白己也下法司論罪旣而釋之後文程因不合睿親王意時稱疾家居至是世祖以文程在盛京時不附貝勒碩託後亦不附睿親王衆所共知免其罪革職留任未幾復原職九年遇恩詔晉一等子十月任議政大臣疏曰臣見直省土地荒蕪賦虧餉絀國家大害在此然軍屯可興國家大利亦在此昔明太祖嘗言養兵百萬不費民間一粒亦當元季亂後地曠行屯故耳今湖廣江西河南山東陝西五省寇亂日久人民稀少請設興屯道綜理之同知分理之地之無主者卽爲官屯其有主而拋棄者多方招徠過期不至乃爲官屯凡土著流戶願來耕者均給以地量助牛種官分子粒三之一三年後爲永業編行保甲使守望相助其無本者官給僱值則遠近饑民聞風踵至亦救荒之術也初屯之時所收糧草皆道廳留貯出陳易新爲次年加墾計其難久存者就近撥供兵馬僱舟車起運勿僉點屯民動用屯牛則屯事得永久矣又興屯之處府縣有司聽屯道提

調理屯同知惟屯道管轄如開墾日增撫按特薦做邊俸例三年陞二級以酬其勞其不職者嚴糾之所當信賞必罰也疏上命諸王大臣會議舉行十一月以科道官當睿親王攝政時劾大學士馮銓降革者彙原疏進呈御覽世祖曰諸臣所劾誠當何爲以此罷耶文程曰諸臣疏劾大臣無非爲君爲國皇上當思所以愛惜之世祖遂諭吏部俱以原官起用十年請令部院三品以上大臣各舉所知不論滿漢不拘資格不計親疏取正直才守之人堪任何官列疏奏聞一官可舉數官數官可舉一官將姓名彙置御前不時召對察其議論核其行事遇缺請旨簡用若用後稱職保舉官加以優典否則量罪連坐詔允所議十一年八月加少保兼太子太保時遣官赴各省恤刑因疏言前此遣滿漢大臣巡方慮有擾民是以停止今四方水旱災傷紛紛見告亦應請停止其見禁重囚敕各巡撫詳勘以可矜可疑者奏聞裁定從之九月以疾乞休奉諭曰大學士范文程任事多年忠誠練達朕所倚賴乃近以積勞成病未得旦夕奏效深繫朕懷暫令解任調攝俟病痊召用特晉太傅兼太子太師頻賜藥餌存問十四年詔晉秩一級圖其像藏之內府聖祖仁皇帝嗣位奉命祭告太宗山陵康熙五年卒年七十賜祭立碑諡文

肅五十一年御書元輔高風以額其祠文程經事四朝寵錫優異在盛京時列聖皆呼其官而不名以其形貌頎偉所賜衣冠皆特製居恆言治天下惟在得賢庶官有才者不以一眚掩湔除拔擢時爲奏請焉謝政後居別墅中以詩書騎射教子弟性廉慎樂施與器量淵深人莫窺其喜怒子六人承斌襲一等子爵承謨承勳別有傳

額色赫

額色赫滿洲鑲白旗人姓富察氏世居納殷祖莽吉圖當太祖高皇帝時隨其兄孟古慎郭和來歸額色赫初事太宗文皇帝由護軍校屢從征授兵部理事官天聰九年隨副都統巴奇蘭征黑龍江先還奏捷崇德三年擢祕書院學士五年齎救赴錦州諭睿親王多爾袞進兵機宜會都統圖爾格敗明兵於木輪河額色赫以捷還奏六年三月同內大臣圖爾格大學士范文程剛林等往訊圍錦州大軍離城遠駐遣兵歸家等狀王貝勒大臣皆服罪降罰有差八月明總督洪承疇率衆十三萬援錦州至松山額色赫受上方略往諭統軍王貝勒等尋還奏敵勢甚衆宜益兵上遂統師親征擊敗之七月鄭親王濟爾哈朗克錦州祖大壽降額色

赫至軍營宣諭慰撫降衆八年隨貝勒阿巴泰征明至山東下兗州同參領穆成格等奏捷世祖章皇帝順治元年隨大軍入關定燕京二年敍功授騎都尉世職四年考滿加一雲騎尉五年遷刑部啟心郎八年擢國史院大學士九年充纂修太宗文皇帝實錄總裁官會試正考官列議政大臣復充武會試正考官屢遇恩詔晉世職至一等輕車都尉十二年加少保兼太子太保再充會試正考官時方纂輯太祖太宗聖訓又奉諭取經史中忠臣孝子賢人廉吏之事蹟語言分類採輯成書名曰資政要覽額色赫充總裁官十三年敕使朝鮮鞫獄是年考滿晉少傅兼太子太傅廕一子入監十五年改保和殿大學士十六年詔獎奉職勤勞諸臣晉少師兼太子太師十八年十月卒

寧完我

寧完我遼陽人天命年間來歸事貝勒薩哈廉隸漢軍正紅旗太宗文皇帝召直文館尋授參將天聰四年大軍破永平命同館臣達海等執黃旗登城諭士民安業尋隨貝勒阿巴泰等守永平又從征大凌河及察哈爾並招撫有功授騎都尉世職五年十二月上疏言臣蒙皇上出之奴隸登之將列不揣庸愚妄自期許初

被召對輒薦五人復公疏請立六部設言官今六部已立不設言官者意以爲國人皆得進言耶又或謂南朝多設言官竟致敗壞耶臣請明辨之我國未立六部之前臣不具論自六部既立之後曾見疏劾人罪者否今日秉政之人豈盡循良方正在屬下者既不敢非其官長旁人又誰敢輕議權貴古云兼聽則聰偏聽則蔽若設言官人必自斂君身尙許諍諫他人寧知忌諱此古帝王明目達聰之大用也南朝之言官壞事由伊主之鑑別不明非洪武定制之不善臣自揣無經緯之才惟忠耿之心至死不易今再行奏聞以明始終無欺不勝悚慄之至六年六月與范文程馬國柱疏陳伐明之策九年二月言頃奉聖諭各舉薦賢能以供任事孰意無知之輩反假此爲倖進之階臣思之古薦賢之條功罪連坐所以杜弊端而防冒濫伏願再頒明詔自後所舉之人或效能敘功或僨事獲罪皆令舉者同之若其人砥行於厥初改節於末路許舉者隨時檢舉乃免連坐如此庶人知畏法而所得皆真才矣太宗並嘉納之十年二月罷職先是完我留守永平以好博爲禮部參政李伯龍等所訐奉諭諄誠宥其罪至是復與大凌河歸附參領劉士英博爲士英家人舉發論罪革世職凡恩賜莊田奴僕悉入官遂閒居數年世

祖章皇帝定鼎後起用爲學士順治二年五月授宏文院大學士充明史總裁官
二年至六年三充會試主考官又充纂修太宗實錄總裁官並繙譯三國志洪武
寶訓諸書告成賜賚優渥授二等輕車都尉世職八年遷國史院大學士十年四
月內院以完我與洪承疇等班位祿秩應否照漢官例奏請完我獨承旨照滿洲
大學士例尋授議政大臣十一年三月疏劾大學士陳名夏曰古來奸臣賊子黨
不成則計不得行欲成奸黨附己者雖惡必護異己者雖善必仇行之久而入黨
者多矣始也借人以引己繼也納賄以引人若非確訪其鄉評輿論實察其居心
行事則黨固而莫可破臣自念壯年疏庸貪博辜負先帝一廢十年皇上定鼎燕
京復得隨入禁地矩趨公署凜守臣職者又復十年於此愚直性生遇事勃發雖
不敢行埋輪補牘之事若附黨營私以圖目前富貴寧死不爲痛思人臣貪酷犯
科國家癘疥之疾不足爲慮惟懷奸結黨禍關宗社患莫大焉陳名夏奸亂日甚
黨局日成臣不憚舍殘軀以報答聖主並列其罪狀請敕大臣鞫訊事詳陳名夏
傳八月加太子太保十三年考滿加少傅兼太子太傅十五年九月以老乞休奉
諭大學士寧完我效力多年勤勞素著今因年邁有疾令原銜致仕以遂頤養康

熙元年聖祖仁皇帝念其贊理機務年久命以一子補用學士四年四月卒賜祭立碑諡文毅

覺羅巴哈納

覺羅巴哈納滿洲鑲白旗人景祖翼皇帝第三兄之四世孫也年十七卽效力戎行屢從太宗文皇帝征伐著有功績天聰八年授騎都尉世職九年命免功臣徭役並分設佐領巴哈納與馬崇德三年授刑部理事官明年擢本部參政尋兼正藍旗滿洲副都統七年以刑部失勘違禁出邊之布山罪又拒戰錦州之護軍阿桑喜自陳戰功於法司巴哈納審斷不公革世職留副都統任八年七月論登州略地諸將罪巴哈納以倡議令軍士皆歸坐奪所俘獲論罰如律順治元年四月擢正藍旗蒙古都統尋調滿洲都統六月與都統石廷柱徇霸州滄州德州臨清皆下之七月詔平山西遂移師會都統葉臣軍遣使招降明總督李化熙等十一月同石廷柱師自汾州趨平陽大敗賊兵於西山寨俘斬甚衆降僞副將三員至黑龍關降明守備三員綜計得降卒六千餘人以功賚白金授三等輕車都尉世職三年九月隨肅親王豪格剿流寇張獻忠於四川分兵討平遵義夔州茂州諸

路斬僞官數百員降甲士數千獲馬騾輜重無算餘寇悉平五年二月以前討張獻忠時護軍統領哈寧被圍護軍統領阿爾津蘇拜援出之參領希爾根遲留不救及師旋希爾根冒功妄爭巴哈納勘察失實又肅親王欲以有罪揚善之弟機賽爲護軍統領巴哈納與議政大臣索渾不爲阻止扶同進奏廷議革職解任得旨改降世職爲騎都尉尋擢戶部尙書八年正月世祖章皇帝旣親政巴哈納入奏事畢上詢民間疾苦及國家無益之費巴哈納以遣官採辦臨清甄分派漕船載運通州由五閘撥運供用對遂奉諭永行停止二月兼正白旗滿洲都統四月駐防佐領碩爾對訐告戶部給餉不均下法司鞫問部議巴哈納阿附睿親王私厚白旗兵丁給餉不絕刻待黃旗兵丁屢請不發應論死籍沒上命免死革世職罷任籍沒家產三分之二明年十月起授刑部尙書十一年二月同諸大臣命分賑畿輔賜敕印以行八月上嘉其素效忠勤始終不渝特晉太子太保明年三月加少保兼太子太保五月晉少傅兼太子太傅授弘文院大學士十五年改中和殿大學士十八年復設內三院仍授祕書院大學士康熙元年兼鑲白旗滿洲都統五年十二月卒康熙八年五月巴哈納子巴什訴言巴哈納自十七歲效力行

陣歷四十三年因與鼉拜遏必隆不和給諡號不與立碑部議給予祭葬得旨
巴哈納准予諡尋贈少師兼太子太師賜祭葬如典禮諡敏壯

車克

車克滿洲鑲白旗人姓瓜爾佳氏世居蘇完祖克爾素太祖高皇帝時來歸父席
爾那任佐領既卒車克仍其任兼前鋒侍衛天聰八年從上征明由大同趨懷遠
薄左衛城與前鋒統領圖魯什等設伏敗明總兵曹文詔騎兵略地越代州百餘
里至五台山還遇明總兵祖大弼兵二百餘擊敗之並多斬獲崇德三年授戶部
副理事官會戶部承政韓大勳私取庫金事覺以前此貯庫時車克失記冊檔論
罪應死上命免死罰鍰仍留部用尋兼任參議五年鄭親王濟爾哈朗率兵圍錦
州令車克同前鋒統領勞薩等領兵三百設伏高橋北以縱敵弗擊議罪籍家財
半六年復赴鄭親王軍攻圍錦州破明總督洪承疇步兵三營世祖章皇帝順治
元年從大兵入關擊敗流賊李自成二年敘功授騎都尉四年考績以車克在戶
部能任事加一雲騎尉五年擢本部侍郎隨英親王阿濟格征大同叛鎮姜瓖車
克分兵往援太原與巡撫祝世昌合謀遣兵剿除餘黨劉遷萬鍊等瓖尋伏誅七

年兼任正白旗副都統兩遇恩詔晉世職至二等輕車都尉八年三月解侍郎任改都察院參政四月駐防河間佐領碩爾對訐戶部諸臣給餉不均下法司鞠實由尙書巴哈納主議車克前任侍郎坐附和降世職爲雲騎尉九月擢戶部尙書明年列議政大臣遇恩詔晉騎都尉十年上以車克前此降世職處分過重仍復二等輕車都尉十一年八月上嘉其素效忠勤任部務著有勞績特加太子太保十二年擢祕書院大學士晉少保奉命輯太祖太宗聖訓充總裁官十三年三月自陳學識疏淺未諳祕書院事請罷大學士任上弗允諭吏部曰戶部尙書職司國計倚賴非輕必得精敏練達之才方能勝任大學士車克向任司農廉勤夙著着晉少傅兼太子太傅仍管戶部尙書事十四年考滿加少師兼太子太師十六年奉命赴江南督造戰艦十七年同安南將軍羅托統兵剿海敵鄭成功十八年聖祖仁皇帝卽位車克奉詔還京調吏部尙書先是旗人阿那庫與其兄金布爭產奉有諭旨均分阿那庫旋以金布隱匿婢女三人訴戶部車克以婢舊爲金布所有於分產無涉置弗理阿那庫復與本旗佐領吉詹爭論吉詹以阿那庫違旨妄爭牒戶部車克移牒刑部遂坐阿那庫違旨罪論絞致阿那庫妻擊登聞鼓訟

冤詔所司勘議阿那庫違旨之罪得釋車克應革任罰鍰詔削加銜免革任康熙元年復授祕書院大學士六年以疾乞休詔以原官致仕十年六月卒予祭葬如典禮賜諡文端子渥爾敏襲職

明安達禮

明安達禮蒙古正白旗人姓西魯特世居科爾沁父博博圖太祖高皇帝時率七十餘戶來歸卽授爲佐領俾轄所屬太宗文皇帝天聰元年隨征明錦州歿於陣予三等輕車都尉世職明安達禮襲兼管佐領崇德三年任護軍參領隨貝勒岳託征明由密雲東北毀邊牆進同都統伊拜擊敗明太監馮永盛兵攻克南和縣六年隨大軍圍錦州敵據山巔列陣明安達禮率所部護軍衝擊敵潰遁松山敵騎來犯復擊敗之我師鑿壕駐守敵兵出錦州城奪橋明安達禮擊卻入城上親督師敗明總督洪承疇三營步兵明安達禮奮勇力戰又擊敗敵騎敘功晉二等輕車都尉七年冬隨貝勒阿巴泰征明薊州薄燕京破明總督趙光抃軍又同前鋒統領阿山擊走三河縣步兵進略山東八年春師還明總兵白廣恩張登科和應薦等巡哨螺山明安達禮率所部擊之潰又同護軍統領鼇拜破明總督范志

完軍凱旋賚白金是年擢禮部參政兼正白旗蒙古副都統世祖章皇帝順治元年隨大軍入山海關擊敗流賊李自成二年隨英親王阿濟格征自成於延安府七戰皆捷招撫鳳翔等府降者三十餘城三年改兵部侍郎值蘇尼特部騰機思與弟騰機特叛明安達禮隨豫親王多鐸率師往征扼據險要騰機思等聞風遁走明安達禮乘夜追逐至鄂特克山大破賊衆斬其台吉茂海復同鎮國將軍瓦克達等追剿手斬十一人獲其輜重並擊敗土謝圖汗及碩雷汗兵五年擢正白旗蒙古都統七年兼任兵部尙書先是敍入關征流賊及征騰機思功晉爵至二等男世襲罔替嗣以考滿並遇恩詔晉一等男加一雲騎尉八年以議敍福建湖廣大同軍功遲延削雲騎尉罰鍰九年列議政大臣復遇恩詔晉二等子十年以徇隱興安總兵任珍擅殺事覺罷尙書任降世職爲一等輕車都尉兼一雲騎尉十一年統兵征鄂羅斯敗敵於黑龍江十三年上以明安達禮在部日久練達庶務授理藩院尙書十五年十二月命爲安南將軍率師駐防荊州十六年海敵鄭成功犯江寧明安達禮率師赴援敵船千餘艘泊三山峽明安達禮督兵擊敗僞都督楊文英等擒斬僞副將一獲船艦器械甚多鄭退竄入海明安達禮旋奉詔

移師浙江駐防舟山十七年還京仍授兵部尙書聖祖仁皇帝康熙三年考滿加太子太保六年調吏部尙書旋因疾致仕八年二月卒賜祭葬如典禮諡敏果子都克襲

藍拜

藍拜世居佟佳以地爲氏父噶哈太祖高皇帝時來歸任佐領隸滿洲鑲藍旗太宗文皇帝天聰八年藍拜任護軍參領奉命隨都統阿山略明錦州獲牲畜復隨前鋒統領勞薩率兵迎察哈爾部衆之來歸者尋擢副都統崇德四年五月以不稱職解任十一月命承政薩穆什喀索海分統左右翼征索倫部仍以藍拜管副都統事取道虎爾哈部攻克雅克薩城獲丁壯甚多索倫部長博穆博果爾迎戰藍拜同索海設伏擊敗其衆敍功授騎都尉世職分賜貂皮及所獲人戶六年三月以隨睿親王多爾袞圍明錦州離城遠駐議革世職籍家財半命從寬罰鍰仍隨鄭親王濟爾哈朗圍錦州城明兵自松山來奪我紅衣礮藍拜率兵擊卻之五月擢兵部參政八月明總督洪承疇集衆援錦州據松山列營藍拜同諸將進擊破其二營尋敵騎乘陰雨來侵我右翼營藍拜同參領遜塔等拒戰大捷十一月

調禮部參政明年七月部議圍錦州時徇隱軍士失律諸將罪藍拜應罰緩得旨寬免世祖章皇帝順治元年隨大軍入山海關擊敗流賊李自成敍功晉世職三等輕車都尉三年上遣恭順王孔有德統師征湖南授藍拜爲鑲藍旗滿洲副都統率兵偕征是時明桂王朱由榔據武岡自成餘黨郝搖旗王進才等降附之與明巡撫何騰蛟總兵黃朝宣張先璧等抗拒我師有德至長沙擊走王進才藍拜同副都統卓羅追擊其衆千餘殲殪過半下湘潭黃朝宣擁衆屯燕子窩藍拜同副都統佟岱乘艦至瀘口督兵破其營尋隨智順王尙可喜援桂陽賊聞風竄遁遂移師征道州擊走郝搖旗旋會有德軍征沅州張先璧遣其衆自黔陽出扼要隘列五營有德令分兵擊之藍拜率先攻賊斬級七千餘遂合兵薄沅州張先璧集衆三萬拒戰悉敗潰取其城捷聞賜白金擢本旗都統五年九月還仍任副都統敍功賜黃金白金晉二等輕車都尉六年九月兼任禮部侍郎八年擢都統兼工部尙書九年四月調刑部十月解尙書任專管都統事十一月奉命同靖南將軍卓羅征廣東未定州縣尋以廣東漸定撤還屢遇恩詔晉爵至二等男十年十二月命率兵鎮守湖南時流賊張獻忠餘黨孫可望劉文秀馮雙禮等亦降附朱

由榔由蜀江窺武昌岳州常德諸郡藍拜督兵防禦賊不能犯十三年正月偕護軍統領蘇克薩哈等還京召見上親勞以酒諭曰爾等爲朕宣力年久矣今見爾等形貌癯瘠朕心惻然藍拜奏曰宣力効勞人臣之誼臣等有何功績致厯聖懷今得覲天顏臣心足矣四月以老病乞解都統任詔允所請加太子太保康熙四年七月卒予祭葬如典禮子都幹海襲爵

寧古哩

寧古哩滿洲正藍旗人姓託和洛氏崇德三年任吏部主事六年大軍圍明錦州寧古哩隨鄭親王濟爾哈朗營以擊敗敵兵馳齎捷奏七年錦州降復以降人及所獲簿籍馳奏順治二年四月遷吏部啟心郎四年五月山東巡撫張如秀以罷歸侍郎孫之獬因土賊謝遷陷城遇害爲請卹部臣陳名夏金之俊謂應復其原銜予卹寧古哩與侍郎馬光輝謂孫之獬既革職爲民例不予卹以兩議上得旨申飭議卹非例是年考滿予雲騎尉世職嗣兩遇恩詔晉世職騎都尉兼一雲騎尉八年閏二月以前此吏部銓選有越格濫用者革啟心郎任會御史張煊劾奏尙書陳名夏在吏部專權徇私諸款並言其以尙書而卸罪於啟心郎致寧古哩

革任己得脫然時尙書譚泰同陳名夏與己同掌吏部坐張煊誣陷罪未幾譚泰以把持部務恣意妄行獲罪上命寧古哩仍爲啟心郎十年五月擢吏部右侍郎十三年四月因河西務鈔關員外郎朱世德虧課萬餘兩戶部援赦免罪吏部亦弗置議並坐瞻徇寧古哩革任降世職爲雲騎尉十四年四月上以寧古哩前在吏部諳習事務命遇侍郎缺出卽與推補十六年正月授禮部右侍郎十八年閏七月擢左都御史十二月疏言定例駐牧察哈爾蒙古向京城置買盔甲弓箭由八旗都統造冊送部出口時察驗放行其他蒙古不得私買恐日久禁弛有借名置買及私相轉賣之弊請旨嚴飭關隘官員察詰並令蒙古都統以下參領左領以上申禁又設兵原爲剿賊之備近見各省匪徒或數千人嘯聚總督提督不親率標兵堵禦輒請京兵京兵一出不惟費餉抑且擾民請嗣後有竊發者總督提鎮先率標兵剿捕不得輒請京兵則餉運可省而民生得安又各省罪犯應解部審者向來各部差官提解仍須州縣官遞送今驛遞繁苦宜概令在外督撫提鎮解送停止差官以省供應之費下部議從之康熙元年七月遷戶部尙書二年二月卒部臣以任尙書未滿一年奏諭曰寧古哩雖爲尙書未久念初設六部之時

卽在部任事可予尙書卹典賜祭葬諡勤敏子色楞襲雲騎尉世職

噶達渾

噶達渾姓納喇氏世居達哈太祖高皇帝時有約蘭者率其子懋巴里等來歸遂隸滿洲正紅旗噶達渾其裔孫也初任護軍參領天聰二年從太宗文皇帝征多羅特部有功八年從征明山西克應州城賜人戶牲畜崇德五年隨大兵略中後所同護軍統領敦拜擊斬敵衆睿親王多爾袞等率師圍錦州令噶達渾領纛先進敗杏山騎旋往設伏松山敵至斬十餘人敵據嶺列營擊敗之復同前鋒統領勞薩等合兵追襲抵北岡仍還七年隨豫親王多鐸征寧遠敵兵出躡我後噶達渾先衆還擊敵潰走師旋有護軍達哈塔者中創仆掖之以歸順治元年擢護軍統領從大兵入山海關破流賊李自成以功授騎都尉世職二年隨英親王阿濟格擊流賊至九宮山凡三敗敵三年隨肅親王豪格征四川師至西安分兵剿邠州賊渠胡敬德結營三水縣噶達渾與副都統和託攻堅直入拔其營復與護軍統領蘇拜哈寧阿副都統阿拉善擊敗高汝礪武大定二賊兵於三寨山用步卒搜剿山谷賊據山巔以拒遣其衆左右馳下迎戰噶達渾與護軍統領阿爾津奮

勇斬殺連敗賊衆賊兵復犯正藍旗營哈寧阿被圍噶達渾與阿爾津蘇拜疾馳往援擊卻之又破賊兵於增蓋尋擢戶部侍郎五年三月調吏部侍郎六月敘功晉三等輕車都尉十二月與阿拉善承命率八旗兵赴英親王軍協討大同叛鎮姜瓖至則七戰皆捷賊黨自代州北關遁追斬無算遂平代州復渾源州六年擢本旗蒙古都統仍任戶部侍郎七年以從睿親王行圍私出射獵罷都統任降職爲騎都尉又一雲騎尉世祖章皇帝親政擢戶部尙書明年二月噶達渾訟鑄職寃詔復職晉二等輕車都尉三月改都察院左都御史四月以駐防河間佐領碩爾對訐戶部給餉不均事下部鞠訊坐隱匿不奏論削世職得旨改罰鍰五月復調戶部尙書九月奉命率師往征鄂爾多斯部九年擒斬叛逆蒙古多爾濟並殲其衆於賀蘭山兩遇恩詔晉三等男世襲調滿洲都統十二年二月尋調兵部尙書十一月奏言京城廣闊向設礮煤山以爲信今停止無憑集衆請用盛京時鳴鼓聚衆之法疏入詔曰塔山及九門仍各設礮十年三月敘功晉二等男八月以濫引赦例請貸行賄之雲騎尉呂忠罪飭令回奏奏復稽遲下王大臣議坐削爵得旨改降一等輕車都尉會海敵鄭成功潛據海島攻陷福州內地命同定遠大

將軍世子濟渡等統師征討並賜世子敕曰凡爾調遣官兵勿令噶達渾離左右也既至與督臣李率泰等會兵剿撫克復海澄分遣將領水陸並進擊敗敵衆克福州下泉州攻惠安之海港衛套及閩安鎮陣斬數千級獲戰艦軍械蕩洗敵巢成功遁入海十四年三月班師四月卒賜祭葬贈太子太保諡敏壯子噶爾漢襲職

伊拜弟庫爾闡

伊拜姓赫舍里氏世居齋谷父拜思哈當太祖高皇帝時來歸授佐領隸滿洲正藍旗既卒伊拜與其兄宜巴里弟庫爾闡分轄人戶任佐領太宗文皇帝卽位察哈爾部貝勒圖爾濟率人戶來歸命伊拜迎犒之天聰八年上統師征明伊拜齋敕往科爾沁部調兵隨征是年五月以克副任使予雲騎尉世職九年擢任正白旗蒙古都統崇德元年隨武英郡王阿濟格征明入長城攻克昌平等州縣俘獲甚衆師還出邊敵襲我後隊縱劫掠因論伊拜不殿後及徇隱軍士失律諸罪坐罰鍰三年九月隨睿親王多爾袞證明由青山口入邊越燕京略山東四年三月凱旋以過三屯營時佐領喇巴希爲敵所困伊拜未助戰罰馬一又其僕與軍士

爭草鬪毆伊拜袒其僕以鳴鏑射軍士復罰鍰五年大軍圍明錦州伊拜遇杏山敵騎率本旗兵擊敗之復連敗松山騎兵步兵後敵騎復自杏山來犯伊拜邀擊多斬獲又同左翼軍擊卻錦州城中出戰敵兵六年攻錦州破其山嶺步兵復擊敗其拒戰騎兵敍功晉世職爲騎都尉時明總兵洪承疇集兵十三萬駐松山援錦州上親征陳師於松山杏山間授諸將方略分布要隘俟敵潰遁截擊伊拜奉命同副都統譚拜等率兵倚杏山駐營明兵自松山竄走伊拜追逐至塔山敵挫衄及溺水死者無算七年大軍擒承疇於松山明總兵祖大壽以錦州降伊拜奉命駐守杏山是年七月部議圍錦州時敵犯鑲黃旗壕塹軍士有未戰者伊拜徇隱應罰鍰上貫之八年十月奉命與輔國公篇古率將士駐守錦州世祖章皇帝順治元年調正藍旗蒙古都統隨大軍入山海關擊敗流賊李自成尋同都統葉臣等剿賊山西圍太原府城賊出城抗拒伊拜同都統巴哈納等督兵敗賊克其城招降附近郡邑師還賜白金三百兩二年隨英親王阿濟格征陝西敗賊延安自成走湖廣追剿至武昌連破賊營三年敍功晉三等輕車都尉五年隨鄭親王濟爾哈朗征湖南時衡州寶慶諸郡爲明桂王朱由榔之將所踞六年春大軍克

湘潭伊拜同都統佟圖賴等分兵趨衡州距城三十里賊千餘據橋立寨伊拜督兵擊之潰進薄城下連破賊寨斬僞總兵陶養用途定衡州大軍別徇寶慶辰州武岡沅州靖州賊俱敗遁七年四月凱旋復賜白金三百兩八年以年老解都統任九年命爲議政大臣疊遇恩詔晉爵至二等男十五年卒年六十有五贈太子太保諡勤直賜祭葬如典禮立碑墓道以其第三子費揚武襲爵伊拜弟庫爾闡初任佐領天聰九年隨副都統巴奇蘭征黑龍江有功予雲騎尉世職崇德三年授都察院理事官兼任參領五年隨工部承政薩穆什喀征索倫部與其部長博穆博果爾力戰卻之師還以俘卒遁去論監守不嚴應鞭責上念其曾與博穆博果爾力戰停其敘功免罪仍予賞賚尋隨睿親王圍明錦州擊敗杏山敵騎及松山步兵又同左翼軍擊敗錦州城中出犯兵六年擢都察院參政復隨鄭親王圍錦時敵騎自松山來奪我紅衣礮庫爾闡擊卻之旋率兵據守山寨敵來犯勢甚衆時薩穆什喀別守汛地欲遣兵助戰庫爾闡以敵易禦辭之遂獨率所部奮擊敗敵斬四十一人獲雲梯檜礮甲楯旗幟敘功晉世職爲騎都尉八年擢正藍旗蒙古副都統順治元年隨大軍入山海關擊敗流賊李自成並追至望都敘功加

一雲騎尉二年正月復隨豫親王多鐸擊流賊於潼關連破其兩營敘功晉三等輕車都尉尋以考滿稱職晉二等四年六月奉命率兵駐防濟南會土賊謝遷等陷淄川縣城庫爾圍遣所部兵並調綠旗兵往援部議其不親赴剿罪應罰鍰解副都統任革世職得旨倍其罰餘寬免明年擢都察院承政尋仍改爲參政六年同都統譚泰征江西叛鎮金聲桓卒於軍遇恩詔晉世職爲一等輕車都尉以其子舒赫襲

金礪

金礪遼東人明武進士任鎮武堡都司本朝太祖高皇帝天命七年大兵征明克廣寧城礪率屬來降授參領予三等男爵太宗文皇帝天聰五年始設六部以礪爲兵部承政六年上幸演武場閱兵礪與參領石國柱金玉和高鴻中等並以訓練有方賜鞍馬尋調戶部承政八年考績晉爵二等男崇德二年隨武英郡王阿濟格征明皮島參領巴雅爾圖等統兵先入敵陣礪與副將高鴻中所部水師停泊觀望致前隊失利下法司議罪應褫職論死籍沒上以礪與鴻中並有歸順功命免死四年分漢軍四旗以礪屬鑲紅旗漢軍復任參領五年授吏部參政六年

擢都統七年大兵克松山與都統巴顏等奉敕收藏所獲槍礮火藥以備用旋克塔山隨鄭親王濟爾哈朗等駐守其地八年隨鄭親王攻前屯衛中後所二城指揮士卒發紅衣礮攻克之論功予三等輕車都尉世職世祖章皇帝順治元年五月偕副都統李率泰安撫天津亂民六月同都統葉臣招撫山西時流賊李自成遁入陝西賊黨陳永福竊踞太原礮與葉臣潛往審視攻圍處所城內步兵突出礮擊敗之復督本旗兵以紅衣礮攻克其城凱旋賜銀四百兩晉世職一等輕車都尉二年隨順承郡王勒克德渾征湖廣僞總兵馬進忠降而復叛礮同都統劉之源擊敗之武昌奪其戰艦六十餘尋奉詔與副都統佟岱分率左右翼兵同恭順王孔有德等征湖南時僞伯黃朝宣等附明桂王朱由榔聚衆十餘萬屯湖南四年礮與有德等水陸並進擊破賊兵追斬朝宣於衡州復與懷順王耿仲明副都統卓洛等進兵長沙僞總兵楊國棟聚馬步賊衆七千迎戰礮率兵奮擊賊敗竄斬國棟於牛皮灘五年十月旋凱賜金二十兩銀四百兩六年正月敘功晉世職一等輕車都尉七月授平南將軍鎮守浙江七年遇恩詔加一雲騎尉八年明魯王朱以海及其臣阮進張名振踞舟山礮與副都統吳汝玠等率兵由寧波出

定海會總督陳錦兵剿進於橫水洋生擒之遂抵舟山掘陷其城名振擁以海遁九年海敵鄭森犯漳州礪奉命統兵赴福建議剿師至泉州敵聞風退屯江東橋礪由長泰進營漳州城北分兵萬松關以牽制敵營敵糾衆來攻我兵迎擊七戰皆捷斬獲無算漳州圍解海澄南靖漳浦諸縣悉平敍功並兩遇恩詔晉爵至一等男加一雲騎尉十一年授陝西四川總督十二年奏請以遵義永寧二鎮兵分屯順慶府潼川州川北龍安之兵亦令各擇曠土屯種卽有寇警不勞運糧而兵食自足又以陝西神道嶺地當險要宜於潼關各營撥兵五百分駐附近諸處以資援剿俱下部議行十三年三月引年乞休上念其宣力多年勤謹夙著命加太子太保以原官致仕康熙元年七月卒賜祭葬如例以其弟俊襲爵

劉之源

劉之源漢軍鑲黃旗人太宗文皇帝天聰十年三月授參領崇德五年五月從上證明錦州距城東五里以紅衣礪攻克其臺復列礪城北攻克晾馬臺擊斃六人降其卒十三人是年鑲黃旗漢軍都統馬光遠因疾解任以之源代之六年八月隨睿親王多爾袞圍松山以礪攻克近城四臺斬守備二都司一擒副將王希賢

參將崔定國都司楊重鎮等明兵尋自松山遁高橋迤南三臺之源率前隊兵攻克之多斬馘七年四月隨鄭親王濟爾哈朗圍塔山列礮城西擊毀城垣二十餘丈殲其守城兵衆進克杏山城城北一臺復擊毀杏山城城中人驚懼悉降敕功予二等輕車都尉世職時分設八旗漢軍都統授之源鑲黃旗漢軍都統八年十月隨鄭親王攻明中後所拔其城斬遊擊吳良弼都司王國安等進征前屯衛復以礮攻克其城敕功晉一等輕車都尉世職世祖章皇帝順治元年大兵定燕京命之源同都統李國翰剿平畿南餘賊時流賊李自成遁陝西僞伯陳永福等竊據太原之源同都統葉臣等攻克其城又同都統巴哈納自汾州剿賊至平陽斬賊四千餘山西州縣悉就招撫師還得優賚二年隨順承郡王勒克德渾征流賊至湖廣同李國翰殲賊應山縣時僞總兵馬進忠降而復叛之源同都統金礪擊敗之武昌奪賊艘六十餘復追敗餘黨於湖泊明年敕功加一等雲騎尉五年命爲定南將軍率左翼漢軍隨鄭親王征湖廣六年進攻湘潭明總督何騰蛟分兵三隊出城拒敵我軍分擊大敗之克其城生擒騰蛟乘夜率兵追剿馬進忠平明薄其營奮力衝擊遂克寶慶并破南山坡九營陣斬總兵馬有志胡進玉等進忠僅

以身免又破賊渠袁宗第營於洪江駐師沅州僞總兵王永強來犯之源敗之於
便水驛斬僞副將三人賊衆七百餘級累遇恩詔晉世職至一等男又一雲騎尉
八年同都統金礪駐防杭州時僞大學士張肯堂僞蕩湖侯阮進僞定西侯張名
振等擁明魯王朱以海踞舟山之源與總督陳錦總兵田雄會師進剿由寧波之
定關出海阮進集戰艦以拒我師敗之於橫水洋生擒進復分兵擊剿三戰皆捷
遂至舟山之螺頭門肯堂集城中兵六千堅守十餘日我兵用雲梯破城肯堂及
僞尙書李向中吳鍾巒僞侍郎朱永佑等縱火自焚死名振擁魯王遁三盤島之
源遣總兵馬進寶等率兵追克之焚其積聚復敗之於沙埕收各嶼戶口八千五
百餘悉令歸農因與陳錦金礪奏設陸兵一千爲中營水兵二千爲左右營駐守
舟山增設弁備統以副將敘功晉三等子世襲罔替十六年八月授鎮海大將軍
駐防鎮江疏言京口要地百川滙流所以通江南半壁之財賦輓運北輸近因海
敵鄭成功狡逞糾羽黨聯踪入江來犯幾至橫截運道臣思敵之所長在水宜先
練習水師以資防禦夫防海之策有三出海會哨勿使入江上策也循塘拒敵勿
使登陸中策也列陣備兵勿使近城斯下矣顧水師必先僣造船隻今礪火器具

水手舵工百無一備何以禦敵乞敕總督郎廷佐速爲製備下兵部速議行之十七年七月疏陳三事一沿海民向有雙桅沙船一名捕魚亦名立功自明時因引倭人入寇久經飭禁至今未盡革除奸民多資緣汛官買口私出因臣申嚴海禁始開報船戶花名投營效力此等船隻造作堅固其人皆熟於洋面水道若徒許令投營不爲安插得所日久必仍販載禁貨出洋或且爲海敵耳目今令京口水師造船二百招募水手舵工八千餘名一時正難精當莫若悉將兩項船隻查驗堪用者量給價值各船戶照例給以糧餉既可省鳩庀製造之費亦可杜私通海敵之弊一汛防向設戰船分散各營船式低小猝遇海敵大艘勢難向抵臣思京口水師旣造船隻旌旗舳艫煥然改色江南亦有沙號各船備用則此等小船除狼山福山吳淞各口酌留數號以備傳遞哨探之用其餘不必概行修補以省無益之費一邊海汛地緊要凡礮臺烽墩橋路宜修葺高廣預備不虞臣已屢飭沿海州縣至今玩誤不行請敕督撫嚴行申飭疏下兵部並從其言詔江南督撫提鎮實心奉行無得因循怠玩是年緝獲海敵鄭成功所遣僞兵部黃徵明得交結蘇松提督馬逢知及逢知受賄關通狀奏入特命刑部侍郎尼滿赴江南會同之

源審擬事俱實逢知伏誅聖祖仁皇帝康熙元年十二月招降僞肇敏將軍陳文達僞總兵羅永德等三年四月以疾乞休召還京仍任都統四年七月復乞休得旨劉之源自太宗時委任勤勞年久著以原銜加太子太保致仕旋以其子副都統劉光代爲都統八年內大臣鼈拜獲罪拘禁之源與光並坐黨附革職任擬立斬籍沒上命從寬俱免死之源尋卒二十年妻胡氏叩閭訴之源功可抵罪詔復原銜並予三等子爵以光襲

伊爾德

伊爾德滿洲正黃旗人姓舒穆祿氏揚古利族姪也天聰三年太宗文皇帝命揚古利率師略明錦州寧遠諸邊境伊爾德從軍有功復從大軍征明北京奮勇攻擊斬殺甚衆又敗山海關援兵於灤州師還出邊先至木城擒斬明兵之守隘者五年上帥諸貝勒大臣攻圍大凌河城中兵突出伊爾德衝鋒入陣殺敵二人都統和碩圖等合師來擊追奔至壕還又擊明監軍道張春兵遇敵騎挾弓矢將犯御營伊爾德馳斬之是秋往略前屯衛率十五人偵緝明哨卒值我軍將領噶思哈爲敵兵所困伊爾德奮擊援出之積功授騎都尉世職尋擢護軍統領崇德二

年隨貝勒阿巴泰往築都爾弼城率護軍四百人防護築城工役五年五月大兵圍錦州敵兵出戰伊爾德領燾追擊至壕敗之七月隨王貝勒等至錦州松山屯田明人縱牧於野伊爾德設伏於烏欣河驅其牲畜以歸敵兵潛襲我後伊爾德率後隊還擊斬獲無算特晉爵三等男十一月以擅離營汛私往貝子尼堪家又向王貝勒及護軍校索馬擅遣其子額爾畢黑隨參領希爾根往錦州部議應降職明年奉命往睿親王軍營傳諭通察各旗將領事不卽奏報部議削爵籍家財之半均得旨罰贖七年復從圍錦州敗松山兵之來奪我礮者敘功晉一等男順治元年駐防錦州二年加一雲騎尉世祖章皇帝命伊爾德隨豫親王多鐸南征同尙書宗室漢岱等統蒙古兵由南陽趨歸德招撫甚衆至揚州城北獲戰艦百餘渡江先入旗都統進破南京福王遁走蕪湖復同都統阿哈尼堪等追擊之敗明靖南伯黃得功軍三年敘功晉二等子六年與都統譚泰征江西叛鎮金聲桓平之進剿廣東叛鎮李成棟於信豐拔其城成棟夜遁馬蹶溺水死隨分兵定撫州建昌破僞總兵楊奇盛兵二千餘江西悉平師旋復奉命統領將士往剿保定土寇敘功晉一等子八年八月護軍統領鼈拜訐伊爾德罪狀以上幸南苑時伊

爾德擅令內直員役更番及私減守門護軍額數又嫉忌鼈拜等爲上效力鞠實論死籍其家上貸之命削世職降一級留任罰贖十一月擢本旗都統明年三遇恩詔晉一等伯兼一雲騎尉隨敬謹親王尼堪征湖南敗績十一年師旋論罪革職籍沒是時明魯王朱以海爲鄭成功所殺其餘黨竊據浙江舟山爲寇十二年上命伊爾德爲寧海大將軍統兵往剿至則僞總兵王長樹毛光祚沈爾序等糾賊登岸肆掠大嵐山伊爾德遣副都統碩祿古總兵張承恩引兵趨夏關抵斗門連擊敗之斬長樹等三人殲賊兵無算而自率師攻寧波乘舟趨定海分三路進發賊將陳六御阮思等於海島望江口山下列戰船以待伊爾德揮衆進擊敗之追至橫水洋斬六御等遂取舟山十四年凱旋命貝勒杜蘭等郊勞復世爵敘功晉一等侯兼一雲騎尉十五年隨信郡王多尼征明桂王朱由榔自貴陽至盤江斬其將領進克雲南省城十八年卒於軍年五十六予祭葬如典禮諡襄敏子陀和齊早卒孫巴琿岱襲

根特

根特姓瓜爾佳氏世居尼馬察父尼努太祖高皇帝時與其兄尼唐阿率衆來歸

均任佐領隸滿洲鑲藍旗太祖文皇帝嘉尼努能事授騎都尉世職天聰八年隨副都統巴奇蘭征黑龍江虎爾哈部有功加一雲騎尉旋軍時有蒙古兵弗戒於火尼努被兵焚死根特襲職尋任刑部理事官世祖章皇帝順治元年睿親王多爾袞統師入山海關討流賊李自成根特署前鋒參領敗賊將唐通於一片石追剿自成至望都復同前鋒參領阿爾布尼剿撫馬騰口土賊敘功晉世職三等輕車都尉四年授協領駐防西安時叛賊王光泰據鄖陽詔侍郎喀喀穆率禁旅自河南進征並調西安駐防兵會剿根特率兵破賊黨甄以鍾等於房縣旋師復敗賊方國成於谷口六年叛鎮姜瓖踞大同其黨虞允白璋張萬全等陷平陽蒲州及臨晉猗氏河津諸邑根特隨總督孟喬芳侍郎額色統軍渡河剿賊復蒲州臨晉河津進征平陽白璋糾步騎六千至滎河迎戰根特同副將趙光瑞等奮擊大破之斬二千餘級復逐賊至黃河賊未及濟我師薄之溺水死者無算遂斬白璋餘賊竄入孫吉鎮悉殲焉移師趨猗氏偽監軍衛登芳依山結寨與張萬全爲犄角以抗根特分兵擊斬萬全殲其衆移兵轉戰生擒登芳陣斬偽將王國興等三十員復剿聞喜賊偽都督郭中傑兵於侯馬驛追奔三十里斬獲無算仍還駐西

安九年還京授參領三遇恩詔晉世職一等輕車都尉兼一雲騎尉十年僞秦王孫可望與其黨馮雙禮白文選馬進忠等踞武岡寶慶根特隨貝勒屯齊征之自永州趨寶慶賊衆十餘萬扼險隘抗拒根特鼓勵將士分路截擊以驍騎衝陣賊衆遂亂時正黃正紅二旗兵方與賊戰根特復躍馬往夾擊之賊大敗進征武岡有牧馬賊千餘來犯又敗之十一年九月從寧海大將軍伊爾德往浙江剿舟山賊以右翼兵擊僞伯阮思及賊將陳六御兵獲其戰艦及紅衣礮復舟山十二年敍功晉爵三等男署鑲藍旗滿洲副都統十四年敍復舟山功晉一等男十五年授鑲藍旗蒙古副都統康熙十六年三月擢本旗滿洲都統列議政大臣二十三年四月以老病乞休三十二年卒賜祭葬如典禮謚襄壯子格圖肯襲爵

郎廷佐

郎廷佐漢軍鑲黃旗人先世居廣寧父熙載爲明生員太祖高皇帝天命七年征明廣寧熙載率遼河西四堡兵民來歸授備禦分轄降衆守其地嘗擒獲逃卒五十人論功予三等輕車都尉世職崇德元年卒長子廷輔襲世職廷佐其次子也由官學生授內院筆帖式世祖章皇帝順治二年擢國史院侍讀三年隨肅親王

豪格征四川流賊張獻忠六年隨英親王阿濟格征大同叛鎮姜瓖是年遷祕書院學士十一年授江西巡撫江西自明末洊遭兵亂水旱頻仍逋賦甚多廷佐再疏請蠲緩以蘇民困得旨俞允時土賊洪國柱繆我章等剽掠饒州廣信間廷佐遣將往剿降之十二年擢江南江西總督十四年疏言江南逋賦多至四百餘萬兩宜分別官侵吏蝕民欠各爲一冊專責右布政使按籍督催其新徵歲賦以左布政使稽其收納則新舊牽混之弊悉可除至徵收之各州縣衛各官舊例未完者輒予降調官屢吏易吏民益輕玩催科反無實效宜令戴罪留任催完又江南襟控九省商賈所聚前者大軍經行以船載兵估舶因觀望不至宜如江西例官爲造船備用以蘇商困上嘉其言深切時弊下所司議行十六年以巡按衛貞元劾按察使盧慎言婪贓不職廷佐不先劾奏及奉旨詰問復巧言支飾部議黜罷得旨革職留任是年二月廷佐因巡閱江海密陳海防機宜言海敵鄭成功擁衆屯聚海島將侵犯江南而江省各汛兵數無多且水師舟楫未備請調發鄰省勁兵防禦疏下部議以鄰省亦需兵防守寢其事五月海敵陷鎮江襲據瓜洲遂犯江寧時城中守禦單弱會副都統噶楚哈等從貴州凱旋率兵沿江而下廷佐與

駐防總管喀喀穆邀入城共議擊敵挫其前鋒獲舟二十餘僞印二敵首鄭成功旋率羽衆偪城聯營八十有三敵艘蔽江分截要路廷佐與喀喀穆等晝夜堅守檄調各路步騎及水師俱至同諸將定計以滿洲兵禦擊敵營而令綠旗兵從儀鳳鍾阜二門出戰擒僞總統余新及僞總兵二次日廷佐居守議以提督管效忠總兵梁化鳳等分水陸進擊大敗敵衆擒僞提督甘輝僞總兵張祿郭良玉焚毀敵艘五百餘敵之在鎮江瓜洲者皆遁人海捷聞得旨嘉獎下部議敘尋兵部請議前此失陷所屬城邑罪上以廷佐於失陷後能固守江寧擊敗敵衆命免議祇停敘功嗣復以失糾巡按王秉衡劣蹟部議降調得旨寬免十八年聖祖仁皇帝卽位分江南江西總督爲二以廷佐任江南總督康熙四年復舊制廷佐仍兼督江西七年十一月以疾解任先是致仕大學士金之俊家居得匿名書於門詆其在朝居顯秩曾降流賊李自成之俊以訴廷佐令有司窮治之旋以書有悖逆語疏聞上以廷佐窮治匿名書帖將株連無辜並諭責之俊違例妄訴俱下部察議八年正月命削之俊加銜廷佐於病痊起用日鐫二級十三年逆藩耿精忠反福建總督范承謨遇害上授廷佐爲福建總督廷佐受命卽奏言臣孫雖爲精忠胞

弟之壻然臣誓不與逆賊俱生願力疾前驅殲除叛寇上嘉之賜鞍馬甲冑以寵其行時福建俱陷敵廷佐至浙江隨康親王傑書駐金華十五年六月卒賜祭葬如典禮祀江南江西名宦

蔣國柱

蔣國柱漢軍鑲白旗人父筌官佐領國柱初充官學生世祖章皇帝順治四年授都察院啟心郎十一年二月遷僉都御史十月擢工部右侍郎十三年六月調戶部左侍郎十月命提督操江兼安徽巡撫十五年八月部議國柱任工部時監造乾清宮工程不固應革職得旨追奪賞賚從寬留任九月以漕額全完又捐賑寧國太平水災貧民加兵部尙書十六年二月疏言海敵鄭成功謀犯內地臣膺操江重任未敢刻忘戒備如下江南岸圖山營北岸三江營逼近海洋洲港錯雜上之瓜洲京口人烟輻輳漕糧數百萬由茲北上海敵眈眈思逞匪伊朝夕臣數次巡視凡烟墩礮臺木樓悉修整以資偵守抽調操撫兩標官兵隨帶戰馬船隻設防於瓜洲等處隘口分班巡徼圖山三江之界譚家洲以北則列巨纜橫江洲以南則置木簾截流謹以布置機宜及長江險要形勢繪圖陳奏得旨圖留覽下部

知之三月調江寧巡撫先是正月國柱疏劾按察使盧慎言貪虐在巡撫衛貞元糾參之後奉旨回奏以司道未揭百姓未控申辨下部察議始既徇隱後復巧言支飾應革職得旨留任六月國柱自江寧之蘇州抵鎮江海敵已陷瓜洲國柱與提督管效忠率兵沿江堵禦敵衆登岸官軍迎戰失利退回江寧副將高謙等以鎮江城降敵國柱退駐常州檄調崇明總兵梁化鳳率兵四千赴援七月國柱進軍丹陽梁化鳳趨江寧會滿漢兵擊敵潰遁國柱卽率標兵馳至鎮江遇敵擊敗之城敵縱火乘船遁遂復鎮江鄭成功引敵船二十餘將襲崇明國柱遣遊擊劉國玉等趨崇明守禦檄梁化鳳還鎮八月疏言自江寧大捷之後料敵必犯崇明急令鎮臣旋師未渡而敵鯨大至臣親至七丫海口相度形勢海面遼闊距崇邑二十餘里遙見施翹河等處敵鯨密布卽發各營兵船出口拒敵於白茆翌日鄭成功親統大鯨二十餘齊至崇明上抵平洋沙下至排沙銜尾停泊別遣兵數萬登陸豎木寨雲梯用礮攻城遊擊劉國玉等奮勇堵禦連敗敵衆大軍出七丫口敵乃南遁獲大礮器械船隻木寨無算得旨下部察敘十七年三月論失陷鎮江罪應斬詔從寬革職籍沒十八年四月國柱以鎮江失守後卽檄梁化鳳軍援

江寧及崇明敗敵事列疏自陳聖祖仁皇帝諭曰蔣國柱失陷地方在先其後有效力立功之處酌量官職補用九月補右通政十月遷祕書院學士尋授山東巡撫康熙元年疏言登文兩營歲需兵餉十五萬有奇坐派登州府屬就近支領自遭于七變亂以來徵輸難繼請動藩庫銀五萬兩解運支應俟催徵補還下部議行二年三月疏報丈量清出樂安壽光等各州縣欺隱迷失及混入民地之竈地共一千四百一十一頃有奇有自前明以來編入民糧者有因人戶俱絕報作迷失者應撤出歸竈其民地缺額糧銀請於荒蕪民地內勸諭開墾補足完課從之五月丁憂回旗六月議敘國柱在山東察解逃人九百餘名加工部尙書進階正一品三年六月授浙江巡撫四年三月疏言杭州地狹民稠無尺土不輸將國課駐防滿兵樵採未免病民請於額餉之外加給柴價銀兩部議各省滿兵餉有定額無支給柴薪之例其兵丁樵採恐損民間桑樹令將軍禁止五年三月疏言浙江寧台溫三府頻經海寇自順治十八年間遷沿海居民於內地樹椿爲界以杜通海之奸而患始息其界外丁田錢糧已於康熙元年題准蠲除界內荒田招墾九萬餘畝尙有水衝沙壓一十六萬二千一百餘畝舊課未除莫敢承佃此界內田

土之無徵也界外雖經蠲除尙有匠班漁戶等課不入丁田失於開報今海禁既嚴片板不許下海匠戶漁戶逃亡稅課疊欠此界外土田之失報也今勘丈屬實合界內界外請蠲銀一萬五千八百餘兩米二千二百餘石以甦民困仍將界內田地設法招墾俟三年成熟起科又請捐仙居臨海二縣續報荒田無徵銀五千四百餘兩又奏台溫等六衛所及歸并縣徵之金鄉海門等四衛屯糧蠲除軍興時加增銀數照舊額徵輸內有積欠金鄉改入平陽界外屯田無徵銀三百二十餘兩并請捐免俱下部議從之四月疏言處州一郡僻處萬山之中疊石爲田水旱易困前明卽遭寇虐至順治十五六年始盡滅除丁戶凋零歲賦缺額統計麗水等九縣荒田三十九萬五千三百餘畝荒地五千八百餘畝每歲無徵銀三萬二千餘兩無徵米二千四百餘石積下未完正項錢糧十餘萬兩自順治十六年以來縣官因錢糧被參降革與憂鬱身亡憤激自經者計三十餘員催科計拙官民交困請全行蠲免逋欠荒額責令道府縣招墾照例起科得旨麗水等九縣田土荒蕪錢糧疊欠經徵縣官被參降革亡故至三十餘員巡撫以下官平日所司何事明白回奏於是前任巡撫朱昌祚總督趙廷臣皆奏言向以處州田荒賦欠

屢檄清查實荒田畝確數實因處屬田段零星崖谷溪澗按弓積步未易科算且數年間印官緣逋賦降革死亡者多冊報不齊未經題請今丈量確實應如國柱奏捐免并下部議行六年九月自陳求罷下部議國柱莅任以來於地方事務頗著勤勞詔照舊供職七年正月疏言部議裁守巡各道一百八員以爲節省裕餉之計浙省九道盡在裁汰之中所留四十員內有福建廣東巡海道各一江南淮海道一山東登萊道一蓋因封疆重務惟防海爲急浙省寧台溫三府尤爲海洋衝要之區有招撫投誠安插流移諸務請設寧台溫巡海一道駐劄台州下部議從之八月浙東被水國柱由台溫至處州紹興履勘請分別捐免各縣銀五千七百餘兩并臨海天台二縣衝沒田畝全除額賦下部議如所請十二月卒於官賜祭葬如例

喀喀穆

喀喀穆滿洲鑲黃旗人姓薩哈爾察氏先世居烏喇部父塘阿禮當太祖高皇帝時率百人來歸授佐領使轄之從征遼東有功予三等輕車都尉世職後從征瓦爾喀爲熊傷而卒喀喀穆襲職太宗文皇帝崇德三年授吏部理事官五年隨承

政索海征虎爾哈部敵據柵拒戰喀喀穆率衆攻破其柵擊斬二百人生擒索倫兵一百三十人以歸七年隨征明松山以本旗將領失律未察舉降世職爲騎都尉八年二月擢吏部參政世祖章皇帝順治元年署副都統隨大軍入山海關督後隊兵擊敗流賊李自成敍功加一雲騎尉時改參政曰侍郎喀喀穆仍任吏部四年考滿復三等輕車都尉世職尋奉命率兵征鄖陽先是大兵定湖廣明鄖陽總兵王光恩迎降卽予原官留鎮至是以罪逮繫其弟王光泰遂叛糾衆踞鄖陽自稱明鎮武伯聯結叛賊賀珍武大定等爲應援提督孫定遼戰歿賊勢猖獗喀喀穆自河南進征將薄鄖陽光泰乃遁喀喀穆偕副將王平率兵渡河追剿至房縣斬級千餘光泰及僞總兵李世英等竄四川喀喀穆還駐鄖陽五年春總督羅繡錦以叛鎮金聲桓自江西窺湖廣請留喀喀穆駐防荊州六年還京七年兼任鑲黃旗副都統三遇恩詔晉爵三等男初鄂爾多斯部札穆素多爾濟屯牧神木邊外言我使臣逃叛旣而札穆素悔罪來歸多爾濟竄匿賀蘭山屢犯邊界肆劫掠八年九月喀喀穆奉命同都統噶達渾等率兵討之九年五月自寧夏出水驛口至賀蘭山後分兵搜剿斬多爾濟及其弟二人並部衆悉殲之俘幼弱及婦女

以歸獲馬駝各數百牛千餘羊萬餘是年五月授鎮守江寧總管十年命爲靖南將軍剿廣東賊寇時流賊張獻忠餘黨李定國自廣西掠廣東潮州總兵郝尙久應之踞城以叛喀喀穆至廣州同靖南王耿繼茂進征潮州攻圍逾月以雲梯兵克城尙久投井死潮州及附近州縣悉平仍還駐江寧十六年六月海敵鄭成功陷鎮江襲踞瓜洲遂犯江寧喀喀穆與總督卽廷佐提督管效忠協謀禦擊檄調蘇松總兵梁化鳳等赴援會貴州凱旋之副都統噶褚哈瑪爾賽率兵由長江而東亦使人邀之駐守喀喀穆與密議曰敵勢盛宜乘其未集先擊之簡兵逆擊敵衆之先至者敵敗卻獲舟二十餘七月成功悉衆薄城連營八十有三敵艘蔽江喀喀穆與文武官晝夜防守俟援兵旣集議以綠旗兵先擊敵營於儀鳳鍾阜門外梁化鳳出儀鳳管效忠出鍾阜夾攻截擊殲敵甚衆陣擒僞總統余新及僞總兵二敵氣奪次日喀喀穆同噶褚哈瑪爾賽率兵出神策門見敵踞山列陣乃先分兵左右仰攻而自率精銳擣其中堅陣擒僞提督甘輝及僞總兵數人斬馘無算成功收潰衆乘船遁我水師復截擊之淹斃過半焚其船五百餘又分水路追剿敵之在鎮江瓜洲者皆遁捷聞下部優敘尋兵部請議前此失陷鎮江瓜洲罪

上念其固守江寧功可抵罪予免議聖祖仁皇帝康熙元年改江寧總管爲將軍仍以喀喀穆任之七年八月卒以其子喇揚阿襲一等輕車都尉兼一雲騎尉

梁化鳳

梁化鳳陝西長安人順治三年武進士四年授山西高山衛守備五年大同總兵姜瓖叛化鳳從英親王阿濟格攻克陽和城賊將郭二用就擒敘功陞大同掌印都司時大同左衛渾源太原汾澤諸郡邑賊衆蜂起六年化鳳破大同北窰溝生擒賊將李義張豹二月攻渾源州克三堡破賈莊城擒賊帥王平進攻左衛下之論功加都督僉事以副將推用五月攻太原賊悉衆殊死戰化鳳身被重創督攻益力執其僞巡撫姜建勳六月攻汾州進薄孝義縣穴地置火藥藥發城圯拔其北關賊帥沈海襲大營化鳳破走之遂下曹家記古善信諸寨堡介休平遙祁縣望風悉降十月攻太原延安皆下進逼沈海於九臺火其寨海降遂乘勝進定澤州七年復殲餘寇於牛鼻寨晉地悉平八年授江南蕪永營參將剿石皿鷺鷥二湖盜十二年陞浙江寧波副將海寇張名振犯崇明之平洋沙總督馬國柱委化鳳署蘇松總兵事至則遣都司談忠出戰名振復圍高橋化鳳親馳援剿擊敗其

衆十三年三月實授蘇松總兵化鳳以平洋沙懸隔海中爲賊占聚因沿海築壩長十餘里引平洋沙入內地且灌田千頃俾斥鹵盡爲膏腴時海上鄭成功率衆號百萬先犯崇明化鳳擒間諜督兵逆戰獲敵渠餘衆潰遁十六年七月成功以大艦陷鎮江瓜州直犯江寧南北中梗化鳳率所部兵三千人疾抵江寧登高審視見敵精銳盡屯江干遂偕駐防都統喀喀穆副都統噶褚哈分儀鳳鍾阜二門身先搏戰拔敵巨燾毀其木寨命勇士踞高發巨礮飛火鏃乘勢奮擊擒僞總統余新等敵衆奔潰是夜僞帥連營屯白土山岡化鳳由陸路進兵敵列陣迎師化鳳督諸軍自下仰攻生擒僞提督甘輝等敵大敗奔北化鳳追斬甚衆別遣部將燒敵船五百餘艘敵衆自相蹂躪溺死者無算江南遂通成功敗遁入海化鳳遣將防崇明敵果薄城下適化鳳兵自江寧回聲勢相應括民舟出白茆港絕流迅擊敵復大敗成功僅以身免十六年八月授輕車都尉世職賜金甲貂裘十七年擢蘇松提督加太子太保左都督化鳳疏言蘇松濱海要地延袤八百餘里原設標兵僅二千餘名請酌調省兵三千八百名立爲中左右前後城守六營以資捍禦下部議行十八年七月上特詔曰海寇入犯江寧時梁化鳳擊敗其衆繼援崇

明保全孤城功亦不小應再敘捷功加授世職以示鼓勵遂晉爵三等男准襲八次八月以病乞休溫旨慰留之九月裁江安廬鳳提督缺以化鳳爲江南全省提督時議者以海敵初平遊氛未靖欲立界遷沿海居民於內地化鳳曰沿海設兵以所棄地畝賦之則國旣足兵民無廢業遷界何爲奏上詔從其言康熙元年丁父憂令在任終制十年十一月卒於官賜祭葬如典禮贈少保謚敏壯以其孫作長襲爵四十二年聖祖仁皇帝巡幸西安府遣官奠其墓

達素

達素滿洲鑲黃旗人姓章佳氏世居費雅郎阿由護軍授護軍校天聰五年從太宗文皇帝征明圍大凌河城明監軍道張春率兵四萬由小凌河赴援達素同護軍校鼇拜擊卻之旋往略明地奮擊斬敵騎一人還尋擢護軍參領崇德五年大軍圍錦州達素率護軍敗明杏山兵六年復圍錦州明兵數十人據塔山列火器拒守達素出不意率六騎馳上盡斬之復率兵邀擊松山遁走敵衆追至海岸溺死者無算七年隨豫親王多鐸征明寧遠擊敗敵騎八年同護軍統領阿爾津等征虎爾哈部攻克博和理城又招降能吉爾屯及大噶爾達蘇屯世祖章皇帝順

治元年從大軍入山海關擊敗流賊李自成尋同都統巴哈納等征山西敗賊兵於太原攻克絳州追賊至黃河賊得舟遁達素督兵射之賊多墮水死二年隨英親王阿濟格剿自成於湖廣攻克安陸武昌追至富池口賊列營對岸達素先諸將衝擊俘獲無算二年隨肅親王豪格征流賊張獻忠過漢中擊走叛鎮賀珍進師四川屢戰皆捷先是敍人關功予世職騎都尉及獻忠滅加一雲騎尉六年隨英親王討大同叛鎮姜瓖敗賊於右衛已而賊大至達素奮前搏擊飛矢及其喉兩手足並中傷遂墮馬軍校欲負以退達素叱曰死則死耳何避賊爲復裹創督衆力戰賊敗卻三遇恩詔並敍平姜瓖功晉世職至一等輕車都尉九年獻忠餘黨孫可望李定國等寇掠湖南廣西陷沅州武岡寶慶及全州桂林達素隨敬謹親王尼堪征之敗賊衡州貝勒屯齊令率邏卒往寶慶偵賊踪跡還遇賊衆邀戰擊敗之尋率兵剿賊全州破賊五寨斬僞副將僞守道等九人及賊衆四千餘遣兵復興安灌陽斬賊將倪兆龍是年十一月敬謹親王擊賊衡州歿於陣將佐俱獲罪達素以調遣他往嗣復擊賊有功得免議十一年擢護軍統領十三年擢內大臣十六年海上鄭成功陷鎮江犯江寧上命達素爲安南將軍同都統索渾護

軍統領賴塔等率師往剿至則彼已敗遁入海達素奏請進剿成功於廈門得旨
俞允遂領所部兵由江浙赴福建十八年聖祖仁皇帝卽位命達素率兵還京仍
任內大臣康熙八年領侍衛內大臣釐拜獲罪達素舊爲釐拜引用坐黜罷尋仍
復世職及卒以其子達禧襲

趙廷臣

趙廷臣漢軍鑲黃旗人世祖章皇帝順治二年由貢生授江南山陽縣知縣遷江
寧府江防同知因催徵逾限罷職十年大學士洪承疇赴湖廣經略軍務奏薦廷
臣清幹素著請飭隨往軍營委用得旨俞允十一年授湖廣分巡下湖南道十三
年調本省督糧道十五年隨大兵定貴州遂授貴州巡撫明年擢雲貴總督先是
土賊馮天裕等竄伏山寨旬結亡命陷湄潭犯甕安至是廷臣調思南平越遵義
偏橋諸路兵擊破賊營斬天裕及僞總兵冉宗孝等疏言貴州古稱鬼方自城市
而外四顧皆苗雖種類不同要皆專事鬪殺故馭之爲難臣以爲教化無不可施
之地風俗無不可移之鄉請今後應襲土官年十三以上者令入學習禮由儒學
起送承襲其族屬子弟願入學讀書者亦許其仕進則儒教日興而悍俗漸變又

每遇歲終土官各上其世次之籍於布政司布政司上其籍於部遇承襲時有爭論者按籍立辨斯釁端預杜矣又奏改馬乃曹滴諸土司爲流官復言黔省曩爲寇踞改衛爲府改所爲縣紛更法令民苦重役今底定之後應復舊制滇省田土荒蕪當急招民開墾其衝路各州縣請以順治十七年本省秋糧貸爲春種之資會吳三桂以五象進獻上命停止送京廷臣因疏請概停邊貢以省解送之勞疏俱下部議行尋以剿平土酋龍吉兆功加兵部尙書聖祖仁皇帝御極調廷臣浙江總督彙敘督墾雲南荒田功加太子少保康熙二年廷臣疏言浙江逋賦不清由徵解繁雜請以一條鞭徵收之法卽用爲一條鞭起解之法令各州縣隨徵隨解布政司察明註冊至爲簡便又請移海島投誠官兵分插內地杜賊人煽誘定水師提鎮各營設兵之制以備水戰杭嘉湖三府毗連太湖泖湖易於藏奸請增造快號船撥兵巡哨部議俱從其請時海敵鄭成功死廷臣招其黨僞將軍阮美僞都督鄭殷僞侍郎蔡昌登等皆相繼降獨僞兵部張煌言率衆遠遁廷臣馳赴定海與提督哈爾庫張杰定議檄水師由寧台溫三府出洋搜剿斬獲六百餘降其僞副將陳棟知煌言披緇竄伏海島廷臣選驍將徐元張公午飾爲僧人服率

健丁潛伏普陀山朱家尖蘆花澳三路以伺得敵船急擊之擒獲林生陳滿等誘使言煌言竄處卽駕所獲敵船乘夜至懸山范畧自山後潛入其帳擒煌言獲其僞敕印奏入得旨嘉獎煌言伏誅四年疏請崇節儉以維風俗又言用人宜寬小皆請敕部分別罣誤降革人員量才錄用以收得人之效又言駐防滿洲收買民人宜令地方官給與印契並曉諭居鄰俾知某人賣身旗下後或逃歸有容留者乃可坐其窩逃之罪事並下部議行會部檄各省流寓人責令回籍廷臣疏言革職解任之員應卽令回籍其身故而子孫願留及流寓士民有丁口田土已附版圖者聽其自便得旨漢軍速催回旗餘如所請五年招降海敵鄭錦之僞都督李順等六年閏四月以病求罷上慰留之八年二月卒於官賜祭葬如典禮諡清獻廕一子入監

李率泰

李率泰漢軍正藍旗人李永芳次子也初名延齡年十二卽入侍禁廷太祖高皇帝賜今名年十六以宗室女妻之太宗文皇帝親征察哈爾朝鮮及明錦州率泰俱從崇德八年隨貝勒阿巴泰征明至山東有勞績洊擢副都統世祖章皇帝順

治元年正月授刑部參政兼副都統率兵駐防錦州四月隨睿親王多爾袞入山海關破流賊李自成尋同都統金礦招撫天津又率寧遠駐防兵平定山東河南擒斬滿家洞賊將趙應元降其衆萬人二年隨豫親王多鐸破流賊於潼關移師南征克揚州下江寧分領精兵三百徇蘇州松江所過城邑悉撫定惟江陰閉城抗拒督兵攻破之三年隨端重親王博洛下杭州定福建敘功授世職爲二等輕車都尉復以考滿兼一雲騎尉五年海敵犯福州漳泉諸郡詔率泰與靖南將軍陳泰同心協謀前往誅剿至則擒斬敵渠曾慶等及餘黨數萬時鄭彩連踪數千盤踞長樂連江城邑率泰會陳泰分兵夾擊盡驅出海恢復二縣又統師直入興化生擒僞總督顧世臣等十一人斬之興化平先是福州爲敵困十四月城中民相食江西賊郭天才僞稱援兵自杉關長驅抵福州駐兵洪塘載米麥江上誘郡民出就食會率泰提師抵建寧聞之閒道飛檄巡撫使偵備賊乃夜焚洪山橋掠就食者千人以遁率泰至命有司收賊遺粟以甦餘民巡按御史周世科大治椿杵釘絞之刑考掠士民恣取財賄巨萬率泰白之巡撫會劾之世科伏誅六年從征大同叛鎮姜瓖下保德州擒斬賊黨牛化麟等敘功加一雲騎尉先是順治元

年更定官制名參政曰侍郎率泰仍以刑部侍郎兼任副都統事八年閏二月調吏部侍郎三月授弘文院大學士六月條奏三事一懲貪酷官吏一給滿洲兵丁馬匹草料一酌量營造工程次第上從之七月率泰與大學士陳泰誤增恩詔赦款復巧飾誑奏罷任降世職爲騎都尉尋遇恩詔加一雲騎尉九年正月以吏部奉恩詔予襲太濫命削雲騎尉十二月奉特旨晉三等男十年六月以大學士洪承疇薦授兩廣總督諭曰李率泰當永不敘用經略輔臣既保爲總督特允所舉著改過自新以圖報稱時明桂王朱由榔居安隆其帥李定國擁兵粵西十一年土賊廖篤增等結連定國爲寇率泰遣兵分道進剿陣斬篤增於玉版巢十二年定國犯粵東率泰領兵禦之敗其將高文貴會靖南將軍朱瑪喇率禁旅至合兵夾擊破之於新會城下乘勝追逐克復高州雷州諸郡所至軫恤民賴以安方新會被圍時城中糧盡且食人兵衆掠婦女千餘口率泰言於諸將盡釋之十三年詔加太子太保調浙閩總督諭以浙閩重地軍務方殷敕到卽兼程赴任時明將鄭成功招集亡命嘯聚海濱爲江南浙江福建之患率泰旣莅任相度形勢以鄭揚帆鼓楫來往無常倘不急整舟師慮難擒剿特疏增設水軍三千復與撫臣劉

漢祚動帑遴員刻期伐木增造號哨各船百餘爲戰禦計十四年招降海寇陳德容並疏言搜捕成功宜離其黨與散其羽翼以撫佐剿又言鄭成功之父芝龍不宜流徙寧古塔恐其地近海由此而遁爲患更大上悉是其言併飭所司嚴守芝龍是年敍前破李定國功晉一等男考滿加少保十五年正月招降鄭黨僞都督唐邦杰僞副將林狝葉祿等三月奏允調直隸山東河南山西江西步兵萬人赴浙防守海汛會鄭成功侵溫郡平陽瑞安俱陷浙東告警率泰調江寧滿洲兵助擊鄭始退走七月詔分浙閩總督爲二以都統趙國祚爲浙江總督駐溫州而以率泰總督福建駐福州九月鄭踞南安嶺窺福州羽黨陳斌旣降復叛率千餘人據羅星塔率泰馳檄會師焚其巨艦千餘敵遁因以舟師圍之斌降率泰奏斌屢叛狀誅斌於福州南十六年以會審羅源縣敗逃事不詳究供詞部議瞻徇應革職得旨革去世職留總督任兵部又追論率泰當總督浙閩時不能保固封疆應革任復得旨寬免罰俸一年仍戴罪圖功自贖康熙元年正月率泰以漳州爲全閩門戶奏增設水師二千及副將遊擊等官時定海小埕敵衆盤踞率泰密會靖南王耿繼茂遣兵擊走之又萬安所先經遷毀僞總兵楊宣等復於其地築新壘

率泰會提臣馬得功調兵夾剿賊不能支揚帆遠遁六月招降僞總兵林俊奇等六十一員兵千餘人二年九月降僞忠靖伯陳輝等一百三十餘員兵一千六百及家屬八百餘十一月招降賊將何義魏明等復統建寧延平邵武將弁三路進剿山賊獲逆渠王鐵佛斬之未幾海賊五百餘人由梁山突犯內地率泰遣總兵王進加參將折光秋夾擊大敗之俘斬甚衆復與耿繼茂統率大兵航海攻克廈門乘勝取浯嶼金門二島該地鄭錦周全斌等勢窮宵遁三年二月擒斬寧化山賊錢禾四月招降僞總兵林國樑五月大兵至八尺門僞威遠將軍翁求多率兵民六萬餘人納款率泰夜半渡海進拔銅山焚燬敵巢斬首三千三百餘級僞永安侯黃廷等率家屬兵民等三萬餘人出降獲船艦軍械無算鄭錦僅以數十艘遁去臺灣聖祖仁皇帝優旨嘉獎下部議敘加秩正一品六月率泰以病求罷諭曰覽奏知病是實當卽允所請但閩省投誠官員兵民最爲繁衆著親行安插務使得所事竣日然後來京閩六月遣總兵李長榮等出洋剿賊擒僞總兵張賢時閩海廈門各島悉已蕩平惟南山鎮海佛潭橋猶爲餘孽盤踞九月率泰飭總兵官劉進忠等進剿陣斬賊黨七千有奇招撫男婦萬餘人十月別遣兵會剿茶仔

番山寇生擒賊首余角俘斬餘黨無算四年三月再以病求罷上慰留之六月以漳汀二府地甚遼闊奏定守漳道仍駐漳州巡建道仍兼轄延平守建道自建寧改駐汀州兼轄邵武五年正月卒於官遺疏言閩海餘氛遠竄臺灣奉旨撤兵與民休息洵爲至計惟是將衆兵繁若撤之太驟則易致驚疑太遲又恐貽患目下當安反側之心日久務防難制之勢紅毛夾板船雖已回國然往來頻仍異時恐生釁端閩省兵馬錢糧專望協餉倘若外解不周則有意外之虞至數年以來令濱海居民遷移內地咸苦失其故業宜略寬界限俾獲耕漁稍甦殘喘疏上得旨李率泰原以才能蒙世祖章皇帝特簡浙閩總督自任總督以來克副簡任之意殫力報効剿撫賊寇多建功績且忠清素著正資調度今以久任巖疆積勞病殞深可憫惻下所司議卹加兵部尙書予祭葬如典禮諡忠襄明年敍功追贈一等男子正宗襲

馬國柱

馬國柱遼陽人隸正白旗漢軍太宗文皇帝天聰八年命禮部考取舉人國柱與選賜衣一襲免四丁入直內院崇德三年授都察院理事官世祖章皇帝順治元

年大兵擊走流賊李自成於大同代州歸順授國柱山西巡撫自昌平出居庸關至代州任事值都統葉臣巴哈納石廷柱等平忻州太原國柱進駐太原策應大軍汾州平陽潞安澤州等府以次底定賊黨李過高一功遁據綏德國柱疏請分兵東西夾擊使賊首尾不能相應則一鼓可以成擒上是其言二年二月疏舉明廢官巡撫張鵬雲苗胙土太僕寺卿王邦柱巡按陳昌言等並下部錄用六月陽曲土賊閻汝龍等糾衆劫掠國柱遣遊擊楊捷率兵往剿擒斬汝龍等復剿嵐縣土賊高九英招撫四十餘寨交城賊梁自雨河曲賊李俊等與九英互爲犄角國柱亦遣將剿平之十月擢宣大總督四年七月調江南江西河南總督五年正月安慶土賊馮洪圖陷巢縣掠無爲州國柱飭按察使土國寶隨侍郎鄂屯率兵剿擊擒洪圖及其黨蔣懋修鍾武等是月江西總兵金聲桓踞南昌叛賊將潘永禧突犯徽州國柱遣滿洲駐防官兵進擊賊衆奔潰復祁門黟縣上命征南大將軍譚泰率師討聲桓九江南康饒州以次恢復時僞尙書余應桂踞都昌出沒鄱陽湖國柱遣副將楊捷等隨大將軍以雲梯攻克都昌城擒應桂斬之復擊敗賊黨鄧應龍等於武寧十月廣東叛鎮李成棟由南雄犯贛州國柱遣兵與巡撫劉武

元等會剿大敗其衆六年湖廣流賊王定安陷羅田結連江南英山土賊陳元等謀犯霍山縣國柱遣中軍副將朱運亨等擊卻之三尖山檄總兵卜從善剿白雲梅家英窠諸寨僞石城王朱統錡糾賊五千餘由金紫寨赴援倚山列陣我兵奮力衝擊斬獲無算連破賊寨擒僞總兵孔文燦僞副將方學達等國柱復自率兵會提督巴山張大猷剿六安州山賊先圍賊黨侯應龍於將軍寨迎擊賊渠張福寔賊俱敗潰陣斬福寔應龍招降僞總兵王俊僞副將霍維倫等諸賊寨俱燬滅先是明魯王朱以海竄舟山僞侯吳凱踞大蘭山助之國柱奉詔酌籌剿撫機宜知寧波貢生方聖時與僞僉都嚴我公爲舊相識令赴賊巢陳說利害我公遂投誠並獻招撫策國柱護送京師上遣之齎敕招撫國柱復寓書與凱至是凱偕僞伯顧奇勳僞將軍姜君獻僞總兵陳德芝等繳僞敕印來降是年秋江南河南所屬州縣有雨雹傷稼者國柱請敕撫按確勘分別蠲卹得旨嗣後州縣遇有災傷督撫按卽察明頃畝分數奏卹勿泛奏候旨遲於察勘著爲令國柱又疏言江南旣改爲省南京國子監宜改爲江寧府學卽其舊址新之仍支學田租銀以供祀事疏下部議從之七年遇恩詔加太子少保九年七月福建賊渠張自盛竄入江

西大覺巖國柱檄提督劉光弼會閩兵合剿陣斬僞總兵李全等自盛就擒十年五月蘇松巡撫秦世植疏言各省州縣賦課徑解布政司以杜勒索侵挪諸弊國柱疏言州縣錢糧由府解司所以察核完欠重郡守之責成請於解府之時府但編號記簿無庸拆封換批則勒索挪移之弊可絕詔如國柱所請行十一年正月海上張名振屢犯崇明及劉河吳淞等地國柱增造戰艦募水師遣總兵王璟副將張恩達等分兵夾擊敗之於靖江又敗之於泰興燬其船羽衆遠竄二月湖廣紅頭賊賴龍等踞桂東犯江西國柱與湖廣總督祖澤遠會師協剿直搗賊巢擒獲賴龍等是年遇察典加太子太保九月以年老致仕康熙三年二月卒賜祭葬如例入祀江南山西名宦祠

林起龍

林起龍順天大興人順治三年進士授吏科給事中疏請嚴禁白蓮大成混元無爲等邪教務絕根株俾閭閻勿惑聽聞又以守令得人則教養行而下向化請以招流亡墾荒蕪巡阡陌勸樹藝稽戶口均賦稅輕徭役除盜賊抑豪強懲衙蠹賑災患濟孤寡修濬溝池平治橋梁興舉學校十五事考其殿最而大吏以時訪察

俱如所奏行四年正月劾山東巡撫丁文盛庸劣無能致盜寇充斥因薦大理寺卿王永吉可代文盛下部議以起龍徇情薦舉降二級外用尋坐誣劾登州道楊雲鶴贓款擬革職世祖章皇帝親政覽前奏以起龍因彈劾不實罷廢尙非品行玷缺者比詔來京候旨十年十二月復原官時軍旅數出需餉孔繁未暇講求積貯而入旗禁兵所得月餉僅堪餬口起龍請敕司計諸臣悉心籌畫先實京倉以及近輔各省倉儲務使水旱有備調發裕如又言昔年兵在盛京無餉而富今在京師有餉而貧揆之時地迥異法制尙宜更定凡駐守征行所需馬匹草束軍裝戎器悉動官帑估值分給俾籌備有資無致拮据疏入上諭吏部曰滿洲兵建功最多資生無策十年以來章奏未有言及此者林起龍所奏思慮周詳條畫有緒實心爲國忠誠可嘉嗣後有關政治民生利害興革者言官俱宜直陳無隱如果有裨政事朕不靳懋賞諭部議敘以五品京堂用起龍懇留任得旨加銜仍原職十一年轉刑科加大理寺寺丞銜疏陳州縣官媚事上司耗費不貲狀乞嚴飭禁革並請遣廉能大臣巡行各省體察情形延訪利弊疏皆稱旨飭部議行復疏劾總河楊方輿用賄署官侵剋工料不塞決口致河北盡遭淹沒工部尙書劉昌不

行糾劾乃議令督撫詳勘九河故道稽延日時冀爲方輿掩罪事下王大臣訊鞠起龍與方輿昌面質無實坐杖流上特宥之改降三級調用旋補光祿寺署正明年諭吏部列科道因言降革者以奏起龍得授大理寺寺丞十三年洊擢右通政大理寺卿工部侍郎十五年調戶部左侍郎總督倉場明年三月加太子太保七月考滿廢子入監八月請更定綠旗兵制使兵馬器械無虛額訓練行伍非具文留有用之兵裁無實之費取材技於武科責愛養於總帥章下所司議行十七年加太子太保兵部尙書銜巡撫鳳陽先是立懲貪例官吏犯贓照輕重科罪不許納贖至是起龍請仍舊章收贖充餉上命九卿科道會議從所請諭曰立法止貪今因濟餉而貸法如民生何所奏俱不合仍前例行聖祖仁皇帝嗣統授起龍漕運總督康熙元年疏請豁免東海遷居民所遺地糧報可又疏濬涇河開淮城迤南運河七十餘里直達射陽湖近海田廬免患下部知之五年上言漕運倚於河防濟寧暨臨清一帶勢雖建瓴泉湖蓄洩隄閘鱗次請飭有司修築俾無廢缺淺阻又疏禁運丁毋得病民運弁毋得病丁條議以上請旨頒行時江南浙江省蘇松常嘉湖等府穀賤白糧折徵舊額浮於市價請改徵本色上並納其言初起龍

奏禁運丁多攜貨物遲滯漕運令沿途監司節次稽察儀徵瓜洲責之總漕及漕儲道淮安責之淮安道濟寧責之總河及濟寧道天津責之倉場及催漕分司以專責成會裁漕儲道糧艘至儀徵瓜洲起龍不復委員稽察至濟寧運丁有額外攜貨者事覺總河盧崇峻具疏舉報部臣令起龍咨送盤驗不實諸職名起龍以道員既裁申覆六年四月御史張志尹糾其不自引罪巧言支飾上命起龍回奏起龍謝溺職乞賜罷斥下部議坐失察命降三級休致以疾卒於家

耿繼茂

耿繼茂漢軍正黃旗人耿仲明長子順治初授子爵六年隨仲明征廣東仲明死繼茂代領部衆隨平南王尙可喜進征攻克南雄韶州廣州分兵平肇慶羅定高州雷州八年四月世祖章皇帝命繼茂襲父靖南王爵九年流賊張獻忠遺黨孫可望李定國自貴州雲南寇廣西連陷郡邑繼茂同可喜遣兵赴援恢復梧州南寧平樂潯州橫州十年潮州總兵郝尙久據城叛繼茂同靖南將軍喀喀穆豐順總兵吳六奇進剿圍城逾月招降賊將王立功使爲內應遂樹雲梯登城殲賊無算尙久投井死潮州及饒平揭陽澄海普寧諸邑悉平十一年李定國寇擾高雷

廉三府進圍新會繼茂同可喜及靖南將軍朱瑪喇擊走之定國遁踞南寧復犯橫州繼茂統兵由梧州至橫州擊走賊衆進剿南寧定國遠竄十三年賜敕紀功歲增藩俸千兩初繼茂與可喜攻下廣州怒其民久相抗凡丁壯輒誅戮卽城中駐兵牧馬營造靖南平南兩藩府東西相望繼茂尤汰侈廣徵材木採巨石於高要縣之七星巖工役無限制復創設市井私稅民咸苦之會布政使胡章自山東調廣東行至江西聞官廨爲兵馬所占具疏劾繼茂可喜縱兵不戢狀繼茂奏辯曰前者我兵圍廣州九月被賊礮擊鋒傷不知凡幾城下之日卽食肉寢皮未足洩忿俘繫實多至部衆初雖雜處旋卽移駐北城未嘗久占官廨可喜辯亦同胡章坐誣罷任逾年高要知縣楊雍建內擢給事中疏陳廣東採買濫役私稅諸大害謂一省不堪兩藩請移一藩於他省疏下所司察議時貴州雲南底定經略大學士洪承疇請分駐重兵於要地於是詔繼茂鎮四川尋改鎮廣西皆未及移十七年七月命移鎮福建時海敵鄭成功據金門島入侵閩浙繼茂旣移鎮與總督李率泰協謀征剿屢奏捷聖祖仁皇帝康熙元年繼茂偵成功以狂疾死其子錦自襲僞延平王羽黨嫌隙漸生遵旨相機剿撫尋招降成功族兄僞總管鄭泰泰

遣僞中軍楊來嘉吳蔭赴漳州獻其僞敕印成功弟鄭世襲僞都督鄭賡楊富陳宗率僞官數百兵衆數千降二年十月繼茂同率泰督兵渡海攻克廈門羽衆驚潰水師提督施琅以所募荷蘭國夾板船邀擊之斬級千餘乘勝取浯嶼金門二島錦與僞侯周全斌等遁走銅山復糾餘黨突犯雲霄陸鼇諸衛總兵王進功率兵與戰斬殺過半破敵巢於下蔡逃者悉墮水死僞將張傑吳盛率兵民來歸三年三月繼茂復與率泰進攻及海澄公黃梧統兵至八尺門由海道拔銅山敵巢鄭錦集戰艦數十遁臺灣餘黨或斬或降獲戰艦軍器無算捷聞得旨嘉獎並加歲俸千兩十年正月疏陳疾劇請以長子精忠代理藩務得旨俞允五月卒賜祭葬如例諡曰忠敏以精忠襲爵精忠別有傳

尙之孝

尙之孝漢軍鑲藍旗人尙可喜次子幼隨父於鎮所康熙十三年任藩下都統值逆藩吳三桂耿精忠反潮州總兵劉進忠應之踞城叛可喜令之孝率兵討進忠先是可喜欲以長子之信襲其平南王爵至是惡之信酗酒嗜殺因疏陳之孝律已端慎馭下寬厚堪嗣職聖祖仁皇帝命之孝襲封平南王之孝畏之信啟巡撫

劉秉衡爲之奏辭部議令可喜如舊理事俟賊平以之孝襲時普寧爲進忠黨劉斌所踞知縣段藻佯附賊潛遣人請兵約爲內應之孝誘斌出城迎戰藻閉門絕賊我兵奮擊敗賊斌竄走之孝復普寧進征潮州進忠糾衆抗拒我兵三戰皆捷陣斬僞副將陳璉及賊兵千餘又攻克東津筆架山洗馬橋賊營十四年詔授之孝平南大將軍之孝圍潮州歲餘進忠求援於海敵鄭錦錦遣僞總統劉國軒引賊萬餘助進忠我兵戰失利之孝退駐惠州十五年可喜以疾劇入奏上命之孝還廣州視疾代理藩務之孝未聞命之信已降三桂脅之孝撤兵棄惠州之孝弗與抗解兵柄侍可喜疾及可喜卒仍閒居廣州十六年之信歸順襲父爵之孝還京命列內大臣之孝疏言臣詣闕待罪分當誅戮乃蒙恩寬宥願募兵三千備軍械剿賊自效廷議如所請俟募兵數足分爲三營設將校給以俸祿赴簡親王喇布軍供調遣於是詔授之孝宣義將軍十七年之孝率兵至江西時三桂餘黨猶分踞吉安贛州山寨之孝與總兵許盛會師進剿多斬獲十八年招降僞總兵林興隆僞副將王國贊等二十餘員兵六千餘僞將軍楊一豹江機由廣信寇掠建寧邵武之孝奉詔赴福建會剿師至汀州一豹等降於康親王傑書軍之孝還江

西十九年江西平命之孝還京以所募兵留充江西綠旗營伍是年九月之信以悖逆賜死廣州法司議之孝應連坐詔免之仍隨內大臣班入直二十年五月請迎其父骸骨於廣州歸葬海城得旨俞允二十二年議政大臣等追論之孝當之信叛時不能討賊邇者藉詞葬父久留海城又奏請欲守陵寢計圖宴逸應革職銜與其子弟並籍入內務府詔從寬止削其職三十五年正月卒年五十有七子崇坦官至鑲紅旗漢軍副都統

金光祖

金光祖漢軍正白旗人順治十六年任吏部郎中兼佐領尋遷參領十八年授福建右布政使聖祖仁皇帝康熙元年調廣西左布政使三年遷廣西巡撫九年擢兩廣總督十三年二月廣西將軍孫延齡叛應逆藩吳三桂踞桂林陷平樂梧州光祖奉詔同平南王尚可喜酌籌剿撫七月丁父憂命在任守制時總督駐肇慶光祖遣兵赴廣西援剿復梧州擊敗賊衆於懷集縣及欽州十四年六月光祖自率兵赴梧州禦擊來犯賊衆屢奏捷旋奉詔同鎮南將軍舒恕剿叛鎮祖澤清於高州舒恕自江西進廣東卽與光祖會師征高州吳三桂遣賊將誘光祖降謂繳

出總督印卽易與新印俾總管兵柄光祖遂阻舒恕剿賊趣之還江西自引兵五千還肇慶先是上授孫延齡爲撫蠻將軍贖印至肇慶延齡已叛光祖貯存之至是謫言總督印失去尙可喜爲之代奏暫用撫蠻將軍印會可喜疾劇其子之信潛附吳三桂誘藩屬及在省文武官從逆光祖趣駐守肇慶之副都統莽依圖率滿兵還江西遂自通款賊將董重民李廷棟等降於吳三桂時十五年二月也旣而吳三桂以董重民爲兩廣僞總督誘光祖往湖南董重民逐光祖出官廨光祖乘間往依尙之信十六年五月尙之信聞莽依圖率江西大兵將入粵與光祖合謀反正光祖乃疏言前者與將軍舒恕會兵高州逆書疊至僞諭交投臣窺察衆情猜忌敬藏總督印託言失去平南王尙可喜令臣暫用撫蠻將軍印仍舊管事各逆因臣不繳總督印遂報吳逆解臣兵柄調往衡州臣乘間赴廣州與尙之信密謀令督標兵弁借乏餉鼓噪擒僞督董重民遂率廣肇所屬軍民於大軍至南韶之日反正歸誠臣乃以先藏兩廣總督印開用綏輯人心惟臣清夜自思荷蒙皇上厚恩畀以兩粵疆土旣不能預籌保固一旦被逆賊淪陷又不能一死自決至辱身降節乞敕嚴加處分疏入得旨金光祖身膺兩廣總督重任不能保守封

疆致逆賊淪陷前奏印已失去今又稱收藏如果收藏前具題失印之時何以不將此情密奏明屬巧飾本應從重治罪念其與平南王尙之信密謀反正復定粵東著革職仍留原任戴罪圖功是年吳三桂遣其從孫吳世琮誘殺孫延齡踞平樂南寧等府詔光祖率兵恢復光祖疏請增調滿洲兵上諭責之曰進征廣西合計將軍莽依圖平南王尙之信巡撫傅宏烈并金光祖所轄之兵爲數已多金光祖正宜乘此機會効力先驅以贖前罪況傅宏烈前此未任封疆尙能募兵擊賊直入粵西恢復梧潯諸府鼓勵將弁爲國宣力金光祖本膺總督重寄曾疏請同總兵官祖澤清取南寧柳州不應遷延時日復請增兵其違前旨速行進取十七年將軍莽依圖進征平樂請留光祖駐梧州任轉輸防守之務金光祖以叛賊馬雄死雒容柳州賊勢漸潰仍率兵進征師至潯州與賊戰失利詔責光祖希功輕進令回駐梧州光祖尋疏言賀縣開建爲粵東西門戶最爲要地守此二處則兵餉可由封川輓運上敕莽依圖固守賀縣開建光祖督運糧餉以給大軍是年十一月復原職十八年南寧賊平詔光祖同尙之信莽依圖等剿撫慶遠太平思恩等府餘賊十九年六月光祖隨尙之信駐武宣會廣東巡撫金僑劾奏尙之信狂

悖諸款奉詔與光祖合兵擒之事詳尙之信傳八月勅光祖率兵隨大將軍進征雲南二十年十二月副都御史余國柱疏劾之曰金光祖本闖茸無才之人負貪邪苟且之性歷任布政巡撫時政蹟無聞穢聲已著復總督兩粵自當竭智據忠鞠躬盡瘁即使時值艱難勢處迫促捐生而外夫復何求乃從逆投誠之情事言者髮指聞者噴飯姑就其一二大端言之光祖同將軍舒恕出師高雷彼時尙之信反形未彰肇慶諸郡尙爾安堵光祖忽稱印信失去堂堂制府三軍司命朝廷印信隨身出入豈其有翼而飛有脛而走乎明係自己暗藏希圖繳印吳逆假盜失以文其姦及尙之信叛起廣城光祖擁兵五千與副都統莽依圖同居肇慶矢志同仇義無反顧縱獨力難支亦當隨莽依圖領兵外出以觀內變乃計不出此安居肇郡恬受僞職有覲面目改換衣冠且聞其猶然建牙秉鉞鳴騶開道後經吳逆解其總督許加三級另用亦復揚揚得意坐待僞命迨後禁旅壓境傅宏烈每從間道密報逆情志圖內應絕不見光祖一羽之馳至逆黨勢迫投誠光祖始同衆反正戴罪圖功猶貪心不已乞憐於尙之信代題還職夫旣爲之信肺腑之交豈不知其猶懷二心巡撫金備挺然直糾光祖全無發覺其爲隱庇姦黨叵測

不悛不問可知我皇上德侔天地待之不死仍以總督任之恩則大矣試問光祖懸印肘後擁旄車前回首昔時追尋往事良心安在耶雖令出師滇南無論逗遛觀望尺寸罔效即使有蓋世之功而大節既虧百身莫贖矣請嚴賜處分以爲不忠者戒疏下王大臣議革職歸旗越數年乃死

石廷柱

石廷柱遼東人隸漢軍正白旗先世居蘇完姓瓜爾佳氏曾祖布哈明成化中任建州左衛指揮僉事祖阿爾松阿襲職父石翰始家於遼東遂以石爲氏有子三長國柱次天柱次卽廷柱也初爲明廣寧守禦天命七年太祖高皇帝親征明攻廣寧城天柱時爲明千總出迎賜金印鞍馬令其撫慰城中士庶廷柱遂以城降授三等輕車都尉世職俾轄降衆十一月蒙古巴林部貝勒囊努克背盟刦掠廷柱從上討之克取屯砦收其畜產論功晉三等男爵天聰三年太宗文皇帝命率兵搜剿明故將毛文龍所屬諸島會石城島兵來犯擊斬二百人俘十九人以歸尋從上征明北京明年正月班師至沙河驛廷柱與文臣達海頒諭城中軍民降之先是三屯營漢兒莊喜峰口潘家口洪山口並已歸順至是復叛廷柱奉命同

達海等率兵千人往偵收復漢兒莊率其城中將士來謁五年明總兵祖大壽築城大凌河上親統軍圍之廷柱擒斬出戰敵騎尋大壽糧盡窮蹙上頒敕諭降大壽從子澤潤以書繫矢射出城一與廷柱一奏上乞令廷柱往與大壽定議廷柱同達海等至城南臺下先遣陣獲千總姜桂入城大壽令遊擊韓棟偕姜桂來迎廷柱並以其義子可法爲質廷柱乃踰壕與語大壽言決意歸順惟乞大兵速取錦州俾得妻子相見廷柱還奏上復遣廷柱諭之大壽遂出降六年從征察哈爾多斬獲七年隨貝勒岳託等征明旅順口凱旋上親酌金卮以勞晉爵三等子八年從征明應州城東南隅有石家村堡廷柱用礮攻克之九年貝勒多鐸統師征明次廣寧令廷柱同都統阿山率兵四百先趨錦州至大凌河西遇明兵相對列陣遣騎馳告貝勒貝勒移師赴之明兵見我軍踵至遂大驚潰廷柱與阿山等率所部掩擊陣斬明副將劉應選及其兵五百擒游擊曹得功並守備三人翌日復攻克一臺師還分賜所俘獲崇德元年二月上幸演武場以廷柱軍容整肅獎賚之十二月命廷柱整飭器械儲糧糗統所部漢軍同恭順王孔有德懷順王耿仲明智順王尚可喜等護紅衣礮及諸軍器隨大軍征朝鮮二年大軍旣克朝鮮其

國王李倬降遂征明皮島廷柱與戶部承政馬福塔從北隅督戰有功尋追論朝鮮王謁上時石廷柱亂班釋甲及縱士卒違法妄行罪解任罰贖奪賞賚是年七月始分漢軍爲左右翼以廷柱爲左翼都統三年上與諸臣論兵事以呂尙訓勉諸臣廷柱奏言呂尙能專制闔外生殺故所向有功今臣等若有過下部逮訊雖左領以下亦當與之比肩對簿其何以堪諸大臣以其言懇請下刑部議罪論死上特宥之是年十月從征明錦州攻克諸屯堡獲人戶及馬騾牲畜甚多會我軍破錦州城旁一臺臺上所餘敵兵都統馬光遠部兵守之敵兵潛從間道遁去部議廷柱弗追擊應鐫爵罰緩得旨寬免四年二月上統軍駐松山命廷柱攻城南樓臺毀其堞臺兵不能禦降其守將王昌功等四十餘人上登松山南岡相度城垣形勢命廷柱隨尙可喜用礮攻城南門之左廷柱與光遠先取城西南隅一臺諸將繼進合攻城盡毀其堞會以日暮罷明日復進攻敵守禦甚固我雲梯兵不能入遇害者二十餘人廷柱兄子達爾漢亦中創上召詢諸將皆謂必能攻克但鉛藥不繼宜遣人速取翌日復集議有德仲明可喜光遠欲鑿地道攻城廷柱獨持不可諭責廷柱曰爾爲主將恇怯無鬪志而與攻城人異議後何以戰爾因兄

子被創故驚懼不欲戰耳廷柱惶恐對曰臣向曾出哨於此知地中有水石必不可穿且亦不能越壕而過故冒陳愚悃今衆皆謂可攻臣焉敢獨異乃與有德等鳩役於城南鑿地道會祖大壽自錦州遣蒙古兵三百乘夜入城覺之多爲備地道不能達於是罷攻城議師旋追論廷柱在松山時詭稱鉛藥已罄不盡力攻城諸罪罷任罰鍰尋命赦罪分漢軍兩翼爲四旗以廷柱爲鑲白旗都統初祖大壽之降也請歸錦州爲內應後竟背約屢抗我師六年七月廷柱條上困錦州策謂錦州爲遼左首鎮今我遣兵鑿壕築壘誓期翦滅以圖進取誠至計也第明國以祖大壽爲保障我兵圍之急彼必益發援兵併力一戰宜乘此時簡精銳分布各旗屯田處遇警卽並進如敵已立營用紅衣礮四面環攻伺其軍動我軍突入轉戰過錦州至松山杏山間敵必敗遁錦州可破矣錦州旣破關外八城聞風震動是卽當年瀋陽失而遼陽隨下沙嶺失而廣寧隨順之明效也近聞喀爾喀扎薩克圖聲言取歸化城恐陰欲取鄂爾都斯臣擬令鄂爾都斯移過黃河與歸化城相近彼此策應仍簡才勇將士攜取火器並鳥槍手百人往彼駐守而令王貝勒率兵從宣大諸處進略應州雁門歸化城有警輕騎倍道赴援彼明國援遼士馬

所恃不過宣大陝西榆林甘肅寧夏諸路西省有變自顧不暇豈能復援遼哉此一舉兩得之策也明援兵從寧遠至松山所齎行糧不過六七日若少挫其鋒勢必速退或逗遛數日亦託言糧盡而返宜設伏於高橋險狹處掘壕截擊仍發勁兵尾其後使之進退無路則彼之援兵盡折而降於我矣我兵遇敵步軍每奮勇直入第彼步營火器稠密恐致傷挫應偵敵人遠離城郭或憑據高阜水泉易竭糧餉不充然後四面攻圍夜則鑿壕守之晝則大礮擊之不一二日勢必自生變亂其斃可坐而待也洪承疇書生輩耳所統援遼鎮兵亦皆烏合亡命雖張聲勢心實恇怯如祖大壽一失則承疇與諸將縱得遁去亦東市伏誅而已彼見我皇上恩養降將最爲優渥或慕義歸誠亦未可料今明國災異迭見流寇不寧聖主乘時應運定鼎中原機不可失疏入上嘉納之九月大軍圍松山城敵乘夜犯廷柱營廷柱率兵禦擊斬首十餘級獲刀甲槍礮無算晉爵二等子七年分漢軍爲八旗以廷柱爲鑲紅旗都統世祖章皇帝順治元年四月隨大軍入山海關擊敗流賊李自成五月同都統巴顏等剿滅昌平土賊六月同都統巴哈納率師剿撫山東郡邑七月移師會都統葉臣攻克太原府城平山西河南賊寇師還賜白金

五百兩晉爵一等子六年從征大同叛鎮姜瓖恢復渾源太谷朔州汾州等城十二年五月授鎮海將軍駐防京口十四年二月以老乞休上念其宣力年久勤勞素著命加少保兼太子太保致仕先是敍平姜瓖功復三遇恩詔廷柱晉爵一等伯兼一雲騎尉尋改爲三等伯予世襲十八年二月卒年六十有三賜祭葬贈少傅兼太子太傅諡忠勇立碑紀功以第三子華善之子文炳襲爵

蔣赫德

蔣赫德本名元恆世居遵化天聰三年太宗文皇帝統師征明克遵化選儒生俊秀者送盛京入文館讀書元恆與焉賜名赫德崇德元年授祕書院副理事官賜人四戶及牛驢七年分編漢軍八旗赫德隸鑲白旗世祖章皇帝順治二年四月擢國史院學士五月充明史副總裁三年四月教習庶吉士四年三月充殿試讀卷官六年正月充纂修太宗文皇帝實錄副總裁五月復命教習庶吉士七年四月以繙譯三國志成賜鞍馬九年三月充殿試讀卷官五月因朝鮮國王李滉陳奏國內外奸徒陰謀詛咒圖爲不軌俱已伏辜事赫德同侍郎伊勒都賚敕往朝鮮慰問十一年三月擢國史院大學士十二年正月奉詔直陳時務疏言察吏而

後可以安民除害而後可以興利方今百姓大害莫甚於貪官蠹吏懲治之法惟侍督撫糾劾以其確知屬員之賢不肖也每見各督撫彈章指事列款臧跡累累及奉旨提問招擬覆奏計臧科罪不及十之二三不曰事屬子虛則曰衙役作弊卽坐衙役者又多引雜犯律例聽其贖免何所懲憚而不肆行其志乎其始也官胥朋比虐取瓜分事敗之後官則嫁名於吏以覲然灰吏則假貲於官以成展脫究之官吏優游兩獲無恙糾劾雖行竟成故事此因循之積弊也請天語嚴飭嗣後各督撫糾劾貪官審結覆奏之時必全述原參疏語款數如前註明開報官及承問官職名某款不實或係開報官捏造或係承問官故縱務窮源質訊使是非不容並立果係衙役詐騙者亦按律坐以應得之罪不准折贖則貪蠹清而民生蘇息矣得旨下所司嚴飭行二月諭獎密勿抒誠贊襄竭力諸臣加赫德太子太保十四年正月修輯太祖高皇帝太宗文皇帝聖訓以赫德爲總裁十五年七月改內三院爲殿閣銜授文華殿大學士兼禮部尙書十月充武殿試讀卷官十六年三月諭獎勤勞素著諸臣加赫德少保兼太子太保九月同侍讀碩博輝賚敕往封朝鮮國王世子李柵爲朝鮮國王十七年二月引疾求罷得旨卿清慎素著

佐理有年念時有疾病准解任調理聖祖仁皇帝康熙元年六月復設內三院詔起爲弘文院大學士二年三月調國史院大學士九年九月卒年五十有六賜祭葬如例諡文端

傅以漸

傅以漸山東聊城人順治三年一甲一名進士授弘文院修撰四年充會試同考官五年充明史纂修官八年閏二月遷國史院侍講九年正月充太宗文皇帝實錄纂修官六月遷左庶子十年正月遷祕書院侍講學士五月遷少詹事閏六月擢國史院學士七月教習庶吉士十一年八月授祕書院大學士十二年正月詔陳時務因條上安民三事又命作資政要覽後序二月諭獎密勿抒誠諸大臣加以漸太子太保尋改國史院大學士充文武殿試讀卷官時編輯太祖高皇帝太宗文皇帝聖訓暨通鑑全書以漸並充總裁又承旨撰內則衍義會戶部進新修賦役全書亦命覆核十三年八月京察自陳乞罷得旨卿輔弼重臣醇誠樸慎勤勞密勿倚任方殷豈可引例求退著益抒猷念佐成化理十四年二月以漸同庶子曹本榮奉諭曰朕覽易經一書義精用溥範圍天地萬物之理自魏王弼唐孔子曹本榮奉諭曰朕覽易經一書義精用溥範圍天地萬物之理自魏王弼唐孔

穎達有注釋正義宋程頤有傳迨朱熹本義出而後之學者宗之明永樂間命儒臣合元代以前諸儒之說彙爲大全於易理多所發明但其中同異互存不無繁而可刪華而寡要且迄今幾三百年儒生學士發揮經義者亦不乏人當並加採擇輯成一編昭示來茲爾等殫心研究融會貫通務期約而能該詳而不復俾義經奧旨炳若日星以稱朕闡明四聖作述至意十二月修易經通註以進十五年二月偕學士李燾充會試主考官入闈舊俱攜書籍至是言官奏定禁例以漸疏請凡出題應用書籍敕部照例給發庶免漏誤下部議令內監試察驗仍准攜入以漸因闈中咯血疏言入闈七日幸硃卷尙未謄進乞賜另遣一員同李燾任事得旨知卿偶恙著力疾料理闈事四月考滿加少保九月改內院爲內閣授以漸武英殿大學士兼兵部尙書十月以疾乞假回籍十六年十一月以病逾一載乞罷黜命加意調理稍痊卽來京入直辦事不必引請處分十七年三月京察自陳乞罷得旨卿清慎素著佐理有年著加意調攝痊日卽來京供職不必求罷十八年正月聖祖仁皇帝御極以漸復疏乞罷下部議准解任在籍調理病痊起用康熙四年四月卒年五十有七

呂宮

呂宮江蘇武進人順治四年一甲一名進士授祕書院修撰九年遇恩詔加銜右中允十年二月上幸內院宮與侍講法若真編修程芳朝黃機並召對命撰柳下惠不以三公易其介論賜茶食五月諭吏部曰翰林官陞轉舊例論資俸兼論才品朕思果有才品特出者何必拘於舊例右中允仍管祕書院修撰事呂宮文章簡明氣度閑雅著遇學士員缺卽行推補尋授祕書院學士閏六月擢吏部右侍郎十二月授宏文院大學士時言官請禁江浙僉點富戶運白糧及織造報充機戶諸弊部臣以已有例禁議覆宮請嚴飭督撫察究從之十一年三月給事中王士禎御史王秉乾交章劾宮素倚罪相陳名夏聲勢攬事招搖備員政府無寸長表見命宮回奏宮引咎乞罪得旨呂宮旣爲大臣與陳名夏結黨是真人所共知本當治罪姑從寬宥從今以後著洗滌肺腸痛加省改實心盡力慎辦職務以副朕超擢宥用之意五月以巡按四川御史郝洛爲吳三桂訐罷宮曾與大學士馮銓成克鞏等合疏薦洛可大用坐濫舉降二級留任九月疏言臣乞假調理已經三月惟冀早痊入直奈稟體怯弱人道俱絕精神日減僅能僵臥兀坐伏乞垂憐

篤疾容臣寬期調治得旨著用心調理稍痊卽入直辦事十月御史姜圖南劾宮
養病疏語褻嫚將來雖愈其所建立亦無足觀不當容其饗戀上以宮在病置弗
問宮疏言臣曠職已將半載蒙皇上數遣大臣詢狀臣不敢諱隱疾粗率具述致
道臣姜圖南以褻嫚責臣蒙恩寬宥臣不敢贅至圖南謂臣雖病愈所建立亦無
足觀則臣自揣疏庸應不出圖南所料況政府殷繁豈容臣優游養病曠職臣旣
無表見無敢沃重以錮疾爲人所羞稱宜急隱避乞賜罷斥上慰留之十二月命
同大學士額色赫金之俊充資政要覽總裁是月疏言臣臥病經時早宜引去而
受恩深重誼不忍言聞人言以猛省始敢乞休仰荷溫綸諭以用心調治不必求
罷今又逾兩月中懷焦迫再乞恩憐容臣回籍調理上復慰留之十二年正月御
史楊義疏言宮屢挂彈章久負曠職之愆願皇上早允歸田養其廉恥疏入旨未
下宮再疏請回籍詔加太子太保馳驛回籍調理病痊日召用賜貂裘蟒緞鞍馬
十三年六月賜敕存問曰朕惟國家簡輔弼之臣資其助勳宜加恩禮卽或抱疴
歸里睠念才能每懷寤寐亦豈忍漠然置之爾大學士呂宮學術雅醇性資通明
旣魁多士旋登禁林受朕深知早參大政而能不阿不激小心匡贊一載綸扉多

所裨益不意二豎偶嬰藥餌未效因准暫還用便調攝今間闕年餘彌深軫念特遣官賫敕存問賜羊酒卿其慎起居親良餌爲國愛身佇須召用欽哉十七年詔大學士尙書等自陳時大學士金之俊傅以漸俱告假回籍相繼具疏自陳並諭趣來京供職宮於十三年十月疏謝賜敕存問恩自後不復具疏左都御史魏裔介因劾宮乍病時上疏入告而曰人道俱絕遺笑天下一病六載聞問杳然忘主負恩上以宮因病請告回籍無自陳之例諭裔介不必苛求十八年聖祖仁皇帝御極宮來京仍因病回籍康熙三年四月卒年六十有四賜祭葬如例

魏裔介

魏裔介直隸柏鄉人順治三年進士由庶吉士授工部給事中五年二月疏請舉行經筵日講以隆治本得旨報聞是年充山西鄉試正考官六年轉吏科給事中丁母憂歸九年補原官疏請時御正殿晉接羣臣令部院科道等官面奏政事又言各州縣間遇災荒旣經報部其例得蠲緩錢糧卽與停徵以杜吏胥欺隱並就各州縣所有積穀及存貯之銀先行賑貸疏並下所司議行先是江南旣定明兵部尙書張縉彥赴招撫大學士洪承疇軍前投誠至是河南巡撫吳景道援恩詔

薦舉部議予錄用裔介疏言縉彥在明朝身任中樞值流賊李自成逼北京匿不以報有盧杞賈似道之奸而庸劣過之若復列朝班恐貽羞士類乞敕部擯棄以協輿論疏下部察議以事在赦前予外用十一年裔介遷兵科都給事中疏劾剿撫湖南將軍續順公沈永忠當流賊孫可望犯辰州時擁兵坐視不救致總兵官徐勇辰常道劉昇祚等守城力竭戰死乞賜罷斥以懲庸懦疏下所司察議永忠罷任削爵十二年疏劾福建提督楊名高禦剿怠玩致漳州郡邑爲海敵鄭成功淪陷名高坐罷任是年遷太常寺少卿尋擢左副都御史十三年疏劾大學士陳之遴心術不端營私植黨之遴旋奉詔解任發遼陽閒住時孫可望盤踞貴州鄭成功鴟張海島裔介疏言孫賊借峒蠻爲助而峒蠻之甘爲所用弗歸順我朝者因欲收其舊有之敕印也宜命在事諸臣加意招徠給以新敕印其舊者聽其存留俟向化有年再籌收繳則歸順者多助賊者少至鄭敵自明天啟之季作亂海上已三十年我之水師無多若揚帆大海以擣其巢非所素練惟於沿海要地增兵築堡使敵船不得泊岸侵擾俟其疲於遠涉坐而受困然後招其攜貳散其黨與海患可以漸平又請定教官每年考察之例令學政刊布明儒薛瑄王守仁等

講學諸書以培真才並下部議行十四年二月擢左都御史四月因欽天監推算次月日月交食裔介上疏請廣言路停緩工量寬州縣催科考成速清恩赦應釋滯獄減調移之兵節供應之費上嘉其奏下部詳議行七月同左副都御史能圖等疏請更定世職襲例上以所奏似有受囑徇私情事召集詰問下部論罪能圖倡議變亂成例革世職裔介坐附和應革職詔從寬留任尋遇恩詔復職十六年諭獎勤勞奉職諸臣加裔介太子太保十七年二月裔介以京察自陳得旨御史巡方屢以貪贖敗檢魏裔介爲臺臣長曾未據實糾參殊負委任削去太子太保並所加一級仍舊供職會陝西巡撫張自德爲給事中金漢鼎疏劾贓款解任給事中孫光祀因劾裔介曾以洮岷道劉澍致託自德故稔知自德貪婪不敢糾劾詔裔介回奏裔介言不劾自德由聞見不廣劉澍赴任時曾與自德書言當教誨之勉作循吏上以裔介旣吐真情予免議五月疏劾大學士劉正宗成克鞏欺罔附和諸罪詔正宗克鞏回奏未得實下法司勘鞫並革裔介職與質訊正宗獲罪籍沒入旗克鞏革職留任裔介復原官時因雲南福建用兵裔介疏請敕部綜計軍需足用卽停止加派直省州縣錢糧得旨除已派外其未派者並行停止聖祖

仁皇帝康熙元年雲南平裔介疏言雲南既有吳三桂藩兵數萬及督提兩標綠旗兵則滿洲兵可撤但滇黔川楚之邊闕不以滿洲兵鎮守要地倘戎寇生心恐鞭長不及荆襄乃天下腹心宜擇一大將領滿洲兵數千常駐其地無事則控扼形勢可以銷奸宄之萌有事而提兵應援可以據水陸之勝疏下部議部臣援順治十二年奏設武昌駐防有擾驛累民不准行之諭旨寢其事裔介復謂移舊駐武昌之湖廣總督於荊州部議從之二年遷吏部尙書三年擢保和殿大學士六年充纂修世祖章皇帝實錄總裁官遇恩詔加一級九年充會試正考官是年四月內院承旨會同吏禮二部選新進士六十人試以文字分擬上下中三等入奏上親定二十七人爲庶吉士御史李之芳疏劾裔介先以閱擬上卷之二十四名私令家人通信招搖納賄並劾裔介於其兄魏裔魯任運使敕書擅自更改令統轄知府前此遇恩詔予廕時裔介候缺未補乃以其子魏嘉濂混得廕又劾裔介與班布爾善比匪相倚引用私人爲實錄館纂修提調越格優敘班布爾善者以黨鼂拜伏誅之大學士也詔裔介回奏裔介言閱卷非臣一人通信納賄有何證據臣兄魏裔魯任運使敕書未經閱看廕子由吏部題明恩准皆有案可稽至謂

臣與班布爾善比匪則前此同在內院遇事輒相爭論以鼈拜之勢炤臣足跡不登其門況班布爾善與臣同官豈肯比匪之芳所指越格優敘私人構誣皆屬無據由臣服官以來彈劾無所避忌如劉正宗黨類切齒於臣者十年於茲之芳係正宗同鄉售其報復之謀難逃聖明洞鑒因請賜罷斥歸田疏入下吏部會質裔介一一辯釋之芳爭執不已言劉正宗居安邱我居武定非親非故彼獲罪身死已久謂我爲之報復爾是大學士能令朝中直隸人爲爾報復耶伏讀世祖章皇帝諭旨嚴戒被論之人反唇讐訐爾何敢悖旨於是裔介自引咎部議魏嘉蔭生雖非朦混但候補官無得廢之例應革去之芳所劾事屬有因係言官應免議裔介於奉旨回奏原款外牽引已結案之劉正宗等殊屬不合應削加級罰俸一年得旨魏裔介削級罰俸俱寬免益勤慎供職副朕宥過之意明年正月以老疾乞休得旨卿才品優長簡任機務正資贊理覽奏患病情詞懇切准解任回籍調理病痊起用十一年實錄告成加太子太傅二十五年四月卒賜祭葬如例雍正十年入祀賢良祠所著有兼濟堂集及希賢錄諸書乾隆元年上念裔介與尙書湯斌等未邀易名之典詔予追諡諡曰文毅

孫廷銓

孫廷銓山東益都人初名廷鉉明崇禎進士任永平推官世祖章皇帝順治元年投誠授天津推官二年以巡撫雷興薦擢吏部主事三年充陝西正考官再遷至考功司郎中七年擢太常寺少卿明年遷左通政十年授戶部侍郎以大學士洪承疇薦召同太僕寺卿衛周祚等三人入對旋以會議總兵任珍罪附和吏部尙書陳名夏等部議革職得旨從寬罰俸十一年乞假省親明年假滿補兵部侍郎擢尙書十三年調戶部尙書御史侯于唐劾廷銓庸陋不勝司農任上責于唐妄奏十四年廷銓疏言山東河南除賦荒田未盡報墾請招民墾闢其已熟者清釐賦額無使隱漏上嘉其言有關國計如所請行十五年六月調吏部尙書加太子太保十六年三月諭獎勤勞奉職諸大臣加廷銓少保十月疏言學道一官自順治元年定制內而部郎外而府道皆序俸薦陞補至四年始專以部屬考選每一學道缺出禮部二人戶兵刑工各一人內閣與吏禮部會考行之既久不無滯礙人才文望隨地而有未必在咨送數員中學道職在衡文不公之弊大於不明今於其始授僅慮其不明而考之是遺其大而務其細也臣以爲凡考試各官出於

宸斷者神明睿照望其外而併得其內觀其文而遂得盡其人取舍皆由聖鑒故
考試足重今學道既奉特旨罷其御試卽內閣諸臣亦不與其事矣獨吏禮二部
會考臣等尋行數墨所見不出尺幅之外其他何足以知之不如停其考試仍如
初年舊例於進士出身之部郎府道按俸舉薦隨時陞補可以絕揣摩而抑奔競
疏入得旨學臣關係人才所奏停考試按俸薦陞補事屬可行下所司集議如廷
銓請時吏部銓除一事數例胥蠹因緣爲奸給事中楊雍建胡爾愷黏本盛孫際
昌王啟祚御史許劭昕先後疏糾其弊且劾廷銓因循委靡爲官吏朦蔽事下宗
人府都察院會議部臣均坐降罰廷銓削加銜罰俸又以會推調漕督沈文奎爲
巡撫上以巡撫不宜降調官下議政王等察議廷銓降三級留任十七年四月疏
言舊例新闢邊疆員缺督撫委用者卽予實授同部選之官一體遷轉有莅事未
久輒移內地者請嗣後試署兩年果能安民靖盜乃予實授又言司道不宜輕易
非大計處分及貪酷被糾而降革者宜仍留任疏並得旨俞允六月因旱陳言二
事一曰寬考成二曰舉屯政上命兵部議興屯事宜而摘考成疏中積資累薦棄
以一眚等語諭令回奏所指廷銓言積疲州縣久累人材稍請寬減以勵後效非

爲處分人員求免十一月大學士劉正宗爲左都御史魏裔介御史季振宜劾奏罷職吏部尙書伊圖等謂科道未劾正宗者應議處廷銓言正宗罪狀原因言官舉發不應轉議言官因偕侍郎郝惟訥馮溥別爲一議上以滿漢兩議傳旨申飭尋諭寬免科道各官議處聖祖仁皇帝康熙二年二月都察院劾廷銓當會議之所與尙書杜立德喧爭失大臣體應並議罰詔寬免之四月御史李秀疏劾廷銓爲劉正宗親黨巧舞奸弊遇會議會推則閉目俯首如木偶素與侍郎馮溥同鄉相結其弟孫廷鐸考取推官徇私有據上責秀以言官糾劾本應緣事指陳不得恣詞詬詈命廷銓溥回奏皆辨釋五月擢廷銓祕書院大學士三年十一月以疾乞假歸里十三年卒於家年六十有二予祭葬如典禮諡文定

黃機

黃機浙江錢塘人順治四年進士改庶吉士六年授弘文院編修八年充江南正考官十年二月世祖章皇帝幸內院詢機籍貫品職命同侍講法若眞修撰呂宮編修程芳朝撰柳下惠不以三公易其介論閱畢賜茶五月授機左春坊左中允七月遷弘文院侍講十一年七月轉侍讀明年二月機奏言自古聖仁之君必祖

述前謨以昭一代文明之治今纂修太祖太宗實錄告成乞上特命諸臣校訂所載嘉言善政做貞觀政要洪武寶訓諸書輯成治典欽定鴻名頒行天下尤望萬幾之暇朝夕省覽法開創之維艱知守成之不易何以用人而收羣力之效何以納諫而宏虛受之風何以理財而裕酌盈劑虛之方何以詳刑而無失出入之患力行身體則動有成模紹美無極得旨此奏有理下所司議輯太祖太宗聖訓以機充纂修官十三年遷左春坊左庶子明年遷國史院侍讀學士十七年充武會試正考官擢禮部右侍郎聖祖仁皇帝康熙三年以會試場前清冊不定又失察欠糧舉人入場部議各降一級得旨仍留原任五年轉本部左侍郎六年三月擢禮部尙書五月疏言今天下民窮之由有四一雜差私派或掙克以奉上官或巧取以充囊橐一棍徒結黨成羣假借逃人名目嚇詐平民動輒舉首及審無干而家已破一設官原以撫民其中豈無匪類惟畏督撫糾劾不敢肆害今一歲之中劾者無幾貪風愈熾民何以堪一設兵原以衛民近聞各省兵丁私放營債霸佔行市欺壓小民此四者皆民窮之源而責任全在督撫今大計將行文武各官紛紛請託非徇私害公卽市恩養患吏治何由肅清請敕部院嚴察各省督撫如

有舉劾未當卽以此定督撫之賢否庶貪風息而民命甦至各省藩王將軍提鎮如有不法害民之事督撫得以糾劾乞嚴飭諸臣共破情面不得因循畏縮貽誤地方則民生幸甚疏入下部議行七年轉戶部尙書八年四月轉吏部尙書六月疏言臣前在戶部竊見各省荒棄田地尙未開除雖冊籍載有虛名而錢糧究無歸結且恐不肖有司因帶徵受罰強派熟田代賠現在有業良民必致逃亡避役卽如浙江總督趙廷臣以溫處等府無徵荒逋入奏奉旨清查臣思荒田逋賦不獨浙省有之請令各省督撫核實報部准與豁免疏下戶部議行十二月疏言世祖時舊制降補官員皆對品遇缺補用自康熙六年允御史錢延宅條議將降官預掣一項註冊候補如運同運副等官不過數缺而掣定守候者甚多每遇選期有人者無缺可補有缺者又無人可補請仍遵舊例令降官對品補用庶銓法不致壅滯下部議從之九年二月季振宜疏劾機從降級留任之侍郎越次超陞尙書不思秉公協和勤敏部務前奏疏通銓法令降官對品補用不知設官之法尊卑高下有不紊從品級次第者卽如知府爲正四品而參議則從四品僉事則正五品皆知府之上司也若如機議知府應降一級反可陞參議降二級反可陞僉

事品雖降而官則尊徒開奔競之門仍於銓法無益上命機明白回奏機奏言降補官員自有應得之缺知府降從四品補連同降正五品補同知係世祖時久行定例今部議允臣所請復遵舊例本無府降道銜之例疏并下都察院尋議機奏復舊例未申明知府不應降補參議僉事及回奏又不剖晰降級侍郎開列尙書情由均屬朦混應解任以降級侍郎致仕上諭令洗心滌慮改易前非免解任十年二月充經筵講官四月給事中王曰溫疏言已故庶吉事王彥實係機子黃彥博抱病臥邸卽遷庶常機爲大臣並未檢舉請罪應黜罷以爲徇私者戒機以其子黃彥博與庶吉士王彥姓名既不相同且彥博病故已久何敢以姓名不符之人妄認己子而請罪乎具疏辨釋十一年二月以遷葬乞假歸十二月御史寧爾講劾機自知清議不容乞假歸里今假滿在卽勢必覲顏赴補請將科臣王曰溫所劾黃彥博事窮詰實情明正其罪疏下吏部以事已結案寢議十八年上聞機居鄉謹飭安靜特旨召用時已擢左都御史魏象樞爲刑部尙書象樞疏辭乃命象樞以陞銜留任機以吏部尙書銜管刑部尙書事十九年五月詔九卿等陳時政得失機奏言九門捕獲竊匪給賞太重恐因邀賞致滋波累又審案反覆妄供

每誣扳良民並請申嚴禁令得旨如所請行十一月御史張志棟疏言黃機素稱老成忠厚然衰邁實甚刑部事件皆人命攸關苟有貽誤受害非淺在機或以新蒙上恩起用不敢遽自引年求退應請特旨罷歸田里弗致貽誤部務上曰張志棟所言過當從來才德難以兼全國家用人正需老成黃機可照舊供職是月調任吏部尙書二十一年二月充會試正考官九月疏言臣前此請假歸田臥病八載復應起用伏思諸臣請假者多而臣獨蒙恩召且不由薦引斷自宸衷自當勉圖報效然齒實向衰乞賜歸里疏入得旨慰留十月授文華殿大學士兼吏部尙書時重修太祖實錄三朝聖訓平定三逆方略並充總裁官二十二年二月復乞休得旨卿簡任機務端恪謙慎倚毗方殷覽奏情辭懇切准以原官致仕馳驛回籍遣官護送以示眷懷二十五年二月卒於家年七十有五賜祭葬如典禮諡文僖

蘇拜子和託

蘇拜滿洲正白旗人姓瓜爾佳氏前鋒統領武理堪之次子也蘇拜年十五從太祖高皇帝征蒙古有功授侍衛兼管佐領事太宗文皇帝天聰九年隨大軍征察

哈爾收降林丹汗子額哲遂入明邊境攻代州明兵三百自崞縣赴援蘇拜爭先
迎戰敵潰遁崇德元年從征朝鮮破敵桃山村三年任護軍參領隨貝勒岳託征
明白牆子嶺入邊越燕京擊敗明太監馮永盛軍五年大軍圍明錦州蘇拜屢擊
卻松山杏山敵兵又同都統圖爾格等設伏烏忻河口多所俘獲敵兵千餘襲追
戰卻之獲輜重以歸六年復圍錦州敗松山騎兵又敗明總督洪承疇三營步兵
敘功予世職騎都尉加一雲騎尉七年隨貝勒阿巴泰征明至山東屢敗敵馬步
兵攻克樂安昌邑二縣八年凱旋晉世職三等輕車都尉世祖章皇帝順治元年
隨睿親王多爾袞入山海關擊敗流賊李自成是年冬隨大軍西剿自成取道士
默特鄂爾多斯入邊鑿黃河冰濟師擒斬賊衆明年春至榆林賊乘夜襲我蒙古
營蘇拜與護軍統領徹爾布往援擊敗羣賊旋軍遇伏復戰卻之進征延安七戰
皆捷自成走湖廣躡追之至安陸屢破賊營斬獲無算三年署護軍統領隨肅親
王豪格征流賊張獻忠敗賊將高汝礪於三寨山進擊獻忠於西充連敗賊衆我
正藍旗軍爲賊所困蘇拜同護軍統領阿爾津率兵趨援大敗賊五年還京授護
軍統領先是敘入關及剿滅自成功洊晉一等輕車都尉加一雲騎尉及獻忠滅

敘功並二遇恩詔晉爵二等子八年正月同其兄武拜及內大臣洛什博爾輝等舉發英親王阿濟格謀干政罪狀議敘晉一等子加一雲騎尉二月洛什博爾輝以陷媚諸王造言構釁伏誅蘇拜與武拜並坐附和罷任削爵籍沒又以睿親王葬時私置御用服飾蘇拜徇隱不舉又王欲移駐永平蘇拜曾與密謀論死得旨寬免九年起爲正白旗副都統十三年擢內大臣十五年上念其戰陣有功復爵一等男世襲尋授領侍衛內大臣康熙三年十二月卒賜祭奠如典禮諡曰勤儉子昂安巴襲爵第三子和託初任侍衛康熙十五年以參領從征陝西叛鎮王輔臣至平涼城北擊敗賊衆十六年從征逆藩吳三桂至湖廣於攸縣河岸擊敗賊將王國佐等又敗賊將胡國柱等於永興十九年由廣西征逆孽吳世璠敗賊將何繼祖等奪石門坎黃草壩進薄雲南城敗賊將胡國柄劉起龍敘功予世職騎都尉加一雲騎尉尋任護軍參領五十二年卒子巴爾泰襲職

鄂羅塞臣

鄂羅塞臣滿洲正藍旗人姓郭絡羅氏額駙達爾漢長子也天聰元年從其父征明錦州有斬獲尋任護軍參領三年從征明燕京同護軍統領哈寧阿破明巡撫

袁崇煥營太宗文皇帝嘉其善戰授騎都尉世職四年署都統事隨貝勒阿巴泰等鎮守永平因取糧遇明兵自開平衛迎戰擊敗之五年從征明圍大凌河城連敗城中出戰兵八年隨貝勒薩哈廉略明山西邊境與崞縣兵遇鄂羅塞臣從第三隊先衆擊敵斬四人獲其馬累功晉二等輕車都尉崇德元年從征朝鮮與副都統薩穆什喀等敗其援兵二年列議政大臣三年十月隨豫親王多鐸征明寧遠錦州有擒斬謀卒功十一月豫親王至中後所將往會鄭親王濟爾哈朗軍爲明總兵祖大壽所襲參領翁克等及隨征土默特部兵先奔鄂羅塞臣同護軍統領哈寧阿等且戰且退士卒有死傷者論罪罰贖革世職六年三月隨征明圍錦州以聽從睿親王多爾袞等私遣兵丁歸家及離城遠駐坐罰鍰六月復隨鄭親王圍錦州殲其樵採者九人連敗明總督洪承疇松山援兵是時祖大壽據錦州突糾步兵出城來犯我鑲黃旗營我左翼三旗騎兵多避敵鄂羅塞臣同參領阿桑喜率護軍直前奮擊敵挫衄乃遁肅親王豪格欲袒庇三旗之未戰者睿親王附和之皆使人謂鄂羅塞臣曰爾所敗明兵勿言皆爾護軍力亦勿言戰時未見騎兵也於是功罪概勿論明年事聞上命罰睿親王白金五百肅親王白金千兩

予鄂羅塞臣以旌之復授二等輕車都尉世職擢任副都統八年同參政巴都禮等征黑龍江克之撫定其地順治元年凱旋世祖章皇帝遣侍郎明安達禮往迎宴勞以所獲戶口分隸八旗二年隨大軍擊流賊李自成師抵潼關賊嬰城固守鄂羅塞臣奮勇先登殺賊無算五年正月命統兵駐守滄州十二月復率兵從英親王阿濟格軍前協剿叛鎮姜瓖六年以錄敘世效勞績舊臣晉一等輕車都尉詔以鄂羅塞臣爲和碩公主子特恩晉爵二等男世襲罔替是歲七月擢正藍旗蒙古都統尋兼任刑部侍郎兩遇恩詔晉二等子七年坐讞獄徇情罷侍郎任明年授都察院左都御史尋解任專管都統事十三年以疾乞休不允十六年同安南將軍明安達禮率兵駐防荊州會海敵鄭成功犯江寧鄂羅塞臣同明安達禮等赴援戰於揚子江中成功敗竄十七年還京仍任都統康熙三年卒贈太子太保賜祭葬諡果敏子鄂忒渾襲

哈什屯

哈什屯滿洲鑲黃旗人姓富察氏先世居沙漠祖旺吉努當太祖高皇帝時率族屬來歸授佐領卒長子萬濟哈襲管佐領哈什屯爲萬濟哈長子初任前鋒校隸

正藍旗太宗文皇帝天聰時改隸鑲黃旗授侍衛尋襲管佐領擢禮部參政崇德二年同佐領喀愷等率兵分道征瓦爾喀俘獲甚衆三年太宗親統師征喀爾喀部留守盛京禮親王代善聞明總兵沈志祥欲率石城島兵衆歸附遣哈什屯招之志祥遂來歸是年重定官制改禮部副理事官六年大軍圍明錦州明總督洪承疇率兵十三萬赴援據松山鎮守總兵曹變蛟乘夜率衆犯御營哈什屯先衆扞禦手腕中槍仍裹創力戰卻敵得優賚白金及蒙古二戶世祖章皇帝順治元年擢內大臣二年以勞績久著予騎都尉世職嗣以考滿並遇恩詔晉世職至一等輕車都尉加一雲騎尉七年五月列議政大臣七月睿親王多爾袞有疾哈什屯同議政貝子錫翰等往視睿親王曰予有疾上宜臨視又曰爾等毋以予言奏請旣而駕幸視之睿親王罪大臣等違令擅請降世職爲騎都尉八年世祖親政鑒哈什屯無罪降職命復之兩遇恩詔晉爵一等男初冷僧機與哈什屯同爲內大臣冷僧機諂附睿親王及睿親王卒冷僧機揄揚其功績因誣奏昔日兩黃旗大臣謀立肅親王豪格事詔下法司鞠訊集哈什屯及議政大臣巴哈等質之盡得其阿諛誣陷罪狀肅親王之爲睿親王所害也尙書鞏阿岱與都統何洛會等

議殺肅親王子富綬哈什屯言王無滅嗣之罪同巴哈力持不可事乃已至是世祖封富綬爲顯親王何洛會以黨附睿親王爲議政大臣蘇克薩哈所劾磔死鞏阿岱與冷僧機朋比奸惡事覺詔逮勦哈什屯亦質之鞏阿岱與冷僧機並伏誅時鄭芝龍隸正黃旗授子爵其子鄭成功踞海島入侵福建哈什屯奉命同內大臣遏必隆鼈拜大學士范文程宣諭芝龍導其招降成功芝龍因改隸鑲黃旗遣人往福建取其妻妾及幼子至京十年詔以哈什屯宣力年久加一雲騎尉十二年詔獎奉職恪勤諸大臣加哈什屯太子太保十三年奉敕使朝鮮鞠獄還奏稱旨尋以年老致仕康熙二年卒年六十有六賜祭葬如典禮諡恪僖子米思翰襲爵別有傳乾隆元年孫大學士馬齊疏陳哈什屯勞績得旨入祀賢良祠十三年册諡孝賢皇后推恩先世追封哈什屯一等公十四年曾孫大學士忠勇公傅恆經略金川功成凱旋詔視勳臣額亦都佟國維之例賜建宗祠春秋致祭以獎忠勳祀自哈什屯始

褚庫

褚庫滿洲鑲黃旗人姓薩爾圖氏先世居札魯特祖柏德遷居葉赫太宗文皇帝

天聰五年大兵圍明大凌河褚庫年十七從征有蒙古驍將徹濟格突陣褚庫迎擊之生擒以歸尋征明大同攻萬全左衛褚庫首先登城頸被創猶力戰破其城論功予騎都尉世職賜號巴圖魯授佐領兼參領崇德三年任吏部理事官世祖章皇帝順治元年隨英親王阿濟格追剿流賊李自成由廣西至湖廣賊將吳伯益以賊衆三千拒戰褚庫率兵擊敗之三年隨肅親王豪格征流賊張獻忠同尙書星訥敗賊將高汝勵等於陝西進師四川復屢敗賊兵六年隨大軍征叛鎮姜瓖圍大同僞總兵楊振威糾賊犯正紅旗汛地並擾土默特營褚庫連擊卻之賊又犯鑲藍旗汛地同護軍參領瑚葉赴援以步戰敗賊衆賊平還京尋以值宿失印鑰解理事官任仍管佐領兼參領九年隨都統噶達琿征鄂爾都斯部叛酋多爾濟於賀蘭山俘獲甚衆屢遇恩詔晉世職至二等輕車都尉十三年海敵鄭成功犯福州時鄭親王世子濟度統師至漳州遣副都統阿克善偕褚庫率兵赴援鄭以戰艦二百自烏龍江來犯褚庫率本翼兵登舟奮擊敗之追至大江口獲船十二鄭又以千餘衆於江岸迎戰褚庫督兵奮擊斬級二百餘聖祖仁皇帝康熙二年擢正紅旗蒙古副都統三年敘累次隨征功晉一等輕車都尉七年以年老

解副都統任十四年卒賜祭葬如典禮諡襄壯子海存襲世職

清史列傳卷五終

清史列傳 卷六

大臣畫一傳檔正編二

耶球

耶球姓覺羅氏滿洲正藍旗人景祖翼皇帝第三兄索長阿之曾孫也初任理事官兼護軍參領天聰三年從太宗文皇帝征明燕京以中途逗遛罰鍰奪所俘獲九年大軍征明廣寧耶球同參領圖賴等率兵四百先趨錦州有斬獲功擢刑部承政兼護軍統領進列議政大臣崇德三年睿親王多爾袞征明上親帥諸王送之豫親王多鐸不至詔禁王不得出府門是時耶球爲豫親王屬下上因怒曰朕屢諭耶球王若有過爾當諫諍乃竟諂媚逢迎見王怠玩如此不行規正可速執之既而上命豫親王同大軍赴山海關牽制明寧遠錦州援兵諭諸王貝勒大臣曰多鐸等前罪姑俟班師後議耶球出任職如初會豫親王軍行失律上欲申飭其罪命耶球召王耶球違命不往詔解任下廷議並論前罪明年五月王大臣等以耶球瞻徇隱默復藐視上命罪應死籍沒奏聞得旨從寬革世職罷任六年隨

征錦州與副都統星訥擊敗松山援兵登山克敵又與參領鼇拜敗敵步兵論功抵前罪復任參領命率護軍助內大臣錫翰等設伏高橋擊敗杏山邏兵追至塔山斬獲甚衆七年授禮部參政旋擢承政順治元年世祖章皇帝定鼎燕京耶球任禮部尙書贊定郊廟大典二年授騎都尉世職三年隨順承郡王勒克德渾征湖廣流賊師至石首縣偵知賊欲渡江攻荊州大軍進擊耶球先率兵趨江濱斷賊後路取賊船千餘賊自荊州敗還不得渡悉爲大軍斬獲四年六月考滿晉三等輕車都尉六年授本旗都統兼禮部尙書七年四月調刑部尙書先是五年九月鄭親王濟爾哈朗統兵之長沙耶球署副都統以隨至是凱還得優賚八年正月英親王阿濟格有罪耶球坐徇隱罷任削世職籍家產之半明年三月復授禮部尙書十月列議政大臣十一年加太子太保尋加少保兼太子太保調戶部尙書十三年五月以員外郎朱世德虧缺權稅戶部援恩詔請豁部臣均坐徇庇耶球削少保解任康熙五年二月卒年七十有三賜祭葬如例

斐雅思哈

斐雅思哈滿洲正黃旗人姓富察氏佐領木科里之第三子也初任護軍校天聰

六年太宗文皇帝親征察哈爾分兵略明大同至朔州城中兵出戰斐雅思哈與參領道喇等奮擊敗之崇德三年署護軍參領隨貝勒岳託征明入牆子嶺敗密雲步兵五年大軍圍錦州明兵至松山杏山赴援斐雅思哈禦戰皆捷六年復圍錦州同參領哈寧阿擊敵城下射殪二人明總督洪承疇以步隊自松山來犯斐雅思哈力戰卻敵世祖章皇帝順治元年隨睿親王多爾袞入山海關敗流賊李自成又追敗之於望都是年冬授護軍參領隨英親王阿濟格剿自成明年春次榆林賊乘夜襲我營斐雅思哈同護軍統領車爾布等擊走之窮追自成至武昌連破賊營復率舟師敗賊於富池口獲賊船三十三年隨肅親王豪格征流賊張獻忠過西安分兵剿賊邠州賊渠胡敬德率衆千餘踞三水縣西北山岡斐雅思哈同護軍統領噶達渾破賊寨復同都統巴哈納擊敗叛鎮賀珍於鷄頭關進師四川屢與獻忠賊黨戰斬獲無算正藍旗官軍爲賊所困同噶達渾趨援賊敗遁先是敘入關功予世職騎都尉及獻忠滅加一雲騎尉六年隨英親王討大同叛鎮姜瓖掘壕圍城僞總兵楊振威率步騎萬餘來犯斐雅思哈先衆迎戰卻賊入城時賊黨分踞左衛復陷汾州窺太原斐雅思哈先後率護軍剿賊所至克捷尋

復會大軍圍大同賊勢蹙振威斬瓌首出降乃班師三遇恩詔晉世職一等輕車都尉十三年擢護軍統領列議政大臣尋率兵赴湖南駐防時獻忠餘黨孫可望踞辰州斐雅思哈同都統卓羅副都統泰什哈等由澧州常德進征賊棄城遁縱火焚其船以阻我軍斐雅思哈取其未及焚者以濟師攻發賊伏躡擊至瀘溪殲賊甚衆十八年隨定西將軍愛星阿剿明桂王朱由榔於緬甸緬人執由榔以獻聖祖仁皇帝康熙元年凱旋敘功晉爵三等男十一年五月卒賜祭葬如典禮諡僖恪子蘇丹襲爵

巴山子舒恕

巴山滿洲鑲黃旗人姓瓜爾佳氏世居哈達祖巴岱國初時率衆來歸授佐領再傳至巴山仍其任天聰五年從太宗文皇帝征明圍大凌河城明兵出城誘戰副都統屯布祿戰歿巴山衝入敵陣得其屍以出復擊退敵兵取佐領郎格等二人屍歸明年大兵征察哈爾其部衆有竄入明大同邊境者往索取之師旋明兵追襲巴山與承政圖爾格殿後設伏邀擊斬馘甚衆八年以克副任使授騎都尉世職尋任參領崇德元年從上征朝鮮同參領屯泰等先衆破敵陣三年七月兼任

工部理事官八月隨貝勒岳託征明白牆子嶺入邊薄燕京擊敗明太監馮永盛兵進攻鉅鹿縣率所部樹雲梯先登克其城敘功加一雲騎尉五年同承政薩穆什喀索海等征虎爾哈部攻掛喇爾屯有斬獲七年奉命隨奉國將軍巴布泰率師駐防錦州世祖章皇帝順治元年睿親王多爾袞統大兵入山海關巴山率所部步戰擊敗流賊李自成尋擢工部侍郎敘功晉三等輕車都尉二年十一月授鎮守江寧副都統三年命總管江寧駐防滿洲兵時江北山寨賊寇未靖江寧城中奸徒謀爲內應巴山偵得之捕斬逆黨三十人未幾僞潞安王朱誼石糾衆二萬餘分三路來犯巴山與副都統康喀賴等破走之賊復屯聚城北之攝山我軍進剿斬其渠數人餘黨悉潰竄四年明故官侯峒曾之子侯元澣遣其黨謝堯文潛通明魯王朱以海於海島取僞敕及僞鎮黃斌卿致招撫大學士洪承疇書以歸爲柘林遊擊陳可所獲有內伏承疇殺巴張二將語蓋指巴山與提督張大猷也事聞上以逆書所云乃反間計特宣諭慰承疇而諭獎巴山張大猷曰爾等嚴察亂萌具見公忠盡職六年江南總督馬國柱剿六安州山賊巴山以兵會之陣斬賊渠張福寰諸賊寨俱翦平兩遇恩詔晉爵三等男九年還京十一年以久鎮

江寧平賊寇功晉二等男康熙十二年卒賜祭葬如例以其子舒恕襲爵十五年舒恕隨大學士圖海征叛鎮王輔臣師至平涼北城虎山墩輔臣以衆萬餘拒敵敗之是年復隨都統穆占征逆藩吳三桂破賊衆三千於湖北松滋縣二十年進圍雲南城擊敗賊將胡國柄劉玘龍黃明等又蹙賊將馬寶巴養元等於烏木山二十五年敍功晉一等男後以年老乞休尋卒子長清改襲一等輕車都尉

星訥

星訥滿洲正白旗人姓覺爾察氏初爲二等侍衛兼佐領從太祖高皇帝征明遇蒙古兵四百於塔山之北射其渠魁殪之遂敗其衆天聰七年太宗文皇帝命與參領蘇爾東阿等率兵三百駐守遼河先是我師征察哈爾星訥以二十人往張家口偵敵猝遇敵兵禦守四日夜俟貝勒阿濟格至請兵二百攻克之察哈爾部多爾濟塔蘇爾海倚山立寨列火器拒守星訥率護軍先登敵衆奔潰八年上統大軍征察哈爾星訥隨額駙布顏代率蒙古兵進哈麻爾嶺遇其部俄爾塞圖等率所屬戶口來歸納之以聞時察哈爾林丹汗西奔土默特其下相率歸順上乃移師征明星訥同前鋒參領席特庫等略大同明將自龍門率兵三千逆戰星訥

擊之敗北斬獲甚衆論功予雲騎尉世職尋授刑部參政崇德三年同承政葉克舒征黑龍江奏捷敘功並以其兄辛泰弟西爾圖陣亡應得世職令併襲之晉三等輕車都尉參政吉恩哈有女爲雅什塔子婦新寡吉恩哈疾女歸省星訥之子阿思哈見而謀娶之雅什塔訟於所司論罪星訥應革世職罰鍰降理事官上命降罰如議免革世職四年授護軍參領兼議政大臣尋遷副都統六年二月授工部參政三月隨鄭親王濟爾哈朗圍錦州明總督洪承疇親以兵六萬赴援屯松山北岡星訥先登破其壁壘明援兵繼至星訥屢擊敗之七年敗明總兵吳三桂白廣恩等兵於高橋八年擢工部承政世祖章皇帝順治元年隨睿親王多爾袞入山海關擊流賊李自成以步兵破賊陣是年改六部承政曰尙書星訥仍任工部二年敘功授一等輕車都尉三年隨肅親王豪格師抵西安分剿賊於邠州賊潰遁進趨秦州賊將高汝礪率步騎迎拒大敗之與肅親王會師川中屢敗賊渠張獻忠兵凱旋晉太子少師加一雲騎尉六年逆鎮姜瓖據大同叛星訥隨大兵討之圍其城賊填塹毀垣簡驍勇蒙盾突犯星訥率將士持短兵力戰卻賊賊背城爲陣復以火器來攻星訥親督精銳馳壓其營大敗之賊兵不能支殲其勁

兵略盡七年遇恩詔晉爵二等男八年都統額克青等舉發英親王阿濟格令其子勞親以兵衆迎睿親王喪謀干政法司鞠議星訥隸王屬下雖未與謀第不卽奏劾且爲王趣召勞親應罷尙書任又議其在工部擅撤昭陵工役五百人及不補植陵樹罪革世職籍家產半九月復任工部尙書列議政大臣十年上以星訥宣力有年衰老可念命以原官加一級致仕十四年自陳戰功請復世職部議星訥前任工部獲罪應削恩詔所加之爵仍留戰功所得世職奉旨復一等輕車都尉兼一雲騎尉予世襲康熙十三年卒賜祭葬孫巴爾達襲

蘇克薩哈

蘇克薩哈滿洲正白旗人姓納喇氏額駙蘇納長子也初委署佐領崇德六年隨鄭親王濟爾哈朗等圍錦州明人出步騎接戰敗之太宗文皇帝聞明總督洪承疇以師十三萬赴援親帥大軍環松山列營敵兵遁走蘇克薩哈同護軍統領漢岱追敗其衆於塔山翼日復追擊明兵於海岸隨豫親王多鐸等設伏襲擊與漢岱追斬杏山兵之潛遁者二年敍功授騎都尉世職尋晉三等輕車都尉七年世祖章皇帝念蘇克薩哈父蘇納在太祖太宗時屢著功績繼因隱匿丁壯削世職

三等輕車都尉至是特旨復蘇納世職以蘇克薩哈併襲爲三等男八年任議政大臣九年兩遇覃恩晉爵一等男加一雲騎尉初蘇克薩哈隸睿親王多爾袞屬下既睿親王薨於獵所蘇克薩哈與王府護衛詹岱等舉首其殞殮服色違制及謀遷永平諸逆狀命諸王大臣質訊皆實遂論睿親王如謀逆律是歲擢鑲白旗護軍統領十年流賊張獻忠餘黨孫可望聚寇湖廣蘇克薩哈奉敕同都統陳泰等率禁旅出鎮湖南與經略洪承疇會師進剿十二年賊帥劉文秀遣僞將盧明臣馮雙禮等分兵犯岳州武昌蘇克薩哈伏兵邀擊大敗賊衆明臣等復遣賊縱艦拒戰又擊敗之文秀引兵寇常德戰艦千餘蔽江而下蘇克薩哈指揮軍士奮勇截擊明臣等悉衆抗禦我軍協力撲剿六戰皆捷縱火焚其船斬獲無算明臣赴水死雙禮被創遁降其僞副將等四十餘人文秀走貴州明年敘功晉爵二等子任領侍衛內大臣加太子太保十八年正月與索尼及遏必隆鼐拜等受顧命爲輔政大臣奉聖祖仁皇帝嗣統是時索尼爲四朝舊臣遏必隆鼐拜皆以公爵先蘇克薩哈爲內大臣鼐拜尤功多意氣凌轢人多憚之蘇克薩哈以額駙子入侍禁廷承恩眷奉遺詔輔政名亞索尼與鼐拜稱姻婭而論事多與鼐拜迕積以

成讐索尼亦惡蘇克薩哈會鼇拜欲令鑲黃旗與正白旗互易屯莊索尼贊成之
遏必隆弗能止遂行圈換之令旗民皆弗便康熙五年大學士兼管戶部尙書蘇
納海坐撥地遲誤總督朱昌祚等坐紛更阻撓罪皆論死上覽部議召詢輔臣咸
曰宜如議獨蘇克薩哈不對上因不允所請鼇拜卒矯詔並予棄市未幾索尼死
鼇拜益驕恣蘇克薩哈慮其逼己也居常怏怏六年前上親政諭部議加恩輔臣以
示酬庸之典越日蘇克薩哈奏言臣才庸識淺蒙先皇帝眷遇拔授內大臣早夜
悚懼恐負大恩當先皇帝上賓之時惟願身殉以盡愚悃不意恭承遺詔臣名列
於輔臣之中分不獲死以蒙昧餘生勉竭心力冀圖報稱不幸一二年來身嬰重
疾不能始終效力於皇上之前此臣不可追之罪也茲遇皇上躬親大政伏祈睿
鑒令臣往守先帝陵寢如綫餘息得以生全則臣仰報皇上參育之微忱亦可以
稍盡矣疏上有旨諭議政王貝勒大臣曰蘇克薩哈奏請守陵如綫餘息得以生
全不識有何逼迫之處在此何以不得生守陵何以得生其會議具奏王貝勒等
以大臣怨望奏請逮治鼇拜與其黨大學士班布爾善等謂蘇克薩哈不欲歸政
文致之構罪二十四款坐奸詐欺飾存蓄異心論如大逆應與其長子內大臣查

克旦皆磔死餘子侍衛穗黑塞黑里郎中那賽塞克精額達器德器孫倭克札兄弟之子圖爾泰海蘭皆斬決籍沒族人前鋒統領白爾赫圖侍衛額爾德烏爾巴亦皆斬決獄具入奏上知鼈拜素與蘇克薩哈有隙是以構成罪款必欲置之重典諭以核議未當不許所請鼈拜攘臂上前強奏累日卒坐蘇克薩哈處絞餘悉如議八年五月鼈拜既敗特諭吏兵二部曰蘇克薩哈雖有罪不致誅滅子孫此皆鼈拜挾仇滅其後嗣深爲可憫白爾赫圖等無罪誅戮殊爲冤枉其蘇克薩哈及白爾赫圖等官俱應給還七月復蘇克薩哈原官及世爵三等子命其幼子蘇常壽承襲

蘇納海

蘇納海滿洲正白旗人姓他塔喇氏岱圖庫哈里之曾孫也初爲睿親王多爾袞護衛世祖章皇帝順治三年正月授弘文院學士命隨肅親王豪格討流賊張獻忠十一月獻忠滅王令蘇納海先還奏捷六年隨英親王阿濟格討大同叛鎮姜偽總兵楊振威等斬瓌首以獻王亦令蘇納海馳奏上卽命往軍中宣恩諭仍
英親王還京十年以繙譯三國志告成賚鞍馬銀幣兩遇恩詔授世職騎都尉

兼一雲騎尉尋以甄別各官濫邀世職削雲騎尉九年正月詔重修太宗文皇帝實錄充副總裁官十一月盛京總管葉克舒泰獲朝鮮國越界採獲人命蘇納海同副都統瑚沙攜其人往朝鮮敕國王李滉會鞠明年三月還京以滉陪臣至賚表謝罪附貢方物是年擢吏部侍郎十一年同尙書巴哈納侍郎額爾德等分賑畿輔十二年兼任鑲紅旗滿洲副都統十三年戶部援恩詔赦免員外郎朱世德虧缺河西務額稅世德官如故吏部亦弗置議得旨詰問乃以世德應褫職逮訊覆奏部臣坐瞻徇降革有差蘇納海罷任革世職逾月上以蘇納海舊在內院練習院務起授國史院學士尋充經筵講官遷禮部侍郎十六年加太子少保十七年擢工部尙書旋調兵部是時海敵鄭成功踞臺灣四出侵擾有言瀕海居民宜移之內地者蘇納海同侍郎宜理布奉命赴江南浙江福建會勘定議聖祖仁皇帝卽位擢國史院大學士康熙二年兼管戶部尙書事五年輔政大臣鼐拜蘇克薩哈有隙鼐拜因己隸鑲黃旗蘇克薩哈隸正白旗欲以正白旗屯莊改撥鑲黃旗而別圈民地給正白旗使旗人訴請以牒戶部蘇納海持不可謂旗人安業已久民地曾奉諭不許再圈宜罷議鼐拜銜之矯旨遣貝子溫齊等履勘旋以鑲黃

旗地不堪耕種疏聞遂遣蘇納海會同直隸總督朱昌祚巡撫王登聯經理其事昌祚登聯交章言兩旗人較量肥瘠相持不決而旗地待換民地待圈所在荒廢不耕農人環訴失業請停止圈換之令蘇納海亦以屯地難於丈量候明詔進止鰲拜遂擅坐蘇納海藐視上命遲誤撥地械付刑部議罪部議律無正條應鞭百籍沒家產上覽疏知鰲拜以蘇納海始終不阿欲置之死地召四輔臣詢問鰲拜極言情罪重大索尼遏必隆附和之獨蘇克薩哈不對上仍以部議不按律文弗允鰲拜出矯旨卽予處絞八年上親政以鰲拜罪惡衆著命逮治於是議政王大臣等列狀入奏因及誣陷蘇納海事鰲拜既伏罪上諭部臣曰朕閱處分蘇納海原案由鰲拜等以撥地遲延遽行逮問多端文致誣陷不按律文任意處死冤枉可憫宜予恩卹於是賜祭葬如例諡曰襄愍以其子瓦爾達爲三等侍衛

朱昌祚

朱昌祚漢軍鑲白旗人世祖章皇帝時任宗人府啟心郎順治十八年四月授浙江巡撫既抵任會浙東西皆旱災昌祚捐金爲倡煮粥以活饑民復具疏請旨賑卹時海上未靖有旨令瀕海居民遷移內地昌祚疏請酌撥荒田給令開墾爲生

俟三年成熟後照例起科其舊居所棄之田畝丁糧請予蠲免俱下部議行先是陝西巡撫扈申忠條奏軍民宜一體聽徭敕下督撫議昌祚奏浙省各衛所均有運糧之責其閒丁每年亦各賦丁銀以爲貼造糧艘之費與秦省衛所無糧運者不同難以復兼民役事遂寢聖祖仁皇帝康熙三年六月擢福建總督以丁憂未之任四年特起直隸山東河南三省總督請終制不允五年抵總督任疏言直隸總督經制額兵舊駐河間提標額兵舊駐大名今總督駐劄大名提督改駐河間若令兩標兵彼此調移恐攜帶家口致累民間請免調兵丁但更換統轄之員爲便得旨俞允時輔政大臣鼈拜以鑲黃旗地畝瘠薄傳旨圈換正白旗地畝及開墾成熟民地令朱昌祚同戶部尙書蘇納海巡撫王登聯經理其事昌祚疏言直隸省州縣田地之瘠薄膏腴賦稅之上中下則原自異同豈能盡美今令兩旗更正地土原欲其彼此均安但臣見現在行圈地畝皆曉曉有詞大概以瘠易腴者固緘默不言而以腴易瘠與以瘠易瘠者不免觀望嗟吁皆不樂有此舉雖勉強撥給難必其異日不出而申訴重煩睿慮臣思安土重遷人之至願兩旗分得舊處莊地二十年來相安已久靡不有父母墳墓在焉一旦更易不能互相移徙且值

此隆冬各旗率領所屬沿村棲守守候日久窮苦者橐糧已盡凍餒可憫又附近百姓聞朝廷此舉所在驚惶且據士民環門哀籲有謂州縣熟地皆已圈去無餘今之夾空地土皆係所遺窪中經墾闢成熟當差辦稅者有謂地在關廂大路鎮店所居民皆承應運送皇陵物料並墊道修橋及一切公差徭役者有謂被圈地之家卽令他往無從投奔者有謂時值冬令扶老攜幼遠徙他鄉恐地方疑爲逃人不容棲止者有謂祖宗骸骨父母邱壠不忍拋棄者臣職任安民而民隱如此何敢壅蔽不以實聞臣又徧察薊州及遵化等應換州縣一聞圈丈自本年秋收之後周遭四五百里盡拋棄不耕今冬二麥全未播種明年夏盡安得有秋且時已仲冬計丈量竣事難以定期明春東作必又失時而秋收亦將無望京東各州縣合計旗與民失業者不下數十萬人田荒糧竭無以資生豈無鋌而走險者地方滋事尤臣責任所關不敢畏忌越分不以實聞伏乞斷自宸衷毅然停止疏入與蘇納海王登聯請停圈各疏並忤鼇拜意革職逮問刑部議律無正條擬鞭責籍沒家產鼇拜入奏應置重典上未允鼇拜出矯旨並予立絞八年鼇拜獲罪逮繫上特諭吏部曰原任總督朱昌祚巡撫王登聯於撥換地畝時見旗民交困有

地方之責具疏奏聞釐拜輒謂非其職掌妄行干預不按律文誣陷至死深爲可憫其予昭雪以示仁恩昌祚復原官賜祭葬如典禮諡勤愍祀直隸浙江名宦祠子紱以廕入監讀書授督捕理事官尋遷大理寺卿

王登聯

王登聯漢軍鑲紅旗人世祖章皇帝順治六年由貢生授河南鄭州知州八年巡撫吳景道奉詔考核府州縣官疏薦登聯有德有才遂擢山東濟南道十三年內陞通政司參議十五年遷順天府丞十七年二月遷大理寺卿九月授保定巡撫十二月疏言近日盜案多而緝獲者少不嚴立法恐有諱盜不報之弊其降革戴罪督緝者又恐有真盜未獲朦朧開復之事嗣後失事不報之州縣當立行拏問治以縱盜之罪道府捕廳治以徇庇之罪使知申報者雖降革可望開復匿報者不能脫罪且累及上官則無敢諱隱矣其獲盜也或係自拏或係協拏務必真盜淨盡方可銷結如以他案從犯充數借殺死搪塞者日後真盜犯事前局敗露雖經遷陞仍行追究使知開復之不可徼倖則必拏真盜自贖矣欲弭盜必嚴究窩主窩主慮及敗露每不令在本地行劫故所在官司明知其爲巢穴而不問嗣後

問擬強盜務究窩家其州縣衛所與諱盜者一體處分若隣里出首番捕訪獲以所起贓私一半給賞如窩主能悛改前惡擒大盜出首者免罪文武職官實力訪緝者分別紀錄庶萑苻靖而境域寧也疏上得旨所奏於弭盜有裨下部詳議俱議行十八年六月聖祖仁皇帝御極裁順天巡撫以登聯兼理其事加工部尙書銜康熙四年河間大名所屬州縣歉收登聯先後奏請發粟賑濟並從之五年十月輔政大臣鼐拜以鑲黃旗地畝瘠薄傳旨圈換正白旗地畝及開墾成熟民地令戶部尙書蘇納海會同總督朱昌祚與登聯經理其事登聯分勘京東諸路因疏言圈換田地正值大小二麥墾種之時臣同部臣東往豐潤灤州諸處荒涼極目民地之待圈者寸壤未耕旗地之待圈者半犁未下恐明歲春夏青黃不接無從得食此旗人與百姓並困之情形也臣同各旗副都統至玉田縣相度甫施一圈而旗下官丁咸謂此非山岡石磧卽沙淤鹽鹵不肯承受又有舊圈內房屋多而今圈內房屋少者有此地內房屋可居而彼地內房屋破壞者一經移換則舍舊謀新薪糧必多耗費器具亦有損傷此旗下官丁相持不決之情形也至百姓情形更有難於見聞者自圈地之令一傳知舊業難守有米糧者已糶賣矣無積

蓄者將轉徙矣婦子老幼環泣馬前云普天之下莫非王土圈丈固所宜然但撥補不知何處目前霜雪載途懼填溝壑將往奔他境而逃人令嚴誰容棲止仍僦集本土而人稠地窄難以賃居又有謂丁地相依地去而丁不除賦免而徭尙在餬口無資必虧課額者臣往來玉田豐潤遞呈士民不下千百又謂自順治三四年兩次大圈地土雖撥城關集鎮奉旨悉留今若概行圈換百姓必致散亡若皇差陵工運石載料誰爲填築搭橋修路挽拽之夫朝貢使臣誰任奔走供應之事所關似亦非小夫循制易地非臣所敢臆測但目擊情形不敢壅於上聞乞敕部臣從長酌議俾兩旗各安舊業畿東億萬姓俱免播遷幸甚疏入與蘇納海朱昌祚請停圈各疏並忤鼈拜意下部議革職逮問鼈拜矯旨並予立絞八年鼈拜獲罪逮繫詔雪其誣互詳蘇納海朱昌祚傳王登聯復原官賜祭葬如典禮諡愨愨祀直隸名宦祠子盛唐以廕入監讀書授督捕理事官

鼈拜

鼈拜滿洲鑲黃旗人姓瓜爾佳氏偉齊第三子也初爲護軍校從征屢立戰功天聰八年授騎都尉世職任參領從太宗文皇帝征察哈爾收其散亡部衆旋奉命

與護軍統領譚泰等由上方堡入明邊設伏以違界出略又不至期會地詔奪其所俘獲崇德二年隨征明皮島武英郡王阿濟格集諸將問進取之策鼇拜與參領準塔願爲前驅與王約曰不得此島勿復見王遂與準塔連舟渡海敵嚴陣拒堡上我兵莫能登鼇拜大呼超躍而上冒矢石直前搏戰準塔繼之明軍披靡遂克其島太宗以此島可比大城命優敘晉三等男賜巴圖魯號四年率護軍略地錦州有斬獲六年隨鄭親王濟爾哈朗圍錦州以步戰敗明步軍營功最得優賚晉爵一等男方大兵之圍錦州也明援兵踵至城內兵復乘間衝突夾擊我軍鼇拜往來接戰每不待軍令輒當先陷陣五戰皆捷時明總督洪承疇等率兵十三萬赴援太宗親統大軍環松山而營敵兵出犯屢擊卻之還營度明師必宵遁命鼇拜移駐右翼汛地協力追剿夜一鼓明兵果遁鼇拜與護軍統領阿濟格尼堪等相繼躡擊擒斬過半七年擢護軍統領八年隨貝勒阿巴泰等征明攻邊城指揮本旗兵先登克之長驅入邊敗明守將進薄燕京略地至山東三敗明兵斬殺甚衆攻兗州府及臨清汶上諸邑並麾軍前進有功別遣將士略取四城凱還師次密雲擊走敵兵三千復破明總兵吳三桂總督范志完諸軍是歲十月敘功晉

三等子賚金帛甚厚順治元年隨大兵定燕京二年世祖章皇帝命考核羣臣功績鼇拜以忠勤戮力晉一等子隨英親王阿濟格征湖廣至安陸破流賊李自成兵睿親王多爾袞以英親王有罪令鼇拜與都統譚泰於軍中集衆暴其狀鼇拜譚泰匿之不以示衆論罪罰鍰明年隨肅親王豪格征四川敗叛將賀珍兵於楚湖師抵西充賊渠張獻忠列營拒戰鼇拜奮擊大破之斬獻忠於陣賊衆收合餘燼復犯我師鼇拜遣軍士連擊敗之旋偕侍衛李國翰等分剿賊黨俘斬無算下遵義夔州茂州諸郡邑五年二月部臣論隨征參領希爾根冒功爭賞罪鼇拜坐軍中詳勘不實論革世職又以貝子屯齊等訐告鼇拜於崇德八年與護軍統領圖賴等六人謀立肅親王私結盟誓廷議應死並得旨罰贖四月侍衛科普索訐告鼇拜擅撥護軍爲侍衛遏必隆守門仍論死上復宥之十一月統兵駐防大同時總兵姜瓖叛鼇拜率七騎敗賊兵三百餘明年端重親王博洛率師至與鼇拜合攻大同鼇拜遣部將敗賊兵之奪我礮者賊將楊振威率兵萬餘犯正藍旗營鼇拜以右翼三旗兵大破其衆賊兵五千餘由大同北山至立兩營逼我軍鼇拜率精兵進剿破其一營乘勝逐北瓖聞北山援兵至亦盡發城中兵出拒我師鼇

拜縱擊斬獲殆盡賊將復以兵截戰敗之於忻口再敗之於晉祠鎮攻汾州關克孝義縣皆以捷聞七年睿親王有疾貝子錫翰等請駕臨幸王以錫翰違令瀆請鼇拜目擊其非不卽執訊降爵爲一等男并罰贖復隨世祖親征晉三等侯八年任議政大臣敍功晉一等侯兼一雲騎尉九年自陳勞績且以忤睿親王意致屈抑戰功訟於上前詔部議晉二等公賜敕予世襲免死二次尋授領侍衛內大臣十三年奏請三年一次舉行大閱以講武事傳令大臣侍衛等御前較射著爲令是年十一月創發臥疾上親臨視明年以恩詔加少保兼太子太保尋加少傅兼太子太傅教習武進士十八年受顧命奉聖祖仁皇帝嗣統與內大臣索尼蘇克薩哈遏必隆爲輔政大臣旣受事與內大臣飛揚古有隙又飛揚古子侍衛倭赫及侍衛西住折克圖覺羅塞爾弼同直御前不加禮輔臣鼇拜惡之遂論倭赫等擅乘御馬及取御用弓矢射鹿罪並棄市坐飛揚古怨望亦棄市并殺其子尼侃薩哈連籍其家以與弟都統穆里瑪先是鑲黃旗屯莊畫給保定河間涿州之地已二十年蘇克薩哈鼇拜姻婭也論事多齟齬積而成讐鼇拜因蘇克薩哈籍隸正白旗欲以薊州遵化遷安諸莊改撥鑲黃旗而別圈民地給正白旗康熙五年

使旗人訴請以牒部大學士蘇納海管戶部議阻之貝子溫齊等以履勘鑲黃旗地不堪耕種疏聞遣蘇納海與直隸總督朱昌祚巡撫王登聯丈量酌易時則兩旗人較量肥瘠相持久不決而旗地待換民地待圈所在荒廢不耕百姓環訴失業昌祚等交疏請停止圈換之令鼇拜怒坐蘇納海撥地遲誤昌祚等紛更妄奏悉逮治棄市且以蘇納海族人已故額駙英俄爾岱爲睿親王私黨令部臣盡削世職以洩其忿明年議蘇克薩哈罪慮大學士巴泰逆己意不使與聞坐蘇克薩哈以大臣缺望蓄異志論應磔死上鑒其枉鼇拜攘臂強爭卒予絞并誅其族屬鼇拜之受顧命也名列遏必隆後至是索尼死矣班行章奏鼇拜皆前列日與弟穆里瑪姪侍衛塞本特訥莫大學士公班布爾善尙書阿思哈噶褚哈馬爾賽都統濟世侍郎泰璧圖學士吳格塞等黨比營私是時侍讀熊賜履遵旨條奏時政有曰內臣者外臣之表也又曰急功喜事但知趨目前尺寸之利以便其私圖鼇拜聞而惡之曰是劾我也入對時輒請申禁言官不得上書陳奏聖祖旣躬親大政冀其感恩悔罪克保功名特命鼇拜於二等公外加賜一等公以其子那摩佛襲二等公爵七年世祖配天覃恩加鼇拜太師加那摩佛太子少師時有竊其馬

者鼈拜捕斬之併殺御馬羣牧長怒蒙古都統俄訥喇哈達宜理布於議政時不附已卽令蒙古都統不與會議馬爾賽故部臣請諡上不允鼈拜令仍給與諡八年五月上以鼈拜結黨專擅弗思悛改命議政王大臣等逮治鼈拜罪諭曰前工部尙書員缺鼈拜以朕素不知之濟世妄稱才能推補通同結黨以欺朕躬又奏稱戶部尙書應授二員將馬爾賽徇情補用又鼈拜於朕前辦事不求當理稍有拂意卽將部臣叱喝引見時在朕前施威震衆科道官條奏鼈拜屢請禁止恐身干物議閉塞言路凡用人行行政欺朕專權恣意妄爲文武各官欲盡出伊門下與穆里瑪等結成同黨凡事在家定議然後施行且倚仗兇惡棄毀國典與伊相合者薦拔之不合者陷害之朕念鼈拜舊臣望其改惡悔過今乃貪聚賄賂奸黨日甚上違君父重托下則殘害生民種種惡跡難以枚舉其嚴拏勘審於是康親王傑書等列其攬權欺罔諸罪狀請革職立斬籍沒那摩佛亦論死上親加鞫問情罪俱實諭曰鼈拜以勳舊大臣受恩皇考遺詔輔佐政務理宜精白乃心盡忠圖報不意結黨專權紊亂國政紛更成憲罔上行私朕久已悉知尙望其改行從善克保功名以全終始乃近觀其罪惡日多命諸王大臣公同究審俱已得實以所

犯重大擬以正法本當依擬處分但念鼈拜在累朝效力年久且皇考曾經倚任朕不忍加誅姑從寬革職籍沒仍行拘禁那摩佛亦免死革職拘禁鼈拜死乃出那摩佛於獄而釋之卒於家五十二年上復念鼈拜戰陣功多特追賜一等男以其弟巴哈之孫蘇赫襲蘇赫卒仍以鼈拜孫達福襲世宗憲皇帝時賜鼈拜祭葬復一等公世襲罔替加封號曰超武

巴哈

巴哈滿洲鑲黃旗人姓瓜爾佳氏偉齊第四子也初任一等侍衛太宗文皇帝崇德二年設議政大臣二十有四巴哈與焉征明錦州凱旋上幸牧馬所命內大臣侍衛與新降之明總兵祖大壽等校射獎賞有差巴哈得賜駝一世祖章皇帝順治元年隨大軍入山海關定燕京二年以巴哈在太宗朝扈從著勞授騎都尉世職時睿親王多爾袞攝政都統譚泰訐內大臣索尼詆誹睿親王及捕魚牧馬鼓琴演戲諸款法司鞠訊以巴哈曾與索尼同觀偶戲議革世職罷任詔賞之三年隨肅親王豪格征陝西四川尋以考滿並敘隨征功晉世職至一等輕車都尉六年睿親王帥師討大同叛鎮姜瓖巴哈請從征自效王弗許復再三請王使人諭

以或隨明甲隊或隨暗甲隊惟所自便巴哈知王終弗用也拂衣起遽歸翼日議罪應斬改罰贖七年睿親王有疾貝子錫翰等奏請上駕臨視睿親王罪以擅請並責巴哈弗執問復罰鍰八年上親政命爲議政大臣三遇恩詔晉爵至一等男初肅親王爲睿親王構陷卒於獄子富綬尙幼尙書宗室鞏阿岱議殺之巴哈同內大臣哈什屯持不可乃止鞏阿岱因與其弟錫翰及侍衛冷僧機勸睿親王疎遠巴哈及其兄鼇拜旣而錫翰復以巴哈入直御前因數集內大臣西訥布庫等議其罪復聞有旨嘉巴哈勤勞議乃寢至是上以鞏阿岱錫翰冷僧機西訥布庫等朋比妄行命諸王大臣鞠訊巴哈證其狀咸伏誅十二年以巴哈恪供職業加少保兼太子太保十四年晉少傅兼太子太傅十五年授領侍衛內大臣聖祖仁皇帝康熙六年以其子訥爾都尙公主封和碩額駙八年上以察哈爾阿布奈久缺朝請無藩臣禮命巴哈往察其狀及還會鼇拜以結黨擅權獲罪同父兄弟並褫革論斬籍沒上念巴哈宣力年久貸其罪並免籍沒後以疾卒

瑪爾賽

瑪爾賽滿洲正白旗人姓他塔喇氏世祖章皇帝順治七年襲父譚拜二等男爵

尋兩遇恩詔晉一等男兼一雲騎尉十五年署副都統隨寧南大將軍宗室羅託自湖南征貴州既定貴陽同護軍統領科爾崑率兵五千擊走僞鞏昌王白文選取黃平州十六年八月旋師次荊州聞明臣鄭成功陷鎮江犯江寧偕副都統噶褚哈率兵由大江趨援與駐防將軍喀喀穆總督郎廷佐等擊敗鄭兵并力守城敵衆數萬屢薄城窺犯瑪爾賽率兩翼兵奮擊殲敵甚衆追剿至鎮江盡竄入海敘功晉爵一等子聖祖仁皇帝康熙元年授正白旗滿洲副都統二年隨將軍穆里瑪圖海征湖廣流賊李來亨高必正等於茅麓山戰輒捷連破賊寨來亨自縊死必正率衆降六年擢工部尙書尋調戶部七年兼正白旗蒙古都統時淮徐河堤屢決總河楊茂勳請於天妃閘外築壩逼黃引淮出口俾黃淮相抵以歸海給事中李宗孔請塞盱眙決口以防淮流上命瑪爾賽同刑部尙書明珠往江南會勘定議尋疏言興化縣白駒場舊設四閘洩水由牛灣河入海近年閘俱填塞水無所洩宜卽疏濬仍置版以時啟閉清口爲黃淮交匯漕運要津黃水強則越淮淮水弱則沙土得入壅運道宜於黃河北岸多濬引河以分其勢使沙逐水流運道無阻又董口沙淤難行每歲修築徒費無益其右有駱馬湖可通宜添築堤岸

以爲繕道盱眙縣翟家壩之北古溝鎮諸決口卽宜堵塞使全淮盡由清口會黃入海詔如所議行初瑪爾賽與內大臣班布爾善皆諂事輔政大臣鼇拜鼇拜遂引班布爾善爲大學士而欲以瑪爾賽爲戶部尙書時已有旨擢任兵部侍郎瑪希納鼇拜疏援順治年間曾設滿洲尙書二員故事以薦瑪爾賽旣任戶部與尙書王宏祚論事齟齬不得自專適戶部有失察書役假印盜庫金事吏部議瑪爾賽王宏祚處分並援恩詔寬免班爾布善獨票擬宏祚革任爲瑪爾賽洩忿八年正月瑪爾賽病歿得旨予祭奠如例鼇拜擅予謚曰忠敏未幾鼇拜及班布爾善皆獲罪逮訊得瑪爾賽黨附狀論追革官爵戮屍籍沒詔免戮屍以所襲二等男爵予譚拜從孫佛保襲

索尼

索尼滿洲正黃旗人姓赫舍里氏父碩色大學士希福兄也太祖高皇帝時碩色自哈達部挈家來歸太祖以其兄弟父子並通國書及蒙古漢人文字咸擢置文館理事賜碩色希福巴克什號授索尼一等待衛使出入扈從隨軍征討時哈達兵犯界藩城索尼身先士卒擊敗之復隨征棟揆蒙古援兵雲集立二寨互爲犄

角索尼與諸將合兵攻剿拔其一寨餘衆悉降天聰元年從太宗文皇帝攻錦州
遇明兵千餘徙大凌河戶口索尼以二十騎襲擊之多斬獲旋偵敵寧遠城內兵
突出索尼奮勇力戰追擊敵兵至壕而返二年上親征喀爾喀徵兵外藩科爾沁
不至既遣希福率健士八人往趣之復詔索尼與侍衛阿珠祐賚諭飭責土謝圖
額駙奧巴初奧巴爲台吉入朝太祖以貝勒舒爾哈齊孫女妻焉既而奧巴屢違
令約私與明通時復徵兵不至索尼於是稟受方略以行既入科爾沁其部人饋
以牲索尼麾之去曰爾汗有異心爾物安可食耶部人以告奧巴奧巴病足居別
室索尼與阿珠祐詣見公主以諭旨告奧巴奧巴聞之扶掖至佯問曰此爲誰索
尼曰吾儕天使也爾有罪義當絕今特以公主故使來餽問耳奧巴語左右具饌
索尼阿珠祐不顧而出奧巴恐使台吉塞冷等請其事索尼出璽書示之卽令從
者先行奧巴得書大驚令所屬大臣環跪請曰汗獲重罪甚惶懼今寇騎塞路恐
使者卽歸遭侵掠益滋汗咎請少留索尼曰銜君命而來死何足辭與阿珠祐拂
衣起整轡欲行衆皆泣且曰汗欲引罪自謝扣馬首力挽之乃止翼日奧巴辭以
足疾欲令其台吉拜思噶爾及桑噶爾寨偕索尼等入謝索尼曰汝欲解己罪而

使二人行吾豈爲取拜思噶爾等而來耶奧巴乃使人請曰上恕我我固應肉袒謝懼不我容而逐我耳索尼曰皇上覆載如天地汝曩引慝入朝雖有罪必蒙矜恤奧巴叩首決計入朝索尼見其悔罪輸誠與阿珠祐偕其大臣黨阿賴先歸奏狀俱稱旨三年從征明至燕京明寧遠巡撫袁崇煥等赴援列營於城東南索尼奉諭傳令左翼迎擊貝勒豪格先馳入陣敵兵蹙之矢石如雨索尼躍馬突入東西衝擊斬殺甚衆遂拔貝勒於重圍明年正月大軍至榛子鎮城內無官守索尼同文臣達海頒漢字詔諭降其民復招撫沙河驛越日拔永平與達海等奉命執黃旗於城上以漢語遍諭軍民皆歸順二月班師隨貝勒阿巴泰等率將士守永平五年正月朝鮮使臣樸蘭英來朝賜其王瀋蘭英以賞薄辭索尼與參領英俄爾岱等斥責之蘭英懼拜命七月擢吏部啟心郎從征明圍大凌河城明兵自錦州赴援索尼持短兵步戰敗之九月奉命往瀋陽宣布捷音踰月偕參將祝世昌率漢軍千六百人及朝鮮使臣至軍營十二月與達海等奏定元旦朝賀儀制明年從征察哈爾由大同入明邊取阜臺寨會六部官署工竣上召索尼及諸啟心郎諭以啟迪諸貝勒俾勤事改過毋曠厥官八年以索尼任職吏部事無闕失授

騎都尉世職仍與學士羅什等日直內院凡宣示諭旨及察審功罪咸當上意值有旨以郡王禮祭貝勒岳託吏部尙書阿拜誤以岳託子襲封郡王傳語都統葉臣事聞下廷臣議誤傳詔旨罪以索尼任吏部郎官應連坐論罰鍰上曰索尼未經奉旨豈肯妄言特命免議崇德八年考績超授三等男世祖章皇帝順治元年都統何洛會等訐告肅親王豪格言詞悖妄王坐廢爲庶人詔王大臣集衆宣示以索尼忠貞戮力不附肅王與都統譚泰護軍統領圖賴並賜鞍馬二年晉二等子是時睿親王多爾袞攝政以索尼旣列子爵不宜復列郎官令解啟心郎任仍理部事先是索尼叔父希福以不附睿親王爲譚泰構罪劾罷未幾索尼發譚泰隱匿諭旨事譚泰亦坐削公爵有求古琴於索尼者索尼於庫內取漆琴與之索尼又嘗令僕從於禁門橋下捕魚見庫院草長使牧者秣馬院中譚泰遂臚狀劾索尼下法司勘訊論死睿親王奏從輕典削世爵永不敘用遂罷廢三年正月圖賴劾譚泰事涉索尼逮問圖賴曰譚泰有罪吾於途次作書致索尼使啟睿親王索尼以不啟聞及訊資書者塞爾特曰書達索尼索尼囑我勿言也諸大臣論索尼罪當斬王親鞫之索尼曰吾發譚泰擅隱諭旨罪願匿圖賴書以庇之乎復訊

塞爾特因得佐領希思漢慮譚泰得罪投書於河狀索尼遂昭雪尋復授二等子
索尼終不附睿親王於政事多以理爭王由是惡之五年以貝子屯齊等訐告索
尼於崇德八年秋與圖賴等謀立肅親王私結盟誓議罪應死有旨免死褫職輸
贖緩遣守昭陵追奪賞賜八年上既躬親大政以前議索尼罪不實特召還朝復
其爵遇恩詔晉三等伯予世襲九年復命諸王議功晉一等伯賜敕免死二次擢
內大臣兼議政大臣總管內務府事十七年應詔上言十一事一曰小民冤抑有
司不爲詳審者宜別爲嚴察使無壅於上聞二曰凡犯罪發覺問官以奉有嚴旨
往往不察其情輒加重罪不無枉濫乞敕法司量情詳慎三曰前議福建將士罪
在大將軍者止削一不世襲之騎都尉而所屬將領其子爵男爵乃盡議革輕重
不均有乖懲勸請敕更正四曰凡開國之臣自騎都尉以上皆有功行間及贊成
大業者所授之職宜予世襲其後非有戰功恩詔所加不宜給世襲敕書五曰在
外諸藩風俗不齊若必嚴以內定之例恐反滋擾宜格外寬容六曰近聞大臣勢
豪奪據行市奸宄之徒投託指引以攘貨財請旨嚴禁七曰今四方商賈擔負捆
載來京者多爲旗下大臣家人短價強買人將畏而不前請察禁八曰諸王貝勒

以及各官私引玉泉山之水爲灌溉致竭泉流當禁九曰邊外木植皆商人僱民採伐水運解部故額稅之外令自售賣使利及商人今聞大臣於採木之地私行強佔以致商不聊生請禁止十曰大臣不殫力公事惟飾宅第請懲禁十一曰五城審事諸官遇世族富家與窮民構訟必罪窮民曲意徇私不思執法請嚴飭無得枉情納賄恣意妄行疏入上以所奏皆實事宜申禁飭部議行十八年正月世祖升遐遺詔以索尼與大臣蘇克薩哈遏必隆鼈拜四人輔政於是索尼及諸臣盟誓受事尋蘇克薩哈與鼈拜爭事成隙索尼惡之年已老矣且有疾康熙六年正月與輔臣等奏請聖祖仁皇帝親政四月上諭吏部曰輔政大臣伯索尼太祖高皇帝時眊勉效力太宗文皇帝任以內外大事悉能果斷殫厥忠誠世祖章皇帝時亦任以內外大事竭忠純篤以其勳舊忠貞堪受重託遺詔俾令輔政恪遵顧命夙夜靖共厥績茂焉今旣染疴且復年邁宜特加恩寵以示酬庸之典下王大臣會議晉一等公與前所授一等伯並世襲索尼以寵榮逾分悚仄難安陳情辭一等公爵得旨嘉獎仍令祇遵成命不必遜辭是年七月卒賜祭葬有加禮諡文忠以第五子心裕襲一等伯第六子法保襲一等公長子噶布喇任至領侍衛

內大臣十三年十二月聖祖因孝誠仁皇后推恩所生授爲一等公第三子索額圖別有傳

遏必隆

遏必隆滿洲鑲黃旗人姓鈕祜祿氏額亦都第十六子也母和碩公主天聰八年太宗文皇帝賜敕命遏必隆襲其父一等子爵任侍衛九年詔免功臣徭役遏必隆與焉並給人戶使管佐領事貝勒尼堪福晉遏必隆兄都統圖爾格之女也無子謀取僕婦女作爲己生尼堪入奏命刑部承政索海等會鞫之遏必隆告於鄭親王濟爾哈朗曰索海與尼堪爲姻戚恐左袒宜勿與訊及會勘福晉謀作事實遏必隆坐徇庇欺誑削爵崇德六年從上證明移營松山濬濠環守明總兵曹變蛟率乳峯山步騎欲棄寨突圍出屢犯兩黃旗營遏必隆連擊敗之夜三鼓變蛟集敗兵突犯御營遏必隆與侍衛坤巴圖魯巴什塔及大臣錫翰等堅守後營門壘力戰殪十餘人變蛟負創以其衆遁走詔守衛不嚴諸臣輸罰緩分賚禦敵將士遏必隆得優賞七年隨饒餘貝勒阿巴泰等證明入長城克薊州進兵山東抵兗州攻夏津先登克其城授騎都尉世職順治二年流賊李自成遺孽李錦與賊

黨郝搖旗等竄聚湖廣爲亂荆襄武漢道路多梗遏必隆隨順承郡王勒克德渾往討之師次武昌賊據守要隘遏必隆先衆攻擊大軍繼進斬殺無算遂拔鐵門關敍功晉二等輕車都尉五年兄子侍衛科普索訐其與白旗諸王有隙設兵護門事論死籍沒得旨免死革世職及佐領籍家產之半八年世祖章皇帝旣親政遏必隆訟削職寃詔復職明年科普索獲罪以所襲圖爾格之二等公爵令遏必隆併襲爲一等公有護軍擺思哈喇者當太宗上賓時託疾不守門至是已授騎都尉又一雲騎尉遏必隆舉劾其前罪下部鞠實置之法籍其家以與遏必隆旋任議政大臣三月掌鑾儀衛事十月擢領侍衛內大臣十四年加少保兼太子太保尋加少傅兼太子太傅十八年受遺詔與索尼蘇克薩哈鼐拜同爲輔政大臣康熙六年三月御史張惟赤疏請聖祖仁皇帝親政於是索尼等以歸政請遏必隆亦懇請再三是歲七月上躬親大政諭部加恩輔臣以示酬庸之典詔從部議加賜遏必隆一等公爵復以其長子法喀襲原授之一等公遏必隆奏辭不允賜戴雙眼孔雀翎明年加太師尋乞罷輔政溫諭慰留又明年再請乃許先是輔政時索尼老病鼐拜多專政與蘇克薩哈不相能遏必隆不能自異及鼐拜倡圈易

旗地之令中外大臣皆謂爲不便遏必隆欲停止窺鼈拜意在必行遂弗與爭旣而鼈拜矯旨誅大學士蘇納海等復族誅蘇克薩哈遏必隆皆不爲阻亦不入奏八年鼈拜獲罪上以遏必隆同列輔政明知其惡而緘口不語詔法司併逮問論死上復念其結黨無實宥之削太師銜及後賜之一等公九年諭兵部曰前以輔政大臣遏必隆知鼈拜樹黨亂政不豫行糾劾故坐之罪今念其爲皇考顧命大臣且勲臣子其咎止於因循瞻顧未嘗躬負重愆特爲寬宥仍以公爵宿衛內廷遏必隆遂以一等公品級入朝侍直十二年十二月疾篤上臨視慰問及卒賜祭葬諡恪僖勒石墓道碑文稱其賦性敬慎制行端方愨誠報國著有勤勞云尋以冊立孝昭仁皇后推恩所生特旨令立家廟賜御製碑文復御書策名金石四字以額其祠五十一年上念遏必隆曾襲其父世爵緣事削除未襲特命以其第四子殷德襲一等子世爵

楊雍建

楊雍建浙江海寧人順治十二年進士除廣東高要縣知縣十五年兩廣總督王國光疏薦賢能謂其恤困窮若痾身蝨奸弊如浼己於是行取入京考選授兵科

給事中時平南王尙可喜靖南王耿繼茂並鎮廣東十六年正月雍正疏言臣前官粵東日擊粵民困苦由兩藩並鎮每印官缺員市井無賴輒重賄鑽營委署取償民間凡往來饋運土木工作役民無限制增立鹽埠分設私稅縱悍兵開山伐木奪商賈利復於正賦外以藩令採買名曰王穀王席皆責民供應民困已極請移一藩於他省俾粵民甦息疏下部議以藩王應約束弁兵勿干預印官委署累商害民請旨飭禁尋詔移耿繼茂鎮四川旋改鎮福建先是上欲幸南苑雍建具疏諫止上既宣諭以閱兵習武之義復命雍建同科道官隨往翼日雍正疏昨奉上諭閱武南苑令諸臣侍從臣因得覩軍容之盛武備之備知皇上安不忘危原非無事而出始深悔前疏之愚昧無知皆由沽名釣譽習氣未除仰請敕部處分疏入得旨寬免四月疏劾銓政舛錯下宗人府都察院會議吏部諸臣削級罰俸有差五月明臣鄭成功陷鎮江犯江寧雍正劾兵部尙書梁清標等不經畫於幾先又不圖維於事後請嚴旨申飭俾痛改積習疏下吏部察議兵部諸臣削級罰俸有差雍正建累轉禮科吏科至刑科給事中疏言明季仕途分門立戶意見橫生國事遂不可問由社盟標榜排擠報復所致請嚴飭學臣禁止士子立

社結盟以杜朋黨之漸又奏定鄉會兩試絕營競防弊竇之例疏俱下部議行康熙三年十二月因彗星見上疏請修省廣求直言詳詢利病有可惠民者立賜舉行疏入得旨楊雍建直言可嘉星象示異皆敷政失宜所致今惟力圖修省務期允當以答天心尋詔外內臣工各抒所見勿因循瞻顧雍建又言治化之未淳由於臣職之未盡比者部臣於應議之事或請移他部或請下督撫不肯直辭決斷一案之處分經年未結一事之行止重複咨詢民間利病所關憚於釐正輒援往例請議是惟以推諉爲卸責而無任事之實心也督撫知百姓之苦於私派浮征而不爲建長策以除積困見有司之貪暴掎克間有特糾者反爲摘小罪以引輕條是惟以蒙蔽爲養奸而無澄清之實政也請嚴飭內外臣工力圖稱職如仍蹈舊轍立予罷斥上是其言四年戶部議令江浙二省停運白糧折銀解部以充兵餉雍建言比年江浙之米每石值七八錢而止今每石改折二兩加以耗羨備辦夫船之費非本色三石不足以完折色之一石臣以爲有本色則有耗羨有夫船既經改折不應并耗羨夫船而又徵之必不得已而議折則當權衡穀價之高下以便於民然亦可以權宜不可以久遠乞敕巡撫量時價減徵并敕戶部自今勿

輕議改折疏并下所司知之是年得旨內陞十一年命以四品頂帶食俸仍任給事中尋遷兵部督捕理事官右通政太僕寺卿十八年正月擢左副都御史疏劾江西巡撫佟國禎庸碌無能下部察議國禎降二級調用二月充會試副考官旋命巡撫貴州時逆賊吳世璠尙據雲南雍正建旣至貴陽請設撫標三營兵部以例止二營議駁奉旨貴州新經恢復地方緊要應如所請設立三營後不爲例又疏言貴陽殘破尙餘未燬室廬宜招復流散人民量減差役使安其業禁止借端私派上命雍正速行招集流民還業務令得所除供應大兵諸正役外有以私派擾民者卽指名劾奏二十年三月以軍興旁午奏停貴州本年鄉試俟來年補行十月疏言貴陽等七府土司錢糧若歸併附近知縣恐呼應不靈宜仍令土司管理責令知府督催下部議如所請二十一年十二月以考試武舉策問語涉譏諷部議革職得旨楊雍正爲封疆大臣如管兵官員不職應卽具疏糾劾考試關係大典乃於策題內暗含譏諷殊屬不合本當如議革職姑寬削去所有加級紀錄仍降五級留任二十三年八月授兵部左侍郎二十五年十一月以母老病歸養旣終制以部議保舉失當應降二級未赴補二十八年上巡幸浙江賜御書松喬堂

匾額二十九年詔舊任巡撫學政諸臣分修河工雍正修高家堰隄工工竣議敘復所降級四十三年五月卒於家賜祭葬如例

米思翰子李榮保

米思翰滿洲鑲黃旗人姓富察氏哈什屯長子也康熙三年由侍衛襲父一等男兼一雲騎尉管佐領事六年任內務府總管時輔政大臣有欲假用尙方器具者米思翰俱嚴拒之不以予聖祖仁皇帝既親政知其守正不阿授禮部侍郎八年擢戶部尙書旋列議政大臣先是各省歲賦聽布政使存留司庫每有挪移虧缺之弊米思翰疏請通飭各省自俸餉諸經費所餘悉解部由是勾稽出納瞭如指掌是時天下一統邊境戢寧而尙可喜鎮廣東耿精忠鎮福建藩屬將弁咸惰遊驕縱吳三桂鎮雲南尤自恣要請無已俸餉多浮糜輸輓滋勞費十二年可喜請撤藩移遼東三桂精忠亦以是請疏下戶兵二部議米思翰與兵部尙書明珠等議令俱撤藩移山海關外時廷臣有言三桂不可撤者以兩議入奏米思翰堅持宜撤得旨允行既而三桂叛聖祖命王貝勒大臣率八旗兵征討議者以軍需浩繁謂宜就近調兵禦守米思翰言賊勢猖獗非綠旗兵所能制宜以八旗勁旅會

剿之至軍需內外協濟足支十年可無他慮於是請以內府所儲分年發給復綜核各省庫金倉粟以時撥運奏悉稱旨十三年六月偕戶部諸臣疏言大兵剿賊屢奉明詔以正賦給軍需恐有司尙多借端私派請敕各督撫嚴察所屬凡供應糧餉薪芻一切動用官帑毋許苛派其購自民間者務視時價支給勿纖毫累民奉諭如議速行是年十二月卒年四十有三聖祖軫恤備至予祭葬如典禮謚敏果方吳三桂耿精忠相繼叛滇黔楚蜀閩粵悉爲賊踞人謂撤藩實速之生變爲持議者危之聖祖嘗諭廷臣曰朕自少時以三藩勢焰日熾不可不撤豈因其叛誘過於人耶及逆賊殄平聖祖追憶持議諸臣猶諭稱米思翰弗置子四第四子李榮保襲一等男兼一雲騎尉初任侍衛兼佐領遷護軍參領前鋒參領至察哈爾總管乾隆元年馬齊疏陳米思翰勞績得旨入祀賢良祠二年以冊立皇后彝典追封李榮保一等公予其第四子富文一等侯爵十三年冊謚孝賢皇后推恩先世追封米思翰一等公以富文襲十四年李榮保第十子大學士忠勇公傅恆經略金川功成凱旋賜建宗祠春秋致祭自哈什屯始米思翰李榮保並入祀追謚李榮保曰莊愨

巴泰

巴泰漢軍鑲藍旗人姓金氏天聰五年任二等待衛從太宗文皇帝征明圍大凌河城明兵自錦州趨援我師與迎戰侍衛尼雅漢中傷墜馬巴泰馳入敵陣援之以出六年從征明大同敵馳射我參領席特庫巴泰突前衝擊敵遁走崇德元年隨睿親王多爾袞征明至沙河生擒哨騎一斬九人獲馬八我偵敵者至楊村爲敵所困巴泰馳擊斬其一人敵潰走旋師出邊率十人偵敵三屯營敵有奪我馬馳者巴泰追斬之取馬以歸六年隨鄭親王濟爾哈朗征明錦州敗其總督洪承疇兵比還巴泰殿後敵追者猝及面中流矢仍躍馬揮刃斬一人敵乃卻上嘉其善戰併錄前勞授雲騎尉世職尋擢一等待衛世祖章皇帝順治二年以勞績久著晉世職爲騎都尉尋遇恩詔加一雲騎尉時睿親王攝政內大臣索尼侍衛巴哈護軍統領鼇拜並以弗附睿親王坐罪罷任降罰有差巴泰亦弗附睿親王王問以鼇拜索尼相善否巴泰對弗知又問爾與索尼善否對曰我二人同直相善於是罪以僞稱弗知削雲騎尉世職並罰鍰世祖既親政復世職屢遇恩詔晉至二等輕車都尉十五年命列散秩大臣旋擢內大臣聖祖仁皇帝康熙三年擢國

史院大學士賜敕嘉其曩日不附睿親王克抒忠悃晉爵三等男六年充纂修世祖實錄總裁官時鼇拜輔政惡巴泰不附己曾以輔政大臣蘇克薩哈論事齟齬構陷其罪集衆定讞慮巴泰有異議弗使與聞七年二月巴泰以疾解任八年五月鼇拜獲罪逮繫上召巴泰授祕書院大學士仍充實錄總裁官九年十一月改內院爲殿閣以巴泰爲中和殿大學士兼吏部尙書又賜敕嘉其忠盡勤勞晉爵一等子十一年以實錄告成賜銀幣鞍馬加太子太傅十三年以疾乞休詔解任調理十四年命仍入閣辦事十六年七月引年乞休奉旨卿以年邁請休情詞懇切准原品休致念卿宣力有年清端勤慎以朕所御冠服特賜與卿用旌老臣昭朕始終眷念十九年復起爲正黃旗漢軍都統二十三年乞解任得旨俞允仍命以內大臣銜與朝請二十九年卒予祭葬如典禮諡文恪子蘇赫襲爵

佟國印

佟國印漢軍正藍旗人父佟恆年以驍騎校隨其從父佟養正守朝鮮界之鎮江城太祖高皇帝天命六年守城中軍陳良策叛執養正投明總兵毛文龍恆年亦被執不屈死贈騎都尉世職以弟成年襲尋卒佟國印襲職太宗文皇帝崇德三

年授工部副理事官六年隨睿親王多爾袞征明圍錦州與都統石廷柱擊敗李洪步兵上尋親統大軍進征圍明總兵洪承疇於松山敵兵有逸入高橋南三臺者國印與都統劉之源以礮攻克之盡殲其衆七年四月鄭親王濟爾哈朗等圍杏山塔山國印俱以礮擊其城下之敍功加一雲騎尉尋遷工部理事官奉命同副都統馬光輝等赴錦州督鑄神威礮十月隨饒餘貝勒阿巴泰征明由黃崖口入邊時明將於沿邊設臺分兵防守甚密而國印同都統李國翰屢擊敗敵衆克邊臺七又擊敗牆子嶺守兵八年鄭親王征明寧遠既克中後所進取前屯衛國印以紅衣礮擊其城風迴礮火傷領下創甚攻城益力卒克之世祖章皇帝順治元年敍功晉二等輕車都尉三年擢工部右侍郎七年九年三遇恩詔晉爵三等男十二年以疾解任康熙十一年四月卒賜祭葬如例子佟世德初因國印乞休襲爵尋授參領康熙十三年擢正藍旗漢軍副都統十四年八月隨貝勒洞鄂征叛鎮王輔臣於平涼賊衆迎拒世德同都統海爾圖率兵擊卻之賊復倚山據險列陣世德率兵直前衝擊破賊陣追斬甚衆十五年同前鋒統領穆占設伏於平涼之南山擒賊偵卒擊敗賊騎百餘賊將屢糾衆來犯世德率兵五戰皆捷復以

紅衣礮擊毀賊壘殲賊無算尋招降王輔臣及其叛黨陳彭等並在事有功十七年五月命隨撫遠大將軍圖海規復漢中興安十九年五月卒於軍賜祭葬如例子銓襲爵

杜篤祐

杜篤祐山西蒲州人明崇禎舉人世祖章皇帝順治二年授延安府推官五年行取授戶科給事中七年疏言各省錢糧總歸戶部我朝定鼎七年以數千萬金錢任部臣之出入從無一疏奏銷年復一年互相隱卸臣職司部垣屢催通州坐糧廳收發漕糧清冊久不造報一事如此其餘可知請敕循舊例年終逐一奏銷以杜蒙混又司官出差期滿必經堂官考覈題准回部管事方許另差乃有揚州鈔關主事張彥珩甫屆報滿戶部不行考覈輒題管大迤橋糧務專擅違例並請旨嚴飭疏下內院及吏部察議尋議錢糧雖有冊檔可據不依例奏銷實爲怠玩司官差滿未經考覈不應題差戶部諸臣降罰有差八年四月命赴山西齎頒恩詔還奏沿途日擊達賴喇嘛等自直隸赴山西遇大雨泥濘車輛遲滯夫馬苦遭鞭撻以致驛夫斃命者六人倒斃馬騾共十九匹應請旨敕理藩院嚴飭嗣後滿漢

奉差官員如有額外需索苦累驛遞各撫按指名劾奏治罪下部議如所請八月
充山東正考官九年七月遷吏科給事中十二月疏劾左都御史房可壯自任總
憲不能秉公糾駁惟以無益條陳苟且塞責大計在卽舉劾尤宜公正難容尸位
素餐請賜處分上命可壯回奏奏上篤祐復劾其疏詞支飾可壯乞休歸事詳房
可壯傳十年三月篤祐疏言前明詔天下戶口編造黃冊所以定賦役覈隱漏清
逃亡爲法甚善今賦役豈無溷冒戶口豈無凋零奸民豪戶豈無飛派貪官汚吏
豈無挪移況窮民之失業者累及里圖紳衿之優免者加諸貧弱請查照前明舊
例斟酌行之其過割之影射作何清剔審編之隱瞞作何釐正戶口之倒絕作何
開除流移之就居作何安頓務將丁糧戶口編輯全書以重民命上以奏有可採
下部議行十一年三月遷戶科都給事中四月疏陳清釐關弊四事一關員例以
一年報滿而吏員積年不換把持既久索端愈工宜令役滿者通行裁革一商稅
止聽各關報銷無憑稽覈請別立稅票分給商船徑投所在官司按票造冊送部
磨對以杜侵欺一各關主事宜迴避本籍豫絕弊端一差滿繳批毋得逾限逗遛
滋事下部議從之是月又言通政使准過狀詞請敕部速結以伸冤抑又因直隸

灤城等州縣奉詔蠲免錢糧仍私自徵收請敕各督撫清查被災戶口提驗各戶由單會送部科磨對使貪官藏奸無所並從之五月疏言直隸報銷國課本以防奸詎里書指名攤派牧令復借稱上官經承使費上下分肥至贓敗被參累民已甚上曰銷算錢糧攤派使費急宜痛革其酌定畫一之規以除民害尋九部議州縣逐年分晰款項備造清冊由司達部不得派費滋弊苦累小民并諭各督撫嚴飭行八月升太僕寺少卿十三年四月遷左通政六月遷宗人府府丞十月擢戶部侍郎明年丁母憂歸十五年服闋補原官十六年三月諭獎勤勞奉職諸臣加篤祜太子少保聖祖仁皇帝康熙四年調工部侍郎七年轉吏部九年三月擢都察院左都御史五月因御史季振宜劾吏部尚書黃機以降級侍郎蒙混開列升授尚書下都察院及吏部議以篤祜前任吏部侍郎時與尚書瑪希納等徇庇不舉應降級得旨寬免十一月疏言降級革任人員不論有無冤抑甫經離任卽具呈辨復不足以清銓法疏下部議禁止十一月以京察屆期上言八法處分應詳註劣蹟無得混稱不孚衆論又六科向無堂官止令本科掌印開送恐有瞻徇應移送吏部都察院堂官考察皆下部議行明年二月乞休命以原官致仕尋卒於

家

對喀納

對喀納滿洲正藍旗人姓鈕祜祿氏世祖章皇帝順治二年由內院筆帖式遷工部主事九年遷郎中十一年遷刑部啟心郎十五年裁缺十七年補都察院左副都御史十八年二月遷刑部侍郎康熙五年擢本部尙書六年五月聖祖仁皇帝詔臣工指陳民生利病對喀納同尙書郝惟訥侍郎麻勒吉等疏言賣身旗下之人每與民間構訟或本主爲之代告稱妻子寄居其家田宅財物坐落某處某某借銀若干類多捏詞索詐株連無辜竊思有銀有產之人豈肯賣身亦無存留妻子而獨賣己身之理請嗣後通飭八旗及直隸各省遇此等捏詞概不准理庶狡徒稍戢民生得安疏入從之七年九月授國史院大學士充世祖章皇帝實錄總裁官八年七月諭曰刑部事務殷繁人命所係必得才猷練達之人方克勝任大學士對喀納諳練刑部事務著加太子太保以國史院大學士管刑部尙書事九年以內三院爲內閣對喀納改文華殿大學士會吏部尙書馬希納解任調對喀納管吏部尙書事十一年七月副都御史李之芳疏言部院官失察胥役犯贓應

如州縣例革職吏部以部院官員例不關防胥役寢其事上以京官雖與外官有閒不應迴異下九卿科道會議尋議外官改罰俸一年京官應罰俸六月得旨申飭令再議論責對喀納曰衙役作弊小民受害無窮所司官理應從重處分以清積蠹今爾等俱已富貴不念小民困苦惟恐重處屬員致有干涉初議京官不應處分繼議外官亦從未減明係瞻徇朕擢爾吏部尙書自應殫心爲國矢公報效乃全無主見殊負委任之意於是定議外官處分仍舊部院司官失察吏役犯贓不及十兩者罰俸一年過十兩者降一級留任十二年六月疏言舊例各省司道府州縣召募經制書辦典吏攢典等役恐積久弊生一歲一次轉撥約有數萬人甚爲繁擾且致文冊生疏每多舛譌遺漏請照督撫鹽院衙門之例五年役滿停其轉撥得旨允行十三年二月以病乞休溫旨慰留十四年九月卒於官年五十七有七賜祭葬如典禮諡曰文端

傅達禮

傅達禮滿洲正黃旗人姓吳雅氏由主事洊升員外郎郎中康熙六年授內祕書院侍讀學士十年正月改翰林院侍讀學士二月充經筵講官尋又充日講起居

注官十二月擢掌院學士兼禮部侍郎諭曰翰林院起居注職任重大關係機密朕以爾才品優卓實可信任故行簡用爾其阻勉以副朕意十一年正月教習庶吉士先是上命儒臣繙譯大學衍義是年七月告成傳達禮奏請刊頒得旨允行十二年四月諭曰滿漢文義照字繙譯可通用者甚多後生子弟漸致差謬爾任翰林院可將滿語照漢文字彙發明某字應如何用某字當某處用集成一書使有益於後學此書不必太急宜詳慎爲之務期永遠可傳方爲善也後書成賜名清文鑑五月教習庶吉士七月重修太宗文皇帝實錄充副總裁八月命同禮部侍郎哲爾肯往雲南經理吳三桂撤藩起行事宜諭曰因爾等遠往雲南料理遷移事務特賜朕所佩刀各一口良馬各一匹十一月三桂反被留十三年大兵由湖廣進剿三桂釋傳達禮等還上嘉其不屈於賊仍以原官用十四年以經筵講章不稱旨罷尋卒

朱國治

朱國治漢軍正黃旗人世祖章皇帝順治四年由貢生授固安知縣洊擢順德知府霸昌道十五年内陞大理寺少卿十六年四月遷大理寺卿十一月擢江寧巡

撫明年春劾布政使陳培正庸劣累民罷之時明臣鄭成功盤踞外洋出沒江南濱海州縣國治疏言海上未靖欲破狡穴先度形勢敵衆負險我師遠涉風濤其勞逸不同彼等熟識海道我師弓馬便捷其素習不同水師舟楫較之敵船大小懸殊其攻取器用不同臣謂以守寓戰凡海邊江口多設墩臺待彼勢困援絕乘間攻之自能擒渠獻馘下所司議行十八年疏言海防緊要請移蘇州海防同知於常熟移松江海防同知於上海各令其督修沿海橋梁馬路墩堡與各營汛將弁相機策應使任專而事無歧誤從之又疏言蘇松常鎮四府錢糧抗欠者多因分別造冊紳士一萬三千五百餘衙役二百四十人敕部察議部議見任官降二級調用衿士褫革衙役照贓治罪有差時妖言惑衆吳縣有潘應祥等溧陽縣有端應用等國治先後捕誅之康熙元年丁父憂不候代歸部議擅離職守革職聖祖仁皇帝既親政詔起用十年補雲南巡撫時吳三桂以平西王留守滇南收畜亡命潛謀不軌十二年七月詭請移藩錦州上念三桂久握重兵恐滋蔓生變特允所請遣侍郎哲爾肯學士傅達禮至雲南經理其事三桂期以十一月二十四日啟行國治方疏請增設驛堡協撥夫馬以待遷移而三桂與逆黨胡國柱夏國

相馬寶等密謀叛逆舉兵扼守關隘先期三日邀國治及按察使李興元雲南知府高顯辰同知劉崑脅之叛皆不屈國治罵賊尤烈遂遇害十二年雲南平上命驛送國治櫬及家屬回京二十一年諭曰朱國治當逆賊吳三桂反叛之初抗不從逆遂被殺害捐軀殉難深爲可憫其從優議卹乃加贈戶部右侍郎賜祭葬如典禮廕一子入監世宗憲皇帝時入祀昭忠祠

甘文焜子國城和善等

甘文焜其先江西豐城人後遷瀋陽父應魁從世祖章皇帝入關隸正藍旗漢軍官至石匣副將文焜由兵部筆帖式累遷禮部啟心郎聖祖仁皇帝御極改大理寺少卿康熙二年遷順天府尹六年正月授直隸巡撫先是左都御史郝惟訥以督撫親莅屬邑官吏因緣派累民間奏罷巡歷例七年六月文焜疏言巡撫不巡視屬邑則吏治民隱無由悉知如巡撫不賢圖潤私家雖坐守一城而苛屬擾民之事正多若果賢必自愛名節減省從役絲毫不以累人而年歲豐歉民間利病有司貪廉悉無遁情請仍敕令巡視但申嚴苛擾禁例則不肖之人知儆而實心任事者得盡職守疏下部詳議部臣執郝惟訥前奏寢其事上曰各省遇有水旱

等災督撫減省從役速行履勘庶不至顛倒輕重且可察訪貪官蠹役重加懲治於苦累兵民之事驗時卽行更改其允文焜請著爲令九月文焜疏報履勘涿霸安祁等州大興高陽文安武清東鹿清苑等縣田地數萬頃秋雨爲災請全蠲歲賦已征夏稅流抵來年部議按例減免有差得旨朕聞保定眞定二府及霸昌道所屬州縣被災特甚勘報十分九分者其盡行蠲免內有已征者流抵來年文焜復劾昌平順義懷柔密雲交河各州縣官遲報水災得旨下部處分如例會總督白秉眞以賑費浩繁請聽官紳等輸納銀米文焜輸銀三千助賑議敘加銜工部侍郎旋擢雲貴總督八年五月受事奏禁各驛站於額設夫役外派民協助時吳三桂鎮雲南雲貴總督駐貴陽三桂欲藉邊釁以固兵權詭報土番康東入寇又陰趣凱里諸苗煽亂羽檄交馳以覘文焜措置文焜料康東無能爲患凱里近在肘腋不制恐滋蔓難圖先督兵進剿擒斬無算連破賊巢遣副將冶秉忠搜剿阿魯山陣斬賊酋阿戎餘黨悉平乃以進剿康東師期移檄雲南而三桂果以康東遠遁來告文焜尋以滇疆遼闊疏請巡視因徧歷各府州十年三月疏言滇黔山路崎嶇且多瘴癘官員卒於任者請給勘合由驛歸櫬疏下部議行七月以病求

罷上温旨慰留九月丁母憂命在任守制十一月臻剖逆苗阿福倡亂文焜遣兵
擣其寨陣斬千餘人擒阿福誅之文焜再疏乞歸葬許給假治喪十二年十月還
貴陽任事時方允三桂撤藩之請三桂期以十一月二十四日起行陰結黨羽謀
反先期三日戕雲南巡撫朱國治分遣逆黨偪貴陽文焜聞變卽繕疏遣族弟文
炯齋馳入告復致書川湖總督蔡毓榮趣其集兵沅州聯絡楚黔聲援先是文焜
回京治喪三桂請以總督印付雲南巡撫署理假訓練爲名盡調督標弁兵赴滇
厚結之至是煽誘潰散莫聽文焜調遣文焜旣牒提督李本深領兵扼盤江上流
以拒賊適本深以書來覘文焜意中多遁辭文焜復爲手書答之略曰黔省安危
責在提督逆賊受國厚恩罔思圖報乃弄兵一隅自取滅亡我輩忠孝自矢建樹
正在今日尙其同心協力手足相依萬一不濟惟有效張巡南霽雲以身殉國斷
不稍存攜貳也本深得書弗顧竟踞安順府從逆貴州巡撫曹申吉亦降賊文焜
見城中將吏無一可與謀者度貴陽不能守惟鎮遠地勢險阻外可號召荆楚之
兵內可抗撓滇黔之隘堵遏凶鋒力圖剿滅猶事之可爲者因令妾盛氏率婦女
等七人自經死卽輕騎馳赴鎮遠至則守將江義亦已從逆文焜至吉祥寺江義

以兵環之文焜歎曰封疆之臣當死封疆事至此無能爲矣整衣冠望闕再拜遂自刎死年四十有二第四子國城及筆帖式和善雅圖從死焉後數年吳逆旣平貴州巡撫楊雍建疏陳文焜滇黔政績及遇賊死節事得旨甘文焜總督雲貴供職勤勞吳逆反叛捐軀殉難忠節深爲可憫下所司優卹並允直隸巡撫于成龍請遣其長子宣化府同知國均迎櫬還京至之日遣大臣迎奠於盧溝橋贈兵部尙書賜祭葬如典禮諡忠果廕子國璧入監二十五年貴州巡撫閻興邦以士民請建專祠於貴陽入奏御書勁節二字額其祠世宗憲皇帝時以文焜入祀昭忠祠

范承謨

范承謨漢軍鑲黃旗人大學士范文程第二子也初任侍衛順治八年更定八旗漢軍考試之例承謨中式舉人明年成進士選庶吉士授弘文院編修十二年遷祕書院侍讀學士十八年聖祖仁皇帝御極擢國史院學士康熙三年以疾乞假尋補祕書院學士教習庶吉士充纂修世祖章皇帝實錄副總裁官七年授浙江巡撫九年杭州嘉興湖州紹興諸府被水承謨奏貸藩庫銀八萬兩糴米湖廣以

平糶應徵漕米請每石折銀一兩於明年麥熟後徵解其白糧分三年帶徵被災重者如例蠲免並得旨允行先是寧波金華衢台溫處諸府屬荒田以前任總督趙廷臣請除額賦有旨令承謨履勘至是承謨徧歷其地奏豁免荒田地二十九萬四千六百餘畝水衝缺額田地二萬一千九百餘畝十年以疾請解任命乘驛回京調理浙江總督劉兆麒提督塞白理各疏言浙省年來當荒敝時而生民不致重困者皆撫臣承謨之力今以病請告百姓投詞攀留積一百五十餘紙不敢壅於上聞給事中姜希轍柯聳御史何元英等亦言承謨受事三載愛民如子餽遺請謁不通劾奏貪墨廉治巨猾剔除加耗陋規私派積弊單騎勘荒悉心賑恤浙人愛戴深於飢渴今雖積勞致疾懇特敕勉留上諭吏部曰前因浙江巡撫范承謨以患病具奏准其回京調理今據提督等奏稱百姓愛戴號泣請留情詞懇切特順民情仍留原任十一年八月承謨疏言浙省徵輸白糧其加耗多寡不一湖州每石加五斗五升嘉興每石加八斗爲運丁春辦諸費請嗣後令糧戶以春白米輸納概限加耗四斗五升又請豁台溫二衛康熙九年以前荒逋銀兩及石門平陽未完輕齎月糧等項皆下戶部議行十月擢福建總督承謨以海疆重任

難副辭上弗允因疏請陞見十二年七月至京召對承謨舊疾未痊上遣御醫診視賜藥餌逾月疾稍愈命馳赴新任賜冠服鞍馬遣侍衛烏丹傳諭曰爾向有賢聲與他人不同且福建邊疆重地海氛未靖爾其益加勉勵副朕委任初福建總督駐漳州至是將撤靖南藩屬還東特命移駐福州承謨奏攜其家屬賜蒙古壯勇八十餘人以行甫抵任聞逆藩吳三桂反承謨察耿精忠有異志綜計督標兵少又與精忠所部習不足恃乃疏言閩省經制兵自康熙八年依部議裁汰已及三千餘名尙應裁二千五百餘名見在兵單汎廣請暫停裁汰遇缺以投誠人充補又請巡行海濱酌寬邊界令民開墾分遣鎮兵屯糧隙地以裕軍餉疏上未及行精忠已叛先佯言海寇至邀承謨議事巡撫劉秉政陰附精忠促承謨行承謨知有變左右請擐甲以從承謨曰衆寡不敵備無益也乃坦然按轡至則逆衆蜂屯露刃承謨挺身前抗辭罵賊精忠困以桎梏閉之隘室晝夜防伺甚密使毋死承謨罵不絕口一日精忠遣秉政說之降承謨奮足蹴秉政仆地叱左右掖出曰賊誅戮將不遠茲先捱其魄矣爲賊困踰二年冠賜冠衣辭毋時衣每朔望奉時憲書一冊懸之北面跪拜閒爲詩文以桴炭畫壁上當承謨甫爲賊困時部曲有

張福建者手雙刀奮呼奪門連斃賊人力竭被執死又蒙古人嘛尼爲僞散騎郎精忠遣之守承謨感承謨忠義謀使出走事洩精忠將磔之嘛尼大言曰吾寧與忠臣俱死不願與爾逆賊同生及大兵破仙霞關精忠將降節辭冀免死忌承謨暴其罪惡夜遣逆黨偪承謨就縊幕賓無錫嵇永仁會稽王龍光華亭沈天成從弟承譜及親屬家丁隸卒五十三人並遇害賊移屍焚諸野泰寧騎兵許鼎乘夜負承謨燼骸藏之明年櫬還京上遣內大臣侍衛奠酒福建巡撫楊熙疏列精忠叛後死事諸臣爲承謨請優卹總督卽廷相復專疏言承謨於康熙十三年三月精忠邀以會商公事脅之從逆承謨憤怒不屈遂遭羈繫至十五年九月十六夜半精忠遣人縊之承謨猶言主恩未報整衣冠叩首然後就縊親屬幕賓及隨從諸人盡被賊縊死閩人追思其任總督時多愛民惠政聞遭慘變每酸心掩泣言之其純忠勁節久而愈堅富貴榮利不能動其心妻子昆弟不足縈其慮視倉卒遇變激烈捐軀者更未易多得乞敕部優加贈諡卹廕並於閩省立祠褒示以慰人心詔所司優議贈兵部尙書加太子少保廕一子入監賜祭葬如典禮諡忠貞御書碑文賜其家三十四年福建巡撫卞永譽以士民籲建專祠於福州入奏御

書忠貞炳日以額其祠四十七年承謨子時崇官廣東巡撫復疏述前福建督撫爲嵇永仁等請贈部臣以生員無贈銜例寢議乞特敕追贈入祠於是贈嵇永仁王龍光沈天成范承譜國子監助教學正有差並從祀承謨祠世宗憲皇帝時以承謨與嵇永仁等入祀昭忠祠承謨所著有吾廬彙浙閩奏議百苦吟畫壁集聖祖仁皇帝又嘗允時崇請御製承謨畫壁集序曰朕惟帝王教化首重名節所以維繫人心扶樹綱紀也古人臣以身事主守土膺疆或遇螫賊潛生豺狼勃起則捐軀矢志取義成仁而其激烈慷慨之氣聞發爲文辭雖質直無華後世論錄終有不可泯滅者以其出於忠義之誠本乎性情之正也福建總督范承謨名臣之子授節閩海方值敵豎盜兵偏隅煽燄籌略未展橫罹幽繫閱三寒暑貞操彌堅改其嶢然不滓之志縈紆鬱屈無所摠露乃以牆壁爲書箋以桴薪爲筆墨題分甲乙字辨衡從日月既深篇章漸積名曰畫壁記實也卒能終始不撓歸於正命若承謨者可謂冒白刃而不疑守丹心而自信者矣夫以茹荼含藥之餘每念不忘君父故詩文不必盡合於古之作者而浩然之氣流行充溢當其胸填聲咽髮植風生土塊灰丸同於利劍禿毫斷梗等比霜矛寫忠孝之性靈奪姦凶之殘魄

是又豈刻雕藻繪塗飾虛浮者之所能及乎自三逆既滅寰宇謐寧卹典頻加恩綸屢降固已延賞後昆光賁泉壤矣茲特允其子時崇所請復爲序其存藁蓋善善從長春秋之義弁章特錫數出非常庶幾追妥忠魂亦以風厲臣節焉

馬雄鎮

馬雄鎮漢軍鑲紅旗人總督鳴佩子也順治十三年由廕生授工部副理事官累遷宗人府啟心郎都察院左僉都御史國史院學士康熙八年授山西巡撫未之任改廣西巡撫時左江奸民楊其清等妖言煽衆謀不軌右江妖僧假明宗室爲亂羣盜莫扶化等結獍蠻掠梧州平樂二府雄鎮悉討平之疏請定邊俸升遷之例除兵糧運費之徵皆得旨允行十二年逆藩吳三桂反明年二月廣西駐防將軍孫延齡叛應之殺都統王永年等刼巡撫廨署時巡撫無標兵雄鎮督家人拒戰移檄梧州趣提督馬雄率兵赴援雄遷延不至而延齡脅降甚急雄鎮自經爲家人救免卽以蠟丸馳疏請兵延齡偵知繫雄鎮及家屬四十餘人於別室絕食數日不死吳三桂遣使招之雄鎮麾其使誓不屈先是慶陽知府傅宏烈以豫發吳三桂逆謀坐誣謫戍蒼梧至是勸延齡反正延齡躊躇未決雄鎮遣其子世濟

世永孫國楨先後由閒道歸京師復疏言廣西人心不甘從逆若大軍速至可圖恢復廣西既復則三桂腹背受敵矣十六年十月三桂遣從孫世琮殺延齡擁雄鎮至賊壘誘降雄鎮大呼曰吾奉命巡撫廣西義守封疆恨不能斬汝首以報國今討賊不遂死吾分也賊戕其幼子世洪世泰以懼之雄鎮罵益厲遂遇害從者馬雲皋唐進寶等九人咸引頸受刃時雄鎮年四十有四妻李氏妾顧氏劉氏女二及世濟妻董氏妾苗氏同日自縊死幕客孫成陳文煥乘閒脫走由平樂達蒼梧以雄鎮所著擊笏樓遺藁及彙草辨疑歸之世濟明年傅宏烈爲廣西巡撫疏述其事聖祖仁皇帝嘉雄鎮忠烈下所司議卹方雄鎮之遣世濟行也全州人易友亮實導之出及世永國楨之行年俱幼賊伺之甚密友亮復以州人唐守道唐正發謀穴垣出之雄鎮既遇害友亮收其骸骨藁葬焉至是世濟恩授大理寺少卿易友亮唐守道唐正發授遊擊守備孫成陳文煥授同知知縣有差十八年世濟請赴廣西收父骸骨得旨馬雄鎮當逆賊叛亂之時克篤忠貞捐軀殉難其骸骨令馬世濟馳驛往取明年雄鎮喪至京師贈太子少保兵部尙書賜祭葬如典禮諡文毅廕一子入監李氏董氏各以夫品級予誥贈又允廣西巡撫郝浴請建

雙忠祠於桂林祀雄鎮及後爲逆孽吳世璠所害之巡撫傅宏烈二十一年正月宴羣臣於乾清宮以世濟爲殉難撫臣子特命至御座前賜酒時世濟官光祿寺卿旋擢副都御史累遷吏部侍郎貴州巡撫漕運總督世宗憲皇帝時以雄鎮入祀昭忠祠乾隆十六年上念雄鎮爲國效忠前此未有世職特予恩騎尉世襲罔替以其四世孫馬升基襲

高天爵吳萬福等

高天爵漢軍鑲白旗人後改隸鑲黃旗先世居鐵嶺父尙義以隨征松山杏山及太原功予二等輕車都尉世職任杭州駐防協領天爵初由廕生於順治四年任山東高苑知縣考滿遷河南信陽知州十一年以經略洪承疇薦擢湖廣長沙知府大兵進剿明桂王朱由榔天爵理餉濟軍十三年因父病假歸十六年補江西建昌知府先是廣昌縣山賊王昂傅勝幸連升周由義陳太宇蕭來信夏登選等聚黨數千時出劫掠踞羊石滴水二砦爲老巢形勢險峻官軍仰攻輒爲賊滾木礮石所損傷因罷攻招之降王昂傅勝佯就撫仍伺隙煽亂官軍擒之斃於獄餘賊益負固抗拒十八年五月天爵與巡道張永祺參將王之任議乘風雨交作漂

流樹木衝斷橋梁賊俱歸巢後分布官軍絕賊出路直擣滴水砦進攻羊石砦斬賊千餘盡毀賊巢賊傷斃及墮巖死者無算生擒幸連升周由義陳太宇蕭來信夏登選及王昂之父王尙智並斬於軍賊所掠丁口悉遣還其家巡撫張朝璘疏報十年砦賊一旦埽除由道府區畫周詳捐貲懸賞鼓勵士卒冒險奏功詔下部察敍天爵得軍功加級康熙十三年逆藩耿精忠據福建叛縱黨入江西犯建昌時天爵已遷兩淮鹽運使或勸之速行天爵曰吾守此土十六年雖受代豈可遽離遂率家丁數十人禦賊萬年橋城守副將趙印已降賊乘天爵力戰從後縛之以獻賊載送入閩再四誘降終不屈賊拘繫之越歲餘天爵與副將王進武舉胡守謙把總楊起鵬姜山等同謀遣千總徐得功出仙霞嶺請大兵入關陰結死士爲內應賊將王廷彥計之耿精忠遂以十五年九月四日遇害十九年福建巡撫楊熙疏列同日殉節諸人部議卹廕有差天爵得旨贈太僕寺卿廕一子三十五年福建巡撫卞永譽請以天爵與原任福寧總兵吳萬福福州知府王之儀邵武知府張瑞午建寧同知喻三畏邵武同知高舉侯官知縣劉嘉猷尤溪知縣李墳福州城守千總廖有功等合建一祠於省城西門外春秋致祭得旨允行四十四

年子其佩官工部員外郎爲父請扁御書蓋忱義烈以額其家祠四十六年其佩官浙江溫處道復爲父請謚賜謚忠烈雍正四年長子其位官大學士其佩官都統同奏請諭祭得旨高天爵捐軀盡忠大節可嘉高其位高其佩乃見任大學士都統大臣爲父請卹甚是著加禮部尙書銜追賜卹典七年入祀昭忠祠

希爾根子喀西泰

希爾根滿洲正黃旗人姓覺爾察氏世居長白山太宗文皇帝在藩邸時希爾根任護衛太祖高皇帝天命十一年春蒙古巴林部貝勒囊努克背盟劫掠大軍進征攻其塞囊努克挾數騎遁希爾根將追及馬蹶易馬突前擊潰敵騎太宗遂射殪囊努克自是屢從征討有功授騎都尉世職崇德元年大軍征明分克昌平寶坻順義密雲東安文安定興安肅容城安州雄縣等邑希爾根任護軍參領擊敗明太監高起潛兵擒其總兵巢丕昌又助都統譚泰設伏敗三屯營騎兵師還敵躡我後諸將護輜重先行希爾根獨以軍殿敍功超授一等輕車都尉世職二年四月隨大軍攻克明皮島九月上將行圍選從行者希爾根之父雅賴以佐領與選希爾根因已亦從行啟睿親王多爾袞乞免其父不許乃使人告都統譚泰謂

雅賴已免令珠爾堪代之及獵上以珠爾堪不宜與選詰問侍衛索尼奏曰與選者雅賴希爾根給言已見行故代以珠爾堪遂下法司鞠勘希爾根坐欺罔應革世職罷參領任得旨從寬罰鍰五年隨睿親王圍明錦州我師據山岡列營明兵來攻擊走之復敗松山援兵尋以圍錦州時擅離軍伍及言事不實論罰鍰停止敘功七年大兵入黃崖口進圍薊州明總兵白騰蛟率兵馳救希爾根逆擊破敵斬馘無算世祖章皇帝順治二年敘勳舊勞績加一雲騎尉是年隨英親王阿濟格討流賊李白成由綏德州進圍延安府賊攻鑲藍旗營希爾根擊卻其衆賊將一隻虎者恃其勇屢犯我營希爾根三戰皆捷遂至西安同前鋒統領席特庫往躡賊蹤殲賊二隊自成奔湖廣追剿至安陸府賊踞城拒希爾根與護軍統領鼇拜攻克之獲戰艦八十移師武昌擊走賊兵之截我輜重者賊於江濱集艦五百餘將東下都統譚泰督衆往取希爾根先至獲之凱旋敘功晉爵三等男世襲三年隨肅親王豪格征流賊張獻忠與護軍統領哈寧阿阿爾津蘇拜等擊敗賊黨高汝礪武大定等拒戰兵進擊獻忠於西充別趨涪州剿賊袁韜俘斬無算師還部議擊獻忠時哈寧阿被賊圍希爾根弗援妄與阿爾津蘇拜爭功應論死得旨

從寬罰贖降世職爲三等輕車都尉六年隨巽親王滿達海征大同叛鎮姜瓖希爾根圍太谷以礮破其城僞知縣李成沛僞都司吳汝器遁追斬之進克大同及長子縣渾源州朔州復招降永寧州嵐縣潞安府等城同都統漢岱攻復遼州山西平晉秩二等尋訴前鐫秩寃得旨授一等輕車都尉兼一雲騎尉三遇恩詔晉爵一等男九年擢護軍統領十年與內大臣額爾克戴青等會奏佐領敦達禮岱敏互訐事下法司鞫議削敦達禮世職並罰鍰敦達禮訟寃命覆勘得釋因論法司誤勘及會奏諸臣徧徇罪希爾根降爵三等男尋予復如故擢列內大臣更追敘戰功晉爵一等男世襲康熙十二年聖祖仁皇帝念其宣力有年詔加太子太保十三年三月授定南將軍討逆藩耿精忠師次南昌賊已陷廣信建昌撫州九月希爾根督兵圍撫州賊出城抗拒連敗之復擊走僞都督易明援兵賊待援不至棄城遁僞將軍陳昇連結土賊郭應定等犯贛州希爾根令副都統甘度海參將塞勒等禦戰陣斬僞總兵柯隆李梁追剿至龍泉縣破賊三營又攻取曹林十餘寨十四年擊敗僞將軍邵連登恢復建昌府城移師饒州剿滅餘干浮梁樂平諸邑賊衆先是上命安親王岳樂爲定遠平寇大將軍統師南昌簡親王喇布爲

揚威大將軍統師江寧至是諭趣安親王進征湖南安親王請俟希爾根殲滅饒州廣信賊寇乃規取長沙上以賊渠吳三桂早滅則江西福建之賊不剿自平趣安親王速進詔簡親王率江寧兵二千赴南昌以希爾根爲副將軍協同鎮守十五年三桂糾賊陷吉安踞之希爾根隨簡親王督師攻圍十六年賊遁城下詔簡親王鎮吉安希爾根仍駐南昌以年老召還京十八年五月卒賜祭葬以其孫尙世特襲爵希爾根之子喀西泰任護軍參領當吳三桂初反時隨前鋒統領穆占進征四川遇賊將王屏藩等於蟠龍山戰方合賊別由水道登岸來犯喀西泰力戰歿於陣

根特

根特滿洲正黃旗人姓納喇氏父達雅里國初來歸以軍功授騎都尉遞加一等輕車都尉卒以其孫達漢泰襲根特初以閒散隨貝勒阿巴泰征明至山東攻泗水縣先登還攻定州先登敍功授騎都尉兼一雲騎尉世職並賜巴圖魯號尋晉三等輕車都尉順治元年授刑部理事官五年三月隨征南大將軍譚泰征叛鎮金聲桓於江西七月大兵薄南昌圍之未下根特由城南繼蒙古兵登城拔之聲

桓中二矢死生擒其黨王得仁江西平師還擢副都統兼管佐領七年九月兩遇恩詔晉世職爲一等輕車都尉康熙十二年十一月逆藩吳三桂叛十三年正月命都統尼雅翰爲鎮南將軍與兗州副都統瑪哈達同赴安慶根特代駐兗州二月上以江西界福建廣東湖南爲三省要地命根特偕副都統席布率兵速赴南昌三月江西巡撫董衛國疏報湖南長沙失守江西袁州吉安二府與接壤請撥兵駐防得旨著根特率現駐南昌兵往相機剿禦尋命內大臣希爾根爲定南將軍帥師赴江西根特參贊軍務四月平南王尙可喜疏言吳逆遣賊二萬屯黃沙河叛鎮孫延齡欲與合請就近撥兵會剿孫逆以分賊勢諭曰根特候希爾根等兵至江西卽率所部官兵速赴廣東是月授平寇將軍會逆藩耿精忠叛於福建詔根特由廣東仍返江西六月衛國疏報叛弁柯昇勾閩賊竊據廣信諸處詔根特先定廣信再偕前鋒統領舒恕由袁州進取長沙七月兩廣總督金光祖疏報廣信梧州失守諭曰根特等率兵由袁州取長沙進廣西以襲賊後則取道廣東必致遲久其與平南王尙可喜總督金光祖提督馬雄會同酌議添撥官兵規取橫州否則固守梧江諸處相機剿禦八月卒於軍二十二年賜祭葬如例子智宏

襲世職

瓦爾喀

瓦爾喀滿洲鑲紅旗人姓完顏太宗文皇帝天聰時任前鋒校每臨陣奮勇爭先
中創不退屢得優賞崇德三年隨貝勒岳託證明由牆子嶺入邊越燕京趨山東
攻海澄克其城七年隨饒餘貝勒阿巴泰證明由黃崖口入邊轉戰至山東攻范
縣衆皆俟雲梯登城瓦爾喀以長槍鑿破城垣爲磴先登克之世祖章皇帝順治
三年隨肅親王豪格征四川屢擊敗流賊張獻忠兵斬級二十餘生擒賊哨騎十
人有護軍阿納海者爲羣賊所困攢刃將及瓦爾喀馳騎突前格殺二人援以出
五年隨副都統烏拉禪駐防大名攻剿土賊於祁州及臨潼關並多斬獲是年敘
征四川功予雲騎尉世職三遇恩詔洊晉三等輕車都尉九年授工部理事官十
三年以董修乾清宮成晉二等輕車都尉十五年奉先殿成晉一等輕車都尉十
六年署前鋒參領隨都統卓洛前鋒統領白爾赫圖等駐防雲南元江土司那嵩
既降復叛卓洛率兵進剿瓦爾喀督雲梯兵攻克元江城聖祖仁皇帝康熙元年
還京授參領兼督捕理事官五年遷駐防西安副都統七年擢西安將軍十二年

冬吳三桂反上命瓦爾喀偕副都統佛尼埒率西安官兵馳赴四川防守險隘十三年正月上聞四川巡撫羅森提督鄭蛟麟總兵譚洪吳之茂等並叛附三桂因諭瓦爾喀暨佛尼埒曰爾等久歷戎行素稱諳練朕可無西顧之憂大兵入蜀後吳逆僞屬官兵有來降附者應密爲防閑嚴設巡哨整飭營壘至綠旗已叛官兵爾等相機招撫便宜行之三月瓦爾喀至漢中聞叛賊譚洪等已踞陽平關四十餘里於野狐嶺上下及諸險隘並遣賊黨迎拒瓦爾喀部署諸將分兵三路奮擊潰野狐嶺賊隊並發其伏殲之乘勝疾趨克復陽平關四月攻復七盤關五月攻復朝天關先後奪壕毀寨擒斬賊衆萬餘獲旗幟器械無算上嘉其調度有方命事平日議叙時賊衆堅據保寧我軍距城十里鑿壕塹與相持久未下八月瓦爾喀疾卒賜祭葬如典禮諡襄敏立碑墓道十六年三月議政大臣等追論瓦爾喀進征保寧不乘賊未設備時疾進旣至復不簡精兵分守要地致賊刦掠我兵衆又不以實奏報應追奪原官及世職削諡毀碑籍其家詔免籍沒餘如議行

圖喇

圖喇滿洲正黃旗人姓舒穆祿氏世居琿春初任兵部筆帖式太宗文皇帝崇德

七年隨饒餘貝勒阿巴泰征明山東攻泗水縣流矢中目戰愈力攻新泰等城奮勇爭先世祖章皇帝順治元年隨豫親王多鐸征陝西二年復隨征江南七年擢兵部主事兩遇恩詔予騎都尉世職十二年擢兵部郎中十三年隨都統伊勒德征舟山僞伯阮思率巨艦百餘拒戰圖喇與副都統根特擊敗之阮思復糾其黨陳六御張洪德等合兵三萬餘犯我舟師圖喇與副都統柯永綦連破其軍圖喇中礮傷手足舟山既平敘功加一雲騎尉十八年山東土賊于七倡亂聖祖仁皇帝命圖喇同郎中察奇至棲霞逮鞠賊黨時于七踞棲霞之距嶠山其黨段忠續林萬鵬龐應魁高起英各擁衆數千分踞鼇山潛結棲霞城中奸黨爲內應圖喇邏獲賊諜二人詰之盡得賊情適靖東將軍濟什哈率師抵萊陽圖喇遣使約濟什哈調綠旗兵七百疾馳至棲霞獲城中從賊者三百餘人遂趨鼇山忠續萬鵬等聞風遁擒賊黨六十餘獲牲畜以數百計尋偕察奇還京擢大理寺少卿康熙二年五月授駐防杭州副都統十月同總督趙廷臣至定海招降海敵鄭錦之僞靜波將軍阮美及僞官一百二十餘員兵二千九百餘名七年擢杭州將軍十三年三月逆藩耿精忠叛圖喇奉詔與總督李之芳提督塞白理率滿漢官兵相機

防剿尋以都統賚塔爲平南將軍赴衢州禦敵命圖喇駐守杭州兼防海疆六月疏言杭州兵少請增兵協守詔移江南綠旗兵五千駐杭州又疏請杭州增設防禦每旗各一員下部議如所請尋以病還京十月卒賜祭葬如例子明德襲職

莽依圖

莽依圖滿洲鑲白旗人姓兆佳氏父武達禪太宗文皇帝崇德三年隨睿親王多爾袞征明攻直隸任邱山東濟陽並先登賜號巴圖魯予騎都尉加一雲騎尉世職任太原城守尉世祖章皇帝順治七年武達禪卒莽依圖襲職兩遇恩詔晉世職至三等輕車都尉十五年隨征南將軍卓卜特征明桂王朱由榔至貴州明年自都勻進師盤江僞晉王李定國據雙河口悉衆爲三十營列象陣拒戰莽依圖率步兵衝擊破之隨大軍定雲南聖祖仁皇帝康熙二年隨靖西將軍穆哩瑪征湖廣流賊李來亨等賊據茅麓山列寨拒守莽依圖冒矢石進攻毀寨二賊大敗來亨自經死凱旋授江寧協領十三年逆藩吳三桂陷湖南莽依圖隨征南將軍尼雅翰率師進剿岳州用紅衣礮擊沈賊舟敗賊七里橋多斬馘十四年三桂遣賊將董重民結廣西叛鎮馬雄犯廣東平南王尙可喜上疏請兵詔尼雅翰率師

至廣東莽依圖以署副都統駐守肇慶十五年可喜子之信叛降三桂受僞爵倡兵作亂三桂賊將范齊韓等逼肇慶總督金光祖降賊事詳光祖傳莽依圖率所部兵突圍出且戰且走還駐江西僞將軍黃士標僞總兵王割耳糾衆犯信豐莽依圖率兵往援與城內兵奮勇夾剿所獲甚多賊遁走入山後追敗之圍遂解十六年三月實授江寧副都統時廣東尙爲賊將董重民等所踞上命莽依圖爲鎮南將軍率師恢復以副都統額赫訥署副都統穆成額參贊軍務四月自南康至南安僞將軍嚴自明以城降遂偕額赫訥穆成額率師進征南雄僞將軍宋思政僞總兵郭茂威等迎降尙之信亦擒董重民率藩屬歸順莽依圖進韶州五月疏言南安南雄韶州所屬文武官弁昔雖迫於賊勢致污僞職今旣望風款附若悉事更張恐生反側請令暫留原任綏撫殘黎上特允所請且諭獎其進兵迅速六月命翰林院侍讀學士顧八代赴軍前傳諭飭剿逆賊擇便而行時賊將胡國柱馬寶糾賊萬餘犯韶州莽依圖擊卻之九月賊復據河西斷我水運餉道列營蓮花山以瞰城中會將軍額楚率江寧兵至與城內軍夾攻破其四營斬獲甚衆賊敗竄帽峰山我軍乘夜追擊大敗之河西賊亦遁水運遂通十月追擊至樂昌賊

據風門澳拒守我軍三路仰攻別令瑤兵由間道奮擊擒斬賊二千餘乃撫定仁化仍回駐韶州疏言將軍傅宏烈以五千兵獨當西路恐力不支已遣副都統額赫訥赴梧州協剿得旨賊犯韶州將軍莽依圖同額楚夾剿既大敗賊衆復追剿仁化諸縣指顧悉定可謂智勇兼擅凡爲將者統兵滅賊底定疆圉不必一一拱候中旨惟應機適變盡乃心力斯克副委任莽依圖當逆賊甫遁卽遣副都統額赫訥等往援粵西深可嘉尙十七年正月三桂遣其孫吳世琮陷桂林馬寶亦由宜章陷平樂上命莽依圖赴廣西與傅宏烈會師剿賊二月疏言臣抵平樂園其城賊水陸拒阻宏烈所率綠旗兵與戰不勝臣派軍難以久留因退駐中山鎮宏烈亦以莽依圖所率滿洲兵不相應援入奏上念擊賊失利因江水泛漲並免罪諭令和衷協剿逆賊莽依圖尋以賊逼賀縣回梧州乞罷將軍任上切責之仍留任圖功贖罪明年二月吳世琮犯梧州莽依圖同傅宏烈率師拒戰大敗棄營遁先是僞將軍馬承蔭以南寧降至是賊由梧州敗竄糾衆犯南寧六月城中食盡旦夕且陷莽依圖方臥病聞之督師倍道援剿賊悉銳聚新村列鹿角西山拒戰額楚額赫訥引前鋒兵擊之賊稍卻莽依圖與將軍舒恕麾大軍進而預遣左翼

兵潛出山後截賊歸路盡殪之吳世琮負重傷以數十騎越山遁南寧圍解上以廣西底定命進取雲貴九月莽依圖以馬承蔭雖降心懷叵測恐爲肘腋患上言湖南大兵在武岡禦賊臣等一軍先向雲南恐諸路兵不相應援且廣西新定若無兵駐守恐有他虞請暫駐南寧相機進剿上命簡親王喇布鎮桂林莽依圖俟都統希福兵至取路恢復疆土十九年四月授護軍統領五月馬承蔭叛於柳州莽依圖率師進剿次來賓承蔭驅象陣迎戰我軍以勁弩射象回奔賊陣亂乘勝力戰賊大敗棄甲走莽依圖自率輕騎追擊獲象三斬賊甚衆會簡親王與總督金光祖分路剿賊並捷承蔭復降柳州平八月莽依圖卒於軍年四十有七二十二年三月議政王大臣等追論莽依圖征廣西時自平樂退梧州應坐失機籍家產半革去恩詔所得騎都尉上曰莽依圖在行間頗有勞績且屬下兵民俱稱其善凡所過地方亦不擾害百姓可免籍沒削去恩詔所加世職其原襲之騎都尉又一雲騎尉以其子博和哩襲五十九年入祀廣西名宦世宗憲皇帝雍正十年入祀賢良祠乾隆元年追諡襄壯

畢力克圖

畢方克圖姓博爾濟吉特氏世居科爾沁太宗文皇帝時來歸隸蒙古正藍旗任
豫親王多鐸護衛隨征朝鮮及明錦州屢有斬獲世祖章皇帝順治元年隨豫親
王追剿流賊李自成於潼關明年定西安移師由河南進拔揚州下江寧畢力克
圖署護軍參領所至克敵有功四年授騎都尉世職六年擢正藍旗蒙古副都統
時大同總兵姜瓖叛畢力克圖奉命率兵駐防平陽偕巴圖魯羅多渾剿太平縣
賊遇賊黨郭中傑引賊衆寇絳州擊敗之又敗賊騎千餘於張湖村七年同西安
協領根特等率師圍太平城賊負固抗拒逾二旬不下乃因城壕掘地道燃火藥
以墮其城師入叛賊李建泰及賊黨俱伏誅八年正月兼任禮部左侍郎屢遇恩
詔晉世職至一等輕車都尉十年四月調戶部左侍郎十一年六月隨靖南將軍
朱瑪喇征廣東時流賊張獻忠餘黨李定國附明桂王朱由榔由廣西犯廣東踞
新會縣左之山峪畢力克圖同護軍統領敦拜擊潰其衆復與副都統鄂拜護軍
統領賴塔攻剿賊巢賊敗竄溺水死者無算乘勝追至興業縣遇僞都督吳三省
僞總兵楊成王三才等率步賊千拒戰殺過半進抵橫州定國渡江遠竄凱旋敘
功晉爵三等男十三年以員外郎朱世德司權河西務虧缺稅銀戶部誤援恩詔

赦免部臣俱坐降革畢力克圖罷侍郎任降世職爲二等輕車都尉十七年雲南既平朱由榔竄緬甸李定國與其黨白文選等分踞孟艮木邦上命內大臣公愛星阿爲定西將軍畢力克圖署護軍統領率師赴雲南同平西王吳三桂相機征剿十八年十一月會師木邦定國先奔景線文選遁據錫箔江濱聞我兵至毀橋遁畢力克圖與前鋒統領白爾赫圖等先至江岸獲其謀者大軍結筏渡江越十日次奮挽坡距緬城六十里緬人謀擒獻由榔請大將軍留駐以百人進蘭鳩江濱爲扞衛於是白爾赫圖率前鋒邁往畢力克圖率護軍二百隨其後緬人以由榔獻乃旋軍時白文選爲總兵馬寧等追及於猛養率衆降畢力克圖撫其衆移入邊境聖祖仁皇帝康熙三年敍功晉世職爲一等輕車都尉兼一雲騎尉八年擢正藍旗蒙古都統列議政大臣十二年五月詔以畢力克圖屢從征伐著有勞績加太子少師十四年三月授平逆將軍時叛鎮王輔臣附逆藩吳三桂作亂踞平涼肆掠陝西郡邑上命畢力克圖帥師駐大同尋延安綏德皆陷賊諭進駐榆林畢力克圖既帥師移駐偵知賊衆三千餘屯楊家店渡口乃分兵三隊乘夜疾進黎明鳴角渡河賊不虞我師之至也悉驚駭潰竄遂復吳堡縣城進師虎爾崖

口遇賊衆復擊敗之僞遊擊黃文英僞總兵朱龍俱遁綏德平進征延安賊將李士英等棄城遁畢力克圖令副都統覺和託率兵追擊至宜川俘斬無算自駐延安城招撫附近城邑保安安塞宜川延長安定諸縣皆復奉命移師會揚威將軍阿密達征平涼將至王輔臣驅賊萬餘迎戰畢力克圖督兵合擊陣斬僞總兵郝天祥及賊衆無算距城數里駐營十五年上遣大學士圖海爲撫遠大將軍征平涼命畢力克圖率所部前鋒赴寧夏統轄滿洲蒙古兵防剿圖海至平涼王輔臣降畢力克圖還駐平涼十七年移兵守隴州寶雞諸路賊倚仰天池高山爲巢畢力克圖進兵剿除招降靈臺華亭崇信等縣及僞參將李天秀等三十一員兵三千餘賊復據寶雞縣之蟠龍山分三隊來犯又僞副將胡長骸踞顯義三關山坡列陣拒戰畢力克圖以兵兩路合擊大敗賊衆十八年上以畢力克圖出師日久年已衰邁召還京先是圖海議分兵四路取漢中興安令畢力克圖同提督孫思克恢復略陽至是已進征圖海以奏上命俟漢中興安恢復撤回畢力克圖先取成縣招降僞副將王光生等十九員兵三百六十餘名會提督趙良棟已復略陽與將軍王進寶並定漢中圖海亦定興安遂班師十九年還朝仍任都統二十年

六月卒年七十有三予祭葬諡恪僖孫常遠襲職二十五年追敘陝西軍功晉二等男世襲

額楚

額楚滿洲鑲黃旗人先世居薩哈勒察姓烏扎拉氏世祖章皇帝順治二年內大臣何洛會統師駐防西安道經河南明總兵劉洪起既降復叛據西平縣城何洛會督兵樹雲梯攻剿護軍昂海先登額楚繼之遂克其城敘功予雲騎尉世職尋授佐領屢遇恩詔晉世職至三等輕車都尉十五年從大軍取貴州明年凱旋隨副都統噶楚哈瑪爾賽至荆門州聞海敵鄭成功犯江寧由大江趨援噶楚哈令額楚爲鑲黃旗營總統江寧駐防兵擊敗敵衆敘功晉世職二等輕車都尉尋授駐防江寧協領擢副都統聖祖仁皇帝康熙七年授江寧將軍十三年逆藩耿精忠叛應吳三桂遣賊將由福建陷江西廣信建昌饒州等府徽州及婺源績溪等縣俱從逆額楚奉詔同署副都統宗室巴爾堪率兵往剿逆賊萬餘於績溪縣西北迎戰額楚督兵奮擊陣斬僞副將一及賊衆三千餘擒從逆把總劉成功斬之復績溪遂復徽州府城賊將踞休寧縣之新嶺倚險立寨額楚分步兵左右擊騎

兵由中路進攻破鹿角毀木柵斬賊五百餘乘勝進剿至婺源賊皆潰遁婺源亦復額楚奉詔征饒州擊賊於樂平縣之段家村斬二千餘級進薄樂平東門前鋒參領巴特瑪樹雲梯登城賊兵五百餘由西南二門出遁額楚遣兵追襲擒斬過半進次鄱陽縣大磯莊賊由雲梯髻峰下來犯額楚遣巴特瑪等列陣奮戰賊敗潰從逆饒州參將陳九傑時爲僞都督棄城遁入鄱陽湖額楚撫定城中人民賊旋由湖中駕船三百來犯額楚督兵射殪三百餘賊以礮擊毀賊十餘船餘賊俱竄遁十四年四月額楚率兵剿賊萬年縣至石頭街渡口遠望隔岸分布賊營十數處賊船二百餘橫踞渡口額楚令步兵直趨渡口集戰艦發槍礮密令騎兵乘夜由上流潛渡繞出賊營後水陸夾擊殪賊數十盡獲賊船陳九傑就擒伏誅餘賊棄城遁賊之在安仁者皆乘船遁我兵追及之賊以風逆泊船拒戰旋自焚其船棄資械奔竄萬年安仁二縣悉平五月剿賊弋陽賊將蔣得輅等率賊五萬於城北樹木柵十有五又以五千餘賊分踞西岡橋額楚分兵爲二攻毀木柵奪取西岡橋賊卻入城我兵登城克之擒斬僞遊擊張三奇僞都司張明德胡中申等先後擊斬及溺水死者二萬餘賊十五年簡親王喇布自江寧移師南昌額楚奉

詔參贊軍務吳三桂賊將高大傑等突陷吉安踞之額楚同將軍哈勒哈齊率兵攻克外城與賊相持賊將馬寶韓大任引賊數萬來援額楚迎戰於螺子山等處屢失利會安親王岳樂自袁州進征湖南圍長沙馬寶聞急趨救吉安賊衆食盡乘夜出南門奔逸上遣侍郎班第察奏螺子山戰敗罪以額楚不能舉發首先敗走之人又賊遁不行追擊罪無可諉應罷任革世職命以世職仍領江寧兵立功贖罪率兵赴廣東十六年九月賊將胡國柱馬寶率賊萬餘犯韶州額楚師次蓮花山賊偪營額楚督兵禦擊會將軍莽依圖自城中出兵夾擊大敗賊賊由帽峰山遁追擊至樂昌仁化詔莽依圖進駐梧州額楚駐韶州十二月諭曰韶州地屬緊要一切軍務額楚若啟簡親王轉奏恐多遲誤其令額楚以江寧將軍印統轄兵馬事許專奏十七年詔同都統勒貝率兵進駐梧州參贊莽依圖軍務時廣東總兵祖澤清復叛自高州勾結山海諸賊犯電白額楚奉詔會剿擊卻賊衆進駐藤縣遇大疫士馬多病斃額楚以聞命別擇要地移駐額楚旋疏言吳逆踞鬱林融縣潯州聲言三路來犯藤縣軍營未可動移但士馬缺乏應請增遣以備剿禦上命其仍駐藤縣諭將軍舒恕於南雄韶州兵內擇有馬者發額楚軍未至賊犯

藤縣額楚同巡撫傅宏烈率兵禦擊失利退保梧州賊陷藤縣十八年二月賊將吳世琮犯梧州額楚同莽依圖傅宏烈擊卻之賊併力犯南寧城中食盡時降鎮馬承蔭守南寧遣人告急額楚與莽依圖舒恕勒貝分兵四路趨援擊賊於新村西山之巔斬殪無算世琮負創奔逸南寧圍解額楚駐守永淳十九年六月額楚奉詔還江寧二十年十月卒於任以兄子格克里之次子富努保襲二等輕車都尉世職富努保尋卒以格克里長子法保襲初格克里於康熙十四年以六品從大軍征廣東剿叛鎮馬雄僞將軍董重民等於電白縣戰歿於陣二十五年議卹予雲騎尉世職以法保併襲合已襲之職爲一等輕車都尉

莫洛

莫洛姓伊爾根覺羅氏世居呼納赫魯祖溫察太祖高皇帝時來歸後隸滿洲正紅旗世祖章皇帝順治七年莫洛任刑部理事官尋改工部主事累遷郎中聖祖仁皇帝康熙六年擢副都御史七年出爲山西陝西總督時陝西災旱頻仍平涼臨洮鞏昌西安延安鳳翔漢中七府及興安一州荒地逃丁額賦無徵者有司率令現存之戶均輸民甚苦之莫洛旣至疏請豁免上從所請八年輔政大臣鼈拜

結黨專權獲罪法司以莫洛素附鼂拜請逮問諭曰莫洛爲鼂拜黨羽應逮問念其任事封疆釐剔加派火耗等弊姑從寬免罪仍留原任九年遇計典吏部遵例甄別各督撫功過以莫洛向曾植黨營私奏聞得旨革職西安士庶聞之相率哀籲懇留甘肅巡撫劉斗同提督張勇柏永馥總兵孫思克等奏言莫洛莅任以來清以持己正以率下如革耗羨整驛遞息詞訟練士卒清荒熟教樹畜興水利善政難以枚舉乞留任以慰民望上曰簡用督撫原欲綏輯地方愛養百姓莫洛旣爲民愛戴特順輿情免其處分供職如故未幾擢刑部尙書十三年二月上旣分命王貝勒大臣等討逆藩吳三桂並諭部臣曰吳逆煽亂滇黔四川從逆陝西爲邊陲要地西控番回南通巴蜀幅員遼闊素號巖疆非特遣重臣假以便宜未易綏靖莫洛前任總督深得民心茲特授爲經略駐劄西安軍事悉聽調遣復加銜武英殿大學士仍以刑部尙書管兵部尙書事賜以敕印莫洛至西安策遣諸軍進征五月詔諭莫洛曰朕聞叛鎮鄭蛟麟乞降又聞克復朝天關喜慰殊深頃賊蜂聚岳州值雨甚大兵難行稍俟晴霽卽水陸並進吳三桂果在澧州宜乘虛徑襲其後如克復四川可取道交水以定貴州或徑趨雲南其餘諸將集議尋奏逆

賊堅據保寧川地未能猝復容俟奏捷卽行相機進取并奏防禦關隘輓運軍食
機宜諭曰朝天關諸隘關係要害可於滿洲漢軍綠旗官兵內酌撥防守相爲犄
角護送糧艘不爲無助至漢中雖已駐兵猶恐力單且朝天關之外尙有別路可
通漢中倘我兵深入後奸宄竊發據守鷄頭關諸隘亦屬可虞一切機宜其酌行
之又保寧未能卽復則我師益致勞頓輓運糧餉實爲要務其源源接濟毋令匱
乏六月疏報僞副將姚孟龍等繳扎投誠時賊衆負固竊踞廣元所屬百丈關莫
洛旣遣都統馬一寶將軍席卜臣赴漢中副都統科爾寬赴廣元又慮廣元兵寡
不敵賊衆令副都統吳國正俟馬一寶至卽移師助之七月上命貝勒洞鄂偕貝
子溫齊輔國公綽克托率貝子準塔所部驍騎校赴四川莫洛疏陳大兵久駐保
寧與賊相持秦民運餉勞苦臣今親赴漢中酌量分路進剿貝勒洞鄂若率衆盡
行慮致遲滯請敕簡精銳先發速至西安上念貝勒所部無多仍令貝子公等亦
各率所部進發會西安將軍瓦爾喀奏川鎮王懷忠標兵因糧匱逃散請發餉增
兵救援諭莫洛曰大兵或仍圍守保寧或因糧運艱難暫還廣元其與將軍等酌
之並命寬王懷忠標兵罪速行撫納八月莫洛復疏述陝省兵單請增兵以資戰

守上以增兵必須增餉或不煩增兵或必議增兵或不必親行赴川令詳悉覆奏莫洛言增兵則秦兵得以保固迨四川底定則糧餉有資而秦民亦得休息臣仍宜親統官兵進剿四川上從之九月莫洛將由秦赴蜀請敕總督周有德巡撫張德地暨科爾寬等固守朝天關廣元諸路轉運糗糧並請敕將軍等駐守保寧以待兵至諭曰軍機緩急莫洛自有確見可與將軍席卜臣前往廣元進取昭化總督周有德等於經略未到之先督趣糧米運送軍前又廣元兵少或令席卜臣先赴廣元秣馬以待或與經略同發俱令莫洛酌行十月僞將軍何德成等糾合潰衆分路自四川來犯寧羌先立營於文廟山官兵夜襲賊營賊衆大敗遁回南山上諭莫洛曰寧羌爲大兵後路爾其速援庶幾有濟莫洛因賊已遁敗令提督王輔臣遣兵駐守寧羌十一月貝勒貝子等大兵未至僞總兵彭時亨等復屯踞七盤朝天諸關劫奪略陽糧艘廣元兵缺餉者兩月賊衆旋復窺伺陽平上慮莫洛所統皆綠旗兵巴蜀山路險惡滿洲大兵若不相繼難於策應因敕貝勒洞鄂等兼程而進會同經略進川是月莫洛遂帥兵由漢中赴蜀令提督王輔臣隨征先是莫洛甫至陝有詔調陝西兵征湖南輔臣自請率兵赴荊州上以調征湖南兵

已有貝勒尙書貝子準塔等統領因命輔臣仍駐平涼聽莫洛調遣輔臣心怏怏至是莫洛調之隨征輔臣遂懷叛志佯言部兵少請增撥莫洛給以騎兵二千輔臣少之又以所給馬疲瘠不任用爲詞搖惑衆心遂謀作亂十二月莫洛行次寧羌州駐營王輔臣標兵猝亂襲刼經略營莫洛率兵擊卻之甫定王輔臣忽率叛卒來犯礮矢齊發莫洛被重創歿於軍二十二年十月賜祭葬如典禮諡忠愍予世職騎都尉兼一雲騎尉以其子常安襲

陳福

陳福陝西榆林人先是居江寧父德明爲明榆林副將與流賊李自成戰歿於陣福葬之榆林遂家焉世祖章皇帝順治二年大兵定陝西福應募隸寧夏總兵劉芳名標下爲把總隨征叛賊賀珍武大定王元馬德等有功擢守備尋調隨都統李國翰剿滅趙榮貴王永強牛化麟高友才諸賊進征四川授遵義遊擊率兵攻克忠州賊寨擒斬僞總兵陳貴榮高鶴鳴等敘功加參將銜聖祖仁皇帝康熙二年隨四川總督李國英剿滅自成遺黨劉二虎郝搖旗李來亨袁宗第等於茅麓山加右都督銜尋擢成都副將署重慶總兵十二年召入覲賜鞍馬授寧夏總兵

時逆藩吳三桂反遣其黨王屏藩等犯四川四川提督鄭蛟麟總兵吳之茂皆叛應之福妻子在夔州爲賊所阻十三年蛟麟等以書誘福福執賊使遣其弟生員陳壽馳奏上嘉福忠貞予騎都尉世職授陳壽爲刑部主事未幾陝西提督王輔臣叛於寧羌據平涼固原道陳彭定邊副將朱龍皆以城叛福分飭所屬防剿疏陳其略諭獎以殫心籌畫十四年三月上諭部臣曰寧夏總兵官陳福效力巖疆勞績素著屢舉首逆札克篤忠貞且其妻子家屬現在蜀中逆賊挾誘福全無顧戀矢志不移深足嘉尙著陞補陝西提督仍暫駐寧夏管轄鎮兵其弟守備陳奇妻子亦陷賊中殊爲可憫著從優以參將陞用旋復以補舉首王屏藩逆札下部優敘晉爵三等男是時王輔臣陳彭朱龍受吳三桂總管巡撫總兵等僞職糾黨四出脅誘花馬池及惠安安定諸堡並爲所陷遂掠興武營福遣兵擊卻賊衆連復惠安安定諸堡自率兵圍花馬池擒斬僞都司王一龍等招降脅從之衆聞陳彭犯靈州遣遊擊熊飛擊之遁擒斬僞參將馬騰蛟等福率兵復輒坪安邊兩堡進圍定邊城掘壕築臺以困之先是朱龍不虞我軍至以僞副將倪光德守城而自出掠綏德至是知圍急引還福設伏沙家澗殲賊無算生擒朱龍城中人驚懼

逐倪光德出降福斬龍及光德以徇移檄招撫下馬關僞參將李訓縛僞總兵陳江詣軍門歸順陳江者初以海賊投誠授陝西督標副將經略莫洛攜以隨征王輔臣既害莫洛江從逆分踞下馬關福招之不應及是就縛乃數其罪而誅之旋偕副將泰必圖剿賊平遠所斬僞參將陳起元等復其城上嘉福勞績茂著優擢其弟壽爲鴻臚寺少卿福既復平遠所僭泰必圖乘勝剿賊直薄固原城圍之逾月王輔臣遣賊將自平涼來犯城中賊聞有外援亦突出抗拒副將賈從哲遊擊張元經卻走泰必圖戰歿於陣福收兵還靈州請旨斬從哲元經於軍旋奉詔以固原賊衆恃平涼之賊應援或先助貝勒洞鄂攻取平涼緩圖固原宜相機以行福奏固原有賊萬餘若我兵經趨平涼恐賊斷我餉道請先取固原以遏賊勢上允其請十二月福率寧夏兵征固原時王輔臣陳彭爲緩兵計潛分布奸黨虛張賊勢以搖惑我軍值歲暮冰雪寧夏兵不樂遠涉且以前此圍固原失利爲戒軍次惠安堡夜半衆呼譟欲劫福退師福出帳以大義曉諭猝遇害隨征諸將各收所部還本營事聞上命天津總兵趙良棟爲寧夏提督察其事廉知平羅營把總劉德倡議退師參將熊虎與其謀而營兵閻國賢陳進忠實戕害福四人並伏誅

諭嘉福爲國捐軀忠誠顯著擢其弟涿州參將陳奇爲天津總兵優贈福爲三等公賜祭葬如典禮諡忠愍以三等子爵予襲九次子世琳世勳久陷賊中復爲賊自夔州掠至遵義部議以陳壽之子世怡暫襲十九年陳壽自請隨大軍入蜀訪其家得之遵義攜至京命世琳襲爵入籍寧夏尋授直隸三屯營副將遷古北鎮總兵復遷鑾儀衛鑾儀使雍正八年以福入祀昭忠祠世琳卒子益襲官至雲南楚姚鎮總兵乾隆三十二年上念福致命疆場克紹義烈命予子爵襲次滿時再予恩騎尉世襲罔替益卒子大用襲任江南提督

傅宏烈

傅宏烈江西進賢人明末流寓廣西世祖章皇帝順治十四年兩廣總督王國光疏薦授廣東韶州府同知聖祖仁皇帝康熙二年遷甘肅慶陽府知府七年以訐告平西王吳三桂陰謀不軌革職逮繫論斬九年詔減辟徙梧州十二年冬吳三桂反廣西將軍孫延齡提督馬雄叛應之宏烈招集驍健陽附三桂受僞職爲信勝將軍而密約平南王尙可喜共圖恢復十六年正月遣人至贛州致書鎮南將軍覺羅舒恕言定南王女孔四貞不忘國恩孫延齡可招撫狀又致書督捕理事

官麻勒吉言大兵若速進南安宏烈從韶州策應則兩粵可定舒恕麻勒吉先後陳奏上嘉宏烈忠誠授廣西巡撫宏烈聞命疏言逆賊吳三桂陰險小人蓄謀不軌臣自康熙六年知之七年發覺其概審事諸臣惟恐激變凡涉三桂口供一字不錄臣憤激願死自認其罪蒙皇上特恩免死出獄安置嗣聞三桂反臣罪廢梧州計無可展廣西布政使李迎春梧州知府楊彥溶等降賊苦勸臣從臣憤不欲生自投江水願爲厲鬼殺賊漂流十里遇救不死仍赴梧州佇待一年因思不入虎穴焉得虎子乃投身賊地從中反間又假他事赴南寧遂入思州泗城廣南富川諸土司及交趾界聯絡義勇助平南王尙可喜軍可喜病篤猶執手相勸速復肇慶遂與其子之信合謀討賊擊敗僞將軍楊鎮邦僞總兵古元隆金朝相袁茂明等乃得由龍南達贛州歸命朝廷以展夙志吳三桂昨聞規復肇慶卽百計欲殺臣而終不得遂計者隨臣義勇五千人實賴其力請留爲援剿營進征廣西並請敕尙之信遣兵合剿上悉允所請加授撫蠻滅寇大將軍時宏烈已率兵擊敗賊衆於韶州擒斬僞總兵王雲龍僞遊擊何嘉會等遂進征廣西擊走僞將軍趙天元復梧州分遣總兵曾大熾參將周光裕李士龍等攻復昭平賀縣又招降鬱

林州博白北流陸川興業等縣賊衆復犯梧州宏烈遣總兵楊國泰等水陸夾擊陣斬僞總兵張元乘勝復潯州府遣平樂知府劉曉齋疏縷陳進剿機宜上諭吏兵二部曰將軍傅宏烈謀略優長忠貞夙篤自簡任以來實心爲國宣力邊疆親統官兵進取粵西恢復梧潯等處屢奏捷功勞績茂著今覽所奏進剿機宜籌畫詳密矢志滅賊據忠效謀深可嘉尙著加太子太保所屬官員同心報國效力行間深爲勞苦各加職銜一級其代奏知府劉曉立有軍功諳悉形勢敷奏詳明亦屬可嘉著加參議道職銜方馬雄之甫叛也宏烈家屬百餘人盡陷賊中爲叛賊李迎春執送吳三桂與總兵楊國泰及諸將士家屬並遇害至是宏烈以聞諭獎其爲國忘家遇害家屬敕所司優卹時叛鎮馬雄踞柳州吳三桂諸賊分踞平樂南寧橫州勢猖甚宏烈欲借尙之信兵力共取平樂乘孫延齡已謀歸順赴桂林駐守屢請旨趣之信遣兵繼進之信以防守廣東爲說宏烈向借大礮及營馬皆弗應吳三桂知孫延齡不附已遣其從孫吳世琮與賊將馬寶李廷棟陶志貴趙天元擁賊數萬掠桂林給孫延齡出城殺之遂陷平樂伺宏烈赴南寧招撫土司襲梧州宏烈移師擊斬賊乃遁十七年二月與將軍莽依圖進圍平樂賊水陸拒

阻我兵失利退保中山鎮莽依圖奏宏烈所率兵先卻江水泛漲孤軍難以久留
宏烈奏莽依圖所率兵不相應援仍自請議罪論曰江水泛漲大軍不能相援賊
衆我寡以致失利免議罪莽依圖與傅宏烈宜同心和協謀濟國事論王大臣曰
傅宏烈所領官兵從未支領俸餉奮勇收復諸路嗣以規定滇黔請發大軍並進
因令莽依圖協力進取不意莽依圖既抵平樂借口綠旗兵失陷退至賀縣又言
糧乏退保梧州以傅宏烈恢復如許城池盡棄與賊宜嚴飭痛改前非勉圖後效
尋宏烈復奏守戰機宜奉諭曰覽所奏安人心固內地剿賊之策悉備佇看掃蕩
逆氛以副倚任四月偕都統貝勒等率兵自北流陸川博白進剿斬賊將梁子玉
等六月賊兵數萬渡左江我兵與戰失利退守藤縣十月賊併力來犯藤縣失守
遂逼梧州十八年正月宏烈自梧州分布水陸官兵乘賊來犯木城時奮力夾擊
槍礮矢石齊發殲賊二千餘遂遣總兵譚昇等收復藤縣進定平樂桂林五月疏
言臣甫至桂林舊縣孫延齡部下甲兵請糧請餉呼告盈門其野性未化養之無
益而又未可猝然解散宜仍立藩旗各色照額支餉以滿洲將軍帶甲兵一千駐
省署理藩旗俟賊平後然後撤回京師至新自賊中來降諸將各帶兵馬若不用

之則其心生異且無以鼓勵將來若用之則名器太濫不成體制宜各照僞銜給
筭令僞將軍赴部補用總兵副參遊及文職等官或願赴部或願在外將軍督撫
軍前補用悉聽自便務令得所則各僞官解散矣臣暫留本標官兵以資彈壓俟
投誠官兵安插妥當地方平定臣解組養母卽以臣標官兵交付滿洲將軍統轄
酌量汰留總之天下久安長治之策要緊城池宜照江南陝西例設滿洲賢能將
軍駐守以制反側文臣事權不宜太輕藩鎮兵權不宜太重趁此大兵在外軍威
大振之日急應善爲布置密爲解散億萬年太平之基地也又言尙之信歸正後
怙惡不悛前此臣與之交好隱忍調停欲導其爲朝廷出力未卽陳奏其在廣東
賣官虐民抄家充餉遍地起稅恣行無忌時而疏請出兵湖南時而疏請平定廣
西及至旨下則一兵不發閉門不出目中竟不知有君命臣因逆賊分犯梧州求
其借用大礮不發求其援兵不發又因孫延齡請兵緊急求其借馬兵數百相助
不發求其借空馬三百匹相助不來以致孫延齡全家受害廣西恢復遲誤至今
臣不解其是何心也今年正月奉命特加大將軍進剿廣西值湖南大捷乘機可
爲自應奮武前驅乃安駐封川不肯進兵日事狂飲臣不解其是何心也桂林官

兵歸正值逆賊四面屯聚城中絕食勢甚危急幸得征南將軍穆占自永州發兵接應賴以保全今之信行文爲將軍劉彥明等責其不應繳僞敕印劄於征南將軍臣不解其是何心也臣久知尙之信狂野性成反覆莫測故厚集兵力整飭水師以爲東西未雨之防今吳三桂已死餘孽蕩平在卽尙之信必無能爲但善後之策宜於肇慶設滿洲將軍或換滿洲總督帶領甲兵駐守彈壓削之信藩封散所屬多兵設水師提督以分其權則兩廣得以久安臣冒昧密陳乞留中採擇上並是其言以密疏示議政王大臣等酌行先是馬雄叛踞柳州病死其子承蔭仍附吳三桂爲僞懷寧公廣西大將軍至是詭言投順宏烈以其隨降兵衆驕悍成習奏請仍以承蔭統轄詔授承蔭伯爵給昭義將軍印時賊將范齊韓等尙居粵西宏烈遣遊擊鄧林材合承蔭兵剿擊復柳城融縣十一月疏言進兵雲貴多屬山險之路非可專恃馬騎必用綠旗前驅而進兵之路廣西爲要湖南次之今兩廣綠旗肯爲朝廷捨命殺賊者惟臣標官兵願進剿雲貴朝聞命而夕行者亦惟臣標官兵逆賊未滅臣不安坐現乘此時天寒水涸遣臣標中軍參將溫紹賢等挑選精兵三千五百從小路往駐古泥相機進取貴州黎平府湖南靖州斷賊楓

木嶺糧道又調馬承蔭兵四千往慶遠以分賊勢臣專候俞旨卽親帶官兵或從慶遠泗城進發或從黎平靖州進發先奪楓木嶺會合湖南大兵努力前驅矢圖報稱詔如所請行十九年二月宏烈至柳州疏言柳州兵數不下三萬逆賊百端誘惑人心不一近以乏餉鼓噪臣欲擒誅首惡恐激衆生變又費兵力只得暫爲姑容大抵此股兵馬積成驕悍必俟殺盡邊界逆賊後設法陸續解散安置現在馬承蔭兩協五營乞敕盡給糧餉先收七千人心鼓勵前征庶不爲內地變患疏上未及報聞而宏烈已爲承蔭所給登舟赴柳城會議潛伏賊黨刦之潰其營遂挾宏烈往九月至貴陽逆孽吳世璠誘以僞職宏烈罵賊不屈遂遇害十一月征南將軍穆占攻復貴陽收骸骨以聞上曰傅宏烈宣力粵西勞績茂著陷賊不屈捐軀殉難忠節可憫下所司優卹令由驛歸櫬贈太子太師蔭子入監賜祭葬如典禮諡忠毅並允廣西巡撫郝浴請建雙忠祠於桂林與前爲吳世琮所害之巡撫馬雄鎮並祀世宗憲皇帝時入祀昭忠祠子明垣由蔭生官知州

圖海

圖海滿洲正黃旗人姓馬佳氏父名穆哈達世居綏芬圖海初由筆帖式加員外

耶銜順治二年改國史院侍讀八年遷秘書院學士九年恩詔予騎都尉世職越歲授弘文院大學士列議政大臣十二年加太子太保命攝刑部尙書事明年考滿加少保十五年命同大學士巴哈納等校訂律例旋以承審江南考試作弊事遲延削加銜明年侍衛阿拉那與公額爾克戴青家奴毆於市刑部審理失實上詰問圖海不以實對下廷臣察議以其負恩溺職論死奉旨寬免削職十八年正月世祖龍馭上賓遺命起用聖祖仁皇帝御極卽於是年授正黃旗滿洲都統康熙二年七月蜀流賊郝搖旗劉體純李來亨等嘯聚湖廣鄖襄山中命爲定西將軍副靖西將軍都統穆里瑪率禁旅會楚蜀之師討之至則與總督李國英提督鄭蛟麟總兵俞奮起於大海署護軍統領根特等連營困之賊以兵三千犯奮起營圖海率兵邀擊敗之賊又連犯諸營各分兵夾擊咸潰敗未幾郝搖旗爲副都統杜敏擒斬於黃草坪劉體純相繼破滅惟李來亨擁衆據茅麓山恃險負固圖海等率兵圍之絕其聲援外則搜剿餘寇略盡賊勢窮蹙來亨闔門自經死僞公僞將軍以下僞官五百八十餘人兵八千八百餘名降執斬僞新樂王及僞官七人兵六千餘名俘其家口三千餘衆而還六年晉弘文院大學士加世職爲一等

輕車都尉會纂修世祖章皇帝實錄充總裁官七年命測儀象八年命錄刑部重囚並稱旨九年奏乞解機務專力戎行上慰留之十一年命清理刑獄十二年冬吳三桂叛十三年耿精忠亦叛聖祖以籌餉需才命攝戶部尙書十四年三月疏請敕禁外省軍需不得私派夫役不得先期拘集錢糧不得額外科斂詞訟重者速審速結小者不得濫准滋累衙蠹土豪不得魚肉善良奉旨允行是月察哈爾布爾尼刦其父阿安布柰以叛圖海奉命爲副將軍同撫遠大將軍信郡王鄂扎率師往討四月師次達祿布爾尼設伏山谷賊以兵三千人來拒我師我師進攻伏發撓我土默特兵圖海分兵迎擊賊以四百騎繼至力戰殲之布爾尼乃悉衆出用火器拒戰圖海令嚴陣以待賊敗復聚連擊大破之招撫人戶一千三百餘布爾尼僅以三十騎遁去時科爾沁額駙沙津以兵會剿遇布爾尼於扎魯特境追及斬之察哈爾平班師聖祖御南苑大紅門迎勞之敍功晉一等男十五年二月聖祖以貝勒洞鄂攻叛將王輔臣於平涼未克命圖海爲撫遠大將軍率護軍每佐領各二名赴陝總轄全省貝勒洞鄂以下咸聽節制三月至平涼明賞罰申約束軍威大振賊衆聞之懼諸將請乘勢攻城圖海曰仁義之師先招懷而後攻

伐吾奉天威討茲兇豎無慮不克顧念城中數十萬生靈無非朝廷赤子遭賊劫掠至此覆巢之下殺戮必多俟其向化歸誠以體聖主好生之德不更美乎城中軍民聞者莫不感泣咸思自拔以出賊勢由是日蹙五月奪虎山墩虎山墩者在平涼城北高數十仞賊首以精兵通西北餉道圖海曰此平涼之咽喉也得此則餉道絕城不攻而下矣卽率兵仰攻賊萬餘列火器以死拒戰圖海令兵番休迭進自己至午戰益奮斬僞總兵二人賊被殺及墜崖死者無算遂奪其墩據之俯視城中如在掌握因發大礮擊其城中洵懼輔臣乃乞降隨以其情上聞詔赦輔臣罪撫慰之六月圖海筭授七品官周昌爲參議道齋詔入城翌日輔臣遣僞布政使龍榮遇等率士民獻軍民冊又遣其子繼正等繳所受吳逆僞敕印筭然猶疑懼觀望圖海復令周昌同其兄子前鋒侍衛保定往諭輔臣乃率衆薙髮降圖海令副都統吳丹入城撫定秋毫無所犯平涼被圍日久城中食盡加以鋒鏑之餘死亡過半因令地方官賑窮乏掩骼其老弱之轉徙不能歸者遣將士分送安插遠近帖然初周昌往招輔臣時言昌母孫氏殉節死願以身報國爲母請旌因請往至是奏旌其母又奏蠲秦省被兵及轉餉各州縣賦皆從之是月

遣振武將軍佛尼勒敗賊將吳之茂於牡丹園又敗之於西和縣北山將軍穆占進攻樂門敗賊於紅崖復禮縣於是僞巡撫陳彭慶陽僞總兵周養民嘉峪關僞總兵王好問關山僞副將孔蔭雄共率僞官九百餘員兵四萬八千餘名相繼降關隴悉平八月奉上諭圖海器識老成才猷練達贊襄機務宣力累朝以文武之長才兼忠愛之至性勞績茂著克副倚任朕心深爲嘉悅於軍功議敘外應從優加恩以示朕眷注忠勤酬答勲庸至意遂晉封三等公世襲罔替時漢中興安賊猶據守平涼慶陽初定人心未寧奏請分兵防守諸隘緩攻漢興別遣一旅赴湖廣會剿吳逆奉旨令圖海親率精銳以行圖海以陝西反側未安慮有變九月疏陳其狀聖祖因授穆占爲都統佩征南將軍印率師赴楚留圖海鎮守陝西十二月議取漢中興安奏調綠旗兵檄提督孫思克赴秦州趙良棟赴鳳翔以將軍侯張勇將軍王進寶各引兵助之期以明年正月二十日如所約至下張勇等會議以聞勇等謂宜視夏秋收穫豐歉再圖進取圖海以漢興山路險峻夏秋多溼潦賊守益堅請如前奏十六年正月議上上慮克復漢興後宜設重兵轉餉不易若視夏秋則頓師糜餉亦屬非計諭令守諸要隘分兵赴荊州會剿吳逆議遂寢三

月招撫韓城等縣僞總兵喬斌以下官百有餘員四月遣兵進逼禮縣益門先後
敗賊於五盤山喬家山塘坊廟芭蕉園沙窩諸處復塔什堡是年九月賜服物並
御製詩二章十七年二月奏請分兵兩路進取漢中興安旋奉密諭止之閏三月
將軍佛尼勒等敗賊於牛頭山香泉四川總督周有德等敗賊於秦嶺復潼關堡
五寨四月慶陽賊袁本秀受吳逆僞劄作亂圖海發慶陽宜君延安三營兵會王
進寶兵討之斬本秀於衛遠溝餘衆潰散十二月疏請輕騎赴京面奏事宜許之
十八年二月還陝五月賊犯棧道益門鎮各口奏請提督趙良棟進臨武寨相機
而行俟擊破賊壘分道征進時湖廣廣西平聖祖諭亟殲寶雞之賊恢復漢興以
平蜀地七月破益門鎮賊毀偏橋兵不能進疏其狀以聞聖祖以其怯懦易退嚴
督之九月進取漢中興安分兵四路圖海親率將軍佛尼勒等由興安進總兵官
程福亮爲後援駐守舊縣關諸路將軍畢力克圖提督孫思克等由略陽進總兵
官朱衣客爲後援駐守西河諸路將軍王進寶總兵官費雅達等由棧道進總兵
官高孟爲後援駐守寶雞提督趙良棟由徽縣進剋日並發十月圖海師次鎮安
縣分兵爲二隊進攻僞總兵王遇隆於火神崖敗之渡乾玉河奪梁河關僞將軍

韓晉卿遁入四川是月王進寶復漢中趙良棟復徽縣略陽畢力克圖復成縣又復階州降僞副將王光生以下官十九員兵三百二十名十一月復興安降僞將軍謝四僞總兵王永世以下官三百八十二員兵萬四千三百餘名平利紫陽石泉漢陰洵陽白河及湖廣竹山竹谿上津等縣皆下之是月畢力克圖遣參將康調元復文縣僞洮岷道王文衡降先是王進寶趙良棟捷音先至聖祖以圖海畢力克圖等遲緩切責之至是捷聞得旨嘉獎下部議其功尋命率大軍之半駐守鳳翔十九年正月命赴漢中轉餉以濟蜀師九月陝西總督哈占由保寧直上擊賊譚宏命發兵爲聲援以分賊勢是月獲奸民楊起隆初起隆於康熙十二年詐稱爲朱三太子謀作亂於京師正黃旗周公直家奴陳益聚衆十人於家將起應之公直首其事圖海卽率兵圍之陳益等悉就縛至是并獲起隆送京師二十年正月賊犯四川敘州諸處調副都統翁愛率所部兵往援復奏請親行諭仍駐漢中防守秦蜀七月以疾還京尋具疏乞休聖祖慰留之十二月卒累官至太子太傅中和殿大學士兼吏部尙書正黃旗都統封三等公世襲諡文襄賜祭葬如典禮明年太宗文皇帝實錄告成以圖海曾充監修總裁官追贈少保仍兼太子太

傳二十二年御製碑文立石墓道雍正二年加贈一等忠達公配享太廟尋命建專祠復御製文刻石以旌之崇祀陝西名宦祠子諾敏襲爵

李之芳

李之芳山東武定人順治四年進士授金華府推官十一年以卓異內陞刑部主事遷本部員外郎郎中十五年九月授廣西道御史十一月疏言各省錢糧定例官收官解乃各州縣私僉大戶承值民間畏懼如赴湯蹈火百計營脫官吏贖貨免此僉彼鄉愚不諳倩人頂充因有棍徒包攬將在官銀米任意花銷仍累原僉里戶賠償小民膏血有限不堪一剝再削雖加笞箠終無所得故各省侵欠錢糧爲數甚多追補還官者十常不得一二總緣陋規相仍名色不一有司視爲故常耳苟且欺蒙將何底止乞敕各撫按力行整頓察革陋規凡州縣徵收銀米槩令佐貳官彙解遇有借端科索者許佐貳官揭報州縣州縣轉報撫按提問治罪揭報之佐貳官酌加獎勵如撫按釐剔無效州縣奉行不力並嚴議處分疏入得旨私僉民解病民殊甚下部議如所請行又言州縣路當孔道迎送往來自朝至暮有曠官守請嚴飭禁止從之十六年六月疏劾兩廣總督李棲鳳以失守城池革

職道員郭光祖委署左江道以徇私縱罪革職推官季奕聲復原任應察議上命棲鳳回奏自以不能詳察引咎下部議處如例十七年巡按山西十八年聖祖仁皇帝御極裁巡按回原任康熙元年請假歸二年八月補湖廣道御史三年十二月疏言邇來叩閭事情干涉民間冤抑者固自不乏然而健訟刁告之輩砌款行私降級革職之官飾詞巧辯滋煩擾而長欺妄莫此爲甚嗣後審問情虛宜各依律究擬勿止以責贖從輕發落其審虛復行叩閭仍審虛者加等治罪庶刁誑息而體統肅疏下部議行五年巡視浙江鹽政七年掌京畿道事尋掌河南道事八年五月內大臣鼐拜獲罪拘禁大學士班布爾善以結黨行私伏誅之芳疏言近者班布爾善任意票擬已置大法自此政本肅然一清矣臣惟票擬爲政本所繫昔時大學士等俱內直諸司章奏卽日票擬世祖章皇帝面賜裁決立法至善自順治十八年以後惟輔政大臣內直大學士等在外疏奏俱至次日看詳及進呈候旨止有學士而大學士不預非所以昭嚴密請仍復舊例內直看詳卽日票擬公同候旨永杜任意更改之弊疏下部從之又疏言世祖章皇帝時賞罰出於至公其時之督撫不敢恣睢無忌率有司以虐窮民然猶不時甄別處分以防其壞

法害政之漸輕則降革重則提拏斧鉞懍然未嘗少貸故當時吏治肅清民生不困豈一時之督撫皆賢彼誠有所畏也自順治十八年以後督撫率多貪緣而得有所恃以無恐勒索屬員擾害百姓以下僚爲奴隸任傳宣爲爪牙橫取財物賄賂權奸根深蒂固惟其意所欲爲夫直省億萬之衆皆世祖章皇帝留遺之羣黎皆我皇上愛養之赤子其能堪此輩朘削爲也自與受同罪之法嚴無敢糾督撫之貪婪者與者不認則言者涉虛卽確然有據亦不能執其人而問之矣豈但不能糾督撫且不敢糾司道守令糾之則干礙督撫安有督撫承問而不力爲脫卸謂盡屬子虛者數年以來未嘗因貪縱而重處一人反得粉飾功次冒濫加銜有貪之利無貪之害彼又何憚而不怙惡以自恣耶近者皇上親政屢頒諭嚴飭亦不過糾一二有司以謝責夫表不正則影不直安足除貪盜風而甦民生乎乞睿鑒親裁罷黜溺職督撫庶吏治漸有起色疏下部知之尋甄別各省督撫罷黜降用休致數人九年五月疏劾大學士魏裔介前以候補左都御史妄援恩詔廢其子魏嘉及入內院市恩徇私諸款詔裔介回奏仍下部察議以各款俱辯釋惟候補官無得廢之例革魏嘉廢生事詳魏裔介傳八月得旨內陞以四品頂帶食俸

仍任御史十一年二月擢左副都御史六月疏言外官失察衙役犯贓例坐革職在內部院司官所管胥役犯贓向未有失察處分故縱容奸蠹置若罔聞請敕部嚴議俾知懲警又疏言今日吏治之弊在於文法太密而尤密者在於方面有司等官常有在任三兩年而罰俸至二三十年者夫俸薄尙恐不足以養廉況積年無俸又安能責其潔己愛民乞敕部酌覈外官罰俸事由原無情弊近來處分過當者請旨仍遵世祖章皇帝時定例除去繁苛以課吏治之實效又疏言兩淮兩浙長蘆河東等處鹽課專遣御史經理爲商人培一時之元氣卽爲朝廷培恆足之泉源緝梟販以疏官引嚴秤掣以速行銷翦惡棍以安良善察職要以便小民皆巡鹽御史職掌在順治十八年以前原以此爲殿最之法不僅以完課爲能事乞敕嗣後各巡鹽期滿仍行昔日考覈之例戶部據錢糧之完欠爲高下都察院據政績之優劣爲勸懲庶各爭自濯磨克盡職掌矣疏並下所司議行是月浙江巡鹽御史杭奇常錫允以私派詐贓爲商人赴通政司控告命之芳赴浙察審得實杭奇常錫允並論絞十月遷吏部右侍郎十二年六月授浙江總督明年三月疏言逆藩吳三桂陷湖南恐煽誘滋擾浙江提督標兵應復前未裁減時原額令

各營使用槍礮爲攻堅擊遠計疏甫入逆藩耿精忠執福建總督范承謨據福州
反之芳聞變疏言賊兵已至蒲城衢屬仙霞關與賊接境而常山一縣又爲西南
孔道臣已分調官兵星馳守禦請急救江南省調兵赴援江西省調兵謹守玉山
鉛山要路以固封疆疏入命都統賴塔率江寧副都統瑪哈達瑚圖等及駐防兵
赴浙江諭令與之芳商決軍務五月奉詔進駐衢州請復降調總兵李榮原官俾
統領綠營副將王廷梅牟大寅陳世凱鮑虎等分道禦賊賊由常山陷開化壽昌
淳安由處州犯義烏浦江東陽湯溪龍游沿河阻絕餉道聯結叛弁司定猷叛鎮
祖宏勳陷平陽踞温州又陷黃巖犯台州及紹興集悍卒數萬窺衢州七月之芳
與賴塔閱兵於水亭門率總兵李榮及副都統瑚圖等兵直薄賊壘軍於阮西賊
悉衆來犯我兵衝冒礮矢奮擊卻賊賊越壕踞木城我兵追擊至壕守備梁安歿
於陣賊乘夜移踞杜澤大洲陳世凱與副都統沃申進剿斬戮甚衆乘勝復義烏
湯溪牟大寅破賊常山遊擊王世萬破賊龍游鮑虎復壽昌王廷梅敗賊於金華
之石梁大溝源李榮復東陽尋大敗賊兵於金華之壽溪斬僞總兵張元兆等毀
寨十八參將洪起元敗賊於紹興復嵯縣先後得旨嘉之芳調度有方將士奮勇

令事平日議敘時大將軍康親王傑書自京統師至金華分遣貝子傅拉塔與都統巴雅爾等剿賊温台賊之在處州者逼衢州東南在江山者逼衢州西南之芳分飭營伍嚴守禦勿遽迎擊十月疏言臣自駐衢以來率勵將士搜剿雖所至克捷終因兵少戰守不能兼應原調集之兵及新設援剿鎮兵共祇數千金華堵禦温處兩路嚴州接連徽饒二郡並屬咽喉之地而衢州又當衝扼要爲全浙門戶各處賊兵皆報稱數萬每處官兵不及三千派防屬縣駐守府城聞警策應常恐不敷臣標現設三營應增足每營一千之數並增設前後二營合成五千兵目前便於策應有恢復之地即可分撥駐守俟事平之日調作温處各營原額自是增兵不踰經制之外而援剿機宜克協矣疏下戶兵二部議行會康親王奏進征温處應設温州黃巖平陽三鎮標營其將弁聽之芳揀補陳世凱王廷梅鮑虎並擢總兵官十一月賊衆五萬由常山逼衢州城西溝溪倚山結十數寨掘壕塹覬聯南路賊巢之芳與賴塔議出賊不意遣王廷梅同參領禪布等夜趨溝溪分隊進攻自辰至酉合力撲剿斬賊萬餘賊將棄寨潰竄追逐二十里獲巨礮器械甚多十四年二月疏言臣統師衢郡日夕對壘凡籌畫戰守接濟芻糧策應調遣時刻

勿違軍機緊要之事萬不能輟更無暇晷翰理盜案且臬司駐筭省會解審既慮疎虞駁覈又恐遲滯乞敕歸撫臣就近覆審徑行題結又疏言凡城鄉盜案專汛兼轄武職有住俸罰俸降級之例所以責其督緝逸盜也今用兵之際或本汛防剿或調遣隨征業已披堅執銳展績封疆不能分身緝盜俸銀停支情屬堪憫宜破格開復以示恩養將士之心又疏言金衢台嚴紹等處賊寇屢經征剿附從烏合之徒漸已解散仍復故業臣飭所在官吏安集撫綏俾投誠衆多惟賊寇蹂躪之地一望蕭條啼號載路卽如衢州近城難民現有九千七百餘口其散處各鄉者尙不可計數臣與府縣官雖捐貲量給不過涓滴之微請於布政司所收捐助軍需內動支散給皆疏下部議並從之時賊帥馬九玉朱懷德等盤踞江山常山開化三縣於溪口清湖大溪灘茅村東南列賊營四又列營前嶺以聯絡東南各賊巢且散布處州金華山谷四出窺犯李榮陳世凱王廷梅等分路搜剿所至大捷五月之芳與賴塔議乘連旬大雨河水泛漲由南塘搗賊前嶺陣斬七百餘級墜崖落水死者無算十五年三月遣將由遂安截賊後路連破賊寨復開化縣疏言衢州控賊要害滿漢官兵擐甲枕戈已逾二年因浙省處處用兵分布各路以

致兵力不敷前此專望一處掃平便可併力攻取直搗仙霞不意各路寇氛雖屢經剿創尙未撲滅江西廣東各逆又出沒常山開化欲與馬九玉賊營聯合在衢滿漢官兵僅能堵禦若欲急圖滅賊非厚集兵力不可目下賊勢斷不能窺犯江南宜酌調松江崇明提標兵五六千赴浙聽大將軍康親王調度并力進剿疏入上命康親王於浙省分駐兵酌調統率諭之芳議定由何路進剿之芳疏言自耿精忠叛變分遣賊衆一由衢州一由温州一由處州三路入犯兼以海洋賊舟往來牽制而且廣布僞筭煽惑人心不逞之徒所在蜂起官兵各路堵禦屢奏捷功而負固抗逆者尙有温州之曾養性祖宏勳處州之連登雲徐尙朝沿海出沒之熊進學等因衢州向爲八閩大路勁卒畢集今必先由衢進擊殲其精銳則諸路之賊自然瓦解逆賊馬九玉朱懷德等現在深溝高壘死守河西然其南則江山西則常山皆可以間道截其糧運斷其歸路我兵一進使賊首尾受敵勢難仍保巢穴從此八閩可奏蕩平矣疏入從之八月康親王抵衢州與之芳及賴塔議先斷賊餉道以奪河西賊勢遂進兵大溪灘復江山縣馬九玉棄營遁之芳遣副將馬化龍參將閻進趙得壽率兵隨賴塔進剿降僞參將金應虎等克仙霞關康親

王進定建寧延平將至福州耿精忠率衆降賊之在温州處州者悉解散僞總兵馬鵬汪文生陳山僞將軍程鳳等猶分踞江西之玉山鉛山弋陽德興等縣之芳奏請會剿得旨俞允而江西兵方以禦吳三桂逆黨於吉安袁州不遑東顧之芳遣兵一由常山進剿玉山一由開化進剿德興十月攻克玉山城汪文生潛遁十一月破賊木城六自白沙關趨德興連克賊寨十有三擒馬鵬械至衢州斬以徇遊擊郭守金等復鉛山興安弋陽貴溪等城上嘉之芳遣兵剿賊隣省恢復城邑調度有方下部議敘加兵部尙書銜十六年四月遣參將蔣懋勳等剿賊於玉山之椒巖洞僞總兵陳山率衆出降先是馬鵬就擒汪文生程鳳俱乞降俄程鳳病死其妻王玉貞以僞揚烈將軍印籍所屬六萬七千餘人就撫而僞總兵林爾瞻擁衆數萬以鉛山上饒與福建光澤縣錯壤之石壠地爲巢穴恃山險崎嶇招之弗出之芳令蔣懋勳等由鉛山進剿分扼要隘率數騎入寨慰撫乃挈僞官百餘兵二萬餘出降別有僞都督李日生僞提督洪成龍分距玉山之八仙洞老鼠洞出掠子午口十七年三月蔣懋勳等擊賊子午口斬級數百之芳復遣參將閻進會剿克八仙洞復克老鼠洞各斬賊千餘毀平賊寨時海敵鄭錦尙踞閩境設五

鎮其僞總統劉國軒朱天貴等糾集羽衆乘船窺伺瀕海郡邑之芳檄各營汛嚴密守禦象山副將汪國祥等敗敵於廟嶺湖邊敵復犯温州各汛地皆有備擊毀敵船溺死者甚衆僞副將詹天樞殺其將麥仁赴總兵陳世凱軍前歸順十八年十二月令定海總兵牟大寅率兵巡海見島嶼而木城草屋者悉焚毀搜斬又令遊擊衛聖疇等更番出哨遇敵孝順洋斬僞參將童耀等及羽衆三千餘毀沈十九船獲十五船並器械僞印筭以還二十年七月疏言浙省上游險要莫重於衢州而衢之恃爲咽喉門戶者莫重於仙霞一關自康熙九年撥舊駐江山之楓嶺營歸閩省總兵官於浙不相統轄迨閩中變亂致仙霞天險反爲賊踞聲息不通寇兵遂得深入仰賴天威掃蕩恢復以浙省官兵駐守近見福建總督姚啟聖請設楓嶺營隸閩省伏思守關之法應從內以控扼於外未有反借外以遙制乎內者宜設左右兩營左軍守備以下閩省支餉右軍守備以下浙省支餉其楓嶺營遊擊兼聽兩省節制仍於浙省支餉疏下部議從之二十一年八月奉詔還駐杭州十一月召入京爲兵部尙書二十三年八月調吏部十一月諭大學士等曰部院大臣年高者借以料理政事不以筋力爲禮兵部尙書李之芳齋捧木匣以衣

裘厚重偶致失足倘或至損傷朕心深爲不忍以後木匣令尙書侍郎內年少壯者捧進二十四年八月以疾乞休得旨慰留十二月戶部議刪錢糧絲忽以下細數重刊簡明賦役全書給事中楊周憲疏陳細數不應盡刪全書不應重刊下九卿科道再議未決召詢之芳奏言戶部初議絲歸於毫今擬絲以上之數仍存忽以下之數刪去則便於稽覈吏胥不得作弊實有益於民上是之議遂定二十五年二月彙敘任總督時軍功予雲騎尉世職准襲一次二十六年九月授文華殿大學士二十七年二月御史郭琇疏劾大學士明珠余國柱結黨營私事謂內閣票擬俱由明珠指磨輕重任意余國柱承其風旨卽有舛錯同官莫敢駁正上旣罷明珠余國柱大學士勒德洪並命之芳休致回籍明年上南巡之芳迎駕於德州賜賚優渥三十三年十一月卒於家年七十有三諭曰李之芳前爲浙江總督時隨大軍進剿歷有勞績簡任機務勤慎素著忽聞在籍溘逝朕心深切軫惻下部議卹賜祭葬如例謚曰文襄子鍾麟襲雲騎尉世職四十九年八月諭大學士等曰凡人能效命者卽爲勇士耿逆叛時李之芳任浙江總督雖不諳騎射執刀立於船首率衆突前大破敵人以立功績彼時同出征者回京俱稱李之芳之勇

今承平日久善於馬步射能管轄兵丁者尙不乏人若屢經行陣之人甚難得也世宗憲皇帝雍正十年入祀賢良祠乾隆三十二年上追念國初以來宣力效忠之臣命部臣稽覈前此曾授世職襲次已滿者疏列具奏之芳裔得旨予恩騎尉世襲罔替

清史列傳 卷七

大臣畫一傳檔正編四

董衛國

董衛國漢軍正白旗人初任佐領歷官國史院學士順治十八年擢江西巡撫康熙四年加工部尙書銜九年以病乞休詔慰留之十三年正月改兵部尙書銜時逆藩吳三桂犯湖南長沙失守衛國疏請發兵備禦袁州吉安命副都統根特巴圖魯自兗州移師赴援會逆藩耿精忠復犯寧都廣昌南豐等處廣信副將柯昇叛應之衛國密疏告急命定南將軍希爾根會同衛國相機剿禦衛國復疏言袁州逼賊氛應設總兵統兵三千鎮守並請以副將趙應奎陞授詔從之南瑞總兵楊富謀不軌衛國廉得實擒置之法並殲其黨上嘉其功七月設江西總督卽授衛國舊制南昌水師營兵五百以守備領之衛國奏省會重地應改設遊擊增兵五百又江西營制爲馬一步九用兵之際多一馬兵可當步兵十奏改馬二步八均如所請行十一月耿逆賊黨分犯新昌上高衛國調遊擊佟國棟參將趙登舉

守備張射光往援大捷斬僞都督左宗榜十四年七月與希爾根等招撫泰和龍泉永新廬陵僞官二百七十餘賊衆六萬五千有奇上高新昌金谿餘干諸寇遏廣信糧道十二月衛國奏督兵親剿值簡親王喇布駐師南昌以省城投誠人雜處堪虞督臣不宜他出奏止之十五年正月遣中軍吳友明擊賊於瑞州復上高新昌二縣二月賊圍靜安調吳友明擊之賊潰十二月遣副將許盛遊擊楊以松等先後敗賊於泰和定南復其城十六年三月疏言賊首楊玉泰竊據宜黃樂安崇仁山谷中請統官兵掃蕩允之未幾招降崇仁僞總兵蔡仕伯宜黃僞總兵沈鳳祥等五月大破賊衆於大嶺陣斬僞官百餘兵五千餘復樂安玉泰窮蹙降時湖南平江及銅鼓營賊起衛國留提督趙賴守樂安調本省兵援楚會簡親王檄衛國標下兵盡赴樂安衛國以江西爲楚粵控要省城駐滿兵不過二百恐守禦失利上疏乞賜罷斥嚴旨責王不合並申諭嗣後調遣與衛國會商行之八月遣兵徇建昌招撫僞總兵張發等官一千餘衆六萬餘九月擊走賊首朱統錫於瀘溪擒其黨金洪尹文郁十二月遣兵徇南昌招撫僞總兵袁菊茂等官一千三百餘衆五萬餘復銅鼓營衛國以伏莽未靖疏請赴吉安隨簡親王協力撲剿留副

都統多諾守南昌得旨綠營官兵聽便宜調遣十七年三月賊首韓大任赴閩降其黨郭應輔等分據萬安泰和諸縣衛國剿其衆四萬餘招撫僞總兵以下官三百餘衆四萬六千餘分別安置六月吳逆犯永興薄吉安上命衛國酌撥綠旗兵守吉安速募精銳五千備援先往衛國奉旨守銅鼓營三桂既死餘黨據岳州長沙大兵圍之不下十二月衛國奏銅鼓營寧謐無事請赴楚援剿上嘉許並授方略未幾岳州長沙繼定十八年正月詔赴大將軍安親王岳樂軍協同進取於是衛國隨大將軍由衡州寶慶大敗賊於紫陽河雙井鋪復武岡城嗣給事中李宗孔劾衛國居總督任不治事失民心廷議革職諭戴罪圖功十九年三月率兵破鴨婆黃茅等嶺進剿靖州賊與都統穆占會追敗僞將軍吳應麟等復沅州十月至鎮遠奪石港口抵大巖門僞將軍張足法悉衆拒衛國親奮擊大破之足法夜遁追至油關關而還復鎮遠城大兵既定貴州大將軍貝子彰泰進征雲南留衛國守貴陽二十年雲南平回任二十一年調湖廣總督二十二年廷議前綏遠將軍湖廣總督蔡毓榮劾衛國不聽調度貽誤軍機而衛國有平鎮遠功請免議諭曰董衛國遵朕指授剿定賊寇恢復鎮遠實爲可嘉蔡毓榮勞績遠出其下且二

人敵體大臣無聽調度例以妒功故陷人重罰著將蔡毓榮降五級調用先是御史蔣伊劾衛國縱兵俘掠至是江西總督于成龍疏辯十一月衛國入覲瀕行諭曰爾在外二十餘年地方事宜知之已悉前此用兵之際未免騷擾閭閻今天下承平當思休養民力至於興革利弊尤在嚴飭所屬實力奉行爾前有勞績朕罔不知毋畏人言勉圖後效十二月衛國遘疾卒於任賜祭葬如例

瑚圖

瑚圖滿洲鑲白旗人姓洪鄂氏順治十二年以護軍校隨寧南靖寇大將軍陳泰出師湖廣敗明桂王將盧明臣馮雙禮於岳州武昌十七年隨安南將軍洛託赴福建敗海敵鄭成功於廈門康熙二年授駐防江寧協領八年擢江寧副都統十三年逆藩耿精忠叛上命瑚圖同副都統瑪哈達率所部赴杭州與將軍圖喇計兵事尋以賴塔爲平南將軍瑚圖參其軍務八月僞將軍馬九玉遣其將胡錦等犯衢州至石梁瑚圖與副將王廷梅李承恩分路迎擊賊潰奔崖山進圍之擒錦時賊黨小林別駐大溝源乘勝進擊大敗之十月僞將馬四等率賊衆一由江山至錢塘一由處州至林山謀犯衢州瑚圖分兵東西夾攻陣斬僞將范安國王

頂等已而僞將周列桑明率衆三萬屯焦園紅橋等處分路擊之連破賊衆斬萬餘級十四年三月九玉擁衆屯衢州西南夜渡水犯我營賴塔令瑚圖廷梅往擊之敗諸杭埠斬殺甚衆餘賊多溺死八月九玉遣其將李廷桂率賊七千營於衢州北元口村設木城賊敗遁十五年八月官軍破賊於大溪灘復江山縣九玉走常衝賊營焚其木城賊敗遁十五年八月官軍破賊於大溪灘復江山縣九玉走常山瑚圖追之賊拒戰又敗之進圍常山賊夜開西門遁追至江西玉山界賊大潰斬獲無算復常山縣進克仙霞界拔浦城精忠窮蹙詣康親王傑書軍門降瑚圖隨軍駐福州十一月海敵鄭錦將徐耀率衆三萬至烏龍江南營於小門直鳳諸山謀犯福州康親王傑書遣瑚圖同總兵董大來夾擊破敵營十四敵遁追四十餘里尋以瑚圖防守泉州十六年三月泉州城內外土賊四起瑚圖遣將領水陸分剿盡殪之十月南安縣賊陳式陳角等樹旗揚言欲犯泉州瑚圖令營長張廷輔副將朱起龍分擊敗之斬陳角先是漳泉多寇南安賊首李復貴同安賊首朱寅各據高山勾海敵乘機剽掠康親王傑書令提督段應舉同瑚圖分路進剿擒復貴及寅之僞軍師林日向等至是寅復犯陽坑小黃山瑚圖與三等台吉查渾

副都統鄔爾根追擊之三戰皆捷殺賊千餘斬僞將謝良楊德瑚圖尋駐漳州十七年二月海敵陷石瑪逼海澄瑚圖同海澄公黃芳世副都統孟安應援敗敵於彎腰樹奪金門山進至觀音山敵陳福陳仁來拒擊敗之敵奔下澗追之斬僞將洪結敵收餘黨於石瑪築壘拒官軍三月敵船二百餘乘潮至壘中敵復出列相表裏瑚圖與芳世安營令海澄總兵官黃藍潛師夾攻陣斬僞將朱成高榮等十一人沈敵船九敵仍遁入壘海澄圍解時官兵俱屯海澄石瑪漳州兵少瑚圖同總督耶廷相晝夜防守忽海敵連艘數百乘虛突犯入東關擊以礮敵敗退復益船擁衆至且勾山賊蔡寅由天寶山斷我糧道瑚圖親督戰焚其船敵仍不退閏三月芳世自海澄以兵來援大破敵衆寅始遁去時海敵劉國軒吳淑等復破海澄陷長泰糧道復阻賴塔令瑚圖帶甲八百防守要路九月淑率衆萬餘逼漳城國軒營對河爲犄角城內兵少適副都統沃申率兵千餘來援瑚圖隨賴塔分路剿至蔗林遇伏我兵小卻斬退者三人我兵奮進遂破敵陣連拔其營十六殺其過半乃退據長泰謀犯南靖我兵分二隊進城列營蜈蚣山瑚圖沃申力戰自辰至未敵大敗棄營走斬其將鄭英何觀及羽衆四千餘復長泰城餘退據江東橋

橋爲漳泉往來要道十月賴塔營橋西令瑚圖同沃申提督石調聲取橋東岸乃由長泰繞道越朝天嶺過龍江口深入敵巢彼以礮迎敵瑚圖等奮勇衝擊乃棄寨奔船據橋口急擊之逃奔出江遂通漳泉路十八年二月敵設伏四山來誘我戰瑚圖同副都統雅達里分兵突至山下伏盡起瑚圖等力戰不退敵大敗奔據玉洲觀音山各寨十月忽屯鼇頭山窺江東橋欲斷我路我兵四路迎剿瑚圖與副都統瑪思文爲一路擊敗之十九年三月我兵分路剿擊瑚圖攻克玉洲各寨敵戰敗竄廈門遂復海澄四月忽江欽等糾黨連鯨竄踞廣東達濠島瑚圖隨賴塔至潮州沿海督剿水陸並進敵退乘勝取磊石門敵來爭復擊敗之又遇我水師夾攻敵大潰遁出外大洋尋閩粵平定瑚圖回江寧任二十三年十一月上南巡駐蹕江寧賜瑚圖蟒袍一十二月擢杭州將軍二十六年三月卒於官得旨瑚圖才品優長殫心盡職效力行間勞績茂著及授杭州將軍復能和輯兵民不干預地方事務行止清慎克盡厥職著從優議卹尋議祭葬如例特旨加祭一次諡敏恪

蔡毓榮

蔡毓榮漢軍正白旗人漕運總督蔡士英次子也初任佐領兼刑部郎中尋授京畿道御史兼參領遷秘書院學士聖祖仁皇帝康熙五年授刑部侍郎七年遷吏部侍郎九年授四川湖廣總督駐荊州十年疏言蜀省民少田荒宜廣招開墾凡候選及現任人員招民三百戶者議敘卽用卽陞墾熟田畝寬限五年起科又言蜀省衝要營員請照沿邊例題補十一年疏言移駐弁兵其子弟有讀書者應准入籍考試十二年請裁遵義總兵官改鎮松潘事並下部議行是年十二月逆藩吳三桂反毓榮疏言雲貴總督甘文焜手書遺臣言吳三桂反臣隨調沅州總兵官崔世祿疾赴貴州禦之令彝陵總兵徐治都永州總兵李芝蘭各率兵繼進上諭以宜令提督桑額疾馳沅州固守敕遣王貝勒大臣領八旗兵至荊州復命侍衛納爾泰傳諭毓榮籌備軍需十三年二月分設四川總督改毓榮專督湖廣以前招民墾荒敘功加兵部尙書銜先是賊兵陷沅州崔世祿降賊至是常德澧州長沙岳州相繼失守部議毓榮當賊未陷常德時不卽令桑額往調度無能應革職命從寬留任戴罪圖功尋丁父憂命在任守制仍率綠旗兵偕八旗兵進剿毓榮遣中軍副將胡士英等分防江口值叛鎮楊來嘉等踞南漳縣之天門寨馬良

坪諸處出掠城邑毓榮遣襄陽總兵劉成龍率兵禦剿屢奏捷時廣西提督馬雄叛應吳三桂以逆書與兩廣總督金光祖詭言毓榮欲攜綠營兵數千赴岳州降賊金光祖爲毓榮姻戚密遣人告之蔡毓榮疏陳狡謀誣陷請解任回旗上命以殫心供職勿因逆書引嫌十四年九月大將軍順承郡王勒爾錦奏增設綠旗兵援剿二營領以兩副將詔毓榮統轄之毓榮尋疏言吳逆久據湖南而湖南之長沙與江西之吉安袁州接壤郴州桂陽又與吉安之龍泉接壤若楚省大兵由荆岳諸路進而江省大兵亦由袁州諸路會期進攻使賊三面受敵首尾不能相顧則我兵之勢合而賊兵之勢分一舉而膚功立奏也又言前此屢奉恩諭陷賊官民來歸悉赦已往之罪且不惜數百萬之帑金用兵剿賊無非爲救民水火計惟是烽燧之區或不暇辨是民是賊恐俘戮者衆乞敕統兵王貝勒遴選滿洲賢員齎奉撫民敕諭隨師前進每收復城邑卽稽察戶口悉予安輯賊黨以外戒無妄殺則脅從之衆無不聞風投順矣疏並下所司議行十七年毓榮奉詔率兵五千隨貝勒尙善剿賊岳州因同討逆將軍鄂納等率舟師進剿柳林嘴及君山用礮擊沈賊舟殲賊無算賊復犯我糧艘夾擊敗之斬級千餘是年吳三桂死大兵以

次恢復岳州長沙衡州等府十八年三月毓榮疏言洞庭湖中之君山有龍神廟久著靈顯唐封爲利涉侯宋加封順濟王我朝順治四年王師過湖祈風有應委官葺新昨歲七月大軍攻取湘陰風浪疊壞船艦臣同討逆將軍鄂訥登山虔禱卽風靖浪平克復岳城湖南諸郡底定固皆皇上威福所致亦賴湖神護助請敕賜封祀以旌神功疏下部議視嶽鎮海瀆等封爲洞庭湖之神遣禮部祭告十月毓榮疏言湖南惟辰州一府尙爲賊踞而楓木嶺神龍岡兩路皆極險隘我軍士馬疲困宜暫休息俟糧草克繼會期進剿上命給事中摩囉耶中伊爾格圖傳諭曰逆賊敗遁負險未可專俟馬兵宜用綠旗步兵前進聞蔡毓榮所屬官兵甚爲強壯以此兵力何難剿除將滅之寇從古險隘地方若不攻取豈有自定之理其如何恢復辰沅速定雲貴詳議以聞毓榮疏言辰沅水路直達武陵賊旣扼險於陸又復據泊上游若我師由陸路進攻恐賊以輕舟順流反襲我後宜造八槳小船二百水陸並進並請專責一人總統諸路綠旗兵上允其議卽授毓榮爲綏遠將軍賜敕總統綠旗兵總督董衛國提督趙賴等並受節制十九年三月分路破賊楓木嶺辰龍關並擊壞賊船復辰州沅州及瀘溪溱浦麻陽等縣八月毓榮請

頒敕招撫吳世璠上諭大學士等曰吳世璠爲賊渠魁恃其險阻抗拒官兵殘害生民罪惡重大蔡毓榮不圖早滅逆寇乃欲降敕招撫率意妄奏著嚴飭之閏八月定邊大將軍貝子彰泰與毓榮由沅州進征貴州奏言綠旗兵與滿洲兵已會合一處若各自調遣恐未能併力奏功上命毓榮一切軍機關白大將軍商酌以行十月毓榮同董衛國督兵復鎮遠府隨彰泰定貴陽二十年正月彰泰奏賊衆萬餘欲據盤江已遣兵固守鐵索橋以禦之上諭之曰大兵秣馬貴陽已經月餘今逆賊欲據盤江祇遣兵前往殊昧機宜彰泰蔡毓榮當卽親統大兵撲滅賊衆平定滇中勿失機會三月毓榮隨彰泰抵雲南省城營於歸化寺僞將軍胡國柄等糾衆萬餘列象陣拒戰我師分隊進擊大敗賊衆陣斬國柄及賊衆無算是月逆孽吳世璠自殺其黨以城降雲南平毓榮還任湖廣總督復原職二十一年六月調雲貴總督疏言雲貴兩省險要邊疆又當新復之初督標兵舊設四千未足資彈壓請增兵一千分爲五營又因議裁吳逆所設十鎮請改爲六鎮在迤西者曰鶴麗曰永順曰楚姚蒙景在迤東者曰開化曰臨元澂江曰曲尋武霑又言中甸在金沙江外舊轄麗江土府爲吳逆割畀蒙番通商互市今互市已停而蒙番

所設喇嘛營官未撤宜令土知府木堯仍歸其地十月又奏籌滇善後事宜分別十疏一曰蠲荒賦逆賊踞滇八載按畝加糧驅之鋒鏑地曠丁稀今各府州衛所報無徵地丁額賦應亟予蠲除招徠開墾二曰制土夷前此土日世職不過宣慰吳逆濫加僞職或至將軍總兵投誠之時權照僞銜給劄今當悉行追繳換給土職其應襲者年十三以上令赴儒學習禮起送承襲族人子弟准就試州縣舊被吳逆奪職者察明宗派予襲以示綏柔三曰靖逋逃有逆屬舊人鳥駭鼠竄者有徵兵奉裁乘間兔脫者有八旗僕從不隨師凱旋潛匿滇境者宜定首報賞格重懲窩隱所獲之人按律量從末減自必聞風投歸不致以畏死之故竄入生番矣四曰理財源滇省賦稅無多兵食仰給他省惟產五金可令民自開礦硿而官總其稅省會及祿豐蒙自大理增設鑪座以廣鼓鑄故明沐氏莊田及入官叛產均令變價以裕鑄本其田仍一例納賦又兵弁皆有餘丁宜令酌墾各營荒地起科後編入里甲賦有餘而餉可節實爲邊備至計五曰酌安插逆屬家人曾隨賊伍者應遣發極邊若僅受僞銜並未從行助逆宜免其遷徙以示矜全六曰收軍仗私造軍器者應坐謀叛論罪其土司收藏刀槍及民人以鉛硝硫黃貿易者並當

嚴禁七日勸捐輸滇省民鮮蓋藏偶有稔災無從告糴請暫開捐監事例以備積貯八日弭野盜魯魁在萬山中初爲新嶧阿蒙土人所據嘯聚爲盜內通新平開化元江易門外接車里孟良鎮元猛緬向者吳逆養寇自重授以僞職今雖震驚天威受土司銜仍宜厚集土練各兵坐鎮隘口以防後患九日敦實政兵燹之後宜整理撫綏其要在墾荒蕪廣樹蓄裕積貯興教化嚴保甲通商賈崇節儉蠲雜派恤無告止濫差所在州縣卽以十事考殿最立勸懲庶邊疆日有起色十日舉廢墜學宮之設以育人材吳逆煽亂悉皆頽壞今武功旣成宜倡文教有倡率捐修者錄敘以勵之其逆黨所踞官寮廨宇宜仍給爲公署聽其自尊至通省稅糧旣有成額宜均本色折色之數酌存留起運之經黔滇驛站一例酌增工食則民間永無派累矣疏入上以所奏各款有合時務下九卿詹事科道議行尋諭曰土司等賴刀槍捕獵以爲生計勿概禁止先是毓榮自貴州進征雲南時疏劾提督趙賴駐守貴州抗違檄調進征官兵議政王大臣等以趙賴已奏明防守緊要難於遣發寢議毓榮復劾總督董衛國不聽調度違誤軍機上命事平時再議二十二年部議董衛國未曾違誤且有復鎮遠功請免議上以毓榮妒功誣奏下部議

削五級二十五年閏四月改總督倉場侍郎十月改兵部侍郎十二月領侍衛內大臣佟國維等奏侍衛納爾泰自首前次奉使雲南回京後毓榮令其子琳餽以銀九百兩又內務府新自雲南歸旗之革職知州文定國以毓榮隱匿應官婦女及徇縱逆黨狀入奏詔法司勘鞫得實擬斬立決籍沒命免死與其子琳並遣發黑龍江後赦還三十八年卒

鄂善

鄂善滿洲鑲黃旗人姓納喇氏順治十五年任三等侍衛聖祖仁皇帝康熙三年遷二等待衛七年九月授祕書院學士八年九月遷副都御史九年閏二月疏言近例官員罰俸事在陞任前者罰已陞之俸事在降調前者罰未降之俸追銀均此處分而先後輕重互異請敕議畫一俾永遠遵循疏下吏部議仍復世祖章皇帝舊制無論陞降並罰現任俸其裁缺給假丁憂者俟補官扣抵免行追四月授陝西巡撫十一年四月擢山西陝西總督尋以山西歸巡撫統轄改鄂善爲陝西總督十二年九月改舊駐貴陽之雲貴總督專轄貴州增設雲南總督調鄂善任之十二月至湖廣值逆藩吳三桂反雲貴已陷賊詔鄂善暫留湖廣與總督蔡毓

榮共籌剿禦十三年正月上聞賊逼沅州鄂善與蔡毓榮及提督桑額皆在荊州諭趣桑額赴援改鄂善雲貴總督隨大軍進征二月桑額率兵渡江賊已至沅州進陷常德澧州桑額仍退守荊州尋部議蔡毓榮失守所屬城邑應革職鄂善不能遵旨籌畫機宜應降五級調用均得旨從寬留任戴罪圖功四月鄂善疏言標下需兵惟自陝攜至健丁一百五十名堪以入伍現在召募罕應請於附近湖廣各省抽調步兵一千四百名陝西省抽調馬兵四百五十名合成標兵二千長驅進剿並請以陝西安遠營參將張夢椒爲臣標中軍副將陝西提標守備李國樑爲臣標左營遊擊陝西督標千總馬德昌爲臣標中營守備俾收得人之效疏下部議附近湖廣各省步兵俱當防守汛地陝西馬兵本省需用皆未便抽調仍令鄂善在湖北酌募其標下中軍副將等官已由部選授張夢椒等應留陝西原任六月鄂善復疏言欲募有隣里保結之兵漫無一應由楚人止就本省之募不就滇黔之募也其自願投充者慮係逃人或爲奸宄無益有害萬不敢招轉盼入秋大軍進剿湖南招徠降兵即可撥補營伍請敕領兵王將軍等於恢復之日陸續驗發充額疏下部議從之十二月陝西提督王輔臣叛於寧羌州秦州平涼俱陷

詔鄂善同副都統穆舒渾等率現駐襄陽之滿洲蒙古兵移守興安漢中十四年正月鄂善至安西總督哈占以省會兵少奏留鄂善與穆舒渾率所攜之兵協守尋詔移守榆林延安哈占兩奏止之六月遣營總鄂爾博什邁圖等援邵陽擊敗叛將李師膺於鳳凰山獲偽筭旗礮八月上諭責哈占曰前以延安爲諸路要區曾命鄂善駐守哈占奏留之西安致延安陷沒迨將軍畢力克圖恢復延安又命鄂善前往安撫殘黎保固疆土乃至今未行皆由哈占但知有西安置他處於度外也是月鄂善移駐延安尋奏招還復業人民六萬二千餘得旨嘉獎十六年六月率兵分守棧道以東郿縣各山口七月賊由洪河口至塘坊廟列衆二千來犯鄂善令右翼兵擊賊山澗左翼兵擊賊河岸而自領中營兵踴躍直前仰攻山梁斬馘百餘賊自相踐踏越山而遁是月授甘肅巡撫十七年七月以失察布政使伊圖侵蝕採買價值部議革職詔從寬留任先是正月清水縣民捏告知縣佟國佐苛歛各款鄂善令按察使舒淑布勘鞫舒淑布檄秦州知州王之鯨就近質訊延擱數月至是清水縣民赴京叩閭上遣吏部郎中丹岱等往鞫昌察審得實十八年正月還奏佟國佐革職計贓論絞舒淑布王之鯨懸案逾限擬降調鄂善於

所屬貪贓不先究察及告發仍不審劾已經革職擬革任得旨從寬與舒淑布並任事如故五月因計典察議才力不及無級可降罷任還京尋卒

周有德

周有德漢軍鑲紅旗人世祖章皇帝順治二年由貢生授弘文院編修五年十一月大同總兵姜瓖叛有德隨英親王阿濟格往征賊平還京授侍讀聖祖仁皇帝康熙元年遷國史院侍讀學士尋擢弘文院學士二年授山東巡撫疏言歷城縣有明季廢藩地畝應如齊河等縣例照民田科賦不宜仍明時租額徵收事下部議行三年六月以獲解逃人加工部侍郎銜明年疏請復孤貧口糧舊額請寬青萊登諸處居民海禁仍聽其捕魚資生又言德州駐防兵丁應如陝西浙江例准支月糧舊所給民地五百餘頃仍還之民又言各省州縣官有因錢糧未完被劾者若於離任之先如數輸納請仍留舊任又以兗州濟南東昌青州四府旱災請加賑卹登萊二府歲亦歉收請免本年額賦疏皆下部議行六年擢兩廣總督七年上遣都統特錦等會勘廣東沿海邊界設兵防汛俾民復業有德疏言比外界遷入內地之民頗苦失業今聞沿邊設兵許遷戶仍歸舊地莫不踴躍歡呼第海

瀋遼濶若使勘界既明始議安插尙需時日窮民迫不能待請於勘度設兵之時卽令州縣官按遷戶版籍給還故業俾裕生計疏入得旨允行是年十一月丁父憂平南王尙可喜以沿海兵民賴有德經營安輯疏請留之命在任守制先是從化增城清遠三水河源新寧等縣因蠶戶周玉李榮叛亂總督盧崇峻奏撥藩下及督提標兵分駐防守賊平後居民以客兵雜處爲苦八年三月有德疏請撤回分駐各兵原歸各標事下部議如所請九年正月請回籍治喪詔允之十年四月編修陳志紀疏言近因亢旱皇上朝夕求禱憂勤惕勵甘霖雖應民情未暢大小臣工稍有良知亦當兢兢戒懼用節儉以守官用廉恥以持身乃有曾爲總督巡撫者猶然繕治峻宇高堂連街極巷至取地方子女以爲娼優晝夜宴飲其不節儉無廉恥亦已甚矣近在輦轂之下悍然不守法度無所忌憚如此又何以責遠方之爲督撫大吏者而求其廉節不遜也疏入命志紀明指其人志紀覆奏曾爲總督之郎廷佐張長庚苗澄祖澤溥周有德張朝璘曾爲巡撫之許世昌莫不用民間賣兒貼婦之錢築愁築怨而有德朝璘則方在繕治許世昌取部下婦女教習歌舞且當皇上齋戒禱雨之日演戲如故事下部嚴察郎廷佐張長庚苗澄祖

澤溥張朝璘皆辯釋許世昌未取所管地方婦女曾於齋戒日演戲罰俸一年有德居喪營造又於陳志紀覆奏之先浼人囑志紀勿指其名革原職追奪誥命十三年二月起授四川總督時逆藩吳三桂反四川叛應之上命尙書莫洛爲經略駐西安策遣諸軍進征僞將軍吳之茂與僞總兵彭時亨等糾衆來犯廣元有德偕副都統科爾寬分道擊敗賊衆陣斬僞遊擊徐應昌等會莫洛將移師征四川敕有德同巡撫張德地固守朝天廣元諸路經理糧餉僞將軍何德成等自昭化赴二郎關謀奪我糧有德遣兵擊敗之德成等還踞昭化復廣元有德偕科爾寬等督兵擊敗之逐三十餘里尋以彭時亨復屯踞七盤朝天諸關刦奪略陽糧艘廣元缺餉賊衆窺伺陽平鎮西將軍錫卜臣駐營蟠龍山爲賊所刦復阻截餉運上命有德檄保寧兵回廣元調廣元兵回漢中固守陽平諸處值陝西提督王輔臣叛於寧羌賊黨分踞棧道陷秦州平涼十四年三月定西大將軍貝勒洞鄂率兵征輔臣奏以有德參贊軍務尋奉詔同副都統海爾圖運礮往秦州時賊衆踞關山有德奏請檄回棧道諸軍協力剿擊上允所請並令統領諸軍前進六月貝勒洞鄂復秦州關山賊亦遁七月有德疏請給還誥命吏部以非例不准上特允

其請十五年隨大將軍圖海征平涼王輔臣降圖海奏令有德還守西安十七年吳之茂等賊將尙踞秦嶺有德同副都統覺和託往剿擊敗賊衆僞遊擊王世祐等降是年部議前此運餉廣元遲誤罪革有德參贊任十八年二月調隨湖廣大軍進征授雲貴總督十月陝西大軍恢復漢中上諭部曰前者大兵進剿四川已破朝天等關直至保寧恢復在邇因張德地周有德錫卜臣駐廣元不將糧餉極力轉送軍前陝西總督巡撫亦不將糧餉極力轉送以致大軍難於久駐遂爾退回此數年以來使逆賊逋誅封疆未復兵民苦累休養無期皆周有德張德地錫卜臣及陝西總督巡撫怠玩遲延之故今大兵前抵蜀疆如督撫諸臣有誤餉運俱以軍法從事決不姑恕十二月議政王大臣以湖廣大軍進征雲貴其各省調撥及湖廣全省綠旗兵宜令一人統轄以湖廣總督蔡毓榮及有德列奏敕蔡毓榮爲綏遠將軍有德與江西總督董衛國俱聽節制有德尋疾作留駐常德十九年正月卒

覺羅舒恕

覺羅舒恕滿洲正白旗人武功郡王禮敦之三世孫也順治十二年任侍衛由三

等洊陟一等聖祖仁皇帝康熙八年六月授兵部督捕侍郎十年三月遷吏部侍郎十三年三月逆藩吳三桂陷湖南命內大臣希爾根爲定西將軍帥師之江西以舒恕參贊軍務尋署前鋒統領六月諭希爾根於每佐領下撥驍騎三名付舒恕剿賊時閩逆耿精忠遣賊犯江西陷撫州九月舒恕隨希爾根進剿擊敗逼城立營之賊賊自城中出拒又自建昌路率衆來犯連擊敗之賊尋棄撫州奔竄舒恕督兵追殺數十里十二月擊敗屯踞東鄉縣界賊衆十四年三月賊復犯撫州舒恕督參領邁蘭協領綽勒捫等迎剿敗之於七里岡追殺三十餘里時建昌已恢復餘賊尙據新城縣五月舒恕偕都統覺羅霍特督兵克復縣城擒僞遊擊許定國又偕總兵許貞敗賊於宜黃復宜黃崇仁樂安三縣未幾廣東告急上命舒恕率兵赴援十月授鎮南將軍時叛鎮馬雄偕吳逆僞將王宏勳糾衆犯高州勢猖甚舒恕擊之失利退駐肇慶十五年二月平南王尙可喜病篤其子之信通賊倡兵作亂舒恕退回贛州簡親王喇布以聞詔舒恕堅守南安梅嶺以保固江西十六年三月諭曰今大兵分路進征逆賊不暇窺贛其改授副都統莽依圖爲定南將軍率兵赴粵侍郎舒恕量留甲兵同巡撫佟國楨守贛州舒恕尋遣知縣郭

毓秀招降僞官劉定邦卽令持扎招撫僞總兵關世榮僞副將周先德等別遣遊擊陳廷玉招撫僞總兵張輝僞副將鄧瑞等復遣都司廖正英招撫僞總兵王受之合計降兵數萬先後疏聞六月授南安將軍七月簡親王以吳逆聚寇宜章將窺南韶入奏詔莽依圖迅赴韶州舒恕率兵守南安南雄爲之聲援舒恕尋遣副都統赫勒布率兵赴韶州十七年二月將軍額楚疏報總督金光祖潯州失利諭舒恕迅赴南雄鎮守兼顧韶州四月將軍穆占疏言郴州桂陽新復幅員遼濶賊來無兵可禦請敕舒恕移駐防守時尙之信已反正亦以宜章地方緊要請令舒恕駐守詔舒恕具南雄韶州情狀以聞舒恕疏言南韶爲湖南江西廣東三省接壤要地不可輕離十二月莽依圖疏報梧州危急詔曰南雄韶州已爲內地舒恕其率所屬兵迅赴梧州十八年四月卽軍前授都察院左都御史六月逆賊吳世琮糾衆犯南寧城中食盡旦夕且陷額楚等引前鋒兵擊敗西山賊衆舒恕同莽依圖督衆兵進預遣左翼兵潛出山後截賊歸路盡殲之世琮負重傷以數十騎遁南寧圍解十月舒恕以病劇乞回肇慶調理詔回京既召對諭大學士等曰朕以舒恕病劇必實故召還京師昨見之神色如故絕無病狀舒恕前在高州敗回

肇慶復自廣州退奔不據韶州南雄諸要地竟還贛州致江西全省震動又以巡撫金僞之言盡洩於尙之信又不欲將軍傅宏烈進兵恐嚇阻撓舒恕身爲將軍負如許重罪不思戮力自贖詐稱病劇肆行欺罔著羈候宗人府俟旋師之日嚴察議奏十九年七月裕親王福全等覆訊以舒恕身爲將軍詐稱患病不行奏明私以印信敕書交將軍莽依圖罪一又前進取高州至電白爲賊所敗罪二又自廣州敗出不據韶州南雄諸要處以退賊勢乃退還贛州致江西全省震動罪三又因巡撫金僞之言已知尙之信逆謀乃不行密奏反疑金僞之言爲吳逆離間計遣人潛告尙之信云以安其心辦理錯謬罪四又阻撓傅宏烈進兵罪五應革職任籍沒家產得旨革職免籍沒三十四年二月授鑲黃旗滿洲副都統六月出任山西右衛左翼護軍統領七月授寧夏將軍時上以噶爾丹欲掠墨爾根濟農諭安北將軍費揚古加意防備費揚古自請率兵駐防阿爾察圖蘇穆哈達地以舒恕率兵一千五百往駐歸化城北額勒蘇臺地十一月授費揚古撫遠大將軍以舒恕同都統伊勒慎等參贊三十五年正月上親征噶爾丹由獨石口出中路授舒恕揚威將軍率右衛兵隨費揚古出西路五月費揚古擊敗噶爾丹於昭莫

多舒恕率右衛兵還駐納喇時六月奉詔回歸化城籌辦凱旋軍糧八月疏請仍赴喀喇穆倫費揚古軍前十一月上駐蹕棟斯拉召費揚古議軍務以舒恕暫署大將軍事三十六年閏三月詔費揚古移師郭多里巴勒噶遜舒恕仍以揚威將軍留駐喀喇穆倫屢收納降人遣送入京並偵奏噶爾丹困窘狀五月費揚古疏報噶爾丹竄死詔敍功予舒恕雲騎尉世職召還京三十七年三月擢正藍旗滿洲都統四十年十二月以病乞休致仕四十二年五月卒年六十有五賜祭葬如例子延壽襲雲騎尉由侍衛洊擢歸化城副都統右衛將軍

穆成額

穆成額滿洲鑲紅旗人姓那穆都魯氏西安將軍富喀禪之子也襲父三等子世爵康熙十三年二月耿精忠叛應吳三桂江西寧都廣信各屬騷動聖祖仁皇帝命康親王傑書爲大將軍往征福建復命定南將軍希爾根副將軍哈勒哈齊平定江西六月令穆成額署副都統事與副都統倭赫率大兵赴希爾根軍前未至而精忠陷石城犯寧都穆成額奉諭兼程速赴江西希爾根等方統兵援撫州穆成額遂分兵守南昌九月吳三桂自長沙遣賊將犯袁州詔穆成額率所部往與

總兵趙應奎併力固守以俟大軍會剿遣將軍尼雅翰率駐防江寧兵及副都統碩塔等援之十月僞總兵黃乃忠等合賊衆數萬自萍鄉來犯袁州穆成額與副都統幹都海倭赫等敗賊於西村斬殺萬餘復登山奮擊賊大挫衄追斬五千餘級復與趙應奎分兵二路疾趨萬載縣環城攻擊賊出拒敵奮擊敗之陣斬賊渠邱以祥擒僞官童聖功收獲俘殪無算復其城十一月僞總兵張泰竊據安福縣穆成額偕參領色埒等分路進剿殺賊五千餘復安福縣時耿逆未平叛賊劉進忠等陰連鄭錦侵瀕海郡邑平南王尙可喜與總兵黃芳泰連疏請發大兵至潮州上命尼雅翰與鎮南將軍侍郎舒恕率兵赴廣東穆成額參贊軍務十四年大兵恢復南雄始興守備李光明通敵陷城穆成額與總兵張星耀統衆攻剿陣斬敵將郭梓擒光明及所署僞官等復始興縣城明年五月尙之信叛韶州南雄應之穆成額隨舒恕等退保南安贛州十月與江西巡撫佟國禎合兵剿滅贛州附近諸賊復萬安縣復與副都統額赫訥等屢敗逆賊於南康縣之固鎮堡十六年三月詔舒恕等鎮守贛州而以副都統莽依圖爲鎮南將軍征廣東仍敕穆成額與額赫訥參贊軍務駐兵韶州莽依圖聞賊黨劉進忠寇潮州乃留穆成額守韶

州而自率兵赴廣東七月三桂遣賊犯韶州穆成額與副都統赫勒布督兵急擊卻之及廣韶悉定仍與莽依圖進兵廣西十七年三月吳逆僞將分犯潯梧桂林平樂等郡有旨諭莽依圖鎮梧州令穆成額與將軍額楚都統勒貝巡撫傅宏烈統兵協剿七月兵至鬱林戰失利退保藤縣十二月藤縣失守上復遣平南王尙之信及將軍舒恕率師赴援賊乃遁走二十二年議政王大臣等以穆成額藤縣失機不能禦賊且不收陣亡士卒骸骨應褫職籍沒編入內務府佐領得旨免其編隸尋以其弟新柱襲世爵

桑格

桑格滿洲正白旗人姓喜塔臘氏戶部侍郎庫禮之子庫禮以軍功得騎都尉世職又以考滿及遇恩詔晉一等輕車都尉加一雲騎尉長子堯泰襲旋卒停襲順治十七年更定襲例庫禮之一等輕車都尉加一雲騎尉應世襲桑格由三等待衛襲父職聖祖仁皇帝康熙六年以桑格善射擢一等待衛十五年五月授護軍統領十三年三月逆藩耿精忠叛應吳三桂上命定南將軍希爾根帥師赴江西以桑格參贊軍務八月奉諭曰江右爲粵東咽喉江浙唇齒相關綦重今兵民之

心尙持兩端若不先滅地方小醜大兵難以前進爾當協同將軍領重兵進剿毋使兵力單弱致有疏失時耿精忠之僞都督易明陷撫州桑格同副都統席布率兵規復賊衆四萬餘迎戰擊敗之進薄撫州城賊衆自建昌至倚城結壘合城內賊抗拒桑格同席布督兵奮擊克賊壘連敗賊衆賊棄城竄遁追剿百餘里復撫州入城駐守十月易明糾賊五萬復自建昌來犯桑格甫渡河擊之賊墮水死者無算斬賊將楊三李茂等於陣十一月希爾根移師撫州桑格率兵趨剿距城九十里之碣石隘口斬賊甚衆十四年正月剿賊上高縣斬僞總兵朱一典謝以泰等遂乘勢破賊將阮國棟等於新昌縣北山復二縣城進圍東鄉克之復擊敗賊衆於長興鄉連破賊營斬賊將邵連登等易明引賊竄遁遂復建昌六月鎮南將軍尼雅翰以廣州兵少請敕桑格率兵赴廣東總統軍士守禦詔以江西賊寇未平令前鋒統領覺羅舒恕移兵前往桑格仍留援剿十五年二月安親王岳樂統師由袁州剿吳三桂賊帥夏國相等於萍鄉桑格合諸軍並進破賊十二寨於來龍山夏國相等竄走長沙十八年二月隨安親王復長沙上賜桑格詩有百戰威名早已揚之句八月進征武岡賊帥吳國貴馬寶張祖法等踞隘口拒戰桑格偕

副都統伊巴漢等督兵攻剿越三晝夜以礮擊斃吳國貴賊衆悉潰追剿至楓木嶺之木瓜橋十一月安親王奏令率每佐領下護軍三名還京二十年五月詔以桑格前次出征尙能奮勉回京後委頓不堪解護軍統領任以世職隨旗行走三十五年二月上親征噶爾丹桑格署護軍統領分管鑲白旗大營五月師至克魯倫河同內大臣阿密達請追剿逃寇得旨俞允分隸左翼軍隨平北將軍馬思喀追剿至巴顏烏蘭西路軍已擊敗噶爾丹於昭莫多會師收集降衆護送至張家口尋還京命復護軍統領原品三十八年二月卒子阿住襲世職

塔勒岱

塔勒岱滿洲鑲白旗人姓博利哩氏先世居黑龍江祖額徵古太宗文皇帝天聰時來歸塔勒岱初任前鋒校聖祖仁皇帝康熙元年隨定西將軍愛星阿由雲南入緬甸追擒明桂王朱由榔在事有功十年授前鋒侍衛十三年逆藩吳三桂之黨譚宏吳之茂王屏藩等踞四川塔勒岱隨前鋒統領穆占剿賊於野狐嶺賊以千餘衆伏林箐出步騎百餘誘戰塔勒岱先衆迎擊敗賊盡發其伏分隊撲剿賊俱竄走復擊敗僞總兵葉某於陽平關進征保寧僞總兵鄭歪嘴吳應龍韓天福

等先後率衆水陸來犯咸擊卻之自蟠龍山還至郿嶺及龍潭驛兩遇賊衆並邀擊之潰遁敍功予雲騎尉世職值陝西提督王輔臣叛踞秦州平涼塔勒岱隨穆占征剿敗僞總兵高鼎於隴州進圍秦州擊賊兵之自平涼保寧來援者秦州既下遂趨平涼屢擊敗迎戰賊衆十五年王輔臣降吳三桂尙踞湖南穆占奉詔爲征南將軍移師湖南塔勒岱率兵隨十七年駐師攸縣賊將王國佐屢率衆犯城塔勒岱戰卻之復敗僞總兵黃士彪裘萬寶於酃縣桂陽州諸處十八年敗賊將吳國貴吳應麒等於永州沅州凱旋授護軍參領二十年調前鋒參領二十三年擢前鋒統領二十四年擢鑲白旗蒙古都統彙敍陝西湖南軍功晉世職爲騎都尉兼一雲騎尉二十五年七月卒賜祭葬如典禮諡勇壯子奇蘭布襲職

賴塔

賴塔滿洲正白旗人姓那穆都魯氏和碩額駙康古禮第四子也年十四授三等侍衛太宗文皇帝天聰九年因其叔父喀克都哩欲逃瓦爾喀事覺坐黜罷崇德六年隨大軍圍明錦州擊松山杏山敵兵屢有斬獲明年冬隨貝勒阿巴泰征明越燕京趨山東攻新城高陽霸州壽光博興等城皆先登身中五創賜人戶牲畜

銀幣授前鋒侍衛世祖章皇帝順治元年五月隨大軍討流賊李自成敗賊將唐通於一片石追擊自成至安肅望都十一月授護軍參領隨豫親王多鐸由河南征陝西連敗自成賊衆於潼關明年隨豫親王征江南攻克揚州取江寧追敗明福王朱由崧於蕪湖敍功予雲騎尉世職三年隨端重親王博洛征福建明唐王朱聿鍵遁汀州賴塔率兵破其城晉世職騎都尉五年明桂王朱由榔據湖南賴塔隨鄭親王濟爾哈朗往征六年四月師至衡州敗僞總兵陶養用於青草橋又敗僞伯胡一清萬五千衆於府南山進克祁陽僞總兵周進唐於大忠橋拒敵擊敗之復斬其僞副將等於王公嶺一清旋與僞總兵王進才各率馬步數千人拒河岸亦敗潰賴塔進擊僞總督譚宏於道州又擊一清及僞伯焦璉等於全州皆聞風竄遁七年八月兩遇恩詔洊晉二等輕車都尉初喀克都哩獲罪康古禮之世管佐領亦坐革太宗諭以後有報效仍准給還至是賴塔請於部得旨復之卽予賴塔承管十一年流賊張獻忠餘黨李定國犯廣東賴塔隨都統朱瑪喇等往征屢敗賊兵解新會圍定國遁走追敗之興業及橫州敍功晉爵三等男十三年擢護軍統領十六年海敵鄭成功犯江寧命安南將軍達素同賴塔率師往征至

則鄭已敗遁遂移師福建明年賴塔同都統索渾剿賊廈門官軍不習水戰失利
聖祖仁皇帝康熙元年論罪罷任革世職及佐領二年署前鋒統領隨靖西將軍
穆哩瑪征流賊李來亨等於茅麓山屢戰皆捷賊平凱旋復授護軍統領兼佐領
八年擢正白旗蒙古都統十三年逆藩耿精忠叛命賴塔爲平南將軍統兵赴浙
江剿禦精忠賊黨犯金華賴塔遣副都統瑪哈達雅塔哩拉哈等擊走之復義烏
及諸暨二縣賴塔進駐衢州僞都督周列率賊二萬由常山來犯賴塔遣副都統
瑚圖等邀擊於焦國擒斬過半僞總兵桑明旋以五萬衆犯衢州賴塔同總督李
之芳遣兵迎擊復斬級萬餘十四年督兵擊敗僞將軍馬九玉等於黃潭口大鐵
村王屋山杭埠南塘諸處僞副將李廷魁屯衢州城北元口山賴塔督兵乘夜攻
圍破走之焚其木城九玉同賊將林福等退據大溪灘時康親王傑書爲大將軍
駐金華賴塔奉詔參贊軍務並分駐衢州仍佩平南將軍印屢擊卻來犯賊衆十
五年八月康親王進衢州賴塔循例歸將軍印以都統任參贊先率兵馳擊大溪
灘斷賊糧道復江山馬九玉潛遁九月賴塔同瑪哈達等率兵破仙霞關僞參將
金應虎降進援浦城又同副都統吉勒塔布等敗賊於建陽克其城進復建寧府

十月隨康親王抵延平精忠窮蹙迎降時漳泉興化俱爲海敵鄭錦所踞十六年正月賴塔同寧海將軍拉哈達剿敵興化連破二十六營陣斬僞總督趙得勝等復興化僞總兵郭維藩以仙遊降三月同拉哈達討叛鎮劉進忠於潮州進忠迎降康親王奏復授賴塔平南將軍印守潮州十七年四月鄭錦之僞總統劉國軒陷平和犯海澄上命賴塔移師赴援彼斷江東橋及長泰同安諸小徑我師弗克進六月敵陷海澄漳平同安惠安犯泉州九月賴塔與總督姚啟聖合兵進討大敗之於蜈蚣山破其七營斬四千餘級復長泰十月復敗之於漳州萬松關十八年僞將軍吳淑何佑等犯長泰賴塔同提督楊捷等分道進擊斬二千餘級生擒僞總兵副將三人劉國軒復犯江東橋賴塔迎擊敗之退逃太平寨追斬千餘級十九年二月同姚啟聖楊捷等剿敵海澄招降僞總兵蘇堪復其城聞水師提督萬正色已取海壇賴塔由松嶼進征僞將軍陳昌率衆迎降鄭錦遁臺灣廈門金門相繼定四月調本旗滿洲都統仍爲平南將軍守潮州尋奉命移駐廣州會尙之信獲罪逮繫其藩下長史李天植等怨都統王國棟發難誘殺之藩兵咸畏罪思亂賴塔密承詔旨以罪不株連慰撫藩兵自率兵圍之信第收捕天植及同謀

者繫獄候旨餘釋勿問時逆孽吳世璠尙據雲南定遠大將軍貝子彰泰自湖南進征貴州上以賴塔在福建廣東勞績素著授爲平南大將軍赴廣西調遣滿漢兵由南寧直進雲南賴塔遂率兵由田州泗城進西隆州僞總兵周應龍迎降僞將軍何繼祖等擁賊數萬於石門坎築壘拒敵石門坎者距安籠所三十里地峻隘稱天險賴塔令都統貝勒希福瑪奇護軍統領額赫訥等率師直前自與副都統洪世祿赫呀布總督金光祖分兵爲二由間道躡其後二十年正月度賊無備飭前軍進攻賊倉卒出禦後軍履險上前後來擊大敗賊衆奪其隘口進復安籠城降僞總兵陳義魁何繼祖復糾僞將軍詹養王有功等率二萬人據黃草壩列衆拒戰二月二日賴塔督兵奮擊自卯至未奪賊營二十三生擒詹養王有功及賊衆千餘獲其象馬上以賴塔自廣西深入雲南獨先諸路大敗逆賊温旨嘉獎師抵曲靖降僞總兵尹士元僞道員劉世忠等隨遣兵取霑益州斷賊中路僞將軍線絨等皆遁歸分遣希福瑪奇等復雲龍州易龍所及楊林城營總碩塔等克嵩明州其他賊營聞風解散遂會合彰泰軍駐營歸化寺僞將軍胡國柄劉起龍等離城拒戰賴塔與彰泰分兵進擊自卯至酉賊大潰斬國柄起龍及僞總兵九

生擒賊六百餘逆孽吳世璠嬰城守陰調賊將馬寶胡國柱夏國相等還救大軍並力環攻賊內亂欲擒世璠出獻世璠自殺線絨等開城降遂磔僞大學士方光琛等於軍前戮世璠屍傳首京師夏國相竄廣南賴塔與彰泰檄土官儂朋總兵李國樑率師追剿擒之西板橋又遣希福等追剿胡國柱於雲龍州國柱縊其黨王紱李匡自焚餘衆悉降雲南平二十一年十月大軍凱旋上親率諸王大臣郊勞於盧溝橋西二十里外御黃幄詔彰泰賴塔行抱見禮還京仍任都統二十二年以隱匿尙之信藩下應入官婦女事覺應勘問上曰賴塔自福建廣東雲南宣力勤勞樹立大功勿因細微事遂以非禮加之致失朕眷顧功臣之意下所司集質得實請革職治罪詔從寬削級罰俸明年十二月卒予祭葬如典禮加祭二次諡襄毅二十四年六月上諭王大臣等曰平定雲南賴塔之功最大縱有他過爲人訐告朕究不加罪諸臣曰皇上俯念賴塔有功曲賜保全不特效力行間者皆歡忻鼓舞卽臣等亦莫不感戴二十五年追敘其功予一等男爵子費葉楞襲雍正五年八月世宗憲皇帝諭曰原任都統賴塔當三逆變亂時統兵征剿克復雲南功績懋著朕恭閱聖祖仁皇帝實錄備悉其詳因伊身有過犯功過相抵是以

未封公爵止授一等男在當日之不優封賴塔者欲使立功之人咸知儆惕收斂不可恃功驕肆妄爲今事歷多年後人已知鑒戒奉法著追封賴塔一等公令伊孫博爾屯承襲以示朕眷念舊臣之意八年始建賢良祠詔以賴塔與大學士圖海等並入祀九年加公號曰褒績

趙良棟

趙良棟甘肅寧夏人世祖章皇帝順治二年大兵定陝西良棟應募隸總督孟喬芳標下署潼關守備隨征秦州鞏昌擊走叛將賀珍武大定授寧夏屯田水利都司五年隨征河西叛回擒其渠丁國棟敘功擢高臺遊擊十三年以經略洪承疇薦隨征貴州雲南任督標中軍副將聖祖仁皇帝康熙元年擢雲南廣羅總兵先後剿平馬乃隴納水西諸苗猱有功四年調貴州平遠總兵尋以憂去任八年起爲大同總兵十一年調天津十五年甘肅提督張勇薦良棟才略過人堪鎮寧夏詔授良棟爲寧夏提督先是逆藩吳三桂反叛鎮吳之茂王輔臣等應之分踞固原慶陽平涼諸郡陝西提督陳福領寧夏兵征固原中途兵變遇害上命總督哈占等察其事未得實至是良棟入覲請留家口居京師自簡精兵百人疾馳赴鎮

又謂寧夏亂兵宜誅首惡宥脅從上可其奏良棟既之鎮宣恩諭撫慰旋察知害陳福者平羅營兵閹國賢陳進忠倡亂者把總劉德而參將熊虎與其謀乃先以調遣散其黨羽旋逮熊虎劉德閹國賢陳進忠聲其罪請旨斬之是時大將軍圖海督師圍平涼王輔臣降慶陽固原俱下上命圖海飭將士守陝西剿撫餘賊分兵助征湖南暫停進取四川良棟與將軍王進寶並聽圖海檄調屢移兵防剿秦州西和禮縣諸處十八年四月良棟疏言寧夏兵舊習驕縱臣三年訓練漸遵紀律並嚴禁侵剋額餉衆志和協咸思奮勉敵愾臣年漸老勿乘時努力有虛簡任今湖南底定宜取漢中興安以圖四川臣願精選所屬步騎五千獨當一路上嘉許之下圖海議行圖海請俟棧道益門鎮諸處賊壘削平分四路進取既而涼州提督孫思克言綠旗兵皆不强壯未可用請俟來春多調守邊滿洲兵並進奉旨切責乃以十月定師期圖海與將軍佛尼勒征興安孫思克與將軍畢力克圖征略陽王進寶與總兵朱雅達征鳳陽良棟獨率寧夏兵征徽縣於是良棟進師密樹關先襲黃渚關以分賊勢遂大破賊復徽縣時孫思克甫至階州良棟遂趨略陽擊走吳之茂復略陽城遣兵取陽平關沔沔縣王進寶亦復鳳縣定漢中府良

棟會之於寧羌各奏捷詔授良棟勇略將軍仍管寧夏提督事十九年正月良棟與王進寶分道進師連挫賊衆於白水壩石峽溝青箐山招降龍安府渡明月江過綿竹縣賊驚潰僞將軍汪文元僞巡撫張文德等降遂復成都得旨嘉獎擢雲貴總督加兵部尙書銜仍管將軍軍事良棟聞命謂寧夏提督有代者則鎮兵不能隨征因疏辭雲貴總督上弗許會部議寧夏宜如舊制設總兵詔卽以良棟子蔭生宏燦任之率鎮兵隨征時王進寶亦復保寧與建威將軍吳丹等規復順慶重慶及遵義良棟分遣遊擊冶國用等西徇雅州復象嶺建昌諸衛東徇敘州復納溪永寧等縣疏請諭趣湖廣兵速取貴州廣西兵速取雲南並敕陝西四川重臣合籌運餉濟軍剋期進剿一自保寧出永寧達雲南霑益州一自成都出建昌達雲南武定府旨是其言以疏示在事大臣令協謀定議而行尋議湖廣廣西四川諸路兵約期並進吳丹出永寧良棟出建昌會逆賊吳世璠遣其黨胡國柱夏國相等陷永寧犯瀘州敘州復聚寇建昌良棟檄總兵朱衣客率兵八千援建昌朱衣客旣至與賊戰弗勝退駐雅州我兵之在建昌城者食盡亦棄城還良棟疏劾吳丹擁兵不進致永寧陷賊復劾朱衣客退遁罪狀詔吳丹解將軍任以佛尼勒

代之朱衣客革職逮訊二十年良棟遣宏燦與總兵李芳述偏圖等破賊於鳳凰村觀音崖賊之在敘州瀘州永寧者皆遁良棟遂會師夾江由雅州進征復建昌渡金沙江達武定時大將軍貝子彰泰統湖廣廣西諸路兵圍雲南城於城東歸化城列營西互雞關賊負固抗拒數月不下良棟至奪橋薄城彰泰令諸軍分進良棟攻南壩連破賊壘奪土橋新橋至得勝橋先薄城諸軍繼之賊不能抗吳世璠自殺賊衆降雲南平二十一年良棟奉詔還京初朱衣客之逮訊也具疏自辯謂良棟與兵少後應又不至是以退還時王進寶亦上疏謂建昌之陷咎在良棟良棟因復劾朱衣客欺飾狡辯且謂其辯疏由進寶所爲上以軍旅方殷命俟事平時察議至是諭曰當逆賊竊據漢中領兵諸將咸以恢復爲難獨趙良棟首先倡議進剿與王進寶同取漢中嗣因意見不同嫌隙漸生遂分路進兵直取成都而王進寶亦取保寧若成都不下保寧未易卽拔保寧弗定成都難以保守二人功績俱著封疆使能公爾忘私和衷共濟則乘勝長驅滇黔賊衆可卽殄滅何復遷延歲月耶是時賊衆入川抗拒中路空虛故大兵得乘機進取沅州鎮遠貴陽等處而川中賊勢復張已恢之疆土幾至再陷此皆由不能和衷之所致也二人

賦性鹵莽不諳大體各懷私忿互相攻訐朕洞悉情事念其功績並茂惟欲保全所有互訐奏章俱行發還概不究問其遲於救援有關軍機仍察議如例於是部議失陷永寧建昌罪朱衣客論斬吳丹論革職籍沒良棟論革職並得旨從寬朱衣客給本主爲奴吳丹免籍沒改授良棟鑾儀衛鑾儀使二十二年四月良棟疏述雲南四川戰功請敕部察議事下王大臣等核議謂良棟失機建昌應以功抵罪止錄敘隨征將士時宏燦任川北總兵與李芳述偏圖並加左都督銜十月良棟以病乞歸寧夏允之二十五年四月上念良棟於雲南凱旋時能恪守法紀廉潔自持優詔嘉獎復將軍總督原銜二十七年入朝自訴戰功並隨征將士多屈抑奉諭歸里後牒部具奏明年奏入得旨趙良棟首倡進取四川又直抵雲南省城奮勇克取得勝橋等要地逼近城郭立營勞績茂著所屬官員亦俱同心效力其並與議敘於是授良棟騎都尉世職三十年噶爾丹侵擾邊境詔西安將軍尼雅翰等赴寧夏防禦凡軍事與良棟酌議以行三十二年三月以寧夏總兵馮德昌赴甘州軍營命良棟暫管寧夏鎮兵十月良棟疏劾德昌剋減軍糧營馬多斃德昌坐罷任調登州總兵王化行代鎮寧夏三十三年六月命良棟率寧夏火器

營兵二百赴土喇防禦噶爾丹旋因土喇無警召良棟入朝三十四年三月良棟復自訴其功績甚多爲大將軍圖海彰泰所隱蔽且追咎大學士明珠弗爲奏請優敘上責其器量褊隘還其疏仍敕部優敘部議授爵三等子詔晉爲一等良棟願留京乞賜田宅御史龔翔麟劾其驕縱矜功越例乞請當議罪上鑒其年老家貧宣諭原宥賚白金二千兩令歸里三十六年正月奉詔曰頃尙書馬齊自寧夏回奏卿臥病不能動履深軫朕懷特賜人參鹿尾馳示存問尙其善加調攝俾夙疾頓痊副朕眷注三月良棟卒年七十有七時上親征噶爾丹次榆林諭迎駕諸臣曰趙良棟偉男子也行間著有勞績但性躁心窄每與人不合有時奏事朕前亦言語粗率朕保全功臣終優容之彼所奏無不准行嘗賜藥餌望其疾愈今聞奄逝殊爲惻然宜爲其妻子區處使之安生駕至寧夏命皇長子臨其喪賜祭葬如例謚襄忠次子宏燮襲爵世宗憲皇帝時良棟入祀賢良祠乾隆三十二年上念良棟征剿吳逆時茂建勳績其一等子爵特予世襲罔替

王進寶子用予

王進寶甘肅靖遠人初隨陝西總督孟喬芳平河西叛回授守備隸甘肅總兵張

勇標下順治十一年張勇調經略右標總兵進寶隨往湖南十五年進征貴州師次十萬谿懸崖千仞僞安西王李定國使僞都督羅大順扼據險要進寶率衆攀崖直上搗其巢賊衆潰以功遷經略右標中營遊擊康熙二年張勇任甘肅提督奏授提標左營遊擊尋隨張勇討平西羌授本營參將時羌人乞駐牧大草灘張勇用進寶議持不可於是卽單于城故址建永固城以進寶爲副將駐之十二年擢西寧總兵明年冬陝西總督王輔臣叛應逆藩吳三桂陷蘭州斷浮橋以拒河西兵進寶率師進討十四年二月師次黃河進寶以革囊結筏自蔡灣夜渡抵皋蘭龍尾山大破賊衆擒僞遊擊李廷玉等乘勝東拔金縣安定復西攻臨洮會大雪偵賊無備遂襲破之輔臣遣使持吳逆僞劄來招進寶以奏得旨嘉獎加銜左都督四月進攻蘭州賊兵千五百人出東門迎戰進寶率衆奮擊自辰至午擒斬過半別遣兵分路剿殺賊退保不敢出我兵環圍之斷賊糧運六月賊造筏百餘謀潛遁進寶分兵沿河伺擊賊勢窮蹙進寶乃遣人招諭僞總兵趙士昇等率衆降遂復蘭州十五年正月詔嘉進寶素著勞績克殫忠誠授陝西提督兼西寧總兵暫駐秦州時僞將軍王屏藩吳之茂互爲聲援窺伺秦州二月吳之茂率賊衆

進踞北山絕我餉道進寶會將軍佛尼勒進剿大敗之生擒僞總兵徐大仁復遣兵馳擊敗賊衆於羅家堡又敗之鹽關賊復集潰衆萬餘築壘排椿據鐵葉硤紅山堡潛出賊兵接運芻糧進寶遣兵撲剿大敗賊衆於牡丹園擒斬僞官獲糧械無算五月撫遠大將軍圖海統兵進攻平涼輔臣勢窮蹙引四川叛鎮譚宏爲援連兵犯通渭進寶指揮將士急擊破之降其僞官復靜寧州城輔臣尋詣圖海軍前降六月進寶率兵次樂門甫駐營吳之茂遣賊衆來犯進寶統兵環擊擒其僞總兵遊擊等斬之復與將軍佛尼勒合兵攻剿屢戰克捷吳之茂僅以十餘騎逾北山遁走平原固原悉定大將軍圖海奏陝西提督原駐平涼固原與平原密邇據秦省形勝宜令進寶駐鎮詔進寶移駐固原兼攝固原總兵事八月敕功議授二等男諭曰王進寶宿將重臣矢心報國兼以訓練士卒忠義素孚故能身先行陣所向克捷朕甚嘉之於軍功議敘之外從優加一等男授奮武將軍仍兼提督平涼諸路軍務十七年四月進寶復慶陽斬僞總兵袁本秀及賊衆二百餘人十八年十月進寶與提督趙良棟等分兵四路規復漢中進寶偕總兵費雅達由棧道進先是進寶奏請令子用予率兵往剿俾練習戰陣上允其奏遂授用予副將

進寶復疏言臣父子均在秦中例應迴避詔曰王進寶父子統率官兵誅剿賊寇保守封疆著有勞績王用予仍留與伊父王進寶同守秦中要地至是從征寶雞進寶遣用予擊賊紅花鋪大敗之復鳳縣兩當縣進軍武關令用予率偏師繞出關後而自以大軍當其前賊腹背受敵皆潰走擒僞總兵羅朝興等奪雞頭關直抵漢中王屏藩率賊衆自青石關走廣元進寶復遣兵躡擊賊衆奔竄降其僞將軍楊永祚僞總兵孫啟耀遂盡復漢中地得旨褒獎時趙良棟亦恢復略陽命進寶與趙良棟進定四川并敕將軍吳丹鄂克濟哈率海州大兵分繼其後進寶自青石關至神宣驛聞賊踞朝天關督兵躍馬直前賊驚竄走疾馳至廣元斬賊無算遂復其城十九年正月分兵三路趨保寧距城二十里當孔道而軍賊衆二萬來犯進寶率兵奮擊大破之追至錦屏山連拔賊壘奪浮橋薄保寧城用予斬門突入進寶麾兵繼進王屏藩計窮與僞將軍陳君極皆自縊吳之茂及僞將軍張起龍僞總兵郭天春等十七員並就擒保寧平別遣兵克復昭化劍州蒼溪蓬州廣安合州西充岳池等州縣時趙良棟已復成都授雲貴總督詔進寶駐守四川擢用予松潘總兵進寶尋以疾再疏乞休命回固原就醫以用予駐保寧暫代管

標下兵尋改用予爲固原總兵趙良棟以進征滇黔奏調川陝各營兵隨征固原兵亦多檄調進寶以本標兵宜留鎮守奏停撥遣詔允之未幾賊將胡國柱夏國相等由黔入川譚宏彭時亨復叛永寧建昌相繼失守良棟劾進寶擁兵不救進寶以臥疾固原疏辯且言建昌之陷咎在良棟詔進寶馳赴保寧於是進寶復統固原兵駐保寧是年冬敘功進寶晉三等子用予加左都督授雲騎尉職明年賊將馬寶犯敘州用予擊敗賊衆恢復納溪江安仁懷合江等城降其僞將軍何德成等馬寶竄雲南用予駐敘州尋奉詔率所部兵馳赴永寧駐守二十一年滇黔旣平上詔進寶及趙良棟至京命王大臣發還前此互訐奏章宣諭二臣功績並茂欲矜全保護之其不諳大體私忿攻訐概不究問事詳趙良棟傳賜服物仍還鎮二十三年五月疾甚再請休時用予已調太原總兵命馳驛偕太醫視疾且調用予甘肅總兵二十四年八月卒年六十得旨王進寶性篤忠貞威望素重率先征剿賊寇勇略兼優邊防戎務籌畫周詳勲猷茂著忽聞溘逝深爲軫惻下所司優卹尋贈太子太保賜祭葬如典禮諡忠勇世宗憲皇帝雍正十年入祀賢良祠初次襲爵者卽用予合其軍功議敘并雲騎尉爲二等子後再襲仍爲三等子今

上乾隆三十三年詔予世襲罔替

佛尼勒

佛尼勒滿洲鑲紅旗人姓科奇理氏父索爾和諾從征明攻河間戰歿佛尼勒襲騎都尉世職順治五年授西安駐防佐領從剿李自成餘黨於陝西委署營總尋擢協領晉世職至二等輕車都尉康熙八年擢西安副都統十三年同西安將軍瓦爾喀由四川進討吳三桂行至棧道叛鎮譚洪據陽平關佛尼勒等自野狐嶺進征斬賊三千餘賊棄關遁繼敗賊將石存禮於朝天關追至沙河驛僞總兵彭時亨以舟師逆戰擊之潰奪戰艦四遂進征保寧叛鎮吳之茂抗拒我軍鑿壕塹與相持尋以糧艘爲賊所劫饑不繼還駐漢中賊邀戰於中途擊走之又敗賊於槐樹驛小郿嶺十四年擢西安將軍加振武將軍銜隨貝勒洞鄂進征王輔臣賊將高鼎立寨於關山河岸佛尼勒同穆占等斬獲甚衆遂破賊寨乘勝追至渭河橋進薄秦州賊伺我師壁壘未定出城衝突佛尼勒率軍遮擊賊不能犯旋攻克東西二關賊夜犯正黃旗營擊之盡殲賊衆數千掠仙逸關佛尼勒慮斷饒道分兵赴援賊踰山遁追躡之搜翦略盡因令參領嵩祝留守仙逸關而自率兵趨隴

州賊縱火山澤間佛尼勒曰賊謀欲燒絕我軍進路耳若不增兵策應則軍食難以輓運因駐兵隴州防賊黨窺伺時大兵攻秦州數月不下賊之自四川及平涼者挾其衆萬餘來援城中賊與應者亦八千餘佛尼勒之師還自隴州與大兵合擊擒斬僞總兵李國棟等殪賊三千餘遂復秦州及禮縣西和清水伏羌諸邑上命佛尼勒領兵開棧道援將軍席卜臣於漢中賊於長寧驛滴水崖及尖插屏嶺屢抗我師擊之皆潰竄招撫陷賊村寨居民三千餘十五年二月吳之茂糾賊萬餘犯秦州佛尼勒同提督王進寶督兵禦戰斬級二千餘生擒僞總兵徐大仁獲器械輜重無算三月偵賊由成縣禮縣運糧因遣兵邀擊於鹽關及羅家堡牡丹園擒斬護糧賊衆獲馬羸焚其糧尋擊敗僞總兵李國良等於清水縣復靜寧州六月復擊敗吳之茂於牡丹園追剿至西河北山之茂僅以十餘騎竄遁十六年四月追論前此自保寧退歸漢中諸將罪降佛尼勒世職爲騎都尉削振武將軍銜仍署西安將軍事十七年閏三月同副都統吳丹等連敗賊於牛頭山香泉等處七月引兵駐守寶鷄防棧道諸險要賊窺棧道之益門鎮擊卻之十八年隨撫遠大將軍圖海進征興安偵賊在梁河關佛尼勒領隊先驅至火神崖擊走僞總

兵王遇隆遂渡乾玉河拔梁河關復興安城尋會王進寶軍於保寧十九年正月同總兵王朝海招降潼川府城及鹽亭中江射洪諸縣又敗賊於豹子山諸處賊渡江遁遂復瀘州冬逆賊吳世璠使其黨胡國柱等糾賊踞敘州陷永寧詔授佛尼勒建威將軍調遣永寧一路兵剿賊二十年春賊衆二萬餘犯寶壩大溪口諸處佛尼勒率兵進擊敗之乘勝恢復馬湖府賊將宋國輔陸道清等詣軍門獻永寧城降胡國柱亦棄敘州遁佛尼勒奉命駐守敘州八月命統西安駐防滿洲兵之征四川者還鎮漢中二十一年卒於官雍正十年入祀賢良祠乾隆元年追諡恭靖第三子託留襲世職官至黑龍江將軍

希福

希福滿洲正紅旗人姓他塔喇氏世居安楚拉庫路祖羅屯國初率八百戶來歸列五大臣編佐領父哈寧阿由護軍參領隨征錦州松山大軍入山海關擊敗流賊李自成追至望都縣總敘前功授騎都尉世職卒子漢初罕襲從征蘇尼特部騰機思等陣亡賜三等輕車都尉弟班初罕襲遇恩詔晉二等輕車都尉希福班初罕兄初任二等侍衛順治七年襲世職兩遇恩詔晉一等輕車都尉又一雲騎

尉授護軍參領康熙七年擢正黃旗蒙古副都統十三年逆藩吳三桂叛希福隨大將軍順承郡王勒爾錦往湖廣剿禦十三年陝西提督王輔臣叛於寧羌據平涼秦州命希福同雲貴總督鄂善等率現駐襄陽蒙古兵移守興安漢中十四年三月貝勒洞鄂征隴州復關山進兵秦州希福攻克東西二關十二年調守隴州十六年遷前鋒統領十七年閏三月詔赴湖南駐守茶陵十一月隨簡親王喇布由衡州之安仁縣進征十八年正月希福率兵攻衡州府夜半薄城下統署前鋒參領戴屯等奪門入賊帥吳國貴夏國相等驚遁復其城得旨嘉獎下部議敘六月遷正紅旗滿洲都統時僞將軍馬承蔭以南寧降上命希福率所部兵赴廣西同鎮南將軍莽依圖自南寧進定雲南十九年五月馬承蔭復叛糾二萬衆迎戰於陶登希福偕副都統馬世泰進擊之賊大敗遁追殫甚衆閏八月奏南寧兵缺馬大軍深入途險遠恐誤軍機上諭以柳州南寧桂林駐兵之馬通融給發並趣都統瑪奇送馬赴南寧時莽依圖卒於軍以都統賚塔爲征南大將軍十二月希福隨賚塔至西隆州僞將軍何繼祖等踞石門坎築城以拒二十年正月希福偕瑪奇等率前隊履險進攻後軍繼進夾攻大敗之盡奪隘口翌日乘勝馳安籠所

復其城降僞總兵陳義魁繼祖遁新城復糾僞將詹養等踞黃草壩列象拒戰希福領前鋒進剿自卯至未破賊營二十二獲象馬器械無算二月抵曲靖復馬龍州等城並遣營總碩塔等馳剿嵩明州斬關入賊遁殲其衆遂會大軍圍雲南省城吳世璠僞將胡國柄劉起龍等犯我軍希福率前鋒奮擊陣斬國柄起龍及僞總兵九人賊馬寶胡國柱等聞雲南圍急由四川還救六月希福同提督桑格迎剿馬寶於烏木山敗其衆馬寶遁姚安降於軍前九月躡國柱等於鶴慶麗江復蹙之於雲龍州國柱勢窮自縊王緒李匡等自焚死餘賊悉降二十一年十一月擢西安將軍諭曰陝西地方緊要因爾練習軍務特簡此任須加意操演毋騷擾百姓至漢中必選精兵戍守不得以疲弱者發往先是希福隨征長沙失利部議革將軍世職上念希福勞績甚多褫本身加級從寬留將軍任及伊父二等都尉世職時川陝平定部議將西安撥守漢中之滿洲將軍兵各一千名撤半仍留一千名輪戍二十五年希福以棧道遞送勞苦疏請並撤部議不准上曰蕩平以來漢中駐防無益朕不忍使兵民交困其輪班戍守及永遠駐防俱著停止二十七年復調正紅旗蒙古都統二十九年噶爾丹擾塞外諸蒙古上命裕親王福全

征之希福參贊軍事破賊於烏蘭布通三十年以老乞休上慰留之三十二年四月調正紅旗滿洲都統並授建威將軍統師駐右衛三十三年噶爾丹師內向將侵根敦戴青命希福率右衛兵同將軍費揚古等赴圖拉禦賊尋疏請大同總兵康調元率綠旗兵三千同行並請派發察哈爾兵上以綠旗兵多則馬更少且滿洲兵有八千所向無敵希福遇事疑阻令仍駐防右衛三十四年兵部疏劾不收八旗撥送馬致糜錢糧革職三十八年卒

穆占

穆占滿洲正黃旗人姓納喇氏先世爲葉赫部長天命四年太祖高皇帝征葉赫招降其貝勒錦台什之子德勒格爾授佐領予三等男爵及卒子南楚襲任護軍統領以罪削爵弟索勒和襲穆占爲南楚之子初任侍衛兼佐領順治十六年署前鋒參領隨都統卓洛前鋒統領伯勒赫圖駐防雲南時元江土司那嵩作亂大軍剿滅之穆占預有功予三等輕車都尉世職擢正黃旗滿洲副都統康熙十二年冬逆藩吳三桂反聖祖仁皇帝命安西將軍赫業副將軍瑚哩布由陝西四川進討以穆占署前鋒統領參贊軍務十三年二月至陝西聞四川郡邑皆附賊叛

鎮譚宏據陽平關穆占同西安將軍瓦爾喀率兵先驅擊潰賊衆於野狐嶺攻克陽平關及七盤關又敗僞總兵石存禮於朝天關陣擒僞遊擊王道成斬獲無算六月進征保寧叛鎮吳之茂率賊數萬迎拒我軍鑿壕列營與賊相持賊數來犯穆占輒擊敗之十月賊劫我糧艘於略陽又阻截運道於槐樹驛及郿嶺穆占率兵通道屢擊敗賊衆以餉不繼同諸將還駐漢中值陝西提督王輔臣叛於寧羌據秦州平涼與吳之茂譚宏等聯結爲寇穆占隨大將軍貝勒洞鄂還西安十四年二月詔洞鄂征秦州平涼以穆占代赫業爲安西將軍率兵並進僞總兵高鼎聚賊四千於隴州河岸立寨拒守穆占整陣搏戰殲賊甚衆連破賊寨遂趨秦州薄城攻圍賊屢出城抗拒皆督兵戰敗之復擊卻平涼赴援賊衆城中困蹙僞總兵陳萬策以城降穆占率兵往助提督張勇圍鞏昌遣陳萬策入城曉諭僞總兵陳科亦率衆迎降乃還會大軍征平涼十五年正月上以洞鄂統師圍平涼日久未下遣撫遠大將軍圖海代之六月王輔臣降穆占分剿餘賊於西河清水成縣禮縣收復城邑僞總兵周養民王好問等以慶陽府降九月召入覲授都統品級佩征南將軍印率兵征湖南十六年正月至荊州時順承郡王勒克德渾守荊州

貝勒尙善圍岳州安親王岳樂圍長沙簡親王喇布守吉安穆占奉詔由岳州助攻長沙疏請移江南沙船百餘爲水陸夾攻之用詔如所請七月詔移兵會簡親王規取衡州永州值吳三桂分遣賊將掠江西穆占移兵袁州秣馬逾月擊卻賊衆之由永新犯吉安者遂進征茶陵逐賊至攸縣陣斬四千餘級生擒百餘人茶陵攸縣安仁酃縣永寧俱復十七年閏三月攻克郴州桂陽招降桂東興寧宜章臨武藍山嘉禾永興穆占自駐郴州以都統宜里布守永興四月賊犯永興穆占遣護軍統領哈克三前鋒統領碩岱等援之時簡親王尙駐吉安穆占請旨趣其進征簡親王奏言穆占撤茶陵攸縣安仁之兵還郴州恐賊由永興占踞要路江西可虞請敕穆占先滅永興之賊穆占疏辨茶陵等處之兵未撤永興已遣兵赴援郴州實爲要地請敕簡親王遣將來守臣乃可擊賊永興上命穆占仍守郴州諭趣簡親王進征簡親王乃移駐茶陵穆占疏請調江西提督趙賴隨簡親王部下將軍華善等率兵分守攸縣安仁等處得旨自穆占至荊州後所奏調遣守禦事宜無不允行今破賊收疆穆占是賴其俱如所請六月賊將馬寶胡國柱并力犯永興我兵戰失利宜理布哈克三皆歿於陣賊遂連劫我營碩岱退入城副都

統託岱等引兵還郴州上以穆占分兵防守閒地致永興兵單諭責厚集兵力立功贖罪時簡親王遣前鋒統領薩喀察由安仁援永興既入城以賊勢猖獗牒請益兵穆占辭以永興軍事簡親王主之薩喀察遣人馳告簡親王遂以入奏上諭責穆占曰凡因茶陵永興諸處軍事所降諭旨皆署穆占名於簡親王之前今穆占牒稱永興爲簡親王之地謬戾實甚自今以往毋分彼此合力剿滅逆賊八月賊將馬寶等聞吳三桂死焚永興賊壘引賊衆還衡州穆占自郴州遣兵敗賊於耒陽十八年二月率兵擊敗賊將郭應甫於常寧招降僞總兵李魁等追擊賊將吳國貴於永州俘斬甚衆復永州道州常寧新田永明江華東安進定廣西復全州灌陽興安恭城時桂林平樂南寧等府已爲將軍莽依圖傅宏烈等收復穆占奉詔還定湖南八月攻復新寧十一月上命貝子彰泰爲定遠平寇大將軍以穆占參贊軍務十九年二月督兵擊敗賊將吳應麒等復沅州進征貴州十月至鎮遠賊將張足法楊應選宵遁復府城進剿逆賊復偏橋興隆二衛進定平越貴陽並遣兵收復安順石阡都勻等府二十年正月賊將高起隆夏國相王會王永清張足法楊應選等擁衆二萬餘於平遠西南倚山立寨穆占同提督趙賴率兵衝

擊高起隆等敗竄王會率所部降遂復平遠分遣副都統莽奕祿遊擊王成功等追剿逸賊擒斬僞巡撫張維堅復大定府楊應選率衆降穆占隨彰泰進征雲南上以貴州苗蠻維處疆土新復命穆占旋師鎮守尋因彰泰請仍命隨征雲南十月合廣西四川兩路兵攻雲南城三桂孫世璠自殺僞將軍線緘等出降彰泰令穆占同都統馬齊入城籍賊黨屬擒僞大學士方光琛等磔於軍門雲南平凱旋授正黃旗蒙古都統列議政大臣二十二年三月議政王大臣等追論穆占征保寧時奏軍事不實征平涼時不臨陣指揮後在郴州推諉不救永興應處絞籍沒奏入得旨穆占雖有罪其勞績亦多罷任革世職餘罪寬免是年疾卒年五十有六

勒貝

勒貝滿洲正藍旗人姓郭爾羅氏父鄂羅塞臣官左都御史諡果敏有傳勒貝初授侍衛兼佐領順治十八年由一等待衛授正藍旗蒙古都統康熙八年調正藍旗滿洲都統十六年三月吳逆未平上以簡親王喇布出師江西久無功其參贊大臣均不勝任命勒貝及護軍統領哈克三副都統舒庫往代之十月鎮南將軍

莽依圖由廣東進定廣西命勒貝偕江寧將軍額楚守韶州十二月詔曰韶州地屬緊要一切軍務若令簡親王轉奏恐有遲誤其令額楚統轄兵馬勒貝參贊軍務凡事許得專奏十七年二月上以梧州爲兩廣接壤要地諭勒貝及額楚往時逆賊祖澤清據高州叛陷鬱林州及北流興業陸川博白四縣四月勒貝偕將軍傅宏烈等擊敗僞總兵梁子玉於白米嶺斬之僞總統饒一龍等各棄城遁一州四縣盡復十八年吳逆僞將吳世琮圍南寧總督金光祖遣總兵譚昇等與戰於新村西山之巔勒貝偕額楚及副都統額赫納分路撲剿殺賊甚衆世琮重創遁南寧圍解十九年五月復偕額赫納等剿叛賊馬承蔭於柳州大敗之於陶登乘勝克象州承蔭降均得旨嘉獎下部議敘八月莽依圖卒於軍上以勒貝代爲鎮南將軍尋命隨征南大將軍都統賚塔進定雲南卽令參贊軍務十二月大軍抵西隆州偵僞將軍何繼祖王宏勳等糾衆萬餘扼安籠所之石門坎勒貝與都統希福等先驅二十年正月抵其地攻克第一峯第二峯第三峯奪隘口復安籠所城繼祖等走復糾僞將軍詹養王有功等九人衆二萬餘守黃草壩列衆拒戰二月勒貝率官兵隨大將軍賚塔進剿生擒詹養王有功及賊千餘直抵雲南城逆

孽吳世璠自殺雲南平班師勒貝以疾道卒柩至京命內大臣往奠二十三年賜祭葬如例

哲爾肯

哲爾肯漢軍鑲紅旗人由佐領授刑部員外郎康熙十一年遷中城御史時吳逆倡亂十三年六月隨大軍出征江西十四年授都督僉事任南贛總兵十五年八月敘舉首偽將軍高得捷等逆書功加都督同知十一月敗賊於九渡水等處擒斬偽總兵副將等又敗之南康縣復潭鋪斬首千餘十二月廣東從逆提督嚴自明總兵張星耀等逼南康縣哲爾肯與將軍舒恕等斬賊萬餘破其營十七賊遁南安均得旨獎敘十六年四月上以大軍攻圍長沙吳逆窮蹙欲往衡州慮其侵犯贛州吉安等處分我兵勢命哲爾肯與總督董衛國等分布防禦偵賊情形不時奏聞十七年正月與舒恕遣官於江廣交界九鄉地方招撫偽總兵賴榮等十七員兵萬餘又遣遊擊楊以松等敗賊於鷓鴣寨等處擒獲偽副將等十餘斬馘六千有奇敘功加左都督十八年二月兩廣總督金光祖疏請復設廣西提督上命哲爾肯任之八月疏言臣駐潯州三合峯彈壓兩江接應大兵但慶遠太平思

恩三府逼交趾接雲南爲粵西藩籬今逆賊苗蠻嘯聚負固臣請統兵先往南寧會同將軍莽依圖相機剿撫上可其奏並諭令原駐之三合峯倫屬緊要可發兵駐汛防守十月疏報泗城土知府岑繼祿向化歸誠下部知之十一月疏言提標設兵舊制馬一步九今廣西餘孽未靖需戰馬甚多請改爲步八馬二從之十九年因與逆藩尙之信結婚部議革職得旨從寬留任戴罪圖功二十一年疏言懷集營兵業經奉旨裁汰但僻處深山必得官兵彈壓今酌撥潯協守備一兵三百布防歸潯州副將兼轄下部議行二十二年卒於官賜祭葬如例題請入祀江西名宦祠

郝浴

郝浴直隸定州人順治六年進士授刑部主事八年遷湖廣道御史奉命巡按四川時流賊張獻忠餘黨孫可望李定國劉文秀等降附明桂王朱由榔踞川南寇掠九年平西王吳三桂與都統李國翰分兵復成都嘉定敘州重慶駐師綿州浴在保寧監臨鄉試可望文秀等合衆數萬薄城浴遣使赴綿州告急逾月吳三桂乃移兵赴援危城得全浴因陳善後之宜畧言大兵剿賊借陝西運餉道遠費繁

宜移陝西駐防屯田成都並招流民開墾借給土司牛種屯耕一年可抵輸運三年之利又言滇黔賊寇善於騰山越嶺蜀中土官土兵習尙相近宜簡精銳爲前茅以滿洲驍騎繼其後疾雷迅霆之下賊寇咸鳥獸散矣上嘉其所奏可採下部議部臣以戰守機宜應聽三桂酌籌寢其事浴又言土賊投誠給筭授官恣行剽掠甚爲民害請嗣後願歸伍者歸伍其願爲民者卽令有司造冊編丁以資生聚又請免牛租除雜派惟就熟地開徵俾民有一定之額疏皆下部議行又劾奏永寧總兵柏永馥臨陣畏縮廣元副將胡一鵬驕悍不法並命革職逮訊方保寧之奏捷也詔頒賞將士三桂因以冠服與浴浴不受疏言翦平賊寇平西王賁耳臣司風憲不預軍事而以臣預賞非黨臣則忌臣也因並疏三桂擁兵觀望狀上命三桂以賞物別賞有功將士大學士馮銓成克鞏呂宮等疏奏浴固守保寧出入營壘奮不顧身收兵措餉轉敗爲功堪膺擢用三桂因摘浴保寧奏捷疏中有親冒矢石語劾其欺罔冒功部議浴應革職逮訊尋論死命免死流徙奉天聖祖仁皇帝康熙十年駕幸奉天浴迎謁道左上親垂問焉十二年三桂反明年尙書王熙給事中劉沛先交章薦浴爲部議所格十四年侍郎魏象樞又薦浴才學識兼

優不宜終棄得旨召還錄用復原官時陝西提督王輔臣叛應逆藩吳三桂浴疏言大兵進剿平涼宜於西安潼關用重兵屯駐以待策應用鄖陽之兵攻興安調河南之兵入武關直取漢中則逆賊計日可擒疏下部議令在事大臣相機而行又言民間納糧多額外徵求致正額反缺又招買軍需名爲市易實係攤派里民比及發價官役互相侵扣又於解餉時多索收餉之費任意遲延請敕督撫嚴察又言京通各倉積貯已多請留山東河南額徵耗米折銀以濟軍需疏並下部議行十六年巡視兩淮鹽課明年擢左僉都御史尋遷左副都御史十九年五月更定新例凡死罪減等及軍流人犯俱發遣黑龍江奉天諸處浴以天旱民飢恐遣犯道斃者多疏陳新例未便下九卿等會議惟犯贓官役依新例餘仍如舊律七月疏言官員非正途出身者雖經保舉仍照常陞用不准考選科道又言各部院大臣宜於歲終視司官賢否各舉劾一人以昭懲勸亦下部議行十二月擢廣西巡撫二十一年疏言粵西地丁錢糧以米折銀乃一時權宜之計今軍餉旣停請仍照舊徵收又請御書清慎勤等字頒發各省督撫懸之堂上傳闔省士民均得瞻仰以垂億載得旨俞允又言粵西外控土司內制猺獞今已底定大兵盡撤守

兵議裁惟撫標官兵不宜再議裁減疏下部議准留其半又以廣西巡撫馬雄鎮傳宏烈先後爲逆孽吳世琮世璠所害請建雙忠祠於桂林潯州府知府劉浩爲孫延齡所執不屈死請賜卹典又請復賑濟貧生學租銀米俱得旨允行二十二年七月卒上諭曰郝浴簡任巡撫以來實心任事邊疆重地正資料理忽聞溘逝深爲憫惻下部議卹初巡撫傅宏烈以軍需移取庫金七萬餘兩米七千餘石浴莅任欲以庫項扣抵及卒署廣西巡撫布政使崔維雅劾浴報銷諸冊皆虛抵虛銷私用庫金及採買餘銀十四萬二千餘兩上命郎中蘇赫陳光祖前往察審以浴採買米豆浮開價值借支給兵船夫價爲名實侵銀九萬餘兩覆奏部議革職追補二十四年五月上諭曰郝浴前任兩淮巡鹽潔己奉公恤商裕課後簡任廣西巡撫清廉愛民克稱厥職其所動錢糧非係入己從寬免追以昭朕優卹廉吏至意二十五年六月子林爲父訴冤請復原官部議不准特旨准予追復九月林復請卹賜祭葬如例二十六年入祀賢良祠林康熙二十一年進士累官禮部左侍郎雍正四年加尙書銜致仕

覺羅伊圖

覺羅伊圖滿洲鑲紅旗人興祖直皇帝第一子德世庫之曾孫也順治元年增設內三院學士各一員授伊圖祕書院學士二年充明史副總裁三年因繙譯明洪武寶訓告成賞馬匹銀兩四年授雲騎尉賜宴太和殿三遇恩詔加至三等輕車都尉九年正月纂修太宗文皇帝實錄伊圖充副總裁三月充殿試讀卷官尋授宗人府啟心郎仍帶二品銜十一年署刑部尙書十四年擢兵部尙書十六年六月海敵鄭成功陷鎮江給事中楊雍建劾奏樞臣不能盡心經畫決策幾先又不返躬引咎收效事後請旨嚴飭詔兵部明白回奏伊圖以籌畫無能引罪部議降三級罰鍰詔貫之十七年二月自陳乞罷上不許五月調吏部尙書十一月命偕禮部尙書沃赫等校定律令先是詔求直言左都御史魏裔介御史季振宜並劾大學士劉正宗徇私納賄諸款上以裔介等明知正宗過端不先舉發並革職御史陸光旭請並治言官不舉罪章下吏部十二月伊圖議應如光旭請言官分別議處尙書孫廷銓以正宗本係言官糾參其各言官無人人具奏之例應免議兩議上得旨如伊圖議並飭會議不許滿漢互異十八年授弘文院大學士康熙六年正月解大學士任命以原官掌管王府事十六年六月卒賜祭葬如例諡文僖

子伊納布早卒以弟伊爾闡之孫悟爾祜爲後襲職悟爾祜子安壽銷除輕車都尉襲雲騎尉雍正六年以隱匿入官財物革職流徙寧古塔

李爵

李爵直隸高陽人父國縉明天啟時官大學士諡文敏明史有傳爵七歲而孤本朝順治二年舉人三年進士改庶吉士授檢討尋遇太祖高皇帝配天覃恩晉編修十年二月世祖章皇帝親試習清書翰林爵與侍講胡兆龍檢討莊罔生並列上等擢中允五月遷侍講會直隸江南諸省學政需代例用翰林爵同罔生等以清書尙未精通恐致荒廢乞免開列大學士圖海范文程爲之代奏得旨俞允尋擢侍講學士十二年遷祕書院學士同學士禪岱麻勒吉胡兆龍教習庶吉士時始設日講官爵同麻勒吉胡兆龍及侍讀學士哲庫納洗馬王熙中允方懸成曹本榮充之十四年充經筵講官十五年二月充會試副考官三月考滿加一級廕一子入監五月授祕書院大學士九月改東閣大學士尋與大學士巴哈納等疏言內三院旣改爲內閣別設翰林院宜分職掌以專責成上允所請十六年三月諭獎勤勞奉職諸大臣加爵太子太保先是十二年上親選武進士二十三人以

領侍衛內大臣教習騎射特詔肇行大典宜加優異一甲一名視副將二名視參將三名視遊擊二甲十九人視守備皆按品食俸至是兵部以十五年所選武進士劉炎等援例請旨疏下內閣票擬既擬進諭曰內閣之設原因章奏殷繁一時遽難周覽故令其看詳票擬候旨裁定此舊例也膺斯任者宜虛公謹慎悉心辦理方爲盡職今兵部請武進士劉炎等品級俸祿一疏或令部議或卽准給及不准給自應三擬乃止一擬部議一擬不給特因劉炎等係武職聲氣不通不擬給與如此偏懷私見任意妄裁負朕倚任不重加懲治以後自專之端必至漸長下九卿科道同吏部察議諸大學士及學士並降罰留任以票擬由爵核定降四級調用九月命寬免諸大學士學士降罰爵復原官任事如舊十九年四月同大學士巴哈納等校定律例十八年聖祖仁皇帝御極復設內三院爵改宏文院大學士三年充會試正考官六年充纂修世祖實錄總裁官九年仍以內三院爲內閣爵改保和殿大學士十一年世祖實錄告成賜銀幣鞍馬加太子太傅十三年詔舉素有清操堪膺繁劇者爵薦休致布政使王舜年降調參議道俞之炎副貢生楊始亨十五年充會試正考官十七年詔舉博學鴻儒爵與大學士杜立德馮溥

合薦副使曹溶布政使法若真參議道施閏章中書曹禾陳玉璣知縣米漢雯進士沈珩葉舒崇二十一年充三朝聖訓平定三逆方略重修太祖高皇帝實錄總裁官又充明史監修總裁官先是重修太宗文皇帝實錄爵爲總裁官至是告成賜賚如例晉太子太師尋充大清會典總裁官會臺灣初定提督施琅請設官鎮守廷議未決有謂宜遷其人棄其地者上召詢諸大學士爵奏言棄其地恐爲外國所據遷其人慮有姦宄生事應如施琅請設官鎮守上是其言二十三年六月以疾卒年六十遺疏入得旨李爵簡任機務慎勤敏練宣力有年勞績素著忽聞溘逝朕心深爲憫惻下部議卹命大學士明珠同學士一員奠茶酒賜祭葬如典禮謚文勤四十九年三月諭大學士等曰李爵任大學士時始終恪慎茂著勤勞伊孫工部主事李敏啟著越格陞補太常寺少卿以示崇獎舊臣優錄後嗣至意十月爵第三子其旋以教習期滿部選知縣引見得旨原任大學士李爵宣力年久其子李其旋著以主事用遇缺卽補尋擢敏啟大理寺卿其旋兵部員外郎

宋德宜子駿業

宋德宜江南長洲人順治十二年進士改庶吉士十五年授編修康熙三年遷國

子監司業六年擢祕書院侍讀八年二月遷國子監祭酒五月遷侍讀學士十年三月充日講起居注官經筵講官十一月擢內閣學士充纂修太祖太宗聖訓副總裁十二年擢戶部右侍郎疏劾龍江關大使李九官解銅赴京欲給門票以銀四十兩賚夜餽德宜私宅聖祖仁皇帝諭嘉德宜舉首餽遺不負簡任下部議李九官罪褫其職十四年調吏部右侍郎十五年二月充會試副考官八月轉吏部左侍郎十六年四月擢左都御史六月疏言國家用兵持久決勝必料狡賊所恃以奪其負固之資而後不戰自屈必察奸民所利以絕其潛通之患而後所向無前自醜類蠢動以來我皇上威德覃敷剿撫並用邇者秦閩底定兩粵漸平逆賊吳三桂勢窮計蹙已如釜底遊魂而尙敢逆我師行者非有弓馬精堅之技非有舟車演易之長所恃不過槍礮而已夫槍礮專藉硝黃而硝黃產自河南山西必奸民圖利私販賊營前經御史朱尙義條奏部議失察處分乃兩年以來並未拏獲通逆販賣一人因循玩愒縱奸乘間夾帶致內地硝黃價值日復湧貴乞天語嚴飭督撫提鎮於附近賊境之隘口間道遴選將弁巡緝奸販庶狡謀日細窮寇可速殄矣疏入得旨通販硝黃與賊屢經飭禁並無拏獲皆由督撫提鎮稽察不

嚴下兵刑二部詳議嚴加處分德宜又疏言頻年發帑行師度支不繼皇上俯允廷臣之請開例捐輸實以酌便濟時天下萬世共知爲不得已也計開例三載所入二百萬有餘捐納最多者莫如知縣至五百餘人始因缺多易得踴躍爭趨今見非數年不得選授亦徘徊觀望宜敕部限期停止俾輸納惟恐弗及既有濟於軍需亦足徵慎重名器之意又疏言自古沿海居民借漁樵以資生計故得佐給賦稅貯備災荒而利用通商又設立市舶之制本朝以海氛未靖立禁甚嚴特慮內地奸民勾引島寇貽誤邊疆耳近者天威遐布四方日就蕩平宜及此時招攜懷遠撫恤流移令沿海居民願以捕魚爲業者許其自造魚船商人願通販海島者許其自造船船官給印票酌仿舊例輸稅其人口貨物往來出入咸稽核之則弛禁仍可防奸裕民生兼資軍計矣事並下所司議行十七年正月疏言吳逆煽亂以來各處領兵大將軍王貝勒及將軍大臣等剿撫立功恢復地方者固不乏人亦有玩寇殃民營私自便或囑託把持督撫各官或越省購買婦女其尤甚者搶奪民間財物稍不如意卽指爲叛逆今大兵會剿剋期滅賊之時猶恐借端需索乞天語嚴敕諸臣洗心滌慮痛改前非務期奮力滅賊疏下議政王貝勒大臣

申飭嚴禁二月疏言遐方未靖宵旰憂勤天顏視昔清減神理之間蘊結未舒尤宜愛惜保護昔唐太宗銳意勤學其臣劉洎諫以多記損心宋儒程頤亦曰帝王之學與儒生異伏願皇上於紬繹羣書時略方名象數之繁祛月露風雲之艷擇其有關政治裨益身心者講習討論稍節耳目之勞用保中和之德上嘉納之時山東文登城守兵以給餉遲延羣集縣廨鼓譟刃傷知縣吳閻啟德宜因疏劾山東提督柯永綦不恤士卒剋減軍糧致縱成驕悍事出駭聞又隱匿不報何異養癰待潰疏下部議察革永綦罷任七月擢德宜刑部尙書十二月調兵部尙書十八年充會試正考官先是詔舉博學鴻儒德宜薦主事汪琬生員陳維崧至是廷試並列一等授琬編修維崧檢討十九年三月左都御史魏象樞副都御史科爾坤偕給事中余國柱御史蔣伊等合疏劾德宜及御史唐朝彝曰要職官員奉上諭令九卿詹事科道會推關繫用人致治最重最要今會推江西按察司衆議以右通政張可全等所舉之福建興泉道張仲舉擬正御史唐朝彝言我是福建人深知張仲舉做官不好我不畫題尙書宋德宜初舉湖北江防道楊大鯤山東濟寧道葉方恆及聞唐朝彝不畫題忽改稱不舉俱屬不合請敕部察議庶以後會

推無所懷私上命德宜回奏德宜奏臣隨滿漢諸臣集吏部會推江西按察使司諸臣遲久不舉臣因向諸臣云應推簽內有道員葉方恆楊大鯤二人知其操守廉潔才幹敏練隨有御史成其範等議推葉方恆侍郎項景襄等議推楊大鯤後右通政張可全等議推福建興泉道張仲舉諸臣酌定張仲舉擬正葉方恆擬陪御史唐朝彞言張仲舉不堪推列副都御史科爾坤謂推者是則阻者不合阻者是則推者不合於是滿漢諸臣議論紛紜自辰踰午爭持不決臣云衆議未定何如請旨論俸論薦無拘現在之舉不舉卽葉方恆亦不必舉此臣與諸臣商推之語並非因唐朝彞不畫題而改稱不舉夫盈廷集議原不禁反覆推敲非如奉旨察議事件前後口供不符有處分之例惟是臣平日孤忠愚戇出語招尤以致無端來此指摘臣亦惟深自刻責不敢置辨且憲臣挾二十餘人衆多之口臣獨伸己說卽仰賴聖明洞鑒而憲臣等之忌臣彌甚乞嚴飭處分俾得投閒置散以安愚分事下部察議唐朝彞革職德宜應降五級調用上特簡湖南糧儲道柯永昇爲江西按察使諭曰會推原令各出所見公同參酌宋德宜唐朝彞俱免其處分十一月工部侍郎趙璟金鼎奏陝西官民運餉四川苦累德宜因言大軍於雲

貴需餉孔亟陝西四川互相推委皆由總督分設若川陝並一總督是則痛癢相關隨地調發可以酌劑均平上命改陝西總督哈占爲川陝總督二十一年靖逆將軍張勇以甘肅邊防緊要請緩裁前此添設官兵部臣均議如所請德宜別爲一議言當日因河東逆賊變亂添設馬步戰兵原議事平裁汰者應卽裁汰其將軍標下前以步兵二千名改爲馬兵宜仍復原定經制馬六步四惟因防邊添設之兵可無議裁上遣尙書哲爾肯往會將軍督撫提督閱核留河州寧夏添設防守之兵不裁餘仍復原定經制如德宜所議是年十月調吏部尙書二十三年授文華殿大學士充政治典訓一統志總裁官先是重修太祖高皇帝實錄德宜亦爲總裁官二十五年告成加太子太傅二十六年六月卒年六十有二遺疏上得旨宋德宜簡任機務宣力有年清慎素著忽聞溘逝深爲憫惻下所司議卹賜祭葬如典禮諡曰文恪詔遣官護送由驛歸襯子駿業康熙二十四年由副榜貢生授翰林院待詔御書處行走尋遷兵部主事員外郎工部郎中禮科給事中三十七年轉兵科掌印給事中四十一年疏劾湖廣總督郭琇提督林本植巡撫金璽總兵雷如等曰苗徭性本獷悍使之畏懷庶不致擾害良民此封疆大臣專責近

聞鎮守士民叩閭一疏言紅苗搶奪恣肆蓋由督撫提鎮平時不能嚴飭屬員加意撫輯及事發又不卽奏請剿撫種種玩愒已盡在聖明洞鑒中卽特遣大臣到彼相度機宜彼處官吏各懷瞻顧上司之意必多方容隱真情豈能盡得況郭琇向騫虛聲近益衰廢加以林本植之昏耄金璽雷如之庸懦持祿養癰視民命爲兒戲置封疆於度外以致釀成刁悍祈立賜罷斥另選賢能代任庶不致回護而剿撫得協機宜上命侍郎傅繼祖甘國樞浙江巡撫趙申喬會審得實郭琇林本植金璽雷如等並坐徇隱降革有差四十三年駿業洵遷鴻臚寺卿右通政左僉都御史四十六年遷宗人府丞左副都御史四十八年擢兵部右侍郎五十二年四月卒賜祭葬如例

杜立德

杜立德直隸寶坻人明崇禎十六年進士世祖章皇帝順治元年以順天巡撫宋權薦授中書科中書二年七月考選戶科給事中疏言治平之道有三一曰敬天人君爲天之子當修省以迓天休今秦晉燕畿水旱風雹天心示警凡開誠布公懋德敦行皆敬天事也一曰法古古者事之鑑也是非定於一時法則昭於百代

故合經而後能權遵法而後能創凡建學明倫立綱陳紀皆法古事也一日愛人自大臣以至百姓宜一視同仁且無論新舊悉存棄短取長之心凡親賢納諫尙德緩刑皆愛人事也疏入上嘉其所奏有裨治理採納之尋疏言牧民之官任不數月卽行遷轉則欲興利除害而前後手之易其局往來間之疲其神將悠忽之念起推諉之路開宜久任以驗成功於三年大計時分別糾劾俾銳者就繩懦者知奮又言荒地以踏勘爲憑亡丁以審編爲據請自今賑蠲之數分列款項豫行頒示使小民咸喻則胥吏不能爲姦又言條編之法簡易便民近因軍興旁午草豆未有定額往往取辦臨時徒飽姦吏之橐請敕部酌定價值使民先事爲備疏並下部議行三年轉兵科右給事中四年轉吏科左給事中又轉戶科都給事中六年疏言漕運爲國家重務數年來姦弊叢生不可窮詰徒以未經發覺指實無從今漕臣庫禮搜獲運官使費冊三十本送部其中所費皆東南數百萬生民膏脂供貪墨之人魚肉請敕部將原冊移送內院按款研究則轉移無術而姦弊悉釐矣得旨如所請行七年轉吏科都給事中八年正月疏言自古帝王致治必由經術宜及時舉行經筵擇廷臣經明行修者授爲講官庶幾裨益聖治上亦嘉納

其言初睿親王多爾袞攝政時給事中許作梅御史吳達李森先桑芸等交章劾大學士馮銓姦貪狀立德疏言馮銓所行弗類諸臣具實以告非私論也將逾旬日未蒙鑒裁恐無以鼓直言之氣宜令滿漢大臣集議朝堂以伸公論又如逋逃之馬士英阮大鍼宋企郊等或納賄招權或煽惡流毒宜急捕誅以彰法紀疏下刑部以事在赦前寢議至是上既躬親大政甄別大臣黜罷馮銓立德因疏言前此糾劾馮銓諸言官如吳達李森先桑芸許作梅等並爲銓所切齒又僉都御史趙開心素爲銓忌銓皆假票擬於數言輕重之中弄機權於旁引曲借之內相繼搆陷斥罷茲逢聖政方新仰乞皇上矜察疏下吏部開心等尋得旨起用九年立德遷太常寺少卿十年三月擢工部右侍郎六月調兵部左侍郎十一年二月上以畿輔八府上年遇水發帑賑濟簡才能清正大臣十六員督率府州縣衛官散給立德同通政使喀愷分賑大名府所屬一州十縣一衛還奏稱旨四月調吏部右侍郎七月丁父憂歸十一月以前在兵部鞫訊窩隱逃人事不詳悉察究降一級調用服闋補太僕寺卿尋遷大理寺卿十四年四月疏言熱審之制因天氣炎熱省釋繫獄凡笞罪釋免徒流以下減等發落重囚可矜疑者奏請定奪乃欽恤

至意也但每歲小滿後刑部具題始通行各省在路近者可如期舉行而路遠者恐災暑已過視爲故事請嗣後各按遠近豫爲通飭舉行俾實被皇仁疏下刑部議如所請六月擢刑部右侍郎八月轉左侍郎十一月疏劾內院學士胡兆龍主使寶坻紳衿藉自縊命案傳帖請託誣告立德引吏部侍郎王崇簡內院侍讀張永祺爲證疏下部質訊弗實議立德捏詞妄奏應革職援恩赦寬免十六年三月諭獎勤勞奉職諸大臣加立德太子少保銜有領侍衛內大臣額爾克岱青家奴陳保糾聚衆棍毆縛侍衛阿拉那於本旗佐領處誣告阿拉那酒醉持刀斫人刑部議處旗牒率擬阿拉那罪事聞下內大臣索尼等察得實陳保等伏法刑部諸臣降革有差立德應革加銜降一級調用得旨削加銜仍留原任九月遷刑部尙書十八年聖祖仁皇帝御極調立德戶部尙書康熙二年二月都察院劾立德與吏部尙書孫廷銓於會議時喧爭失大臣禮應並議罰詔寬免之五月考滿加太子少保三年充會試正考官調吏部尙書八年四月授國史院大學士充世祖實錄總裁官九年三月充玉牒副總裁官十月改內三院爲內閣授立德保和殿大學士兼禮部尙書十一年世祖實錄告成賜銀幣鞍馬晉太子太傅十二年充會

試正考官又充重修太宗文皇帝實錄總裁官十三年詔舉素有清操堪任繁劇者立德薦副使道曹溶可爲藩臬縣丞楊大鯤降調知縣歐陽勤生可爲府佐州牧並下吏部錄用十五年六月內閣票擬陝西總督哈占奏盜犯已獲開復疏防官員一疏誤書三法司核擬既檢舉得旨寬免處分立德告之大學士索額圖謂前此票擬草簽今已改寫及索額圖欲閱草簽立德又以被人竊去告於是合疏請敕吏部嚴察情弊諸臣集問閣臣太學士熊賜履自咎草簽曾經改寫旋因嚼毀部議賜履票擬錯誤改寫草簽復私取嚼毀希圖委咎立德失大臣體應革職賜履遂罷歸立德尋引年乞休不許十七年詔舉博學鴻儒立德與大學士李蔚馮溥合薦原任副使道曹溶布政使法若真參議道施閏章等二十一年正月上元節賜廷臣宴立德有疾未預上遣中使賚酒饌賜之諭曰卿弼亮老臣久任機密茲海宇蕩平時當令序內殿賜宴羣臣念卿臥病不克同此歡譙特遣中使慰問賜以醴饌卿其加餐珍攝以副朕惓惓至意五月以疾乞休允解任調理命乘驛回籍遣行人司員護送尋諭講官牛鈕陳廷敬曰大學士杜立德贊襄機密積有歲年敬慎公忠實多勞績今請老還鄉朕念老臣遠去親製詩章揮灑翰墨爲

一卷軸又書唐詩二軸及怡情洛社篆章一方墨刻二冊汝等齋賜以昭優禮眷顧之意十一月重修太宗實錄告成賜銀幣鞍馬晉太子太師三十年六月卒於家年八十一上諭大學士曰杜立德在世祖時居官早著賢聲稟性厚重行事正大非若他人之徒負虛名朕任用多年老成恪慎遇事得其情理從不肯苟隨同列必直言敷奏從前在任時陳奏之處頗多可謂賢臣矣賜祭葬如典禮諡文端

馮溥

馮溥山東益都人順治三年進士四年補殿試改庶吉士六年授編修十年五月遷司經局洗馬七月遷國史院侍讀十一年授國子監祭酒十三年正月遷宏文院侍講學士十二月轉祕書院侍讀學士充經筵講官十六年九月擢吏部右侍郎十一月給事中張維赤疏言向例各部郎中等咨送學道聽候吏部掣籤遇別項應陞缺出理合扣留今郎中吳六一等待掣學道竟行別補顯係朦混徇私上命吏部回奏時尙書孫廷銓侍郎石申並暫假溥奏言學道員缺以各部送到郎中員外主事考補乃舊例也此次已奉特旨停考止論俸深部員及知府應陞者補用吳六一等雖經保送不復候考學道遇別項缺出應卽陞補實非朦混臣初

任吏部此事同禮部公議非臣一人所得行私奏入事得釋聖祖仁皇帝康熙元年轉左侍郎時左都御史阿思哈已奏停各省巡按因議遣大臣二人巡察督撫設衙署於城東西聽其召募書役溥疏言國家設立督撫皆係重臣今弗信之又遣兩大臣稽察權既太重勢復相軋保無下屬仰承胥役恣橫之弊況創設衙署勞費頓民事多不便疏入遂寢前議二年四月御史李秀疏劾溥與尙書孫廷銓同郡同官腹心相結廷銓目疾百事曠曠凡遇會議溥任意徇私毫無顧忌廷銓弟舉人廷鐸於會試後赴部考取推官廷銓借名迴避實假手於溥無異自定優考大臣藐法何以振肅百僚上諭責李秀恣詞詬詈仍命廷銓與溥回奏溥奏言下第舉人赴部考選推官知縣本無不許大臣子弟揀選之例考試時糊名公閱取定高下孫廷鐸試卷現貯部庫請敕滿漢諸臣公同磨勘則公私自見疏入報聞七月溥乞假遷葬五年七月命以左侍郎管右侍郎六年充會試副考官明年擢左都御史時有紅本已發科鈔輔政大臣鼈拜取回改批溥奏言本章既經批紅發鈔不便更改鼈拜欲罪溥上特旨嘉獎溥所言是諭輔政大臣此後當益加詳慎批發八年三月溥因江南有捕役誣良非刑斃命事請旨嚴定失察官

員處分例又疏言皇上軫念民生窮困令臣等各陳所見臣以爲欲民安居樂業一在省刑省刑者非謂犯罪而沾寬之也古者罪人不孥今一事牽連證佐或數人或數十人往往本犯尙未審明而被累致死者已多又或遲至七八年仍不結案雖有部限屢請寬期遂至力穡供稅之人拋家失業甚可憫惻乞敕部嚴飭以後除叛逆外不得提究多人牽累無益證佐若督撫屢請寬限者治以才力不及之罪一在薄稅薄稅者非謂應納而姑免之也古人云二月賣新絲五月糶新穀言徵收之急也百姓之財不過取之田畝今則正月已開徵矣舊歲之逋甫償新歲之田未種錢糧從何辦納有司不能設法勸諭或用重刑以懲真有日不忍覩耳不忍聞者請敕部酌議自後徵賦緩待夏秋仍無虧於國課有益於民生疏下戶刑二部議刑部議凡強盜人命重情依限一年速結不得牽累無辜督撫及承審問官如有隱漏及延遲者並議處戶部議春季兵餉不能待至夏秋宜仍舊例得旨錢糧夏秋徵收本當允行但國用尙在不敷俟充足時戶部奏請更定八月戶部書役陳一魁用部印行文冒領直隸清苑等縣地丁錢糧事發溥疏言錢糧者百姓之脂膏也其已輸在官則朝廷之帑藏也若任胥役侵盜職掌謂何請嚴

定所司處分懲前愆後又言藩王將軍督撫提鎮購買馬匹以資戰守事屬相同今平南王尙可喜靖南王耿繼茂續順公沈永忠獨牒戶部請免其所買馬匹之稅臣思若許霑恩免稅似應一例遵行若國課所關可喜等不應獨邀異數且恐有匪人借買馬之名漏稅作弊請照順治十六年定例概行收稅以昭畫一皆下部議行九年擢刑部尙書十年二月授文華殿大學士十一年五月疏言直隸山東河南山西陝西二麥皆登秋禾並茂民間穀價每斗不過值銀三四分當此豐稔之時宜廣爲積貯以備荒年至陝西近邊處所更宜多積以實軍儲又見連年河決未塞所需夫役及柳枝甚衆請及此豐登將沿河州縣寬免租稅責令種柳庶人無棄力而不時之需亦豫部議下各督撫議行之是年薦起原任光祿寺丞魏象樞兵部給事中成性俱得旨以科道起用十二年充會試正考官又充重修太宗文皇帝實錄總裁官十七年詔舉博學鴻儒溥同大學士李蔚杜立德合薦原任布政使法若眞副使道曹溶參議道施閏章進士沈珩葉舒崇中書曹禾陳玉璣知縣米漢雯並得旨召試施閏章授侍講沈珩曹禾米漢雯俱授編修是年疏言向者逆賊狂逞聖主宵旰不暇臣何敢爲自便之計今四方漸次平定盛德

大業與日俱新臣已衰朽乞賜罷歸上慰留之十八年充會試正考官二十一年六月復乞休得旨卿輔弼重臣端敏練達簡任機務宣力有年勤勞素著倚毗方殷覽奏以年邁請休情詞懇切准以原官致仕馳驛回籍遣官護送以示眷懷八月溥將歸疏言臣遠辭闕下敬抒愚悃伏見皇上掃除遺孽廓清四海無念不思安全百姓日未出而求衣臣下章奏無不披覽勞百倍於臣下尙望皇上靜以宜民寬以敷政凡事非萬不得已者勿爲勞費如旗人遠出籌備糗糧半由借貸祈皇上曲加體恤外省訐告事非督撫所能審者則遣官其餘勿遣以省騷擾成功羽黨不數年必自戕滅勿輕遽進剿鹽課關稅借諸商實出諸民近者山海關潼關蒙皇上停罷部差人情莫不感悅其鳳陽及湖口亦祈特渙德音并刪去鹽關二差溢額議敘之列休養閭閻扶植元氣上嘉納之尋諭講官牛鈕陳廷敬曰大學士馮溥請老歸里特賜詩一章適志東山篆章一方墨刻一冊爾等傳諭朕意朕聞山東之仕於朝者大小固結彼此援引凡有涉於己私之事不顧國家往往造爲議論彼唱此和務使有濟於私而後已又聞其居鄉多擾害地方朕皆審知其弊馮溥久在禁密之地歸里後可教訓子孫務爲安靜副朕優禮之意是年冬

太宗文皇帝實錄告成加太子太傅賜銀幣鞍馬三十年十二月卒於家年八十有三遺疏上賜祭葬如典禮諡文毅

姚文然

姚文然江南桐城人明崇禎十六年進士改庶吉士本朝順治三年以安慶巡撫李猶龍薦授國史院庶吉士五年三月改禮科給事中七月充山東鄉試正考官六年疏請嚴敕撫按遵恩詔清理刑獄勿任有司稽玩或條赦之外有可矜疑原宥者許專疏上陳又請重定選用會試下第舉人之例以廣任使又言直隸與山東河北接壤兩省各有疆限每遇盜賊竊發東西竄匿難於越境追捕請改保定巡撫爲總督統轄直隸山東及河南懷慶衛輝彰德三府庶盜可弭息又請嚴敕各省督撫勿濫委私人署州縣官疏皆下部議行尋轉工科給事中八年二月請令都察院大臣甄別各省巡按疏下部院會議分六等考核陞調有差是年秋江南浙江被水文然言災地漕米宜令改折以災之重輕定改折多寡又言折漕規則新立小民不能周知官吏因緣爲奸或改折外重徵耗銀或先已徵米又收折價或私折重價而以輕價運解弊端不一請敕漕臣密察嚴劾上並採納之十年

疏言大臣負罪宜免鎖禁城門以存國體得旨嗣後滿漢諸臣有事發部候問不必鎖拏送問俟審有實據依律擬罪是年遷兵科都給事中尋以終養乞歸後於康熙五年補戶科給事中六年疏言四川湖廣諸省官吏借採木爲名或搜取民間屋材墓樹宜申飭禁止又言採買官物其由官發價者駁減之銀應如舊扣貯司庫若價出自民餘銀宜仍還之民間又言一部可結之事卽應一部逕結一疏可通結之事卽應一疏通結若各省錢糧考成已報完者部臣宜於議覆時卽予開復以省奏牘均如所請九年八月得旨內陞以正四品頂帶食俸仍任給事中十年四月兩江總督麻勒吉以京口將軍李顯貴鎮江知府劉元輔侵帑事覺逮繫至京文然疏麻勒吉情罪輕重尙待質問宜釋鎖繫上是其言令自後官員赴質概免鎖繫五月擢文然副都御史十一月遷刑部侍郎十二年二月調兵部督捕侍郎充會試副考官尋以京口將軍柯永綦爲副都統張所養奏劾徇私縱恣等事奉命往鞫得實永綦罷任十一月文然遷左都御史十三年四月疏言耿精忠與孫延齡俱受吳三桂指麾背恩反叛中間阻隔者賴有廣東耿逆將士舊駐其地熟悉山川地利倘與孫逆合謀互相犄角則廣東勢危江西毗連閩粵若逆

賊侵踞贛州南安餉道中斷遞京郵函有梗亦屬可慮宜進駐重兵以通聲援上嘉納之十二月陝西提督王輔臣叛時河南巡撫佟鳳彩乞休已得旨解任文然疏言河南密邇陝西恐流言易滋煽惑鳳彩任巡撫數載民所悅服宜令力疾視事上命鳳彩仍留任十五年擢文然刑部尙書十七年六月卒賜祭葬如例諡端恪雍正八年入祀賢良祠

上官鉉

上官鉉山西翼城人明崇禎十六年進士本朝順治二年授中書充陝西鄉試副考官五年十月遷山東道監察御史十二月巡按湖南八年三月巡按江寧十二月疏言高淳縣素稱澤國有水衡浮糧八萬餘明時徵折色天啟間改本色民困難堪請仍准折部議從之九年三月疏言蕪湖鈔關向有保家百二十餘戶爲關蠹每正課一兩多索或至五兩商聽自納則表裏爲奸所費必倍又巡兵原爲偵查而設近則每兵帶幫役數名近關支河僅十二處委員多至七十五請裁保家及委員聽客船照款目投稅毋許多索巡兵亦照經制名數印給號衣腰牌以杜假冒五月疏言江寧滿漢官兵歲需馬草交州縣採買距省遠者水腳旣多及抵

省歇家串通各役包納致日久草腐復行買補請歲差各郡糧官採辦不必再發州縣運省時或用官船或增水腳隨到隨收價則隨時增減十月疏言江右諸驛爲江浙閩廣通衢乃江西浙江兩省站銀數年不解皆官吏欺隱恃隔省參罰不及請敕該省撫按補解以蘇驛困嗣後統於江浙藩司彙解江南驛傳道給驛十二月疏言鳳陽府屬多荒地前經勘明無主者免其起科如一戶尙存二人卽報爲有主閒有一人包賠闔戶一戶包賠闔甲者連年水旱流移請仍按熟起科豁其包賠並令有司及時勸墾又言江寧所屬英武秣陵廣武三衛屯糧積欠二萬八千有奇實由山阻運艱請改徵本色以省運費十年正月疏言江南亳州城西有地五百七十三頃有奇原係民田明成化閒地民投獻河南徽福二王府遂充王廠其地雖鄰鹿邑實隸亳州今王廠旣廢請仍改隸亳州諸疏並下部議行是年丁母憂回籍尋丁父憂服闋補湖廣道監察御史掌河南道十四年疏言蘇松提督馬進寶陞見其地邊海請令速回任並請嗣後督撫諸臣不必概請入覲輕離重地如有機務面陳再爲請旨疏入報聞十五年二月疏言巡方首重舉劾先貪酷而後罷輒先方面而後守令差滿薦舉前經題定五六人誠寧嚴毋濫之意

倉漕鹽茶祇以運司糧道苑馬河道鹽道爲其專管不許概及提學道輕舉市恩至官有多寡請差滿日將見任知府至知縣每十員擇舉一二員以示激勸再提薦兩次者准爲一正薦凡各差報滿行取升任丁憂等官一概不許提薦部議如所請先是丁酉科江南鄉試考官方猶錢開宗濫中少詹事方拱乾子章鉞等七人致諸生鬪辱同考官奉旨革職提問至是鉉復疏參中式舉人程度淵嘖有煩言請覆試江南新科舉人以覈真僞從之尋以文理不通革中式方域等舉人刑部會鞠方猶錢開宗等作弊屬實依律斬決同考官葉楚槐等絞決方章鉞等及脫逃就獲之程度淵均發遣如律三月疏言臣近聞河南邪教蔓延地方官毫無覺察懷慶衛輝諸郡尤甚請敕撫按稽察州縣嚴懲失察者糾參治罪得旨嚴飭行四月疏陳四事一定臺規都察院舊有會典及題定新例但有古典當因而今未修者有新例增行而昔未備者請悉心參訂刊印成書一慎刑名御史爲執法之官刑名乃其專責臣伏讀順治十二年上諭三法司題覆稽遲皆由文移往來虛費日月且事不同審彙不面議豈能得平仰見我皇上好生之德請令該部先期鈔招送院分各道限期詳閱再行面審務求允協一速考選臺臣職司耳目豈

可久懸請每屆年終將俸滿應考各官行取考選見缺御史七員作速考補一考
取巡方近例考取皆部院開列正陪請嗣後正陪各官務詳開行過事實其不堪
正陪者亦詳列其故每缺出一差送新一差送舊勿拘新人新缺舊人舊缺例部
議考選預取多員恐壅滯不便巡方一款事屬難行應照舊例餘均如所請諭曰
巡方得人自能稱職遇缺取用與預行選擇備差無異內外各差應用御史幾員
除見在御史外應預增設幾員詳議具奏尋議增新舊各十五員特旨增三十員
選用據才品無拘新舊八月疏劾蘇松巡按王秉衡於各屬欺隱錢糧不加釐剔
且縱役擾民革職治罪如律九月疏言計典三年一舉恐各省督撫徇庇屬員反
藉口待科道糾拾循良不免遺棄而漏網者多至浙江湖南蘇松俱無御史計典
應責何官管理臣謹列四款一嚴升任閒有不肖輩在任巧於彌縫去後猶有勢
燄臣謂果有貪穢實蹟不得以既去概從寬典一覈參罰各省俸冊中有一官而
數事牽扯有參罰而數年不開者請將俸冊與計冊參閱如參罰過五件卽係才
力不及降調過十件者革職一註事實凡造報賢否實蹟不得虛詞鋪張宜確覈
職掌直註於冊一察委署凡委署官原與部選不同率鑽營得之當計吏時復脫

然議外無怪貪風日甚請將三年內委署並隨征軍前暫署道府另造一冊疏下部議以府州縣錢糧繁多參罰不一難總計處分惟錢糧號件未完十件遲至半年者隨計冊參處餘並如所請行十六年五月疏言吏部四司司官額設十三員今見止五人懸缺過多恐致叢脞請敕部作速考授從之十八年遷順天府府丞康熙三年遷大理寺少卿六年授太常寺卿十年二月遷宗人府府丞十一月遷左副都御史十一年疏言臣前掌道時管理軍政各省提鎮計七十員數十年來幾至百員臣以爲披堅執銳宣力疆場者多在參遊以下蓋因登進有階不憚衝鋒破敵以博榮名至總鎮以上體統已尊祿位已極無可升加輒不肯實心效力徒糜百萬金錢請敕部臣悉心籌畫養一將務得一將之功勿令坐擁虛名疏下部議提鎮止七十二員俱要缺難裁諭曰上官鉉疏稱宣力疆場者多在參遊以下總兵官以上各員無可升加不行效力等語果有不勤於效力者爲誰應指名糾參乃概以不行效力具奏殊爲不合著吏部察議尋議照條陳不實隱含譏刺例降二級調用尋補太常寺少卿十二年以冬至大祀供器不整潔部議降三級調用請假回籍二十二年卒

錫卜臣

錫卜臣滿洲鑲白旗人姓瓜爾佳氏費英東弟耶格之孫也太宗文皇帝天聰五年授前鋒侍衛崇德元年從上征朝鮮三年隨睿親王多爾袞征明由青山口毀邊牆入至通州明太監高起潛率兵來戰錫卜臣同前鋒參領素爾德擊敗之五年七月大軍圍明錦州敵騎自杏山來援錫卜臣同前鋒統領武拜擊敗其衆錦州馬步兵出城刈草又屢敗之六年復圍錦州擊敗明總督洪承疇三營步兵敵千騎自寧遠來窺錫卜臣與前鋒統領努山追擊至連山斬獲無算世祖章皇帝順治元年隨大軍擊流賊李自成敗賊將唐通於一片石追敗自成於安肅望都後進征山西敗賊於太原二年隨英親王阿濟格征陝西錫卜臣同兵部理事官鄂摩克圖擊敗賊衆自成走湖廣又同前鋒參領錫特庫追至安陸擊敗賊船是年擢前鋒參領敍功予雲騎尉世職三年隨肅親王豪格征流賊張獻忠師至陝西擊敗叛鎮賀珍於漢中遂進四川屢戰皆捷獻忠既滅還京改護軍參領五年冬大同總兵姜瓖叛錫卜臣同護軍統領素拜往討屢敗賊復隨端重親王博洛擊敗賊黨劉遷解代州圍屢遇恩詔並敍四川大同戰功晉世職至二等輕車都

尉十一年擢護軍統領十二年命同都統卓洛等率兵駐防荊州時張獻忠遺黨孫可望掠湖南據辰州十三年錫卜臣同卓洛由澧州常德進征賊聞大兵至棄城遁追破之於瀘溪賊竄入山谷遂復辰州十六年海上鄭成功犯江寧錫卜臣同安南將軍明安達禮自荊州赴援破僞都督楊文英等於揚子江斬獲無算聖祖仁皇帝康熙九年擢鑲白旗蒙古都統十二年諭獎久著勞績諸大臣加錫卜臣太子少傅三年四月巡撫羅森提督鄭蛟麟總兵譚宏吳之茂等叛應逆藩吳三桂上命錫卜臣爲鎮西將軍率兵鎮守陝西是年冬錫卜臣同都統赫業等征四川賊踞保寧我兵營於蟠龍山爲賊所刦復阻截餉運錫卜臣還漢中值陝西提督王輔臣叛於寧羌賊黨分踞棧道錫卜臣駐漢中餉運久阻食不繼十四年八月還西安疏言自本年二月兵糧匱竭取食賊麥以至七月食已罄盡計欲保全大軍乃自漢中出沿途擊賊馬匹器械俱盡上命陝西督撫給帑買馬人各一匹並整頓器械鎮守西安十九年還京仍任都統二十二年四月議政王大臣追論蟠龍山戰敗罪應罷任革世職籍沒得旨錫卜臣尙著勞績免其籍沒尋卒於家

張長庚

張長庚漢軍鑲黃旗人由祕書院編修順治八年遷弘文院侍讀十年遷祕書院侍讀學士兼佐領十一年遷國史院學士十二年充殿試讀卷官十三年擢湖廣巡撫十四年疏報墾田八千三百七十五頃下部議敘十五年十二月以荊州安陸襄陽岳州等府水災請蠲賑十六年春復久雨成災荊安襄岳等府災民流至武昌漢陽長庚同巡按李廷松總督李廕祖倡議捐賑長庚捐米千二百五十石錢三百二十五千下部議敘加太子少保兵部尙書銜十七年四月授湖廣總督康熙元年八月疏請裁駐岳州之上江防道從之湖廣舊設巡撫二員又因川陝河南二省疆隅相接設撫治一員科臣姚啟聖請援江南陝西之例分湖北湖南兩巡撫敕長庚詳確定議長庚議以湖北之武昌漢陽黃州安陸德安荊州襄陽鄖陽八府屬湖北巡撫轄以湖南之長沙衡州永州寶慶辰州常德岳州七府郴靖二州屬偏沅巡撫轄刑名錢穀各歸管理部議如所請並裁鄖陽撫治缺上允之二年長庚同靖西將軍穆里瑪定西將軍圖海等擒斬明桂王將郝搖旗劉汝魁其黨李來亨竄伏茅麓山官兵晝夜環攻來亨窮迫舉家焚縊長庚招服餘黨

並以書降桂王之荆國公王光興等楚寇悉平下部察紘先是湖廣設左右布政使二按察使一駐武昌三年三月移右布政司駐長沙上以湖廣刑名事繁應增設按察使一其駐地令督撫議奏長庚疏言增設臬司應照藩司例駐長沙專理湖南長沙等七府及郴靖二州刑名十一月又言房縣保康竹山竹谿與興山巴東歸州一帶皆楚省邊險地前逆寇盤據今已蕩平新關州縣宜設兵資保障請酌撥荆夷鄖襄四鎮額兵駐防要地俱奉旨俞允四年五月疏給歸州巴東長陽興山房縣保康竹溪竹山等八州縣流民開墾牛種下部議行十月疏報墾田六千頃有奇部議加一級六年四月上諭查各省大小船按兵定數長庚疏言湖廣各營戰馬礮船共四百七十五內除夷陵荊州城守襄陽均房辰沅常岳等鎮協營戰馬礮船二百三十三應全留外其提督與武昌城守宜都洞庭等標協營戰馬礮船二百四十二內應裁六十二又內有督提二標船三十三酌歸荊州武昌城守及漢陽守備就近管理如所請行八年九月甄別各省督撫奉旨張長庚以原品隨旗行走十二年二月戶部以長庚前捏報墾荒奏參削太子少保銜十九年二月大兵進剿雲貴上以長庚於軍中著有能聲命署副都統領兵前往會川

東賊譚洪復叛命吏部郎中范承勳追趣長庚兼程赴夷陵擊賊十一月洪犯夔州掠取糧船上以夔州乃運糧要地令長庚同護軍統領佟佳速取夔州會洪死餘黨就戮川東平將軍趙良棟請酌撤滿兵而以其半進取雲貴長庚在軍無功亦撤回未幾卒

卞三元子永譽

卞三元漢軍鑲紅旗人先世居蓋平縣父卞爲鳳太宗文皇帝時任祕書院副理事官三元以崇德六年舉人亦爲祕書院副理事官世祖章皇帝順治元年授山東登州府知府二年調江南揚州府三年遷東昌兵備道時夏津恩縣莘縣土賊李小亭等劫掠城邑三元督兵剿捕有斬獲尋以賊陷清平縣坐疏防降一級補淮海參議道六年海州陷賊知州張茂勳州同李士麟遇害大軍剿賊三元在事有功十年調湖廣上荆南道十二年調驛鹽道十三年遷陝西苑馬寺卿十四年授山西按察使十六年擢貴州巡撫十七年二月疏言貴州自遭兵燹斗米錢數千貴陽平越黃平定番各府州舊歲大旱無收今春饑斃甚多臣思救民急如救火若必待請命而後濟之則京路往返一萬七千餘里必越四五月方奉諭旨災

黎豈能忍饑久待臣仰體皇仁借發鎮遠府所貯楚運兵米三千石卽於拜疏之日開倉給賑俟秋收後撥補兵米疏入報聞三元又以貴州多峻嶺危坡轉餉不通水道閱視諸葛洞諸處巨石橫亘壅斷河流乃檄新鎮道徐宏業等濬鑿自偏橋至鎮遠開水道二百三十餘里又奏濬湖廣辰溪通銅仁支河以便輸餉復於省溪提溪二司建造倉廩以備儲蓄時明桂王朱由榔竄緬甸其舊將呂洪煬權時泰賀鼎等竄伏山谷三元發兵擒斬之聖祖仁皇帝御極擢三元爲雲南總督康熙四年裁貴州總督卽以三元總督兩省仍駐雲南先是吳三桂奉敕總管雲貴兩省凡督撫提鎮並受節制每征剿苗酋土司輒奏三元功最三元初加銜兵部侍郎旋晉兵部尙書與雲南提督張國柱貴州提督李本深並傾附三桂三桂因前賜敕總管有年後仍令各官管理語六年五月以目疾辭總管疏下部議准辭以雲貴兩省官兵歸總督提督管理三元乃與國柱本深並疏請仍命三桂總管三元疏辭尤迫切言平西王拮据兩省事務殫心竭力剿逆開疆著有成效今辭總管之任以自休息我皇上寵眷舊臣憫恤勞瘁遂允其辭臣伏念滇黔爲僞逆李定國等占踞幾二十載仰仗世祖章皇帝天威遠播遣王公諸臣同平西王

三路進剿勞數年兵力費金錢無算始成一統之隆世祖委任平西王總管雲南繼蒙我皇上復委總管貴州數年以來不虛廟堂西顧之慮矣然滇黔在萬山之中民少苗多雖水西與迤東等處已加懲創改土設流而各種土蠻鷹眼未化異志未消眈眈負隅僅緩目前之狂逞北勝邊外蒙番屯兵近塞情形叵測今奉諭旨允王辭卸總管之任恐內而狡獪生心外而蒙番窺伺臣承乏兩省重任倘將來有一方躡冶必責臣不早言請我皇上深爲目前邊疆叵測之慮收回成命諭王仍復總管使得便於隨時防剿固守邊疆俟數年後再允所請亦不晚也疏入得旨平西王吳三桂以精力日減奏辭因允所請今地方已平若令復理事務恐其過勞愈致精力大損於邊疆遇有軍機王自應經理七年十一月三元疏言臣繼母在京寄信與臣謂汝若不歸我死不瞑目臣因之憂惶成疾當此兩省邊地任大責重豈憂病昏矇之人能深籌遠馭一有貽誤臣罪何逃臣母以思子增衰臣又以思母致疾天性至情無由自解懇恩回旗養母上允其請擢直隸巡撫甘文焜代之吳三桂以文焜不附己奏移之駐貴陽而潛結張國柱李本深謀逆十二年十一月吳三桂反文焜殉節死國柱本深從逆及大兵定貴州乃降皆伏誅

三元乞養歸旗後閱三十六年卒年八十有二賜祭葬如例諡曰恪敏子永譽由廕生任通政使知事洊遷福建興化府知府浙江按察使布政使康熙二十九年擢福建巡撫三十六年丁父憂三十九年補刑部侍郎五十年七月山東民班漢傑赴京控告山西太原流匪陳四聚衆搶掠事下刑部察審尋議檔案證佐俱在湖廣河南請以陳四與班漢傑發交各督撫會同審擬其餘黨六十餘人又援恩旨釋放獄囚之例發回山西原籍取保安插上以部臣草率議覆溺職負恩且諭刑部事件廢弛皆尙書齊世武及卞永譽所致傳旨申飭交部再議陳四論斬餘黨發黑龍江爲奴十月永譽以衰疾乞休解任五十一年九月卒年六十有八今上乾隆四十六年二月奉諭旨朕恭閱皇祖實錄內載雲貴總督卞三元與張國柱李本深等合詞奏留吳三桂總管雲貴事務一節因檢閱卞三元列傳載其與張國柱等俱傾附吳逆卽當日共疏乞留三元疏詞尤爲迫切可見三元實爲吳逆用人當日皇祖洞燭機先未允所請而吳逆事權遂以解退三元後見吳逆反跡漸露遂託言母病乞休迨削平吳逆張國柱李本深俱以從逆伏誅而三元竟脫然事外且自乞養歸旗閱三十年及伊歿後又復邀恩得賜祭葬並予諡以恪

敏夫三元本一進退無據首鼠兩端之人在皇考當日或念三元際開國之初由牧郡洊歷封疆曾有帶兵轉餉微勞且當三桂倡亂之時伊先已告休在家因爲曲予包容保全終始今事閱百年詳加論定不得不明白宣示以昭彰瘴朕於臣工功罪論斷一秉至公卽如前代諸臣之懷二心以事君者猶且別爲列傳不稍寬假況卞三元逮事兩朝寵承恩遇乃始則攀援黨逆力疏保留繼則抽身遠引以圖避害其居心行事殊不可問幸而老死牖下未被顯戮已邀國家寬大之恩若復以飾終令典永荷殊榮何以肅綱紀而示懲勸乎所有卞三元身前官秩及死後謚法並所得誥敕俱追奪其祭文碑文並令該旗查明一併仆燬

熊賜履

熊賜履湖北孝感人順治十五年進士由庶吉士授檢討十七年充順天鄉試副考官康熙二年遷國子監司業四年遷弘文院侍讀六年聖祖仁皇帝屢詔臣工直陳政事得失時內大臣鼐拜輔政自專賜履疏言內臣者外臣之表也今國家章程法度不聞略加整頓而急功喜事之人又從而意爲之但知趨目前尺寸之利以便其私而不知無窮之弊已潛滋暗伏於其中部院臣工大率緘默依阿託

老成慎重之名以濟尸位素餐之計樹義者謂之疏狂任事者日爲躁競廉靜者斥爲矯情端方者病爲迂腐間有讀書窮理之士則羣指爲道學百計詆排欲禁錮其終身而後快乞皇上申飭滿漢諸臣虛衷酌理實心任事化情面爲肝膽轉推諉爲擔當漢官勿阿附滿官堂官勿偏任司官宰執盡心論思毋以唯諾爲休容臺諫極力糾繩毋以鉗結爲將順則職業修舉官箴日肅矣疏入報聞七年遷祕書院侍讀學士疏言朝政積習未除國計隱憂可慮皇上聰明天亶天下之人靡不翹踵拭目仰觀德化之成而設施措置猶未足厭服斯人之望年來災異頻仍饑荒疊見正宵旰憂勤徹懸減饘之日乞時御便殿接見儒臣講論政治行之以誠持之以敬庶幾轉咎徵爲休徵疏入內大臣鼐拜傳旨詰問積習隱憂及未厭人望實事賜履言卽制治未亂保邦未危之意欲至尊憂勤惕勵也鼐拜復傳旨嚴飭賜履不能實在指陳妄行冒奏以沽虛名下部議處應降二級調用上寬免之未幾命康親王傑書等勘鞫鼐拜結黨專權罪狀讞辭有鼐拜銜賜履劾已意圖傾害一款互詳鼐拜傳賜履嘗以上卽位後未舉行經筵舊典謂宜慎選儒臣以資啟沃並請備記言記動之職設起居注官又以上欲巡幸邊外疏請停止

皆得旨俞允諭廷臣曰朕頃以農隙講武之時欲一往邊外閱視有疏稱災變甚多不宜出邊增兵民困苦者深嘉其抒陳忠悃直言進諫已如所請停止此後有未當之事其各直陳所見朕不憚改焉九年四月擢國史院學士十月改內三院爲內閣設翰林院以賜履爲掌院學士會復設起居注日講官命賜履充之又充經筵講官十年六月乞省母疾命勿開缺十一年命教習庶吉士十二年充會試副考官十四年三月奉旨翰林院掌院學士熊賜履素有才能居官清慎著陞內閣學士於是授武英殿大學士時恭輯太祖高皇帝太宗文皇帝聖訓御撰孝經衍義重修太宗實錄賜履並充總裁官十五年六月陝西總督哈占有盜犯已獲開復疏防官員一疏內閣誤票三法司核擬既檢舉得旨寬免處分大學士杜立德告之大學士索爾圖謂前此票擬草簽今已改寫不無情弊既而索爾圖欲閱草簽杜立德又以被竊去告於是索爾圖大學士巴泰同奏請敕吏部集問諸大學士學士及中書等嚴察改寫竊取情弊吏部尙書明珠郝惟納等議賜履票擬錯誤欲諉咎杜立德改寫草簽復私取嚼毀失大臣體革職遂罷歸家江寧二十三年上南巡賜履迎駕召對良久遣侍衛齎御書及食物賜之尋御題經義齋扁

額以賜二十七年六月授禮部尙書十二月丁母憂歸二十九年十一月仍授禮部尙書三十年充經筵講官及武會試正考官三十一年二月命往江南察審運河同知陳良謨訐告河道總督王新命勒取庫銀事鞫新命及良謨並挪移庫銀論罪如律十月調吏部尙書會河道總督靳輔奏所屬州縣開河築隄建壩栽柳之民間田地應令督撫察勘豁免額賦上曰此事若令地方官履勘丈量恐借端擾民特遣賜履前往會同督撫察勘尋還奏高郵山陽等州縣應豁免額賦田地三千七百二十八頃有奇三十三年九卿會推兩江總督以吏部侍郎布彥圖等十二人列奏上詰問保舉布彥圖者何人大學士等以賜履覆奏上以尙書庫埒納與布彥圖同旗同部素所稔知諭責之寘賜履弗問三十五年七月御史龔翔麟劾奏吏部擬補擬選先後互異單月府州縣缺壓歸雙月河工咨留人員或准或否高下其手尙書熊賜履竊道學虛名負恩溺職應與久任吏部之侍郎趙士麟嚴加處分得旨吏部回奏復下都察院察議以回奏含糊矛盾賜履與尙書庫埒納侍郎趙士麟彭孫通並應降三級調用上命從寬留任三十八年授東閣大學士時纂修平定朔漠方略及明史賜履充總裁官先是三十三年三十六年會

試至是三十九年會試並爲正考官四十二年二月復充會試正考官三月以年屆七十乞休得旨卿才學敏贍講幄久勞簡任綸扉勤慎益著老成在列倚毗方殷覽奏引年求罷情詞懇切准以原官解任仍食俸留住京師用備顧問以示優眷四十三年賜御書壽考匾額四十五年十月疏辭食俸乞歸江寧命乘驛官爲護送四十六年上閱河駕幸江寧召見慰問賜御用冠服四十八年十月卒於家年七十有五命禮部遣滿漢司官各一員往視其喪予卹銀一千兩贈太子太保賜祭葬如典禮諡文端所著有經義齋集學統學辨學規學餘諸書當賜履遺疏至京時其同姓編修熊本竄入薦已語上覽疏諭廷臣曰熊賜履學問旣優人品亦端此遺疏內薦舉其姪熊本必係虛僞命總督噶禮確察噶禮取其疏草以進果無是語下法司鞫問論熊本罪如律五十一年諭吏部曰原任大學士熊賜履夙學老成歷任多年朕初立講官熊賜履早夜惟勤未嘗不以內聖外王之道正心修身之本直言講論務得至理而後已且品行清正學問優長身歿以後朕屢加賜卹至今猶軫於懷原任大學士張英張玉書朕因眷念舊勞擢用其子熊賜履之子自應一例推恩著調取來京酌量錄用以示不忘耆舊之意六十年吏部

以其二子引見命俟年壯錄用諭大學士等曰原任大學士熊賜履居官清正學問優贍朕每念舊勞不忘於心屢諭織造李煦曹頌周卹其家今其二子來京觀其氣質尙可讀書熊賜履屢爲試官所取門生不下千人身後竟無一顧卹其家者朕於故舊大臣身故之後不忍忘懷當熊賜履居官時政事言論有不當者朕未嘗不加訓飭卽凡大臣皆然及已去位身故則但念其好處如李蔚王熙之孫勵杜訥之子俱現爲京職現任大學士王頊齡之子王圖炳亦在內廷行走沈荃之子沈宗敬爲人參劾朕念伊父存日勤勞姑留其職杜立德張玉書之家時時問其子孫何如至於讀書學問之事必思及李光地其子姪亦現官於朝此皆爾等所知也今熊賜履二子家甚清寒爾等亦應共相扶助令其讀書俾有成就今上乾隆四年吏部以熊賜履之子志契年已及壯具奏奉旨以京職用尋授翰林

院孔目

清史列傳卷七終

清史列傳 卷八

大臣畫一傳檔正編五

王熙

王熙順天宛平人父崇簡明崇禎進士戶部觀政世祖章皇帝順治三年以順天學政曹溶薦補選庶吉士授檢討洊遷侍讀祭酒侍讀學士少詹事學士吏部侍郎禮部尙書加太子太保嘗疏請賜卹明季殉難諸臣范景文蔡懋德等二十八人又議定帝王謚典罷宋臣潘美張浚從祀議北岳恆山舊立廟曲陽非是當移祀渾源州皆從之十八年以疾解任康熙十七年卒謚文貞熙由順治四年進士改庶吉士授檢討十年二月上親試曾習國書翰林熙列次等諭令勉力學習尋遷司業中允洗馬諭德會初設日講官以熙同學士麻勒吉胡兆龍等充之命每日直講十三年轉庶子遷侍講學士十四年七月擢弘文院學士上曰父子同官古今所少以爾誠恪特加此恩九月充經筵講官十五年教習庶吉士充武會試正考官擢禮部右侍郎兼翰林院掌院學士十七年六月上命造直房景運門內

熙與諸翰林分班直宿十一月考滿加禮部尙書十八年聖祖仁皇帝御極復內三院舊制熙改兼弘文院學士尋轉禮部左侍郎康熙三年以失察欠糧舉人入場削尙書銜降一級留任五十年十一月擢左都御史十二月疏言藩臬兩司總理錢穀刑名守巡各道分蒞各府州縣職任綦重其貪穢暴酷者固爲民害卽闖宄衰庸病廢者亦足貽誤地方乃近來督撫因其地近情親彌縫便巧互相容隱糾劾無聞請敕部嚴定徇庇處分尋得旨如所請行六年疏言六部滿洲員外郎主事與郎中一體辦事乃漢官則以一司之事專委之郎中其員外與主事不過積俸待遷自後應照滿官例各勤職業其不辦事者卽行劾罷今各省關倉抽分造船等事已歸有司管理停遣部員其戶部漢主事二十八員工部漢主事二十員當酌議省減在京六衛管徵錢糧二千餘兩設守備千總等官三十六員實爲閒冗亦宜裁併疏下部議員外郎主事令與郎中同辦事裁戶工二部主事十七員千總六員又疏言近例招民百家送至盛京優授知縣恐有不肖奸民借資爲市貽害地方宜改授散秩以絕僥倖又現任官員捐助銀米博取議敘每云設法捐輸夫設法之中何可究詰名出私橐實則取自民間請一切停罷並從之又疏

言八旗官學教習向以恩拔歲副貢生考取近因人少參用納粟監生不皆文理優長請改令舉人預考禮部會同監臣嚴加考選並分派博士助教等官時至官學稽查教習勤惰及諸生學業課程得旨國子監作養人才教習宜嚴加考試選用文理優長之人復派員赴官學稽查勤惰下所司詳議行是時平西王吳三桂駐雲南平南王尙可喜駐廣東靖南王耿精忠駐福建擁兵踰制三桂驕縱尤甚熙疏言直省錢糧大半耗於雲貴閩廣之兵餉就雲貴言藩下官兵歲需俸餉三百餘萬本省賦役不足供什一勢難經久臣愚以爲滇黔已平綠旗額兵亟宜汰減卽藩下餘丁亦宜散遣屯種則勢分而餉亦裕下部議令平西王與督撫提鎮酌籌裁汰熙又疏言閩廣江西湖廣等省官員自置貨物售之所屬兵民或指稱藩下挾勢橫行放債取利省會要區徧置官商占踞盤剝致小民以貿易爲生者顛連欠業請敕部詳議王公將軍督撫提鎮大小官員如有持己資與民爭利及奸商借藩下勢橫行者嚴加治罪旨下部申嚴禁例七年五月疏言近因天氣亢旱金星晝見詔臣工指陳闕失伏念世祖章皇帝精勤圖治諸曹政務皆經詳定數年來有因言官條奏改易者有因各部院題請更張者有會議興革者則例繁

多官吏奉行得以任意輕重乞敕所司詳察現行事例因變法而滋弊者具題改遵舊典其近年新例實有便於今日者亦條晰不得不然之故統候睿裁定奪畫一永遵上命各部院如所請條議於是鄉會試仍用八股文又前此都統內大臣閣部以下官儀衛踰制修築黃河工程不立限期刑部獄囚霜降後未經依律朝審至是改遵舊制其繁例就刪者復數十事八月疏言逃人誑稱寄頓財物稟部行提致累無辜請敕部察明原案有無財物不得遽准勾取至窩逃之人物故其妻子請免流徙下部議行九月遷工部尙書十二年五月調兵部尙書十三年三月疏言逆賊吳三桂負恩反叛肆虐滇黔毒流蜀楚散布僞劄煽惑人心今大兵已抵荆南元惡旦夕授首逆子吳應熊素憑勢位擅利散財蓄養亡命種種流言譌傳不止大寇在外大慙在內不早爲果斷貽患匪輕且大逆不道不限籍之同異律皆處斬討平三桂之後脅從者或邀恩宥而首惡必無可寬應熊之當誅戮無待再計決者宜速正典刑傳首湖南四川老賊聞之必且魂迷意亂氣沮神昏羣賊聞之內失所援自然解體卽兵士百姓聞之公義所激勇氣自倍至應熊親隨人等已發禁刑部人衆則難防時久則易玩宜卽敕法司訊別情罪重者立決

次者分給各旗消除內變之根源掃蕩逆賊之隱禍務莫急於此上命王貝勒大臣覈議事詳三桂傳十四年詔部院堂官各舉堪勝司道者熙疏薦原任御史郝浴候補司道鄭端周體觀尋詔舉博學鴻儒疏薦原任推官尤侗中書汪懋麟皆次第錄用十七年十二月丁父憂二十一年五月授保和殿大學士兼禮部尙書二十五年重修太祖高皇帝實錄告成加太子太傅時編纂三朝聖訓政治典訓暨平定三逆方略大清會典一統志明史並充總裁官二十七年二月給事中高層雲疏言頃見王大臣會議典禮於永康左門大學士王熙余國柱李之芳向康親王傑書等跪語移時伏思天潢貴裔王大臣禮宜致敬獨公同議事天威式臨非大臣跪諸王之地亦非諸王受跪之時請敕部申飭諭曰朕召大臣議事如時久每賜墊坐語大臣與諸王會議公事不必向諸王行跪傑書王熙等俱從寬免議是月充會試正考官三十一年以足疾請解任奉旨卿自世祖章皇帝時簡侍禁廷恪恭盡職朕屢加擢用漸進綸扉夙夜殫心勤勞自勵今舊臣凋謝惟卿獨在班列雖精力就衰而老成練達常侍左右殊有裨益其勉自調攝照舊供職不必求罷嗣屢疏乞休四十年八月允致仕晉少傅明年四月特遣侍衛五格賚賜

耆老舊德匾額及對幅傳諭曰卿歷官最久自去歲告病在家無日不念老臣也近日九卿皆求匾額字對想卿身雖在告心未嘗一時不在朝中故特書以賜卿其勉強餐食輔以醫藥慰朕不忘舊臣之至意四十二年正月卒於家年七十有六命直郡王允禔大學士馬齊侍衛海青馮武奠茶酒時上南巡傳諭直郡王曰前此大臣病逝間有命皇子臨其喪者從未施拜奠之禮大學士王熙因係世祖章皇帝舊臣特令王行禮舉哀致奠賜祭葬如典禮諡文靖五十年四月上追念數十年中諸大臣諭及王熙服官最久盡力矢忠保全名節云世宗憲皇帝雍正八年入祀賢良祠

魏象樞

魏象樞山西蔚州人明崇禎舉人本朝順治三年進士選庶吉士明年改授刑科給事中以明季大弊未禁革者督撫按聽用之官舍太雜道府州縣之胥隸太濫疏請清理報可五年轉工科右給事中尋轉刑科左給事中劾安徽巡撫王懷徇庇受賄罷之八年世祖章皇帝初親政詔免天下額賦罷城工除加派其時有司有以私徵侵帑坐罪者因上疏極陳其弊請飭州縣各依易知單造格眼冊註明

人戶姓名糧銀款目及蠲賑各清數呈大吏覈驗印發開徵又請定藩司會計之法以杜欺隱立內外各官治事之限以清稽滯皆報可九年轉吏科給事中十年會大計連上四疏皆言計典其一言糾拾之舊制宜復言官不宜反坐下所司議著爲令因奏白順治四年糾拾被譴吏科左給事中劉樾寃得旨復職是年以九卿科道會議總兵官任珍落職怨望罪大學士陳名夏等漢官二十八人爲一議議科臣坐徇黨負恩罪應流有旨釋免各予降罰留原任象樞供職如故明年大學士寧完我疏列陳名夏罪狀詞連象樞初象樞誤劾司官錢受祺擅委中軍下部議降級名夏票改罰俸至是謂象樞與名夏子婦家山西牛射斗爲媼親名夏用是黨護及逮問象樞素不識射斗遂免議旋以名夏父子濟惡言官不先事舉發六科之長皆鐫秩一級象樞降補詹事府主簿累遷光祿寺丞十六年以母老請終養康熙十一年母憂服除用大學士馮溥薦授貴州道監察御史滿歲晉四品卿銜仍掌御史事屢有陳奏大要謂先教化則宜崇臣僚之家教亟治河則定蓄任使之人才正人心則宜戒淫巧勵天下則宜輯禮書聖祖皆是其言是年冬擢都察院左僉都御史明年二月遷順天府尹四月轉大理寺卿七月擢戶部右

侍郎十二月轉左侍郎會西南用兵上籌餉三疏其略曰確估價值以清浮冒嚴覈關稅以防侵漁慎用藩司以清錢糧從之尋命同侍郎班迪清理部庫十七年授都察院左都御史首疏申明憲綱十事聖祖嘉其切中時弊時嘉定縣知縣陸隴其有清名以盜案開報職名遲延革職象樞疏舉之鎮江府知府劉鼎瀉職已極而報陞糧道絳州知州曹廷兪劣跡顯著而不被糾察象樞疏劾之又以磨勘順天鄉試卷陳科場八弊請設內簾監試御史以重關防陳學政十弊請據爲三年考覈之實廷議並著爲令明年遷刑部尙書疏請留御史臺爲朝廷整肅綱紀上可其奏以刑部尙書銜留任遵諭舉廉吏疏薦原任侍郎高珩達哈塔雷虎班迪大理卿瑚密色侍讀蕭維豫郎中文運布政使畢振姬知縣陸隴其張沐十人皆得旨錄用十九年任刑部尙書尋命同吏部侍郎科爾坤巡察畿輔稱旨二十三年以病乞休許之賜御書寒松堂額寵其歸著有寒松堂集二十六年卒於家年七十有一賜祭葬如典禮諡敏果雍正八年入祀賢良祠

湯斌

湯斌河南睢州人母趙氏明末流賊陷州城殉節死父祖契攜斌避兵流寓浙江

衢州世祖章皇帝順治二年大兵定江南江西斌隨其父還里九年舉進士由庶吉士授國史院檢討十二年二月應詔陳言請廣搜野乘遺書以修明史且言宋史修於元至正特傳文天祥之忠元史修於明洪武亦著巴顏布哈之義我朝順治元二年間前明諸臣亦有抗節不屈臨危致命者與叛逆不同宜令纂修諸臣勿事瞻顧昭示綱常於萬世下所司大學士馮銓金之俊等謂斌誇獎抗逆之人擬旨嚴飭世祖特詔斌至南苑溫諭移時九月諭吏部曰翰林官員讀書中祕習知法度自能以學問爲經濟助登上理茲朕親行裁定十八員皆品行清端才猷瞻裕各照外轉應得職銜陞一級用於是斌爲陝西潼關兵備道十六年調江西嶺北道甫至任適遇鄭成功犯江寧陰遣部下至贛州流言煽誘僞通海侯李玉廷踞雩都山寨詐約降實伺南安無備謀陷城斌廉得成功奸細白巡撫蘇宏祖斬之又請移兵守南安玉廷果來犯見有備卻走游擊洪起元追逐數月乃就擒斌以父老乞休歸里尋丁憂旣服闋聞容城孫奇逢講學夏峯往受其業聖祖仁皇帝康熙十七年詔舉博學鴻儒尙書魏象樞薦斌學有淵源躬行實踐副都御史金鉉薦斌文詞淹雅品行端醇召試一等授翰林院侍講同編修彭孫遹等纂

修明史二十年充日講起居注官浙江鄉試正考官轉侍讀明年爲明史總裁官並纂修太宗文皇帝世祖章皇帝聖訓遷左春坊左庶子二十三年二月擢內閣學士充大清會典副總裁官時江寧巡撫余國柱內遷左都御史調湖廣巡撫王新命代之新命旋遷兩江總督六月九卿等會推學士孫在豐浙江布政使石琳堪任江寧巡撫上諭大學士曰所貴道學者在身體力行見諸實事非徒託之空言今有道學名者甚多考其究竟言行皆悖朕聞學士湯斌曾與孫奇逢講明道學頗有定行前典試浙江操守甚善可補援江寧巡撫斌瀕行上諭曰以爾久侍講筵老成端謹江蘇爲東南重地故特簡用居官以正風俗爲先江蘇風俗奢侈浮華爾其加意化導移風易俗非旦夕事從容漸摩使之改心易慮當有成效錢糧歷年不清督撫所奏錢穀刑名大事多有舛錯爾能潔己率屬自然改觀賜御書三鞍馬一表裏十銀五百兩十月上南巡至蘇州諭斌曰向聞吳閭繁盛今觀其風土大略尙虛華安佚樂逐末者多力田者寡遂至家鮮蓋藏人情澆薄爾當使之去奢返樸事事務本庶幾家給人足可挽頽風朕欲周知地方風俗小民生計有事巡行凡日用所需皆自內府儲備秋毫不取之民間恐不肖官吏借端妄

派以致擾民爾其嚴察劾奏駕至江寧諭斌回署治事賜御書及狐腋蟒服初余國柱任巡撫奏言淮揚二府屬水淹涸出者令次年徵輸額賦至是斌以遣員履勘仍然水淹卽涸出者亦未耕種奏入部議令再勘斌仍以實奏事乃寢二十四年四月疏言蘇松等府賦額繁重康熙十八年以來積逋若同時並徵民力不能兼完知縣催科幾敲撲不輟請於二十四年起分年帶徵俾官無挪新補舊之弊民無廢棄農桑之苦疏下部議行是年秋淮揚徐三府復水斌條列蠲賑事宜以聞請發帑五萬兩糴米湖廣先借所屬知縣倉穀散給又言災地百姓餬口無資恐入冬飢寒兼迫流亡者多臣與漕臣徐旭齡河臣靳輔定議二臣就近分董淮安賑務臣卽至清河桃源宿遷邳豐諸州縣察賑上命戶部侍郎素赫往助督賑俾災民咸就撫輯斌先後奏劾蘇州知府趙祿星揚州知府張萬壽句容知縣陳協濬宜興知縣蔡司霑如臯知縣盧縉睢寧知縣葛之英江都知縣劉濤金壇知縣劉茂位等貪酷劣蹟並褫革勘治常州知府祖進朝以失察屬吏降調斌奏留之部議不准得旨祖進朝旣經巡撫湯斌保奏清廉可從所請仍留原任以勸廉吏時吏部行取知縣爲御史斌疏言行取定例必錢糧胥完而蘇州松江二府賦

重役繁甲於天下銓選得此輒謂遷擢難期頽然自放或竟罔顧官箴臣受任巡撫首以察吏安民爲念徧告屬員聖上知人之明出自天授苟能潔己愛民決不至久沈下位故一時守令爭自濯磨操守廉潔政績表著者實不乏人然錢糧則萬萬不能十分全完蓋勢處其難智勇才力俱困今若拘成例勢必以僻壤小邑易於藏拙者塞責未足以光鉅典惟吳縣知縣劉滋吳江知縣郭琇廉能最著乞俯准行取以勵循良俾繁劇與兩邑相符者亦知有登進階相率奮勉疏下部議以二員俱有錢糧未完案格於例得旨劉滋郭琇旣稱爲廉能最著准其行取二十五年三月斌疏言吳中風俗尙氣節重文章而佻巧者每作淫詞艷曲壞人心術蚩愚之民斂財聚會迎神賽社一旛之值至數百金婦女有遊冶之習靚妝艷服連袂寺院無賴少年習學拳勇輕生好鬪名爲打降臣嚴加訓飭委曲告誡一年以來寺院無婦女之遊迎神罷會豔曲絕編打降斂迹惟妖邪巫覡習爲怪誕之說愚民爲其所惑牢不可破蘇州府城西上方山有五通淫祠幾數百年遠近之人奔走如鶩牲牢酒醴之饗歌舞笙簧之聲無時閒歇諺謂其山曰肉山其下石湖曰酒海凡少年婦女有寒熱症者巫覡輒曰五通將娶爲婦病者神魂

失據往往羸瘵而死每歲常至數十家視河伯娶婦爲更甚臣多方禁之其風稍息比因臣勘災至淮乘隙益肆猖獗臣遂收妖像木偶付之烈焰土偶投之深淵檄行有司類此者盡撤燬之其材備修學宮葺城垣之用民始而駭以爲從前曾有官長銳意革除旋即遇祟而死皆爲臣危之數月之後見無他異始大悟往日之非然吳中巫覡最黠且悍恐臣去任後又造怪誕之說箕斂貲財更議興復請賜特旨嚴禁勒石山巔庶可永絕根株疏上得旨淫祠惑衆誣民有關風化如所請勒石嚴禁直隸及各省有似此者一體飭遵先是廷臣有言輔導皇太子之任非斌不可者於是上諭吏部曰自古帝王諭教太子必簡和平謹恪之臣統領宮僚專資贊導江寧巡撫湯斌在講筵時素行謹慎朕所稔知及簡任巡撫以來潔己率屬實心任事允宜拔擢大用風示有位特授爲禮部尙書管詹事府事閏四月斌至諭曰天下官有才者不少操守清廉者不多見爾前陛辭時言平日不敢自欺今在江蘇克踐前言朕用嘉悅故行超擢爾其勉之初河臣靳輔與按察使于成龍論河工事久未決命尙書薩穆哈穆成額往會斌勘議斌謂宜濬高郵寶應諸州縣下河俾積水漸歸於海開一尺有一尺之益開一丈有一丈之益薩穆

哈等因靳輔欲於下河築隄束水入海還奏開濬無益至是上詢斌斌以前議對上詰問薩穆哈穆成額各語塞遂褫其職特遣侍郎孫在豐督濬下河如斌議尋充經筵講官時始設太子講官以斌與詹事尹泰郭棻少詹事舒淑中允閻世繩贊善黃與堅充之斌疏薦候補道耿介賦質剛方踐履篤實潛心經傳學有淵源雖年逾六旬精力尙健乞徵取引見以備錄用上遂授介爲少詹事命斌與介輔導太子二十六年五月因不雨詔臣工直言得失靈臺郎董漢臣以諭教元良愼簡宰執奏御史陶式玉劾漢臣撫拾浮泛之事誇大其詞欺世盜名請逮繫嚴鞫疏下內閣集九卿議有欲重罪漢臣者尋奉特旨免議而余國柱時爲大學士以斌當九卿會議時有慚對董漢臣之語傳旨詰問斌奏董漢臣以諭教爲言而臣忝長宮僚動違典禮負疚實多上以詞多含糊令再回奏斌言臣資性愚昧前奉綸音一時惶怖罔知所措本欲自陳愆過致語多牽混罪何可辭臣自念供奉以來並無正經善言足以仰助萬一而臣動違典禮循省自慙年來衰病侵尋愆過叢積乞賜嚴加處分以警溺職上因其遮飾具奏仍不明晰降旨嚴飭之左都御史璘丹王鴻緒副都御史徐元珙鄭重等劾斌奉諭申飭不痛自引咎並追論其

於蘇州去任時巧飾文告沽名干譽會耿介以疾乞休詹事尹泰少詹事舒淑開
音布翁淑元劾介僥倖求去實無痼疾并劾斌妄薦如尸之人吏部尙書達哈塔
疏言臣奉命輔導東宮數日之內負罪實多以湯斌耿介不能當其任況庸陋如
臣乞准解退疏並下部察議斌介達哈塔俱應革職上命斌與達哈塔仍留任九
月改工部尙書未幾疾作遣太醫診視十月卒年六十有一遺疏入遣大臣奠茶
酒諭曰湯斌任巡撫時廉以自守特加擢用忽聞溘逝深軫朕懷命由驛還櫬下
部議卹部臣以斌曾降七級回奏奉特旨仍如尙書例予祭葬後祀陝西江西江
南名宦世宗憲皇帝雍正十年詔入賢良祠今上乾隆元年賜諡文正所著有洛
學編潛菴語錄詩文諸集

陸隴其

陸隴其浙江平湖人康熙九年進士十四年授江南嘉定知縣十五年十二月巡
撫慕天顏請行州縣煩簡更調之法因言嘉定及崑山丹陽金壇等縣政務甚煩
賦多逋欠如隴其之操守稱絕一塵才幹實非肆應若調補稍簡之縣必勵其素
守惠愛百姓疏下部議謂煩簡更調非例既無肆應之才應照才力不及例降三

級調用會縣民有被盜殺而其親屬以讐殺訴隴其詳報是讐是盜候緝獲後擬既而獲盜鞠實論如律總督阿席熙入奏部議隴其初報不直指爲盜應照諱盜例革職隴其遂罷歸十七年詔舉博學鴻儒工部主事吳源起薦隴其理學純深文行無愧得旨召試隴其赴京未及試丁父憂歸十八年左都御史魏象樞應詔舉清廉官疏言隴其任嘉定知縣清操飲冰愛民如子去官之日萬民遮道攀轅既去之後家家尸祝比於父母部議俟服滿日仍補知縣上曰陸隴其係保舉廉能之官如直隸清苑江南無錫等縣最稱煩難之區用之庶可展其才二十二年補直隸靈壽知縣二十三年六月直隸巡撫格爾古德疏言隴其潔已奉公實心任事革除火耗陋規務農重穀匪類斂跡履任未久而教化已洽輿情循例薦揚以備擢用疏下部議予紀錄時九卿奉旨公舉清廉官格爾古德以兗州知府張鵬翮與隴其並舉焉二十九年吏部以科道需人奉命九卿舉學問優長品行可用者九卿以隴其與清苑知縣邵嗣堯三河知縣彭鵬並舉得旨行取授隴其四川道監察御史十月疏言畿輔沿山州縣土瘠民貧荒多熟少自昔而然數年以來皇上加意撫綏禁止私派不惜蠲賑鳩鵲之民得苟延殘喘然以言乎家給人

足則未也上年荒旱雖間有未被災之處不過差勝於被災者初奉諭概予蠲免二十八年全租及二十九年半租後因部議分別被災輕重撫臣奏災輕田畝秋後帶徵今雖秋收稍稔所入無幾私債之迫索者衣服之典當者已去其大半仰事俯育仍憂不足又可責其兼完新舊之糧乎若非皇上曲加垂卹恐有司惟考成是急不顧民力難勝也疏下部議尋敕部遵前旨盡行蠲免十二月湖廣總督丁思孔以偏沅巡撫于養志在任守制題請隴其疏言天下當承平之時湖南非用兵之地無藉於養志在任守制若因督臣之題請而留將來督撫丁憂皆將援此爲例其不奪情者鮮矣名教自此而弛綱常自此而壞關係世道人心非淺也上覽疏卽以順天府尹王樸代于養志爲偏沅巡撫三十年正月戶部以大兵征噶爾丹軍用浩煩奏行運輸糧草准作貢監及紀錄加級復級封贈與捐免保舉例御史陳菁奏請刪捐免保舉條而增捐應陞先用部議不准隴其疏言捐納一事原非皇上所欲行不過因一時軍需孔亟不得已而暫開若許捐免保舉則與正途無異且督撫保舉之人必曰清廉方可合例保舉可捐納是清廉可捐納而得也至於捐納先用大抵皆奔競躁進之徒多一先用之人卽多一害民之人此

皆不待辨而知其不可者也臣更有請者竊見近日督撫於捐納之員有遲之數年既不保舉又不糾劾者不知果清廉乎非清廉乎抑在清濁之間乎夫既以捐納出身又不能發憤自勵則其志趣卑陋甘於污下可知使之久居民上其荼毒小民不知當何如乞敕部通稽捐納之員到任三年而無保舉者卽行開缺休致庶吏治可清選途可疏而民生可遂矣疏入下九卿議九卿言先用未准捐止捐免保舉實無礙正途若定限到任三年而無保舉者卽行休致則營求保舉奔競益甚應俱無庸議議上得旨保舉一條著會同陳菁陸隴其再行詳議及議陳菁與九卿等並言事例已行次年三月卽停止可不必更張隴其遂獨爲一議曰捐納一途實係賢愚錯雜惟恃保舉以防其弊雖不敢謂督撫之保舉盡公然猶愈於竟不保舉也今若并此去之何以服天下之心卽貪污之輩自有督撫糾劾而其僥倖獲免者遂與正途一體陞轉雖有次年三月停止之期而此輩無不先期捐納卽無不一體陞轉未可云無礙也至於到任三年無保舉者令休致謂恐近於刻不知此輩由白丁捐納得官其心惟思償其本錢何知有皇上之百姓踞於民上者三年亦已甚矣又可久乎況休致在家仍得儼然列於搢紳爲榮多矣若

謂將屆三年輒營求保舉此在督撫不賢則誠有之若督撫賢何處營求且即使督撫不賢亦必不能盡捐納之員而保舉之此休致之議亦從吏治民生起見未有吏治不清而民生可安者未有仕途龐雜而吏治能清者俱難無庸議者也於是陳菁與九卿等各爲一議曰捐納官員倘有劣蹟可隨時糾劾捐納保舉之後仍按俸陞轉督撫旣未保舉必無徇庇之情而官之賢否自有分別何虞龐雜至到任三年之內雖無奇政動上官之保舉亦無劣蹟來下民之告發卽爲安養無事之官何可勒令休致以從前急公之人附八法之末乎且天下何地無才何途無品貲郎始自漢文而文章如司馬相如政事如張釋之皆以貲郎顯故國家用人不必分其門而阻其途實政惠民不必格成議而徇迂見邇者軍需孔亟計各項之捐納人少而保舉之捐納人多是以增列此項隴其不計緩急輕重浮詞粉飾寸步難行致捐納之人猶豫觀望緊要軍需因此遲誤務虛名而債實事莫此爲甚應請革職發往奉天安插議上上曰陸隴其居官未久懵懵不知事情妄昧陳奏理應依議處分念係言官著寬免六月命巡視北城八月以試俸期滿甄別應外調遂乞假歸三十一年十二月卒於家年六十有三所著有困勉錄松陽講

義三魚堂文集諸書二十三年正月江南學政許汝霖任滿上諭大學士等曰學政關繫人才甚屬緊要朕觀原任御史陸隴其學問優良操守甚善若以補授必能秉公考校破除積弊有裨士習大學士王熙以隴其已故奏上乃以前此與隴其同舉清廉之直隸守道邵嗣堯爲江南學政隴其尋祀直隸江南名宦浙江鄉賢世宗憲皇帝雍正二年臨雍釋奠諭九卿議增文廟從祀賢儒因議曰隴其自幼以斯道爲己任精研程朱之學兩任邑令務以德化民平生孝友端方言笑不苟其所著述實能發前人所未發弗詭於正允稱純儒宜配饗俎豆得旨俞允今上乾隆元年詔九卿核議應予追諡諸臣因議曰宋儒胡瑗呂祖謙諸儒皆未居顯職而有諡隴其雖官止五品已從祀文廟應予追諡上特賜諡曰清獻尋禮部以會典未載五品官予諡立碑給價之例請上裁定得旨陸隴其着加贈內閣學士兼禮部侍郎照例給予碑價

索額圖

索額圖滿洲正黃旗人姓赫舍里氏內大臣一等公索尼第三子初任侍衛由三等洊遷至一等聖祖仁皇帝康熙七年授吏部右侍郎八年五月索額圖奏請解

吏部任效力左右仍爲一等待衛是月內大臣鼈拜獲罪拘禁大學士班布爾善坐黨伏誅索額圖旋授國史院大學士兼任佐領九年改內三院爲內閣索額圖爲保和殿大學士十一年世祖章皇帝實錄告成索額圖時爲總裁官加太子太傅十五年同大學士巴泰杜立德等劾奏內閣票本錯誤改寫草簽請敕部嚴察情弊於是大學士熊賜履以改寫草簽復行私毀罷歸事詳熊賜履傳十八年三月京察翰林院以侍講學士顧八代隨征稱職以政勤才長注考索額圖改注浮躁坐降調事詳顧八代傳七月地震左都御史魏象樞奉召對奏請重譴索額圖上諭以修省當自朕躬始翌日召索額圖及衆大臣諭曰茲者異常地震朕反躬修省方圖挽回天意爾等亦宜洗滌肺腸公忠自矢且自任用以來家計頗已饒裕乃全無爲國報效之心朋比徇私朕聞之已久猶望悛改未令議罪今見所行愈加貪黷習以爲常若事情發覺國法具在決不貸宥十九年八月索額圖以疾請解大學士任得旨卿輔弼重臣勤敏練達自用兵以來翼贊籌畫克合機宜覽奏情詞懇切著於內大臣處上朝加意調攝以副眷懷尋授議政大臣初逆藩吳三桂反索額圖謂因撤藩激變請誅建議之人上弗許二十年雲南平諭大學士

明珠等曰吳逆倡亂有謂撤藩所致請誅建議之人者朕若從之則皆含冤泉壤矣先是索額圖之兄噶布拉任領侍衛內大臣以冊諡孝誠仁皇后推恩所生封一等公弟心裕法保分襲索尼世爵心裕襲一等伯任鑾儀使兼佐領法保襲一等公任內大臣二十二年三月上諭議政王大臣曰心裕素行懶惰屢次空班朕交索額圖議處乃止議罰俸一年又法保因懶惰革退內大臣隨旗行走不思效力贖罪在外校射爲樂索額圖亦弗教訓且自恃巨富日益驕縱朕時加訓飭並不悛改著嚴加議處於是議心裕革鑾儀使佐領一等伯法保革一等公索額圖革議政大臣太子太傅內大臣佐領上命心裕留一等伯索額圖留佐領二十五年八月授索額圖領侍衛內大臣時俄羅斯屢犯黑龍江邊境侵踞雅克薩地我兵攻圍之其衆乞降徙去未幾又來踞上復發兵攻圍其察罕汗乃遣人謝罪請釋圍詔許退兵令別遣使來議地界尋遣使費耀多囉等至尼布楚請議值噶爾丹侵掠喀爾喀部上命傳諭費耀多囉等緩期定議二十八年四月命索額圖同都統佟國綱等往議索額圖奏言尼布楚雅克薩應仍歸界內上曰以尼布楚爲界則俄羅斯遣使貿易無棲託之所彼若乞與尼布楚可卽以額爾固納河爲界

索額圖至尼布楚費耀多囉等欲以尼布楚雅克薩歸彼界固執爭辯索額圖詳述舊屬我朝原委斥其侵踞之非宜感戴皇上好生德意於是定議以額爾固納河及格爾必齊河爲界立碑垂示久遠二十九年七月命統盛京吉林科爾沁兵往會大將軍裕親王福全於巴林進征噶爾丹擊敗之於烏蘭布通十一月師還以噶爾丹敗遁不率兵追剿議革職命降四級留任三十五年三月上親征噶爾丹由中路進命索額圖領八旗前鋒察哈爾四旗及漢軍綠旗兵前行並經理火器營事五月上駐蹕什巴爾台以大將軍費揚古西路兵甫至圖拉諭詢王大臣進征遲速機宜索額圖言宜緩行以待西路兵上密諭費揚古截噶爾丹歸路親統師駐克魯倫河噶爾丹望見御營大驚奔竄費揚古截擊之於昭莫多大敗其衆上乃班師三十六年三月駕臨寧夏索額圖從之回鑾至船站命管理水路設站事務是年噶爾丹竄死敍前隨征功復原級四十年九月以老乞休允之心裕代爲領侍衛內大臣四十一年上閱河至德州回鑾特召索額圖侍皇太子允礽養病德州後一月乃偕還京是年心裕以酷斃家人革任索額圖前此亦爲家人訐告罪款上留中未宣四十二年五月命侍衛海青等傳諭曰爾家人告爾之事

留內三年朕有寬爾之意爾無愧悔之心背後仍怨尤議論國事結黨妄行舉國俱係受朕深恩之人若受恩者半不受恩者半卽俱從爾矣去年皇太子在德州時爾乘馬至皇太子中門方下卽此是爾應死處爾自視爲何等人耶爾任大學士時因貪惡革退後復起用並不思念朕恩夫養犬尙知主恩若爾者雖格外加恩亦屬無益朕欲遣人來爾家搜看恐連累者多所以中止若將爾行事指出一端卽可正法尙念爾原係大臣朕心不忍但令爾閒住又恐結黨生事背後怨尤議論著交宗人府拘禁索額圖尋死於禁所後數年皇太子允礽以狂疾廢黜上諭廷臣曰昔允礽立爲皇太子時索額圖懷私倡議凡服御諸物俱用黃色所定一切儀制幾與朕相似驕縱之漸實由於此索額圖誠本朝第一罪人也

明珠

明珠滿洲正黃旗人姓納喇氏葉赫貝勒錦台什之孫也父尼雅哈當太祖高皇帝滅葉赫時隨其兄德勒格爾來降授佐領屢從征有功世祖章皇帝定鼎燕京予騎都尉世職順治三年卒長子振庫襲明珠其次子也由侍衛授鑾儀衛治儀正遷內務府郎中聖祖仁皇帝康熙三年擢內務府總管五年授弘文院學士六

年充纂修世祖章皇帝實錄副總裁七年奉命與工部尙書瑪爾賽閱淮揚河工定議修復興化縣之白駒場舊閘增鑿黃河北岸引河以備蓄洩是年刑部尙書對哈納遷大學士明珠授刑部尙書八年以對哈納兼刑部尙書改明珠都察院左都御史十年二月充經筵講官八月奏停巡鹽御史遍歷州縣之例十一月遷兵部尙書十二年正月上幸南苑閱八旗甲兵於晾鷹臺明珠先期布條教俾衆演習及期軍容整肅上諭之曰今日陳列甚善可著爲令是年平南王尙可喜請撤藩移遼東吳三桂耿精忠亦以是請下議政王大臣九卿等會議時有謂三桂當久鎮雲南不可撤者明珠與戶部尙書米思翰刑部尙書莫洛等堅持宜撤遂以兩議上詔從明珠等議十四年調吏部尙書十六年授武英殿大學士先是吳三桂反大學士索額圖謂因撤藩激變宜罪議撤諸臣上弗許及耿精忠降尙之信賜死吳逆殄滅上宣諭廷臣以前議撤藩惟明珠與米思翰莫洛等爲能稱旨云二十一年議政王大臣等勘論耿精忠及其黨曾養性等二十餘人罪狀擬如律上詔詢廷臣欲量予寬減明珠奏耿精忠罪浮於尙之信尙之信縱酒行兇口出妄言耿精忠負恩謀反悖逆尤甚法在不赦上又諭以逆黨多人尙宜矜釋明

珠奏此中惟陳夢雷金鏡田起蛟李學詩可寬上仍命王大臣集議俱如明珠言於是陳夢雷等四人免死入旗爲奴耿精忠曾養性等咸伏誅時詔重修太祖太宗實錄及編纂三朝聖訓政治典訓平定三逆方略大清會典一統志明史皆以明珠爲總裁官兩遇實錄告成加太子太傅晉太子太師二十七年二月御史郭琇疏劾明珠與大學士余國柱背公營私諸款一凡閣中票擬俱由明珠指麾輕重任意余國柱承其風旨卽有舛錯同官莫敢駁正聖明時有詰責漫無省改卽如陳紫芝參劾張汧疏內并請議處保舉之員上面諭九卿應一體嚴處票擬竟不之及一明珠凡奉諭旨或稱其賢則向彼云由我力薦或稱其不善則向彼云上意不喜吾當從容輓救且任意增添以市恩立威因而要結羣心挾取貨賄至每日奏畢出中左門滿漢部院諸臣及其腹心拱立以待皆密語移時上意無不宣露部院衙門稍有關係之事必請命而行一明珠連結黨羽滿洲則佛倫格斯特及其族姪富拉塔錫珠等漢人之總攬者則余國柱結爲死黨寄以腹心凡會議會推皆佛倫格斯特等把持而國柱更爲之囊橐惟命是聽一督撫藩臬缺出余國柱等無不展轉販鬻必索及滿欲而後止是以督撫等官愈事剝削小民重

困今天下遭遇聖主愛民如子而民間猶有未給足者皆貪官搜索以奉私門之所致也一康熙二十三年學道報滿之後應陞學道之人率往論價九卿選擇時公然承其風旨缺皆預定由是學道皆多端取賄士風文教因之大壞一靳輔與明珠余國柱交相固結每年糜費河銀大半分肥所題用河官多出指授是以極力庇護當下河初議開時彼以爲必委任靳輔欣然欲行九卿亦無異詞及上欲另委人則以于成龍方沐聖眷舉出必當上旨而成龍官止臬司可以統攝於是議題議奏仍屬靳輔此時未有阻撓意也及靳輔張大其事與成龍議不合始一力阻撓皆由倚托大臣故敢如此一科道官有內陞出差者明珠余國柱率皆居功要素至於考選科道既與之訂約凡有本章必須先行請問由是言官多受其牽制一明珠自知罪戾見人輒用柔顏甘語百計款曲而陰行驚害意毒謀險最忌者言官恐發其奸狀當佛倫爲總憲時見御史李興謙屢奏稱旨御史吳震方頗有參劾卽令借事排陷聞者駭懼以上各款但約略指參總之明珠一人其智術足以彌縫罪惡又有余國柱奸謀附和負恩之罪罄竹難盡伏祈霆威立加嚴譴天下人情無不欣暢奏入上諭吏部曰國家建官分職經理庶政必須矢志精

白大法小廉各守職業實心任事庶無負拔擢簡用之意朕親理萬幾歷有年所於爾部院大小官員行事無不深知爲臣子者既僭爵受祿榮及父母庇其子孫家能自給便當知足無致隕越前已屢頒諭旨嚴行申誡又復諄諄面諭訓誨再三今在廷諸臣自大學士以下有職掌官員以上全不恪勤乃職惟知早出衙署偷安自便三五成羣互相交結同年門生相爲援引傾陷商謀私事徇庇同黨圖取貨賄作弊營私種種情狀確知已久九卿詹事科道皆朕委任之員凡遇會議自當各出己見公同商酌乃一二欲行倡率之人持議於前衆遂附和於後雷同草率一意詭隨又其甚者雖在會議之班茫無知識隨衆畫題希圖完結廷議如此國是何憑又有當集議時緘默自容及至僨事巧於推卸朕深惡此等推委苟容之輩亦屢加嚴飭至於用人關係重大羣臣賢否難以周知故遇緊要員缺特令會同推舉原期爲國得人實有裨益亦欲令被舉者警心易慮恐致溺職累及舉者因而勉自刻勵九卿諸臣宜體朕心從公選舉方爲不負委任乃歷來所舉官員稱職者固有而貪黷匪類往往敗露此皆瞻徇情面植黨納賄所致凡茲情弊朕非不知前者班布爾善阿斯哈等身爲大臣所行悖亂致干憲典遂行正法

至今猶耿耿於懷是以比來大小官員背公徇私交通貨賄朕雖洞見而不卽指發冀其自知罪戾痛加省改庶可終始保全詎意積習深錮漫無悔悟如審擬蔡毓榮一案庇護輓救瞻徇黨類百計營私因朕具悉其奸私謀未遂近差塞楞額往審張汧被參情事朕面諭塞楞額張汧居官貪穢爾宜嚴行審出迨差回時詢問塞楞額奏稱臣於此案盡心嚴鞫若有失實甘受誅戮及覽其奏案惟恐累及保舉張汧之人竟爲庇護朕知內閣原擬票簽將保舉張汧官員并未議及業行折出又念張汧審結定罪之後自然發露因仍用原簽票發又靳輔下河工程屯田之案朕早已察其情弊特遣佛倫等前往勘議今所議殊屬偏私且凡會議之時科爾坤佛倫等務執己見持論好勝苟非懷挾私情何以力排衆議朕亦曾面加誠諭未見畏悔如此積弊愈久愈深物議沸騰輿情憤激以致言官列款參奏本應發明其事以肅官方因不忍遽行加罪大臣且用兵之時有曾效勞績者故免其發覺勒德洪明珠著革去大學士交與領侍衛內大臣酌用李之芳著休致回籍余國柱著革職科爾坤著以原品解任佛倫熊一瀟等著解任於河工案內完結嗣後大小臣工各宜洗滌肺腸痛改陋習潔己奉公勉盡職掌以副朕寬大矜

全咸與維新之至意尋授明珠爲內大臣二十九年上命裕親王福全統兵征噶爾丹明珠與領侍衛大臣索額圖等參贊軍務尋以噶爾丹敗遁不行追剿議罪降四級留任三十五年四月上親征噶爾丹遣明珠與左都御史于成龍督運西路軍餉五月以噶爾丹敗遁班師明年上復親征明珠扈從至寧夏奉命撥駝運餉又偕大學士黃茂賚白金頒賚鄂爾多斯隨征兵衆師還敘功復原級四十二年奉命與內大臣阿密達等賑山東河南流民之就食京師者四十七年四月以疾卒年七十有四上遣皇子奠茶酒賜祭葬如例今上乾隆三十七年十月諭曰國史館進呈新纂明珠傳內所列郭琇糾參各款臚採不全於核實紀載之義未合明珠在康熙年間身爲大學士柄用有年乃竟不克自終漸至植黨營私市恩通賂勢燄薰灼物議沸騰皇祖疊申誠諭期得以恩禮保全而明珠不知省改致郭琇參奏復念其於平定三藩時曾有贊理軍務微勞不卽暴示罪狀然亦立予罷斥並未嘗廢法姑容後雖量爲錄用僅授內大臣之職距其身歿二十餘年不復再加委任此實皇祖恩威並用權衡纖毫不爽迥非三代以後所可幾及而確核明珠罪案祇在徇利太深結交太廣不能恪守官箴要不至如明代之嚴嵩温

體仁輩竊弄威福竟敢陰排異己潛害忠良舉朝側目而莫可誰何也卽如明珠以現任閣臣而郭琇卽以露章臚款抨擊甚力使明珠果能如明季諸奸之箝制言路則郭琇矢口之間早已禍不旋踵卽或深謀修隙亦必多方狙伺假手擠排乃郭琇因此一疏遂以鯁直受知不及二年卽由僉都御史洊擢都御史不聞明珠之黨有能爲之抑沮者其間亦曾因事論黜而我聖祖鑒其政績風力由閒廢中擢爲湖廣總督後因紅苗搶奪隱匿不報削籍歸里其罪實由自致亦非明珠之黨藉事以爲報復今郭琇列傳具在可考而知也至於明珠生平是非功過原不相掩我皇祖慎持予奪之柄至公至明因物付物恭繹聖諭仁至義盡一一適如其人之所自取卽此可以窺見萬一茲館臣哀輯明珠事蹟因檢閣庫未獲郭琇劾章似由當日留中不下遂據館中所存郭琇疏稿刊本撮載大凡其間刪削過多恐傳之既久或疑修史者有意曲爲隱諱於據事直書之旨無當也因命於明珠傳中全列郭琇參本俾天下後世得喻此事本末共知我國家立綱陳紀朝宁肅清從無有宵小僉壬如前代之得以怙權干政而我皇祖聖明英斷刑賞持平實爲執兩用中之極則朕稟承祖訓凡一切用人行政無不本此意爲折衷用

是剖悉原委宣諭中外仍命錄載傳後使定論昭然永以示傳信而垂法戒焉

佛倫

佛倫滿洲正白旗人姓舒穆祿氏初由筆帖式遷兵部主事聖祖仁皇帝康熙十五年遷詹事府中允尋遷工部郎中歷少詹事洊陟大理寺卿十八年擢內閣學士充經筵講官時逆孽吳世璠尙踞黔滇是年六月佛倫奉命同侍郎金鋹赴湖廣總理糧餉九月疏言進黔兵餉自至鎮遠後皆資陸運因量設塘站數處集夫遞送惟是黔民遭亂稀少請飭將軍督撫招徠土民貿易以裨糧運從之十九年兼理四川糧餉及賊平還京二十二年遷刑部侍郎二十三年命同吏部侍郎陳廷敬兵部侍郎阿蘭泰副都御史馬世濟管理錢法疏請令各省有蘆課關稅之所辦銅資解寶源局以廣鼓鑄下工部議行二十四年調兵部侍郎尋擢左都御史疏言科道各官有受囑陳奏結黨誣陷及給假終養丁憂不在家靜守遍遊各省挾制督撫諸弊請嚴定處分下吏部議行二十五年遷工部尙書二十六年二月調刑部九月調戶部先是河道總督靳輔言高郵寶應諸州縣下河宜築堤束水入海按察使于成龍以堤工難成請疏濬下河及海口上遣侍郎孫在豐往董

疏濬事靳輔又言宜自高家堰起加築重堤束各壩減洩之水出清口歸黃河而停濬下河並請於隄外涸出田畝設官清丈以爲屯田可增錢糧百餘萬上曰朕從利益民生起見非爲錢糧著佛倫與侍郎熊一瀟給事中達奇納趙吉士會同江南總督總漕確勘議奏尋議應如靳輔所請二十七年漕運總督慕天顏疏劾佛倫勘議河工皆從靳輔臆說不顧興屯之占田厲民孫在豐疏言前佛倫與臣等會勘河工時原議海口應濬擬有疏稿後忽改爲加築重堤停濬海口之疏雖係佛倫主稿實靳輔陰謀御史陸祖修復劾佛倫往勘河工屯田二事左袒河臣不顧公議嗣奉命九卿會議而主議者不過佛倫及尙書科爾坤左都御史格斯特等三四人卽如屯田一節尙書張玉書左都御史徐乾學力言屯田所占民田應還業主而科爾坤等置若罔聞半依佛倫所奏具稿其餘九卿有不見議稿隻字者疏入下部嚴察議奏會御史郭琇疏劾靳輔偏聽幕友陳潢阻撓下河開濬又劾大學士明珠余國柱與佛倫結黨營私諸款上諭責佛倫往勘河工屯田所議偏徇且凡會議時挾私好勝命解戶部尙書任召靳輔于成龍同郭琇佛倫熊一瀟達奇納趙吉士等入對佛倫乃奏停屯田有丈出民田概還業主其暫設同

知縣丞等官並裁汰於是部議佛倫應革職上曰佛倫任工部時極其勤勞凡奉差遣亦能勝任但議此事舛錯殊甚著留其佐領以原品隨旗行走逾月授內務府總管二十八年山東巡撫缺諭大學士等曰山東紳衿最稱桀驁且好結朋黨宜簡用風力之人爲巡撫著以佛倫補授二十九年正月疏言沂州等州縣衛所未完康熙二十八年錢糧請於麥收後開徵上曰山東本年地丁錢糧全行蠲免原欲使小民終年休息若帶徵未完舊欠必至借端滋弊著於三十年帶徵六月佛倫疏言東省賦役不均凡紳衿貢監戶下悉免雜差遂有奸民詭寄田畝規避徭役請通限兩月之內許其自首改正嗣紳衿等田畝令與民人一例應役以釐剔積弊得旨徭役不均偏累小民所奏改正釐剔具見實心任事並不瞻徇直省應一體行七月佛倫疏言東省本年蠲免正賦臣仰體皇仁勸諭大戶酌減佃租一分至五分不等請嗣後直省凡遇恩免賦糧七分蠲免業戶三分蠲免佃種之民又言東省本年豐收紳民願每石捐輸三合以爲積貯合計得穀二十五萬餘石用備荒歉疏並下部議行三十年革職縣丞譚明命許吏部主事朱敦厚任濰縣知縣時婪贓事下佛倫鞠勸佛倫言敦厚加派婪贓經前撫臣錢瑯審實敦厚

因浼求原任刑部尙書徐乾學貽書錢珏徇情銷案請敕部議處乾學等皆斥職三十一年擢川陝總督明年西安鳳翔飢佛倫請暫減二府額銷鹽引之半又言西安駐防官兵糧草州縣苦於遠解請於距省四十里可通水路之曹店設倉收兌事俱下部議行三十二年冬入覲賜冠服遣回任加禮部尙書銜三十三年授禮部尙書三十五年上親征噶爾丹命與大學士阿蘭泰尙書馬齊分班值宿禁城三十八年授文淵閣大學士初佛倫任山東巡撫時疏劾左都御史郭琇前任吳江知縣虧帑事且言琇父郭景昌原名爾標係明季御史黃宗昌家僕曾入賊黨伏法琇私改父名濫請封典應予追奪部議如所請三十九年二月郭琇以湖廣總督入覲具疏訟佛倫誣讎其父上詰問佛倫以訪聞舛錯對下部察議應革職援赦得免三月以前任總督時散給陝西籽種銀兩不確察各官侵扣挪用諸弊應降四級調用上命以原官休致明年卒四十四年上諭大學士馬齊曰佛倫爲總督時密奏涼州總兵師帝賓騎射不堪朕諭以師帝賓爲三屯營副將時騎射之佳大臣侍衛皆知乃佛倫終劾之而佛倫亦於此壞名又審奏趙良棟不可居寧夏乞召赴京師後良棟來朝朕命之歸良棟奏曰有人言臣不宜居寧夏臣

不便歸朕問何人良棟言佛倫以告索額圖而索額圖語臣以此觀之人之無恥未有如佛倫者凡密奏之事皆朕親手封發即左右人亦不得見此皆體密奏者之心而重其事也佛倫自行密奏而反以告人猶可比之人數乎四十九年戶部虧空積年承辦草豆銀兩事覺上命從寬就現在得贓人員於未審之前以所得之銀歸款免其革職拏問因諭諸大臣曰戶部弊端始自尙書科爾坤佛倫後來諸臣因循成習以至於此凡爲大臣者理應廉潔自守阻勉從事方爲無忝厥職也

余國柱

余國柱湖北大冶人順治九年進士授兗州府推官康熙三年內陞行人司行人十一年充山西鄉試正考官明年遷戶部主事十五年七月以考選授戶科給事中十月疏言邇者關中底定閩逆投誠蕩平雖可刻期然一日未罷兵卽一日不可無糧餉宜於浙江江西湖廣開捐例納米豆穀麥草束以濟軍需山東河南歲值大稔並宜捐米貯臨河州縣支應本省兵糧多則運解京倉疏下部議以山東河南需糧無幾運京徒滋耗費浙江兵已進征福建無需捐納准開例湖廣江西

福建三省現任官捐加級紀錄四品以下降革官捐復原職餘分別錄用先用及頂帶榮身十七年五月疏言天下鹽課定額不下三百餘萬止陝西省遇閏加銀應令各省一例又可增銀二十餘萬於軍需不無小補又疏言京通二倉歲進漕白三百餘萬各監督交代時雖有盤驗無缺印結相沿日久未免視爲具文自後應令每十版抽驗一版不足則照版科算令舊監督賠補疏並下部議行十二月轉禮科掌印給事中十八年七月劾浙江水師提督常進功年老耳聾非高聲大呼不聞一語恐秘密軍機因之洩露所關非細疏下部察議罷進功任十九年七月疏言曩者平南王尙可喜駐鎮廣東頗知奉法自逆子尙之信叛後恣意妄爲橫行暴斂雖勢蹙歸正而魚肉閭閻滋害如舊近爲屬下護衛張永祥控告其自辯疏中有云張永祥假其名色每年私收稅銀一千六百兩卽此可知尙之信所自收之稅當不下百萬應令督撫察核歸公累民者奏明豁免並分撥藩下官兵或駐防或隨征毋坐糜俸餉疏下王大臣等議行九月遷鴻臚寺少卿十二月轉光祿寺少卿二十年二月遷左僉都御史五月擢左副都御史九月疏請停各部歲終舉劾之例有不職者隨時舉劾宜保薦者俟京察之期核舉十一月以滇南

平定請釐定樂章上並允所請十二月劾兩廣總督金光祖前此降附吳三桂嗣復蔭庇尙之信應黜罷之以爲不忠者戒從之是月授江寧巡撫二十三年內陞左都御史尋遷戶部尙書二十六年二月授武英殿大學士先是任巡撫時疏請增設機房四十二間製造寬大緞疋得旨寬大緞疋非常用之物何爲勞民糜費斥所奏不行又屢奏淮揚二府屬水退涸出地並令次年征輸額賦及湯斌爲巡撫奏覆勘涸出地皆未耕種且有五千九百四十餘頃仍然水淹事乃寢互詳湯斌傳二十七年二月御史郭琇疏劾國柱在內閣票擬承順大學士明珠指麾輕重任意卽有舛錯同官莫敢駁正屢奉諭詰責漫無省改遇會議會推與尙書佛倫等結黨把持督撫藩臬缺出展轉援引總攬賄賂保送學道及科道內陞出差率皆居功要素營私負恩罄竹難盡請加嚴譴上以黨援賄賂諸弊久已洞鑿因不忍遽行加罪大臣概免勘問革國柱職互詳明珠傳國柱旣罷去法司以覆勘被劾湖廣巡撫張汧上荆南道祖澤深罪狀前此曾遣人赴京行賄營謀庇護詞涉國柱請檄追質問得旨貫免二十八年三月給事中何金蘭疏言凡解職解任官仍居原任地方例有明禁余國柱曾爲江寧巡撫游陟大學士不思竭忠圖報

贖貨無厭穢迹彰聞其人品心術久在睿照中荷恩不置重典放歸田里使稍知廉恥當疾返故鄉杜門省愆乃被黜後挾輜重往江寧省城購買第宅廣營生計呼朋引類壘斷攫金借勢招搖顯違禁例乞敕部嚴議事下兩江總督傅拉塔察訊以留戀原任地方購買第宅並設立錢店典鋪覆奏刑部擬杖折贖詔免罪趣回籍尋卒於家

于成龍

于成龍山西永寧人順治十八年由副榜貢生授廣西羅城知縣聖祖仁皇帝康熙六年總督盧興祖等言羅城在深山之間猺獠頑悍成龍潔己愛民建學宮創養濟院任事練達堪列卓異是年遷四川合州知州八年遷湖廣黃州府同知十三年二月擢武昌知府值逆藩吳三桂踞湖南大兵將進征巡撫張朝珍檄成龍於咸寧縣境造浮橋濟師甫成雨水衝激橋圯部議革職時吳逆散布偽劄煽誘湖北州縣人民麻城大冶黃岡黃安各山寨皆叛應之朝珍以成龍素爲黃州人民信服令往麻城招撫成龍單騎直入賊寨諭脅從者免罪賊衆遂降復督兵擒斬大冶賊黃金龍鄒君升等朝珍疏言黃屬四十八寨接連數省舊爲盜藪伏莽

易發必得成龍彈壓請復成龍職卽以爲黃州府知府上允之成龍尋復率黃岡知縣李經政千總李茂昇等集鄉勇二千人偕營兵搜剿賊寨擊潰賊衆於石子山及牧馬崖擒僞總兵鮑世榮僞游擊何士榮僞參將陳頓澈鄧少興等十五年十月丁繼母憂總督蔡毓榮等奏令在任守制十六年十月增設江防道於黃州擢成龍任之十七年六月遷福建按察使十八年九月巡撫吳興祚等言成龍執法決獄不徇情面屢伸冤抑案牘無停不濫准一詞不輕差一役而刁訟風息擾害弊除捐增監獄口糧徧濟病囚醫藥倡贖被掠良民子女數百口資給路費遣歸屏絕所屬饋送性甘淡泊吏畏民懷爲閩省廉能第一疏入得旨于成龍清介自持才能素著尤稱卓異是月遷福建布政使十九年二月擢直隸巡撫時直隸不設總督保定有守道管布政使事有巡道管按察使事與通永霸昌大名口北天津諸道各以所司之事達巡撫成龍既莅任戒州縣私加火耗餽上官節禮尋據道府揭報不職知縣劾罷數員而知縣有以道府因無節禮誣揭捏報控訴成龍者九月成龍疏言自督撫監司以及州縣上下名義不容紊越未有如直屬之逞訐上官體統倒置者臣六月抵任檢閱舊案如前撫臣金世德之清慎明決而

已故知縣施延寶夏顯煜侵欠庫銀盈千累萬被劾後反訐告道府效尤成風恬不知怪臣任事後以驅除貪吏拯救民生爲務據道府揭報察其已甚者參劾以示懲創隨有知縣訐告道府兩案皆撫拾往事混肆污蔑之言且不由守巡兩道徑以驗文封送似此悍藐將來道府必懷投鼠忌器之嫌而隱忍養奸法紀頽靡如果道府不法而撫臣姑容恣害應重罪撫臣若道府揭報屬官而屬官反噬挾制應加嚴處分以肅法紀疏下部確議督撫姑容不法道府降三級調用屬官首告上司在上司揭報後者不准理革其職已革職者刑部議罪定爲例十月疏言宣府所屬東西二縣與懷安尉州二衛有水衝沙壓地千八百頃有奇小民包糧爲累經前撫臣金世德具疏請豁部議令照舊徵收臣履任後勘明衝壓益甚耕耨無期窮黎綿力幾何奚堪永遠包賠荒糧一日不除則民生一日不遂雖日今師旅未息需餉尙殷而滇黔餘孽指日蕩平此後軍需無虞不足況合計四處荒地糧不過三千餘石銀僅一千餘兩在國計爲涓滴之捐而數千餘戶貧民得免包賠皆頂戴皇仁矣疏下部議令確勘取結自二十年始豁免錢糧十二月疏言宣府所屬東西兩城及萬全左右前衛懷安尉州保安紫溝西陽等處俱報夏災

又被秋災已奉恩旨分別緩徵並平糶積貯糧石近據通判陳天棟報稱東西二城二十餘日間飢死者不下數十人城坊鬧市日有偃仆窮民伏思平糶糧石止救稍能措糶之民而不能救囊無一錢殍臥待斃之民卽再疏請賑候部議覆奉旨允行亦須一月此一月之內民之飢死者又不知凡幾矣臣仰體皇上惠愛元元至意委保定府同知何如玉等馳赴東西二城及前衛懷安等處動支平糶倉糧確察飢困不能謀生窮民每口賑給二斗俾少延月餘其善後之舉容臣與守道等酌議另行題請疏入下部議尋奉詔卽以平糶米石賑濟十二月疏劾青縣知縣趙履謙徵額賦銀一萬餘兩多收火耗三千餘兩領庫銀一千賑濟侵蝕入己及勒索報災冊費等款請革職治罪二十年正月入覲諭曰爾爲今時清官第一殊屬難得聞爾昔在黃州土賊嘯聚爾往招之卽時投順解散何以致之成龍奏曰臣惟宣布皇上威德未有他能上問屬吏亦有清廉者否成龍以知縣謝錫袞同知何如玉羅京對上曰爾前所劾知縣趙履謙甚當成龍奏曰趙履謙過而不改臣不得已而劾之上曰爲政之道當知大體小聽小察不足爲多且人貴始終一節爾其勉之尋諭曰講官曰于成龍起家外吏卽以廉明著聞洊陟巡撫益

勵清操凡在親戚交遊相請託者概行峻拒所屬人員並戚友間有餽遺一介不取朕甚嘉之知其家計涼薄特賜內帑銀一千兩朕親乘良馬一匹以示鼓勵尋命戶部遣員外郎葉倫會同成龍賑濟宣府各處飢民詔蠲免本年額徵積年帶徵錢糧及房稅七月成龍疏言宣府被災地方房稅已蒙恩免徵而真定府屬獲鹿井陘曲陽平山靈壽五縣因夏旱二麥無收其房稅銀兩請緩至來年下部議從之九月詔曰朕巡行近畿至霸州見其田畝窪下多遭水患小民生計維艱何以供給正賦著察明酌量蠲免成龍疏言霸州水淹地方先經疏報勘明成災十分九分者一千五百四頃有奇部覆照例免本年錢糧十之三計額徵銀六千三百八十兩有奇應蠲一千九百餘兩今仰邀睿照洞悉民困特恩軫卹應將本年錢糧破格全蠲得旨俞允又疏言直屬監司廳印等官求其與盜案脫然無累得預陞轉之列者十不能三四此案未獲彼案復增一案幸完數案未結甚有一日而失盜之案數家經年累月攢眉無策在州縣身任地方既不能消弭於未然又不能緝獲於事後責無可諉降調允宜但既降級去任接緝之官事不切已搜捕玩延強盜反多漏網若議處降一級者仍留原任能獲一半以上開復原降之級

於懲過之中寓以勸勉必能悉力擒拏不致兇徒倖免至於薦舉卓異行取乃朝廷超拔人才之典而亦督撫諸臣盡其以人事君之義每因一二案未完格於定例遠大之器困於百里深爲可惜前見江寧撫臣慕天顏以現有錢糧未完處分之知縣林象祖任辰旦題請行取奉特旨俞允仰見皇上憐才之殷初未欲以成例限人直隸盜案處分與江南錢糧相等非無品行卓越才具優長如林任二令者應無論盜案之銷否一體薦揚以備擢用其捕盜同知通判雖專司督緝之任但所屬有十餘州縣及二三十州縣者竟同各州縣一體處分似屬過甚武職議處既有專汛兼轄統轄之等差則同知通判亦當視兼轄武職例至督緝道員定例罰俸之外停其陞轉臣思方面大吏或由京官改授或由外吏陞任率多練達之才及其年力精壯正可矢圖報效乃因督緝議處無復進階之期更爲可惜在承緝官固應停其陞轉限年緝獲而督緝者旣已罰俸似可免其停陞疏下部議不准奉諭曰朕巡視畿輔自山海關以西永平以東一面傍海一面臨邊盜賊無地潛藏故剽劫猶少至玉田豐潤遵化薊州霸州保定諸處民居稠密盜賊所以繁也今處分之例太嚴恐官民俱累其令九卿等詳議尋議承緝不獲未及二年

者免離任督緝道員限滿罰俸免停陞十二月成龍疏言臣早年失恃繼母李氏勤劬撫育臣初任知縣欲奉母之任而力有不能及任黃州知府正值兵興終未遂迎養之私尋聞母病故督撫諸臣題留在任守制由是抱哀供職馳驅軍旅之間而臣母停柩在家不遑顧也今滇南逆孽蕩平我皇上誕敷文德首扶植綱常敦崇倫理臣謬任巡撫代宣聖化亦惟以綱常倫理教人際太平盛時非復從前多事若不歸葬是貪戀顯榮忘親背義對屬臨民之際先自懷慙歉又何以教人乎伏乞允臣回籍葬母完此一生大事則犬馬餘年皆圖報聖恩之日疏入得旨覽奏情辭懇切准假三個月回籍葬母事竣速赴任供職越六日特旨授江南江西總督前此因江西用兵分設江西總督至是復併爲一二十一年正月成龍疏言臣乞歸葬母奉有欽定假期而新承簡命未可久遲赴任謹循前年直隸守道護理撫印之例以守道董秉忠暫護直撫印務臣卽回籍葬母事畢赴新任再有陳者前歲舉劾案內臣以直隸守道董秉忠阜城知縣王燮薦舉去年遵旨往宣府賑濟飢民以南路通判陳天棟薦舉王燮已准行取其董秉忠陳天棟均未予註冊而賢績已達天聽此外柏鄉知縣邵嗣堯高陽知縣孫宏業俱堪磨練通州

知州于成龍具恬淡之性優通變之才霸州州判衛濟賢凜清白之操化浮囂之氣並堪大用茲值離任之際不敢隱蔽特列名上陳以盡舉賢之悃疏入報聞下吏部邵嗣堯等准註冊六月疏言江蘇現屆二年舉劾之期臣自四月任事虛衷察訪屬員有立身以名節自勵而設施未洽民情行已在清濁之間而舉動未撓民怒蓋賢非循卓之尤不賢非污墨之甚恐舉之劾之不足以爲未舉未劾者愧勵請暫停此次舉劾其賢者臣獎進誘掖徐觀厥成特疏題薦不賢者教誡以期自新倘怙惡不悛亦特疏糾參無稍姑容疏下所司知之是月江寧知府缺出成龍請敕廷臣會推清操久著幹練成效與通州知州于成龍霸州州判衛濟賢相類者吏部以知府無會推例議上上命卽以通州知州于成龍陞補江寧知府十二月疏言臣自入境受事細事必出於躬親勺水必慍於夙夜凡屬吏進見多方訓誨隨事整飭察其所守之誠僞訪其敷政之寬嚴亦莫不爭相濯磨矢志釐剔未幾而或以盜案或以逋欠或以違限屢有處分今遇計典與舉薦之例不符如江蘇布政使丁思孔歷任既久參罰因多既不敢違例以入卓異之列又不敢拘例以蹈蔽賢之愆現將入覲乞親賜諮訪破格擢用疏下吏部都察院以毋庸議

覆奏得旨丁思孔准爲卓異旋即擢任偏沅巡撫二十二年十月督造漕船副都御史馬世濟還京疏言總督于成龍向有聲譽初到江南美名如故聞其自任用中軍田萬侯之後人多怨言臣奉差在南見其年近古稀景迫桑榆道路嘖嘖咸謂田萬侯欺朦督臣倚勢作弊因未有實據難以入告督臣衰暮不能精察故匪人得以播弄而敗善政且各有司衙門皆有督臣穢言告示污讎各官如果各官不法何難白簡題參若俱循良豈可憑空凌辱顯係小人播弄督臣令其虛張聲勢就中取利請罷黜田萬侯並令成龍休致疏下部議部臣以馬世濟所言未有實據令成龍明白回奏成龍奏臣到江南期以興利除害察吏安民仰報知遇無奈兩江之吏治營務刑名錢穀繁劇實甚臣晝夜拮据躬親料理從不敢寄耳目於左右然近習難防或有窺伺欺弄臣亦安能保其必無憲臣馬世濟疏稱中軍田萬侯倚勢作弊臣實未之覺察也至於告示一節或地方之利弊民生之疾苦臣有見聞卽通行禁飭無非以利害禍福之言痛切告誡其詞未免過於峻厲似涉穢言污辱憲臣馬世濟疏稱小人播弄令其虛張聲勢就中取利臣亦未之覺察也此皆臣之衰邁昏曠何以自解若夫臣之年近古稀景迫桑榆久在皇上洞

鑒之中雖殫精竭慮不敢稍自寬假然氣衰力疲龍鍾之狀大非昔比臣又何敢自諱乞敕部嚴加議處以爲大臣溺職有初鮮終者之戒疏下部察議兵部言成龍既稱田萬侯倚勢作弊就中取利未之覺察應革田萬侯副將職吏部言成龍三月江蘇巡撫余國柱入爲左都御史安徽巡撫涂國相陞任湖廣總督成龍兼署兩巡撫事四月卒於官年六十有八諭部予卹部臣以成龍曾降五級奏得旨予開復祭葬如典禮謚曰清端七月內閣學士錫住勘問海疆還上問曰爾到江南聞原任總督于成龍居官如何錫住奏成龍居官甚清但因輕信或爲屬員欺罔上曰于成龍因在直隸居官甚善朕特簡任總督既到江南有人言其變更素行病故後知其始終廉潔甚爲百姓所稱殆因素性梗直與之不合者挾仇讒害造作屬下欺罔等語是爲不肖之徒所嫉耳居官如于成龍者有幾十一月上南巡至江寧諭知府于成龍曰爾務效前任總督于成龍正直潔清乃無負朕優眷回鑾諭大學士等曰國家澄敍官方首重廉吏其治行最著者尤當優加異數以示褒揚原任江南江西總督于成龍操守端嚴始終如一朕巡幸江南延訪吏治

博採輿評咸稱居官清正實天下廉吏第一應從優褒卹爲大小臣工勸其詳議以聞御製詩云服官敦廉隅抗志貴孤潔又云江上見甘棠遺愛與人說尋允廷臣議加太子太保蔭一子入監世宗憲皇帝雍正十年入祀賢良祠孫準官至江蘇巡撫

王鷲

王鷲山東福山人順治十二年進士授戶部主事聖祖仁皇帝康熙五年充廣東副考官六年遷員外郎八年遷刑部郎中十九年授四川松威道時逆孽吳世璠未滅大軍分剿永寧建昌諸賊黨進征雲南水陸數千里皆巉崖危峽鷲管運軍糧至蝦蟆灘覆舟又墜馬於獅子坎仍刻期前進轉輸無誤二十四年七月壘溪大定堡山後生番阻截哨道抗撫肆掠巡撫韓世琦奏調官軍進剿令鷲駐劄茂州彈壓并同松潘鎮總兵高鼎會議先撫後剿機宜鷲馳至大定堡傳示招撫反覆開諭番族盤踞巴豬寨且恃有雙馬列角廟山卓沙白卜等寨爲之羽翼佯就撫仍抗命高鼎往剪列角寨鷲駐營山頂製白旗樹立近寨令願投者奔赴旗下免死安插又令安撫司蘇天榮等持白旗號布招卓沙白卜等六寨復令瓦寺土

官招雙馬廟山二寨俱就撫巴豬寨負固如故官軍由廟山進圍斬獲無算於寨內搜獲偽印偽劄窮追至黑水江賊渠挖子被焚死山後番衆悉降九月遷直隸口北道未之任循例以松威道計典入覲二十五年三月疏言四月應運枌杉經撫臣韓世琦以匠夫不敷奏請湖南等省匠夫協助詔工部核計邀恩免運十分之七伏思建造太和殿近係中外萬國之觀瞻遠係聖子神孫億萬年之基業採運木料乃臣工職分庶民子來豈容置喙但事出艱難有勉強竭力而後可爲者亦有勉強竭力而終不能爲者四川境地大半環山巉巖虧蔽惟成都稍稱平衍並無大枌其有大材者皆人跡罕到斧斤難施所以久存遙望一木必多方繕拽始至其地足胝履穿攀籐側立施工旣難而運路則自山抵江或百餘里或七八十里俱屬深澗幽壑一溪之行紆折幾盤必費多力而始轉一石之塞橫亘長川必待暴雨而始過採取必須搭架拽運必須墊低就高木在溪間利於汛漲木在山陸又累於汛漲故陸運必於春冬水運必於夏秋非可一徑而行計日而至儻民力稍可足用卽竭蹶豈敢貽誤乃四川幅員旣廣禍變相踵荒煙百里半竈俱無當年進兵臣行間運糧滿目疲病死亡艱難之狀兵火之苦久在聖聰自蕩平

以來休養生息瘡痍漸起然計通省戶口仍不過一萬八千九十餘丁不及他省一縣之衆就中抽撥五千入山採木其供送衣糧器具又必盈千累百且此遣發民夫遠者千里近者數百里耕作必致全廢國賦憑何辦供請敕撫臣親至產枿處所察勘可以竭力斫運者幾何星速採取其設法竭力而必不能斫運者題請定奪下九卿議以已經議減仍令斫運上曰四川山路險阻人民稀少且屢經兵火困苦已極採運枿木必致甚累小民今塞外松木材大可用者甚多若取充殿材卽數百年亦可支用何必枿木著停止採運十一月吏部循例開列司道內陞京堂官十員鶩名未預特旨內陞二十六年三月授光祿寺少卿尋轉通政司參議鴻臚寺卿十月遷太常寺卿十二月授江西巡撫二十七年正月陞辭諭曰巡撫爲地方大吏以操守爲要大法則小廉百姓俱蒙福矣鶩奏曰臣向在四川時不取民間粒米束草惟帶一二年家僮日費取給於家中不敢有私上曰身爲大臣尋常日用豈能一無所費若必分毫取給於家勢亦有所不能但操守廉潔念念從愛百姓起見便爲良吏人責始終如一朕特簡爾當砥礪清操地方一切利害有關百姓不妨事事奏聞鶩奏曰臣當嚴禁屬吏科派及詞訟賄賂諸弊上曰爲

大吏者亦須安靜安靜則爲地方之福凡貪污屬吏先當訓誡若始終不悛乃糾劾可也瀕行於常例外賜盤費銀一千兩三月擢閩浙總督將入閩奏江西地方向來凋敝自蕩平叛逆之後節年蠲免銀米二百萬有奇民生漸裕然徵收之弊尙爲民累錢糧明加火耗暗加重戕每兩多一錢五六分不等部院司道府皆有解費又多收一錢一二分不等臣入境之初火耗已減解費尙存卽揭示剔除積弊自巡撫衙門起去舊更新官役上下大小雜費盡革有犯必懲漕糧官收官兌本朝定制通行惟南昌新建二縣棍徒把持尙仍民兌臣俱行革除漕運積年陋規搜剔無遺止許遵照定例每石漕米加銀三分米三升漕規止此其餘款項皆屬橫徵弊端向日行之恬不爲怪一經指破衆共曉然曰從此知漕原無費也但在民則省費在官則失利未有不以刻薄怨臣者恐臣去之後空言無用乞天語嚴禁不致前弊復生下所司知之五月次邵武疏言湖廣督標裁兵夏逢龍據武昌叛黃州失守尙滋擾江西應調閩兵協剿十月疏言自海氛旣靖之後皇恩浩蕩大弛海禁許民貿捕爲生途有奸徒雜入商販出洋劫掠半歲之間報有數次屢檄鎮營擒捕多以賊船往來飄忽且執離汛遠洋定例不准會哨爲辭臣思無

事自當恪遵定例有事豈宜仍拘疆界卽遣標員持令箭飛檄温州總兵蔣懋勳黃巖總兵林本植駕船出洋剋期痛剿復令定海總兵董大本出洋逐嶼遍搜賊踪閱三十餘日溫黃二鎮赴楊柳坑大陳嶼等處獲賊船三定海鎮赴楊柳馬蹟外洋斬殺拒捕賊衆獲賊船四又於白沙灣獲賊大船一其生擒賊徒俟審明定擬疏入報聞嗣以思頭島盜首楊仕玉未獲密差標員李涵往寧波偵緝遣人詭投賊夥盡得楊仕玉自稱統海大將軍於思頭島及戰敗後養創窩家復通線下海運械狀悉擒之審釋被擄難民百十一名論斬盜首楊仕玉等十六人餘杖流二十八年上巡幸浙江鷺迎鑾無錫舟次遵旨議入學廣額名數奏請照順治五年以後額數府學六十名大學四十名中學二十五名小學十二名九卿議定府學二十五名大學二十名中學十六名小學十二名及駐蹕杭州賜鷺御用冠服諭曰爾任總督凡事實心辦理操守清廉浙閩黎庶稱爾爲清廉總督故特加優賚五月內陞戶部尙書二十九年二月以墜馬傷疾乞休命在任調理五月疏薦清苑知縣邵嗣堯清廉慈惠得旨優擢三十年六月以老病求罷溫旨慰留之三十一年四月同工部尙書薩穆哈往賑鳳翔府饑三十二年五月復乞休上慰留

之三十二年正月召大學士九卿等同河道總督于成龍入對諭責成龍平日排陷靳輔并及鷺與左都御史董訥內閣學士李應薦畏懼成龍交相附和尋各具疏引罪部議並革職鷺得旨以原品休致三十四年五月卒於家賜祭葬如例

朱之錫

朱之錫浙江義烏人順治三年進士改庶吉士授編修六年二月大學士剛林范文程等請簡翰林官十二人編輯六科章奏以備國史之用之錫與焉七年二月乞假省親旋丁父憂服闋補原官十一年七月擢弘文院侍讀學士十一月遷少詹事十二年二月疏言自國家定鼎以來開館纂修明史因天啟崇禎年間事實散佚參考無憑遂致停擱恐歲月漸深傳聞愈舛夫實錄不存則可據者惟當時邸報及野乘遺書宜敕部宣示中外有以明末邸報來上者量加旌賚至求書久奉明旨而各省奉行怠忽請責成學臣購進及任滿時課其多寡而殿最之則事有專司史料易備矣疏入下所司議行十月遷詹事十三年閏五月遷弘文院學士十四年六月擢吏部右侍郎七月世祖章皇帝諭嘉之錫氣度端醇才品勤敏令以兵部尚書銜總督河道駐濟寧州十五年十月河決山陽縣柴溝溢建義馬

邏諸隄之錫赴清江浦築戢隄以衛之決口遂堵宿遷董家口爲淤沙所塞別開新河四百丈於舊渠迤東以通運道十六年正月疏言黃河建瓴萬里及入河南土鬆流漚泛溢之害無代無之前明二百餘年數興大役治水名臣如徐有貞劉大夏潘季馴等塞決口疏河身役夫俱八九萬至十餘萬糜帑不貲我朝數百萬京儲仰給東南凡籌河者必兼濟運黃河自榮澤至山陽南北兩岸前明經營遺迹廢弛日甚運河自惠通至董口清口至江規制十存其五欲一一修復工繁帑絀謹酌盈虛權緩急條上十事一河南歲修夫役宜存舊額近以安瀾屢經奏減不知河本湍急未至橫流謂之曰安然其湍激之性固無分已決未決也伏秋水漲呼吸閒淹岸數里迎流之處縱有重障如穿蒿葭其防之也高一丈長十丈之埽非數百人莫能推輓一里之隄非三萬餘工不成今歲所築閱歲而高者卑厚者薄加以濁流無定倏北倏南重隄不支退守月隄之內不得不又議土工此夫役舊額萬不可議裁減一淮工宜酌行民修舊例江淮河濟原分四瀆自輓河資運會淮注海以一淮受河濟兩瀆之水漫決時有工作不停前明兼用官修民修我朝因之自順治九年定議募夫支給河銀未議及民修之例河銀有定額

用夫無常期難免顧此失彼宜分別應官修者募夫給銀應民修者派夫給食米人數少可專派山陽一縣人數多則均派高郵寶應興化泰州鹽城泰興各州縣協濟則事分工速一隄閘宜擇最要者先治揚屬運道與湖水相連淮屬運道係黃淮交會黃流易致沙淤必借淮流蕩滌方不致梗運伏秋之間淮被黃遏不得出清口皆聚於洪澤湖則高堰危故堰南有高良湖周家橋兩閘洩水東入高寶白馬諸湖高寶湖東通運河南從瓜洲儀徵入江而地勢微昂宜洩不及則運隄危故運河東岸有徑河子嬰金灣等閘洩水東下射陽廣洋諸湖有灣頭閘有芒稻河洩水南入於江今各閘圯壞應卽估計修葺一柳料宜預爲籌備令瀕河州縣各置柳園數區或取之荒地或就近河民田償價歸官每園置堡夫數名布種澆灌責成道廳稽察數年之後徧地成林不惟有濟河工而河帑亦可稍節一嚴別誤工病民弊端凡供役之廠夫堡夫流夫隄夫閘夫淺夫鋪夫有好豪包占賣富僉貧賄鬻私逃剋減工食之弊採買之柳梢輒石草柴蘆篋灰鐵糯米桐油有扣減價值交收措索折乾肥私之弊器具之方船活牖刮版戽斗鐵鏟鐵鏝布撓竹筐鐵盃杏葉杓鐵簸箕五齒鐵扒鐵杵木夯石礮雲梯有儲備不豫制作潦草

之弊宜責司道府廳查報徇隱者以溺職論一釐覈曠盡銀兩凡額設水夫天時陰雨而不赴工者爲逃曠所扣工食銀謂之曠盡恐不肖官吏侵入私囊前河臣楊方輿奏明每季起解河庫每歲冊報工部今宜令管河廳官立循環簿每幅首行書某州縣額夫若干工食若干中界爲三十格每日一格書夫幾名某所作工有無逃曠後行書應扣曠盡總數每日送司道查覈一慎重河工職守遇同知以下缺員許薦盡心河務之人升補吏部推升亦先用曾經舉薦之人凡河員升調降用俱令候代始行離任一河官既有專責不應別膺差委一請復舊例歲終察覈所屬賢否分別舉劾以示勸懲一酌議派補夫食三月又言黃運二河毗連數省巡撫身任封疆境內河道不當視爲非其職守致調集夫料各省參差請敕各巡撫共襄河務平時先事綢繆臨急從宜搶救疏下部皆如所請行八月疏薦運河同知佟養鉅北河同知魏裔魯邳宿同知孫裔昌封邱知縣余縉儀封知縣崔維雅等得旨敍錄十月以兵船繙夫有守候越站攘奪奔追順水行舟諸苦累請自今兵船分別征剿駐防酌定夫額設官巡查下水舟速停止給夫疏亦下部議行先是之錫丁母憂上以河工緊要令在任守制至是疏言臣前以母癯尙停官

署未營窀穸三疏陳請疊奉溫綸勉臣恪供職業重以褒寵光榮卽頂踵捐糜莫能報塞何敢再以私情瀆奏顧臣墨綬任事轉盼祥禫無地自容時不可失仰祈俯鑒苦衷及今河事方竣望簡新督受代容臣躬扶母櫬回籍治喪得旨覽奏具悉至情准暫假數月扶櫬回籍事竣仍卽赴任命侍郎楊茂勳署河道總督十七年六月授茂勳湖廣巡撫以僉都御史苗澄接署十二月之錫復任偕僚屬捐銀賑濟淮揚徐三府災民明年聖祖仁皇帝御極議敘捐賑千兩以上諸臣加之錫太子少保康熙元年九月河決原武祥符蘭陽東溢曹縣決口香鑪口之錫檄濟寧道方兆及等赴曹縣董築自往河南塞西閭寨單家寨時和驛蔡家樓策家寨諸決口是年河南巡撫劉源濬條奏南陽汝寧二府開墾荒地請免河工差徭十年部議令之錫覆覈之錫言差徭宜均其勞逸新墾者偏逸則舊業之民偏勞酌定自今領墾地畝五年後起派雜差又工部以江南瓜洲剝船浦欠歲輸河庫額銀令之錫察追之錫言揚州至瓜洲近年商船通行剝船無從覓利兼復撥應兵差其舊新額稅俱宜豁免又疏請造船勞淺高郵四十五寶應江都各十八共支帑銀千七十餘兩部議並從之先是之錫疏薦通惠分司工部主事壽以仁河南

驛傳道萬永祚南河分司兵部郎中吳煒北河分司工部主事高恆豫及封邱知縣屠粹忠揚州府推官王士禎等俱敘錄如例四年二月疏言開河原因輓漕開鑿匯衆泉分注灌輸南旺爲運河之脊北至臨清南至台莊全賴四十餘閘啟閉得宜瀕河之地春雨長少惟伏秋雨多收入湖櫃可濟來年新運去歲東省久旱竭力支持舊漕幸竣然山泉之小者多枯大者已弱湖水之舊者盡放新者無收臣日夕憂懸未敢寧處不得不鯁鯁過計於閘板內之涓涓水利若差船官船聚集多人應閉者強之使開洩水下注則重運之在上者阻矣應開者強之使閉留水待船則重運之在下者又阻矣公差旣由水程卽隨漕而進未致誤期官員情殷叱馭旣知河路迂遲則又何妨從陸乞天語申飭各遵例禁仍容臣刊刻榜示樹立各閘有裨漕務非淺疏入得旨嗣後非奉極要敕旨差遣擅行啟閉閘口者卽指名題參下部嚴議行五月疏言自去冬督率東省司道廳印等官搜剔泉源挑濬河身添建草閘多置木壩隨宜經營未嘗時刻停輟入春之後亢陽逾甚循例請頒泰山香帛臣恭詣祈禱值重運停滯沕河臣憂心如燔南北奔馳在清平博平督建草閘事竣五月朔途次東昌大雨如注汶泗諸水已經報長見飭各閘

相機啟閉今歲運道可無淺阻之虞矣八月疏言部議停差北河中河南河南旺夏鎮通惠諸分司令以分司事務歸併地方官臣維黃運兩河隄防疏濬皆須一足到限期不比刑名錢穀之事可以理斷臆決者也河勢變幻工料紛繁天時不齊非水則旱或綢繆幾先或補苴事後或張皇於風雨倉遽之際或調劑於左右方圓之間往往數武之地竭千百人之拮据而不足北河所轄千餘里其間三十餘閘中河所轄黃運兩河而董口尤運道咽喉青黃交接濁流易灌南河所轄在淮黃江湖之間東西南北相距窳遠天妃閘口每多沙淤爲患南旺泉源三百餘處雖濟兗二府所屬近者或出道隅遠者偏藏僻壤夏鎮地屬兩省鑿石通漕形勢陡絕節宣閘座尤費經營通惠浮沙易淺峻水易衝塞決之役歲歲有之各分司職掌載在敕書難以殫述若云歸併府佐則府佐原有管河之責是乃裁革分別非爲撥官管理況徵夫問料地方官民皆不樂聞府佐職微權輕上下掣肘呼應不靈易致貽誤至於地方監司其錢糧差徭盜賊詞訟供應兵差緝解逃人甚爲繁劇河屬修防固未嘗不資其協助然責以終年累月往來奔馳駐守河上揆之事勢萬萬不能況源流之上下相濟夫料之緩急通融分司與各道界壤迥

不相同若應合而分則一閘座也上流以爲應閉下流以爲應開一額夫也在此則欲求多在彼又復患少不但紛競日多必致牽制誤事更當巡道旣裁之後兗西道所管之曹黃東阿陽穀等縣運河已改併濟寧道矣揚州道所管之運河已歸併驛傳道矣淮西道所管之黃運兩河已改併淮海道矣又以驛傳道兼攝揚關權稅淮海道兼攝板閘淮倉清江權稅是一道而已兼數道之任夫稅務猶可坐理若增一泉汛河汛道里相距率皆數百里而遙百務繽紛此身羈縻渺渺水濱欲聞其足音不可得也又況自廳而至道自道而至臣衙公署文移往返道路迂迴坐誤事幾有不可縷悉者蓋臣屬之設司廳於沿河各境猶身之有臂臂之有指也今若專任末僚之佐貳而以事繁地遠紙上兼攝之監司承接其間黃運兩河各不下二千餘里倚臣之一身總理急此而遺彼顧東則失西異時萬一貽誤運道收拾艱難爲憂方大是安得不爲之長慮卻顧哉應仍循舊例部差分司以重河防以保運道疏入得旨俞允五年二月卒於官四月直隸山東河南總督朱昌祚疏言之錫治河十載殫力宣勞當旱溢相仍則拮据夙夜若隄渠挑濬則南北馳驅受事之初河庫貯銀止十餘萬兩頻年撙節見今貯庫四十六萬兩有

奇覈其官守可謂公忠體國其弟之璋稱之錫積勞嬰疾因河事孔棘不敢請告今歲北往臨清南至邳宿夙病日增回署身故年止四十有四未有子嗣籲請恩卹賜祭葬如例十二年八月河道總督王光裕疏言之錫生而盡瘁沒爲河神江淮兩河商民追思惠政每涉危履險祈禱卽驗邳州宿遷中牟陽武曹單等縣皆爲建廟漕艘運丁亦塑像尸祝其生前保運安瀾固分所宜盡而其始終爲國爲民之精誠能於沒後有驗謹據輿情籲請錫封疏下禮部部臣以河臣封神未有成例寢其事今上乾隆四十五年二月巡視河工允在事諸臣請諭禮部以之錫歿爲河神屢著靈應賜封助順永寧侯春秋致祭

靳輔

靳輔漢軍鑲黃旗人父應選官通政使司參議輔由官學生於順治九年考授國史院編修十五年改內閣中書尋遷兵部員外郎聖祖仁皇帝康熙元年遷郎中七年遷通政使司右通政明年擢國史院學士充纂修世祖章皇帝實錄副總裁官九年十月改內閣學士十年六月授安徽巡撫十一年四月奏臨淮靈璧二縣虛報開墾田四千六百餘頃應請旨豁免田糧從之十三年逆藩吳三桂耿精忠

分寇江西煽誘饒州弁兵從逆上詔輔增兵接壤防守輔尋遣兵會剿擒斬歙縣賊宋鑣等十五年二月疏言戶兵二部因軍需浩繁令裁驛站經費臣以爲欲省經費宜先除糜費在外諸臣非要務勿專差齎奏則火牌糜費節省十之八京差官員酌量併減卽解餉解礮沿途自有官兵護送亦止需部差一員則勘合糜費節省十之三嚴禁各員役橫索騷擾則節省無名之費更多安徽所屬站額銀二十六萬兩有奇以十分之四科之歲省十萬餘兩通天下計之每歲所節當不下百餘萬可以裕軍餉甦驛困得旨驛遞繁苦皆由差員橫索騷擾著嚴行飭禁下部詳議如所奏定爲例是年疏報存留各屬損腳等項銀十一萬七千餘兩節省驛站銀十二萬九千餘兩得旨靳輔節省存留驛站各項錢糧爲數甚多具見實心任事下部議敘加兵部尙書銜十六年八月授河道總督七月疏言黃河之水裹沙而行水合則流急而沙隨水去水分則流緩沙停河底日高故全賴各處清水並力助刷始能奔趨歸海而無滯歸仁一隄原以障睢水及水涸邱家白鹿諸湖水不使侵淮且令小河口白洋河入黃刷沙自順治十六年歸仁隄潰淮湖諸水侵淮不復入黃刷沙黃水從小河口白洋河二處逆灌積沙漸成陸地康熙六

七年間王家營邢家口潰而黃水不由雲梯關入海古溝翟家壩潰而淮水不赴清口會黃十五年高家堰清水潭爛泥淺皆潰而運道益淤徐州以下黃流緩弱散漫而河底益高矣謹以大修事宜分列八疏一曰取土築隄使河寬深清江浦歷雲梯關至海口河身泥淤須於兩旁離水三丈各挑引河一道面闊八丈底闊二丈深一丈二尺卽以掘取之土高築隄岸堤底七丈面闊三丈高一丈二尺則黃淮下注中央既有舊存一二十丈河身左右又各有八丈新鑿之河所存舊隄薄僅三丈一經三面夾攻自可盡行刷去新舊之河合而爲一河身寬至四十丈深至二丈可以漸復舊觀其夫役請並令山東河南協募二曰開清口及爛泥淺引河使得引淮刷黃三曰加築高家堰隄岸蓋欲堵決口不先修築殘隄恐水將尋隙奔潰而石工費甚浩繁板工不能耐久伏思水性至柔乘風則剛其板石諸工率皆陡峻故怒濤撞擊潰卽隨之惟遇坦坡及平漫而上順縮而下隄制水而不抗水雖經大水乘風高低不虞激潰今於隄外近湖之處挑土幫築坦坡每隄高一丈築坦坡五丈卽有舊存椿木亦聽其埋於土內以爲隄骨夯杵堅實密布草根草子於其上俟其茂長則土益堅隄益固四曰周橋關至翟家壩共三十二

里原衝支河九道及決口三十四處須次第堵塞臣驗各處埽工率用柳枝蘆草費大而不能經久伏思剋水者土也當求束土禦水之法改埽工爲蒲包裹土麻繩網紮而填之則費省而工亦堅固五日深挑清口至清水潭二百三十里運道所挑之土俱傾於東西兩隄外卽以幫築西隄坦坡增培東隄堅厚六日合淮陽田按上中下三則每畝納修河銀三錢至二錢有差商船來往淮陽兩關納剝淺銀一年以米豆每石二分貨物每斤四分爲率七日裁南河中河北河通惠四分司就近歸道員管理裁管河同知山清安海宿桃三缺改併山盱歸仁邳宿三員以重責成八日按里設兵畫隄分守暇則栽柳蓄草添土幫隄每月乘濬船下鐵埽帚刷河底淤沙督率員弁嚴立課程用期久遠疏下王大臣議以軍務未竣大修募夫甚多宜暫停上命輔熟籌輔復申前奏唯運土用夫請改爲車運遂皆如所請詔發帑興工輔乃開通清口爛泥淺引河四道濬清江浦至雲梯關外河身創築束水隄一萬八千餘丈塞王家岡武家墩高家堰諸決口河隄外加築縷隄及格隄徐州宿遷築淺水壩十三座其壩東西寬十二丈南北長十八丈六尺中立磯心六座兩旁俱用石牆土內密釘排椿灌以漿灰上鋪石板聯以鐵錠每壩

一座共成七洞每洞各寬一丈八尺計其洩水之地共十二丈六尺清水潭舊堤衝潰輔爲棄深就淺計築西隄九百二十餘丈東隄六百餘丈更挑新河長八百四十丈奏改名永安河又以甘羅城西運口黃流內灌易致停淤自新莊閘西南挑濬至太平壩又至文華寺挑濬至七里閘復轉而西南亦接至太平壩因達爛泥淺去淮黃交會之地約十里計閱兩月工竣先是漕船由駱馬湖行八十餘里始抵窯灣夏秋則盛漲冬春則水涸重運多阻輔於湖旁疏濬阜河故道上接洳河通運二十年三月以大修已越三年黃河未盡歸故道自請議處部議革職得旨留任督修二十一年五月上遣尙書伊桑阿侍郎宋文運等閱工並以候補布政使崔維雅隨往因具奏上河防芻議兩河治略二書及條列二十四事欲更改輔所行減水壩諸法也十月伊桑阿等還奏靳輔建議大修已用帑銀二百五十餘萬兩今蕭家渡決口未堵宿遷沭陽等處田地淹沒黃河不歸故道其言固難盡信崔維雅改議修築亦未必成功輔疏言河工次第告竣海口大關下流疏通腹心之患已除蕭家渡決口堵塞亦易不宜有所更張因詳辨維雅陳二十四事不可行並下廷議工部尙書薩穆哈等請令輔賠修決口上曰修治河工所需錢

糧甚多靳輔果能賠修耶如必令賠修萬一貽誤漕運奈何朕思治淮尙易黃河
身高於岸施工甚難崔維雅條奏二十四款朕初覽時似有可取及覽靳輔回奏
崔維雅所奏誠無可行者因召輔來京十一月輔至奏蕭家渡決口明年正月可
塞崔維雅所議挑河每日用夫四十萬築堤以十二丈爲準斷不可行上是之特
旨免賠修決口仍給帑堵築二十二年四月疏報蕭家渡工成河歸故道請修
七里溝險汛天妃壩王公堤等閘座又請增開封歸德隄工以防上流壅滯諭曰
河道關係國計民生最爲緊要今聞河流得歸故道深爲可喜以後益宜嚴愆勿
致疏防十二月詔復原職二十三年十月上南巡閱河諭輔曰朕觀高家堰地勢
高於寶應高郵數倍前人如此築石隄障水實爲淮陽屏蔽且使洪澤湖與淮水
併力敵黃衝刷淤沙關係最重今高家堰舊口及周橋翟壩修築雖久仍須歲歲
防護不可輕視以墮前功又諭曰數年以來治河著有成效黽勉盡力朕已悉知
此後當益加勉勵早告成功使百姓各安舊業庶不負朕委任至意因御書閱河
隄詩賜之二十四年正月疏請添建黃河南岸毛城鋪減水閘一王家山十八里
屯減水閘三北岸大谷山減水閘二以保徐州上流隄工並於歸仁隄添建石壩

二攔馬河及清河運口各添建石閘一九月疏言勘闕河南隄岸考城儀封陽武三縣應幫築隄工七千八百七十九丈封邱縣荊隆口應築大月隄三百三十丈滎澤縣應修築埽工二百一十丈以防上流異漲並請增設蘭陽儀封滎澤河員免開封歸德二府居民採辦青柳事下部議俱從之是時上念高郵寶應諸州縣湖水泛溢民田被淹命安徽按察使于成龍經理海口及下河事宜仍聽輔節制輔疏言下河卑於海潮五尺疏海口則引潮內侵大不便請自高郵城東車邏鎮築長隄二歷興化白駒場至海口束所洩之水入海隄內洄出田畝丈量還民其餘田招民屯墾以抵經費廷議如所奏召輔及于成龍進京成龍力主開濬海口故道輔仍議築長隄高一丈五尺束水敵海潮大學士九卿俱從輔議通政使參議成其範給事中王又旦御史錢鈺從成龍議時寶應人侍讀喬萊奏輔議非是乃命尙書薩穆哈等往勘視尋以開海口無益回奏會江寧巡撫湯斌入爲尙書奏下河宜疏濬上命侍郎孫在豐往董其事二十六年七月詔詢下河田疇何策可紓水患輔疏言宋元以前高郵寶應諸湖原皆田疇臣前堵築清水潭深挑兩隄中間河底有宋元舊錢及輒井石街其爲民居可證蓋黃河在宋元時雖南侵

而尙未全徙至明代始絕北流南奪淮渠以入海致淮水壅不得下清河縣之洪澤村漫淹而爲洪澤湖又從高家堰翟家壩旁流東注爲高郵寶應諸湖自此永不復田疇之舊且爲患於下河矣臣屢經測驗運河隄頂卑於高家堰隄頂一丈有奇故減水壩之建在堰隄可洩水一千方在運隄則便可洩水一千二百方所以歷七年之久三遭大漲而運隄安然無恙運隄所洩之水以下河爲壑下河之東卽大海濬海口似可紓水患然自清江浦南行三百餘里至江都縣之茱萸灣折而東百餘里至泰州又百餘里至海安鎮折而北卽范公隄沿隄而行歷安豐東臺河埭丁溪白駒劉莊等場計二百餘里而抵鹽城縣北行百餘里而至廟灣場折而西百餘里爲蘇家嘴又百餘里仍回清江浦計程千里有奇惟廟灣天妃石碓三口向係洩水入海之處必登舟過渡餘皆可以馳馬之路其卑處於周圍馬路中者南北三百餘里東西二百餘里形如釜底止就釜底挑挖徒增釜底之深當淮流盛漲高堰洩水洶湧而來仍不能救民田之淹沒臣與幕友陳潢反復曲籌杜患於流不若杜患於源高家堰之隄外直東爲下河東北爲清口當自翟家壩起歷唐埂古溝周橋閘高良澗高家堰築重隄一道約高一丈七八尺至二

丈不等長一萬六千丈需費七十九萬五千兩此工一成東堰隄減下之水使北出清口則洪澤湖之水不復東滄下河其下河十餘萬頃之地可變成沃產而高寶諸湖俱可涸出田畝數千頃招人屯墾可以裕河庫且高堰原爲最險之工增此隄則長年保護洪澤湖廣闊非常一遇風起多覆舟沈溺行此隄內之河則避湖險而就安流有便於商民者甚大至臣幕友陳潢前逢聖駕閱工臣以姓名上達宸聽其間興工之委曲及將來竣工非陳潢協力區畫不可念臣垂老多病萬一卽填溝壑或病臥不能馳驅則繼臣司河者仍必得陳潢在幕佐之庶不歧誤此臣十年以來之血誠欲吐而未敢者今據實陳明非僅居功蔽賢之念不忍萌卽引嫌避忌之私亦不敢計疏下廷議如所請並賜陳潢僉事道銜時于成龍任直隸巡撫詔以輔疏示詢成龍成龍言下河宜開重隄不宜築上遣尙書佛倫侍郎熊一瀟給事中達奇納趙吉士與總督董訥總漕慕天顏會勘天顏在豐議與輔相左佛倫等以應從輔議還奏仍下九卿會議二十七年正月御史郭琇疏言海宇昇平萬邦底定宵旰殷憂時切如傷之念者止一綫黃河與淮揚等州縣昏墊之黎民耳皇上委任河臣靳輔靳輔則聽命於幕客陳潢如果洪水歸洋奔瀾

永息猶得有辭乃今日議築隄明日議挑濬糜費帑金數百萬終無底止之期今日題河道明日題河廳以朝廷爵位爲私恩從未聞有得人之效又復攘奪民田妄稱屯墾取米麥越境貨賣皇上以下河爲必可開而靳輔百計阻撓欲令功垂成而終止且屯田一事皇上洞知其累民會勸諸臣亦知其累民則靳輔陳潢之罪瞭如指掌矣陳潢爲靳輔營一家之謀於國計民生全無裨益忌功之念重圖利之心堅真國之蠹而民之讐也監司僉事何等尊貴豈容一介小人冒濫名器以快靳輔酬報私情宜卽斥革敕部嚴加處分另簡大臣之清廉敏練者整理河務庶成功可奏生靈永利矣疏下九卿查議二月給事中劉楷疏言河工道廳至雜職百十餘員題補之權總歸河臣使其虛己求才果能奏安瀾之效猶且不可久擅用人大權乃在在保舉及至任事漫無寸功惟見每歲報衝決而已嗣後大小河官應仍由吏部選補御史陸祖修疏言皇上每遇緊要政事令九卿會議期於衆論僉同至當不易無奈河臣靳輔身雖在外而呼吸甚靈九卿中贊決異同者不過三四人皆左袒河臣不顧公議如屯田一事悉依戶部尙書佛倫等所奏具稿箝衆人之口伏思民間地畝各處例有准則起科並無額外多餘之理直隸

巡撫于成龍審事湖廣將還倫蒙親詢其間利病根由情弊始末可救東南七州縣昏墊之民命省內府幾百萬糜費之金錢河臣積惡已盈中外人心總望睿斷罷斥萬勿議勞使過以重遲回昔帝舜殛鯀以其逆水之性也今兼有屯田害民之事去一靳輔天下萬世仰賴聖明無踰此矣時慕天顏孫在豐亦疏論屯田累民及輔阻撓下河開濬事詔俟于成龍至會議一併嚴察輔尋得請入覲先疏論于成龍慕天顏孫在豐朋謀陷害又自辯受命治河之日正當兩河壞極之時自碭山以抵海口南北兩岸決口七八十處高家堰決口三十四處翟家壩成河九道清水潭久潰下河七州縣一望汪洋清口運河變爲陸地臣晝夜奔馳先堵高家堰淮水方出清口旋堵清水潭挑挖運河改移運口迄今永遠深通其向來行運之駱馬湖淤淺不能行舟臣創開阜河漕艘無阻久蒙聖鑒至濬築經費方臣未任之初曾特遣部臣勘估計六百萬兩臣任事後苦心節省自徐州起直抵海口兩岸隄工並高家堰清水潭及前所未估之新開阜河堵塞楊家莊修築歸仁隄改移運口止用帑二百五十一萬兩又蕭家渡衝決時蒙賜帑一百二十萬兩今一概加修竣工統計所用僅及前此部臣估計之半而臺臣郭琇則曰糜費帑

金數百萬營一家之計不知何所見而誣臣至此極也其曰題道廳未聞得人則河員原因慎重河務必由河臣保題定例已久非自臣始其曰奪田屯墾則臣絕不以納糧之民田分釐入屯其曰越境賣麥則臣原以變價還部題明其曰陳潢小人冒濫名器則陳潢之蒙恩實出鼓勵人才之特典以言冒濫臣不知何所指且詆之爲小人則因于成龍久與結拜弟兄慕天顏頻與宴好殷勤孫在豐亦與親密異常者也自康熙二十二年兩河歸故運道通行而郭琇必以洪水狂瀾罪臣科臣劉楷曰惟見每歲報衝決臺臣陸祖修曰逆水之性又謂清丈隱占非額外多餘地畝蓋郭琇與孫在豐爲庚戌科同年陸祖修爲諸生時拜慕天顏爲師又係孫在豐教習門生劉楷陸祖修己未科同年並江南人與隱占田畝者無非桑梓親戚年誼之契故彼呼此應協力陷臣慕天顏與孫在豐結婚姻因于成龍倡開海口之議故必欲附成龍以攻臣而助在豐兼奪臣任夫河臣之職與督撫不同督撫統攝地方諸務稍一興利除弊易以見德河臣頻年奔走河濱以挑築爲務上費帑金下役民力最易招尤致謗而臣之負謗更因屯田之清丈隱占隱占田畝唯山陽最多有京田時田之分時田一畝納一畝之糧係小民之業京田

四畝納一畝之糧皆勢豪之業臣清丈流陽海州宿遷桃源清河五屬得三百萬畝至山陽則終不能丈以山陽鄉紳多也臣不願衆怒致讐謗沸騰使中傷臣者更得以借口然臣任事十餘年凡雇夫挑築買辦物料皆給發現銀雖淮陽各屬隱占田畝諸人怨臣至深者亦不能指摘也伏念河工一事成之甚難壞之甚易自康熙六年兩河潰決歷經數河臣治之十餘年終無一效臣受任之初羣議蜂起百計阻撓賴皇上不惜帑金兼授方略兩河得以復故正須綢繆善後而諸臣合計交攻必欲陷臣殺臣而後已全不顧運道民生大計當此衆口鑠金之際卽皇上欲終始保全無如諸臣朋謀陷網之密布倘蒙聖駕再巡親閱隄工更命重臣清丈隱占地畝則臣與諸臣之是非功罪立分臣身負重劾萬死一生幸得入覲恐天威咫尺不得盡吐所欲言陳謹繕疏密奏疏入上諭閣臣曰近因靳輔被劾議論其過者甚多靳輔若不陳辯朕前復何所控告耶此疏並下九卿察議三月上御乾清門命輔與于成龍郭琇各陳所見于成龍言海口必應開濬郭琇言屯田奪民產業上曰屯田之事因取民餘田小民實皆嗟怨靳輔當亦無可置辯輔奏向者河旁田畝盡被水淹臣任事後將決口堵閉兩岸築隄河流故道無有衝

決之患數年水淹之田盡皆涸出臣以民間原納租稅之額田給與本主其餘丈出之田作爲屯田抵補河工所用錢糧因屬吏奉行不善民怨是實臣無可辯唯候處分上曰各省民田未有不濫於納糧之額者若以餘田作屯豈不大擾民乎屯田不行無可復議至下河作何開濬重隄應否停築九卿等公同詳酌確議尋允九卿議停築重隄革輔職以福建總督王新命代之陳潢革僉事道銜初漕船出清口入黃河行二百里始抵張莊運口輔奏於清河縣西仲家莊建閘上自宿遷桃源清河三縣黃河北岸遙接二隄內加挑中河一道俾漕船既出清口截流徑渡北岸避黃河一百八十里之險溜由仲家莊閘內進中河歷阜河泃河北上及工竣學士開音布侍衛馬武往勘還奏中河商賈舟行不絕漕運可通上諭廷臣曰前于成龍奏云靳輔開中河無益反爲民累河道已大壞今開音布等往勘則云數年以來河道未嘗衝決漕艘亦未有誤謂靳輔治河全無裨益微獨靳輔不服朕亦不愜於心矣若王新命順從于成龍之說將原修工程盡行更改是各懷私忿必致貽誤河工乃命尙書張玉書圖納等往勘確議還奏河身漸次刷深黃水迅溜入海其已建閘壩隄埽及已濬引河並應如輔所定章程無庸更改十

一月輔奉命同工部尙書蘇赫等往閱通州運河請於沙河建閘蓄水通州下流築隄束水以利漕運從之二十八年正月上南巡閱河輔從行諭詢中河逼近黃河水漲隄潰可虞輔奏前曾奉諭籌攔馬河減水壩所出之水每致淹沒民田臣開中河以束水兼令漕船避黃河險溜今若加築遙隄會不至有患三月諭吏部曰朕南巡時江南淮安人民皆稱譽前任河道總督靳輔念念不忘且念濬河深通築隄堅固實心任事勞績昭然可復其原品二十九年三月漕運總督董訥以北運河水淺請盡洩南旺湖之水北流倉場侍郎開音布以挑濬北運河奏請上召問輔輔奏曰旺湖水若使偏入北河必致南河水淺唯從北河兩旁下埽束水則水深自可濟運詔卽以輔同開音布經理之三十年九月奉命與侍郎博霽李光地等閱黃河險工三十一年正月還奏黃河南岸自徐州以上毛城鋪起至海口北岸自大谷山起至雲梯關以下六套所有減水壩間現無衝損中河亦甚便漕船往來唯黃河南岸之橫莊煙墩馬邏北岸之朱家莊安東縣便益門南東門六處險工有未設月隄及下埽單薄處應增築加培並繪圖呈覽下九卿議令河臣如所奏行二月王新命以勒取庫銀爲運河同知陳良謨訐罷上諭大學士曰

朕聽政以來以三藩及河務漕運爲三大事夙夜廛念曾書而懸之宮中柱上至今尙存倘河務不得其人一時漕運有誤關係非輕靳輔熟練河務及其未甚老而用之亦得紓數年之慮其令仍爲河道總督輔以衰病辭命順天府丞徐廷璽同往協理六月疏言前所奉詔截留江北漕糧二十萬石由黃河運至山西蒲州撥陝西賑濟臣因開封以西黃河淺深無定與漕臣董訥定議漕船三百八十四每船預支下運行月銀六十兩爲增雇剝船夫役之用共銀二萬三千四十兩二月初至淮安開行臣於五月初赴開封督飭催僱添雇民船隨淺隨剝撫臣閻興邦牒稱水路止可運至孟津由孟津陸運至蒲州六百三十里業經山陝兩省議明分運臣今赴孟津料理得旨嘉其實心任事十月疏言黃河自河南滎澤縣至江南清河縣兩岸各一千餘里其險工不可疏虞如南岸之在開封或疏虞則黃水入淮歸德至宿遷或疏虞則黃水入睢桃源清河間或疏虞則黃水入洪澤湖以侵高堰倘高堰不固寶應高郵運道必致淤墊故尙須籌畫萬全欲加築前此停築之重隄爲費甚大惟就運料小河之隄加築高二丈廣三丈乃可無患北岸之在滎澤或疏虞則黃河水溢張秋下溢濟寧魚臺豐沛民田受淹宿遷清河

或疏虞則一百八十里之運道亦淤墊故中河遙隄必須加築於西寧橋添建石關二仲家莊陶家莊兩關左右各添一關以備宣洩其張莊舊運口臣輔前挑中河時會議設關因解任未舉行恐將來山東之水微弱致中河淺澀今宜竟行堵塞就駱馬湖之東中河之南建關值東水大漲開以洩之東水消落閉以蓄之庶無他慮又疏言黃河隄工莫重於既成之後隨時修補隄根積水易致汕刷惟於上流量挖一溝引沙直注使停再於下流量挖一溝引水分洩漸去其低窪處自然淤平臣輔前任時相度董家堂龍窩二處險工曾設涵洞引黃灌注於月隄裏使清水流在月隄外窪地遂成平陸徐州長樊大壩險工亦引黃內灌淤高窪地二三尺今邳州舊城迤西窪地周圍約有百里水無去路宜仿已驗之法行之或慮掘隄難以修防則建小關以酌量引灌更爲萬全疏下九卿議以黃河水勢湍迅引灌邳州窪地已屬危險令再審籌餘如所請又疏言臣前任安徽巡撫當軍興之際陳潢助理協宜及任總河值高家堰決口甚多翟家壩未堵二十餘里成河九道因盡行築隄塞河以敵清口之黃創設減水壩以保高堰之隄改清水潭隄工於湖內永保安瀾濬甘羅城運口至太平壩以避黃水內灌挑阜河二十餘

里支河三十里使駱馬湖不復淤墊又挑中河使漕船免黃河逆流之險凡臣所經營皆潢之計議仰荷聖主如天之福次第成功恩賜潢僉事道銜不意驟遭詆毀革去職銜旋卽物故又奉命勘河之尙書熊一瀟給事中達奇納趙吉士同時被指摘而去已蒙恩起復則無辜受累者當一體均邀慈鑒疏下吏部陳潢已故寢議熊一瀟達奇納趙吉士並請旨錄用時輔再疏自陳疾劇乞解任命內大臣明珠往視傳諭留淮調理十一月卒於官年六十遺疏至得旨靳輔簡督河務經理年久黃淮兩河修築得宜運道民生俱有裨益患病溘逝深爲軫懷下部議卹賜祭葬如例諡曰文襄三十五年河道總督董安國以江南士民籲請捐資建祠河干入奏下部議行四十六年上南巡還諭吏部曰朕屢念河防屢行親閱凡自昔河道之源流治河之得失按圖考績靡不周知粵從明季寇氛決黃灌汴而洪流橫溢歲久不治迄於本朝在河諸臣未能殫心修築以致康熙十四五年間黃淮交敝海口漸淤朕乃特命靳輔爲河道總督靳輔自受事以後斟酌時宜相度形勢興建隄壩廣疏引河排衆議而不撓竭精勤以自效於是淮黃故道次第修復而漕運大通其一切經理之法具在雖嗣後河臣互有損益而規模措置不能

易也至於創開中河避黃河一百八十里波濤之險因而漕輓安流商民利濟其有功於運道民生至大且遠朕每莅河干徧加諮訪沿淮居民感頌斬輔治績衆口如一久而不衰夫人臣有大建樹於國家者獎勵酬庸宜從優渥雖賜卹易名已循彝典尙應特予褒榮賁以殊恩其加贈太子太保予騎都尉世職用彰朝廷追念勲臣之典爲矢忠宣力者勸尋令其子治豫襲職准再襲二次世宗憲皇帝雍正三年以治豫尙隨父任明晰河務由副參領加工部侍郎銜協理江南河工事務五年諭閣臣曰朕覽治河方略見原任河道總督靳輔昔年修理河工勞績茂著欲加恩澤以獎勵庸據吏部查奏康熙四十六年已贈宮保與世職今再追贈工部尙書予祭一次以示朕篤念前勞至意七年命江蘇巡撫尹繼善擇地建祠祀輔及河道總督齊蘇勒有司春秋致祭八年詔建賢良祠於京師以輔入祀

徐旭齡

徐旭齡浙江錢塘人順治十二年進士授刑部主事十五年改吏部主事十七年五月遷本部員外郎六月丁母憂康熙三年起補原官四年遷禮部郎中五年充江南鄉試正考官六年五月疏言經制衙役定額甚嚴近有串名朋役承應官府

表裏作奸是謂衙蠹請敕督撫嚴查所屬凡經制外悉令歸農如不將溢額核汰該管官從重治罪下部議行十月授雲南道御史七年四月疏言贖緩向備倉儲事煩地廣之處贖罪者多有司申報上官十無二三侵漁實甚請於歲終州縣冊報藩臬兩司藩臬冊報督撫疊爲稽核其罰數及罰贖人姓名詳載冊內倘有隱匿卽以貪贖治罪庶積儲充實荒政可修得旨允行並敕承問各官明示曉諭是年裁雲南道缺一員旭齡以裁缺候補八年補湖廣道御史九年三月疏言督撫專司察吏邇來降調官員百姓每每保留不無滋弊請禁止凡官員賢否冤抑責成督撫實心體訪果係清廉良吏或因公受累事同處異者許督撫特疏入告如稍徇隱別經發覺加等治罪從之五月命偕御史席特納巡視兩淮鹽政十月疏言兩淮積弊相沿其私費之苦有六商人納課例將引數填註限單而運庫於每引科費數錢方得給單胥役綱總又有科斂其苦一商鹽出場例將艙口驗報謂之橋掣而關橋扣勒引票每引科費數分方得掣放其苦二商鹽呈綱例必造冊擺馬請之所掣而未經稱掣先有江掣等費每引費一二錢方得過所其苦三引鹽既掣例必請給水程及梳封等項每引費二三錢方得開行其苦四鹽船既放

行而鹽道有掛號之費營伍有巡緝之費關鈔有驗料之費其苦五船鹽既抵岸而江廣進引每引進費錢餘不等又有樣鹽查批等費其苦六請責成鹽屬各官取各商有無私費甘結繳臣衙門查核若一處無結卽指名糾參以爲剝商者戒又言淮鹽稱掣三大弊兩淮地狹鹽多商人於正課寧甘納課不願帶鹽乃橋所兩掣額外之斤反加增重實爲鹽法大害其一爲加鈔之弊掣官不論鹽包輕重暗挂斤兩商鹽不增捆額外始能與鈔相準利歸於鈔而病中於商其一爲坐斤之弊掣官不論輕重有無豫定餘鹽商鹽必多帶斤兩始能抵償掣費公斤愈多則私科愈重其一爲作斤改斤之弊掣官於未掣之先議定使費暗作斤兩已掣之後議定使費又暗改斤兩於是輸納不均害在於課口岸不銷害中於引臣以爲革弊之道惟有嚴禁斤重一法凡橋所稱掣溢斤割沒少者三四斤多者七八斤不得逾額如奸商有夾帶過多掣官有虛填太重者商則計引科罪官則計斤坐贓多帶之斤除則銷運易填註之弊絕則掣驗公部議如所請勒石嚴禁又言兩淮鹽法春夏行鹽秋冬納課原照引數徵納並無計日催徵之例近因部臣以鹽差在任一日卽有一日考成之責於徵完本年課銀外又行豫徵最爲苦累且

早徵於額不增遲徵於額不減民間地丁正賦尙禁豫徵商民無二請將五十七日豫徵停止部議不准特旨再議仍照舊例行十八年遷太常寺少卿二十年轉大理寺少卿二十一年六月授左僉都御史八月疏言國家省事莫如省官康熙元年以各省監司浮於郡守酌議冗官盡去自十三年逆賊變亂添設道二十七員今天下承平多一衙門卽多一供應請將十三年後所添道員或裁巡歸守或併守歸巡或守巡全裁亦息事寧人之道也敕九卿議行二十二年擢山東巡撫二十三年四月旭齡以東省歲稔米貴窮民待哺請借給倉穀免其起息還倉詔報可九月授工部右侍郎十二月遷漕運總督二十八年八月疏請釐三害云隨漕例有增裁原爲貼軍而設乃有司私增更甚於軍每石少以錢計多以數錢計南兵軍局卹伍一項原無增裁今統歸大糧徵收仍難扣減宜革者一隨漕例有運耗原爲貼兌而設乃有司私耗更浮於兌每石少以斗計多以數斗計白糧已編有辦束包令又另加春辦米包索銀宜革者二至盤費腳價江浙官無額編民間私貼每石銀三五分米三五斗乃湖北已編有折銀三千九百餘兩每石復幫貼銀一二錢江西已編有腳費銀三萬四千五百餘兩每石復徵水腳銀三錢五

分宜革者三又請籌三便云各省給軍款項有減存抵欠銷算者勢須糧道給放其隨漕增截銀兩亦彙解道庫一解一給旗丁反受扣減請停止彙解竟歸州縣給發便一運丁行月糧遇有災傷停缺例請撥補有康熙十二年間除荒銀兩至二十一年仍未准給旗丁不沾實惠請停止除荒竟入現運項下得應急之用便二至船少幫多爲病尤甚浙江幫次有可合一幫者請附歸併可省二十餘幫便三諸疏俱下九卿議行二十五年六月疏言京口駐防兵米向例截留江西漕糧康熙二十一年後改留本省常鎮蘇松撥解但江漕有折耗夫役諸費報部核銷蘇松各府解送費亦難免而例不准銷恐不能無累於民查京口歲需米十餘萬石鎮江一府正耗漕米十三萬八千餘石莫若卽以鎮屬之米給鎮江之兵則就地支給耗費可以不用官民均利得旨俞允十月時漕船抵通遲延上特遣部員前往催趲回空不致有誤仍詔旭齡明白回奏旭齡奏漕白二船較上年多三分之一自四月內盡數過淮朝夕督催出關赴北回空船隻并無片帆凍阻上以其節辭誑奏敕部嚴議應革職特旨寬免降五級留任二十六年二月卒諭嘉旭齡才品優長操履清慎應給從優卹典尋命復其所降級賜祭葬諡清獻

于成龍

于成龍漢軍鑲黃旗人聖祖仁皇帝康熙七年由廕生授直隸樂亭知縣八年署灤州知州以罪囚脫逃降調樂亭民列其善政叩闕籲留部議保留疊經飭禁械爲首者繫獄九年二月縣民再叩闕下巡撫金世德察奏所列善政皆實復縣任十三年六月以緝盜逾限未全獲應降調金世德奏言樂亭舊號疲邑成龍撫綏調劑與民相宜可否留任部議不准得旨于成龍撫綏疲邑與民相宜其留任十八年擢通州知州二十一年直隸巡撫于成龍遷兩江總督疏薦其可大用尋又請敕廷臣推清操久著與相類者爲江寧知府上卽擢成龍任之二十三年十月上南巡至江寧傳諭曰朕在京師聞爾居官廉潔今臨幸此地確加咨訪與所聞無異用錫親書手卷以嘉爾清操十一月擢安徽按察使駕還京賜其父原任參領于得水貂裘獎其教子有方又諭八旗都統侍郎諸臣有子弟官外者各貽書訓勉效成龍之潔己愛民二十二年三月擢直隸巡撫瀕行賜銀千兩表裏二十端諭詢畿輔重地利弊應興革者宜何先成龍奏弭盜爲先奸惡之徒倚仗旗下名色窩藏匪類有司明知而莫敢深究嗣後有如此者臣當執法治之旣抵任疏

言弭盜之方在力行保甲今民間已申飭遵行惟旗下莊屯向不屬州縣管轄本旗統領官遠在京城僅有撥什庫在屯未能約束今應令旗人與民戶同編保甲以撥什庫與鄉長互相稽察無論盜所刦之家是旗是民俱協力救護能擒獲者賞給如窩盜縱盜許州縣官詰訊申報又疏言燕山六衛所轄遼闊與州縣不相統屬遇有賊盜止責汛弁緝拿而衛員漠不關心此賊盜所以充斥也請嗣後以衛地近州者歸州近縣者歸縣則保甲易編匪類易察京東之通州西之盧溝橋南之黃村北之沙河宜設捕盜同知四員分駐其地自守備以下分汛各官徼巡墩臺諸務及旗下莊屯悉歸稽察則武弁有所顧忌旗人亦受約束矣疏並下部議行先後察究武清易州等處怙惡不悛之旗人請旨寘諸法又疏言順德廣平大名等府額解狐皮花絨芝蔴運送費多恐借端苛派請改解折色又言河工歲修派夫應令旗地與民地一體計畝均役下部議格於例並得旨如所請行二十六年四月上以于成龍廉能稱職誠心愛民特旨嘉獎加太子少保十月巡行畿甸賜鞍馬並銀千兩十二月詔同山西巡撫馬齊往鞫湖廣巡撫張汧貪款得實論罪如律二十七年三月回任初成龍任安徽按察使靳輔爲河道總督大治淮

黃隄壩上以其未能兼顧下河敕成龍督理之遇事得自陳奏成龍請濬海口故道靳輔請於下河築長隄束水注海上詔詢籍隸淮揚諸臣奏宜從成龍請工部尙書薩穆哈奉命往問居民還奏百姓僉謂濬海口無益大學士九卿議未決成龍遷巡撫以待郎孫在豐督理下河靳輔奏開中河以便漕運又請於高家堰外增築重隄束水北出清口則下河不濬自治上以疏示成龍成龍奏下河宜濬重隄不宜築開中河無益反爲民累上允靳輔開中河遣尙書佛倫侍郎熊一瀟同總督董訥總漕慕天顏會勘增築重隄事佛倫等還奏宜從靳輔請慕天顏孫在豐御史郭琇相繼劾靳輔與屯累民靳輔亦劾慕天顏孫在豐附和成龍朋謀阻撓至是成龍自湖廣還詔同靳輔入對靳輔言開濬海口有海水倒灌之患成龍奏若築高家堰重隄縱上流之水不來而秋霖暴漲天長六合等處之水洩歸何處故海口仍應開濬上罷靳輔任以福建總督王新命代之別遣部臣代孫在豐五月學士開音布侍衛馬武閱中河還奏商賈舟行不絕漕運可通又劾慕天顏前此禁止堵塞支河勒令已進中河漕運退回有意阻撓命逮慕天顏翰問得成龍寄書令勿順從靳輔狀議削成龍太子少保降二級調用得旨留巡撫任二十

八年正月從上閱河同侍郎徐廷璽往視下河還奏申場河已興工挑濬自丁谿場至白駒場有通海之處三陷子竈上又有歸入丁谿之馮家壩小河宜加挑濬俾河堦之水由丁谿入苦水洋從之是年畿輔旱詔發帑金三十萬兩賑濟成龍疏言兵丁仰借月糧今歲米豆騰貴請加給折色之半又言旗下莊屯貧戶及未成災州縣貧民請酌議賑恤又言長蘆鹽引前以軍興需餉加增有壅積未銷者請豁免征課並得旨俞允二十九年正月以部推井陘道甘文煥久不赴任奏薦湖廣知府武廷适戴夢熊王輔請簡補諭責以收羅別省官員之心破壞定例不准行七月疏請增設通州昌平順義等州縣及榆林土木等驛馬匹大名府通判二員移一員駐古北口管理驛務移密雲縣丞駐石匣腰站並下部議從之是年內陞左都御史兼鑲紅旗漢軍都統三十一年二月王新命爲山東巡撫佛倫劾罷靳輔仍復任十二月靳輔卒成龍任河道總督三十二年五月疏言靳輔令河員領帑購買柳束工部駁減銀一萬八千兩今覆覈並無虛冒又言靳輔興築高家堰重隄豫給夫役銀四萬四千餘兩王新命一再題銷工部以非例飭追實因向來募夫遠方悉給安家路費工完扣抵故無扣給之名此重隄工作中止未經

扣抵今訪察豫給是真無從追繳詔並與豁免三十三年正月奉詔至京疏言運河自通州天津至山東嶧縣卑薄各隄宜加築高厚武清八百戶等處宜增建月隄黃河自滎澤縣至江南礪山縣卑薄各隄均宜加築高堰六壩周橋大壩永安西隄均宜改建石工其毛城鋪等處舊有引河宜疏濬深通檀度寺東隄及茆家圍等處挑挖引河卽以所挖之土築增兩岸東水子隄徐州城石岸急應大修清江浦迤下至黃浦東西兩隄揚州屬江都東隄高郵西隄俱需加築並修葺閘壩涵洞又疏言河防各設專員並無顧此失彼之虞天津道有地方職掌應增設兩道一駐河西務一駐倉州分管北自通州南至德州河務江南河工錢糧向分廳庫收支不屬淮徐淮揚兩道職掌應增設河庫道桃源同知現駐南岸應增北岸同知一邳睢同知宿虹同知現皆駐北岸應增南岸通判各一山陽清河舊設同知一應增一員分管兩縣毛城鋪閘壩緊要徐屬同知難以兼顧應增通判一駐礪山縣又疏言河工所費繁多非開捐例不可但銀數太多則無力者裹足不前徒有開例之名仍無濟工之實今仿陝西賑饑事例酌量增減另行條列庶幾援納者衆工程得及時興舉尋命同九卿科道入諭詢捐納無累百姓否于成龍奏

可保無累上曰前所行捐納事例或因軍需孔亟或因拯救災民銀米不能卽至其地爲一時權宜之計至修理河工錢糧並非難於措處豈可遽行捐納捐納之人豈盡殷實大約稱貸者多不朘削百姓則逋負何由而償且居要津者不給銀而虛冒捐納亦復不少陝西所捐銀兩現今多有虧空朕從寬未究是皆有司不能擯絕情面囑託所致若不取償於百姓何以補其缺額如此而云無累百姓可乎成龍奏皇上憂勞百姓屢發帑金百餘萬賑濟陝西且次第蠲免各省錢糧動至數百萬臣愚拙無知因河工費用浩繁請開捐納茲蒙聖諭切指情弊臣冒昧陳奏之罪奚辭上曰爾向日議河工事曾面奏減水壩宜塞不宜開今果可塞乎成龍奏曰臣彼時妄言今亦照靳輔而行上命大學士以成龍所奏令九卿詳議尙書薩穆哈等議河道大修歲修理應陸續題請今成龍以數千里工程欲一時盡行興舉因請添設道員同知通判等官又條列捐例凡革職年老患疾休致之人及布政使大員概許捐復俱未協事宜懷私妄奏應革職得旨從寬留任仍興舉簡要各工七月疏言洪澤一湖密近淮城爲淮睢二水所匯歸伏秋水發波濤澎湃僅恃高堰土隄雖加築堅固仍須歲修搶修急宜改建石工所有六壩及自

小黃莊起至古溝東涵洞止共估工料銀五十萬兩有奇疏下部議從之三十四年八月以督理河務勤勞復原職旋丁父憂回京奏山陽縣龍王閘修造尙遲五空橋及檀度寺應建閘通運高堰石工應開武家墩及楊家廟等壩運料事並下新任總河董安國卽行三十五年二月上親征噶爾丹統師由中路進先期以待郎王國昌督運撫遠大將軍費揚古西路軍糧成龍以左都御史銜同侍郎李鈞左通政喀拜督運中路軍糧兵丁各裹糧八十日八十日外給以成龍所運四月成龍詣格德爾庫御營奏運正項米一萬九千石多賚八千石遵旨酌留各驛五月丙辰朔駕次拖稜成龍奏直隸第一運至第六運已過第十五站格德爾庫地山東省第一運已過第十二站蘇勒圖地詔以後運之六七千石留拖稜備旋師之用癸亥駕至克魯倫河噶爾丹驚竄上率前鋒軍追之五月至拖諾山計軍糧日期將滿而成龍所運未至乃以內大臣馬思喀爲平北大將軍率輕騎裹二十日糧追剿止留扈從御營兵糧七日戊辰西路軍大敗噶爾丹於昭莫多上旋師至拖稜成龍始至命留駐散給諸路軍糧六月遵旨移駐察罕諾爾收貯科圖等處餘糧八月事竣還京九月上巡幸北塞察視軍情命成龍偕李鈞喀拜先赴歸

化城督理糧務十月駕至歸化城諭曰爾等前此遲誤罪在不赦今許爾等效力自贖成龍因與李鈞喀拜王國昌等各自備駝數十以供輓運又自備駝馬車輛運呼坦和朔倉米一千五百石至喀喇穆倫復助馬塘站十一月駕過鄂爾多斯之哲固斯臺將旋蹕命成龍與李鈞等分駐各站辦事十二月還京三十六年正月詔再親征噶爾丹成龍請從效力命同王國昌李鈞等先往寧夏督運軍糧奏請以旗員及情願效力人分管押運派鄂爾多斯兵牽駝負載並以理藩院司員隨行上皆允所請召問何日起行成龍奏俟效力人員同行諭戒前者因待衆遲誤毋再瞻顧他人致已獲罪閏三月自寧夏用船起運牽馬駝至第十站白塔接運從陸駕過白塔二十五里駐營七日大將軍費揚古偵報噶爾丹竄死上旋蹕成龍奉詔督運三之一赴費揚古軍餘留貯所至各站尋又運回諸路餘糧於船站貯用乃還詔免議遲運前罪仍議敘如部議加四級復特予騎都尉世職三十七年二月命以總督銜管直隸巡撫事三月興修永清固安至張協七十里舊隄挑濬渾河淤沙十旬竣工詔錫名永定河建廟以祀奏設南北岸兩分司一以重責成視黃運兩河之例敕部擇諳練河務之候補候選人員赴工效用七月疏言

贊皇縣地處重山界連三省久爲賊藪近遵恩諭勸導自新已相率歸誠而防緝不可無兵應設馬兵四百以守備千總各一把總二轄之又言固關舊設馬步兵七百餘名曠經裁汰抽調止存三之一應移王家坪裁存馬兵九十名隸固關參將增設千總把總各一疏下部並從之十一月疏言駐防滄州滿洲官兵三百二十六員名歲需粟米七千二百八十餘石從前截漕支給近因部議不准截漕以本州額徵粟米撥給僅得其半餘皆採買鄰封市價低昂無定運費贏縮無常每誤二八兩月支放之期請自明年仍循舊例截漕支給爲便疏下戶部不准特旨如所請行是月董安國以不諳河務罷任仍授成龍河道總督諭大學士九卿曰于成龍屢委以事尙克勉效河工須相機料理所與敕書可入各部不得掣肘語三十八年三月上巡閱高家堰歸仁隄等處以增築疏濬事宜諭令籌辦五月疏言黃運兩河舊派徐州屬邑民夫六千九百餘名助河兵供役率以老弱充數且多逃曠請按派夫舊額改令每名徵銀五兩爲添設河兵月糧又疏言皇上親視河工指授方略大爲修治臣以需帑浩繁請許急公人員捐修蒙諭如果修築堅固疏濬深通告成之日自有議敘仰見聖心寸功必酬現在應修之處不一若不

酌定成例恐效力人員觀望不前謹條列計丈議敘各款疏並下九卿議行九月以疾乞假命在任調理三十九年三月卒遺疏至得旨于成龍才品兼優服官勤慎屢經簡任實心辦事不辭勞瘁宣力有年歷著成效前因患病遣醫前往診視方期痊可茲聞溘逝深爲軫悼下部優卹賜祭葬如例諡曰襄勤子永世襲騎都尉世宗憲皇帝雍正八年以成龍入祀賢良祠

姚啟聖子儀

姚啟聖浙江會稽人順治十六年附族人籍隸鑲紅旗漢軍由康熙二年舉人授廣東香山知縣八年以擅開海禁罷任十三年逆藩耿精忠據福建叛遣賊衆陷浙江温州府城及台處二府屬縣聖祖仁皇帝命康親王傑書統師進討啟聖捐資募兵赴軍前效力委署諸暨縣同守備黃河清剿平紫瑯山土賊十四年正月康親王疏陳啟聖勞績得旨授浙江溫處道隨都統拉哈達剿平松陽宣平二縣十五年八月同副都統沃申總兵陳世凱剿賊石塘焚其木城斬獲甚衆乘勝復雲和縣十月康親王進征福建耿精忠降尋以啟聖爲福建布政使時海敵鄭錦踞漳泉興化大軍進剿啟聖籌備甲冑弓矢及戰馬以備軍用十七年五月總督

耶廷佐奏啟聖自攜兵千餘令其子姚儀統領隨大軍剿擊屢著捷功其繕兵購馬製械先後用銀五萬餘兩皆出己貲得旨嘉獎尋擢福建總督值敵陷海澄長泰同安惠安平和等縣啟聖條上十疏一請調福寧鎮兵會同八旗兵及浙江提標兵剿敵泉州調衢州贛州潮州三路兵剿敵漳州一酌給投誠官兵俸餉以安反側一願自捐糧米增募督標兵五千一薦舉浙江賢能文武官二十員請令赴閩調遣一增價糴穀一萬石米五千石貯備軍食一分兵防守要路設站運餉一請復設漳浦同安兩鎮總兵官一閩省經制兵舊有五萬一千七百餘名請增設一萬八千名俟亂平裁撤一嚴禁管兵官以厮役冒占兵額一申明臨陣勝敗賞罰格以振軍心疏下議政王大臣等詳議惟衢贛潮三路兵皆在要地未便調閩又既增督標兵毋庸再廣通省經制額餘並如所請行七月啟聖同海澄公黃芳泰遣兵由永福進復平和及漳平二縣九月敵帥劉國軒等犯漳州啟聖同將軍賚塔都統沃申等率兵進剿大破之於蜈蚣山復長泰縣敍功晉正一品階復遣其子儀率兵抵同安敵棄城遁追斬偽副將林欽等十月啟聖同副都統吉勒塔布提督楊捷等敗劉國軒於江東橋又敗之於潮溝十八年正月劉國軒糾黨吳

淑何佑等踞郭塘歐溪頭欲斷江東橋以犯長泰啟聖同賚塔楊捷及巡撫吳興祚等遣兵邀擊大破之先後招降僞官四百餘員羽衆一萬四千餘名五月劉國軒吳淑等率衆萬餘謀奪江東橋榴山寨啟聖同賚塔石調聲擊敗之至太平橋潮溝殺敵千餘十九年二月同賚塔楊捷石調聲等督兵攻復海澄縣時提督萬正色先克海壇啟聖同賚塔及總兵趙得壽黃大來等分兵七路並進破敵十九寨又別遣將弁乘潮渡海克取金門廈門招降僞將軍朱天貴楊彪等是年秋恢復長泰等縣敘功晉兵部尙書太子太保二十年四月左都御史徐元文疏劾之曰啟聖自爲香山縣知縣穢蹟彰聞革職提問永不敘用祇以逆孽變亂子身戎行遂冒軍功驟致節鉞正當殫力竭忠以報恩遇不謂素性乖張舉措輕妄以虛詞爲實事以乾沒爲己貲其言欺罔無據其心險側不平臣請略舉數端有大可駭者大臣官員侵占民利煌煌嚴禁而啟聖前者妄請借司庫銀十二萬兩經營取息可駭者一啟聖自陳疏稱家無片瓦而以臣所聞啟聖揮霍金錢不異泥沙題報軍前捐銀十五萬兩有奇此銀不從天降不由地出謂非剋軍餉賸民膏臣不信也可駭者二閩省民困已極啟聖不能加意存撫乃拆毀民居築園亭水閣

日役千人舞女歌兒充物房闈又強取長泰縣鄉紳戴璣孫女爲妾委其兄戴法署教官物議沸騰可駭者三海壇進師啟聖力爲阻撓一則曰不敢輕舉喪師辱國一則曰不敢以封疆爲兒戲及恢復海壇繼取金門廈門又言當直取臺灣其始則欲養寇其繼又欲窮兵可駭者四啟聖有卒數萬與海壇萬餘之賊相持三載不能成功乃欲令水師提督統新降之衆遠涉波濤以圖萬一之僥倖繼因詞窮理屈卽自請出師漫無佈置始爲是語以塞人口可駭者五吳興祚萬正色平海奏功啟聖心懷慚妒跪向侍郎溫岱云正色密遣人與僞都督朱天貴約定投誠隨讓海壇而去其言尤爲不根海壇賊遁之後朱天貴尙爾狂逞啟聖疏云廈門雖經恢復而朱天貴實爲後患則所云讓去者顯係妄造臣不知啟聖何心與驅除海逆者作難如此可駭者六總兵封疆大吏乃因欲行讒譖長跪部臣之前失大臣體可駭者七兵部據啟聖之言以爲興祚等冒濫軍功賴皇上聖明洞鑒萬里令卽行議敘自此勞臣吐氣人心莫不鼓舞克海賊者既有功則妒功者自應有罪總之啟聖恣睢放誕險詐欺誣委以封疆甚非八閩蒼生之福乞敕部確察嚴議以爲人臣詭譎行私者戒疏入命啟聖回奏尋奏言臣於康熙十七年十

月進兵至鳳凰山因一時投誠者甚多犒賞不繼與撫臣吳興祚議及外省貿易頗有微息前督臣李率泰經略臣洪承疇曾借帑爲之遂冒昧上疏未蒙俞允臣等雖因公起見然不應以瑣事上瀆宸聰臣自入仕京中未有產業而軍前捐銀十五萬有奇者香山革職後貿易七年頗積微貲併臣浙江祖業變價及親朋借貸經年累月而後有此數臣視師漳南於康熙十七年七月巡邊至省見總督衙門被耿精忠屯僞官兵居住以致拆毀倒塌臣因捐貲修整每日所用匠夫不過數十名各給口糧工價柵外有員役搭蓋小房令其自行拆去至臣妾數人俱有子女年已老大並無歌兒舞女強取戴璣孫女更無其事教官戴法乃前督臣郎廷相批委者臣到任時戴法已署事八月矣康熙十八年十一月臣有密陳進剿機宜清字一疏請水陸各分五路進兵內稱轉盼來春南風一起船隻難行又須坐守一年徒費錢糧臣彼時尙爾踴躍豈至次年輒肯遲滯且撫臣一經拜疏出師臣卽會同將軍楊捷親領弁兵進攻島嶼海倉併十九寨上下夾攻以分賊勢至得廈門之後卽攻臺灣臣先於十八年九月有密陳一統規模清字一疏云前得廈門棄而不守亦不再攻臺灣將船隻盡燬以致海上未靖我兵無船可用今

託皇上洪福如得廈門之後卽進擊臺灣不難破卵覆巢是臣欲攻臺灣始終如一非既得廈門方請宜取臺灣也及十七年九月臣等大敗敵衆於蜈蚣山實因兵單不能分取海澄觀音山等處至十月中催各路官兵到漳而彼已深溝高壘矣平南將軍臣賚塔撫臣吳興祚提臣楊捷及臣等會商若止於陸路進兵斷難必勝決須水陸夾攻臣百端籌畫不敢輕舉貽誤封疆審有可取之機方敢上疏自請督師始爲是言也侍郎臣溫岱入奏之言臣得之朱天貴天貴六月到漳招撫投誠之說天貴言之而臣始知之總之撫臣提臣拜疏出師則平賊之首功已定臣何所容其慚妒乎溫岱曾云總督提督俱要和衷臣因望闕跪誓不肯負恩豈跪部臣乎總之臣任閩三載雖無妒功之心實有溺職之罪伏祈敕部嚴加議處另簡賢能庶臣心安而臣心白矣疏入報聞下部知之二十一年二月敘恢復海澄克取金門廈門功予騎都尉世職加一雲騎尉時鄭錦已死子克塽仍其僞爵稱延平王凡事皆決之劉國軒等遣人賚書願稱臣入貢不薙髮登岸如琉球高麗例啟聖以奏上不許諭趣水師提督施琅進征二十二年六月施琅擊敗其衆取澎湖八月啟聖至澎湖經理糧餉是月施琅定臺灣鄭克塽劉國軒等皆降

513251
文科

啟聖還福州十一月卒年六十明年九月部議啟聖修理船隻軍械浮冒帑金四萬七千兩有奇應追繳上以啟聖素著勞績免之子姚儀初以捐納知縣從征福建康親王以遊擊委用同安之捷啟聖奏其督戰有功下部議敘以員外郎用選郎中應出為知府命仍以京官用議應授五品京堂上以儀才幹素優且願以武職自效改都督僉事以總兵官用二十二年正月授江南狼山總兵官至是襲職歷杭州沅州鶴麗總兵三十四年十月擢鑲紅旗漢軍副都統明年卒賜祭葬如例子法祖襲職

清史列傳卷八終